


U d'of OTTAWA



39003003458212

APR 28 1970



CE

Digitized by the Internet Archive  
in 2010 with funding from  
University of Ottawa



# MELUSINE

PQ

1103

. B5J4

1854



## PRÉFACE.

**L**e roman de Melusine est un des plus intéressants de l'époque ancienne. Le style en est simple, souvent naïf, et, dans plusieurs passages, il ne manque pas d'une certaine élévation. Les noces de Raimondin présentent un tableau qui a de la majesté ; les instructions données par Mélusine à deux de ses enfants, Urian et Guion, au moment où ils vont porter secours au roi de Chypre, assiégé par le soudan de Damas, sont d'un esprit juste et droit. Les regrets de Geoffroy à la Grant Dent, lorsqu'il a brûlé l'abbaye de Maillières, et fait périr son frère Froimond avec les autres moines ; ceux de Raimondin lors du départ de Mélusine, sont rendus d'une manière touchante. L'on ne peut lire cet ouvrage sans être attendri sur le sort de Mélusine, et l'on regrette cette pauvre serpente, si malheureuse de quitter son mari, ses enfants, les lieux où elle était aimée et honorée, et obligée de subir sa pénitence jusqu'au jour du jugement.

La légende de Mélusine a été pendant bien longtemps très populaire en France, et particulière-

*ment dans le Poitou, contrée où, suivant la Vraie Chronique, se sont passés les faits qui lui ont donné tant de célébrité. Si l'histoire de Mélusine s'est un peu effacée de la mémoire du peuple, du moins n'en est il pas ainsi de son nom, car il est peu de localités où l'on ne se serve encore de cette locution devenue proverbiale : Faire des cris de Melusine, ou de Merlusine.*

*Sans doute il en est de la légende de Mélusine comme de la plupart des autres légendes : elle a un fond historique. Nous n'avons pas l'intention d'examiner ici si Mélusine est bien Mélisende, veuve d'un roi de Jérusalem, comme on peut l'inférer de l'Histoire des Croisades de Guillaume de Tyr, ou bien encore Eustache Chabot, dame de Vouvant et de Mervant, femme de Geoffroy de Lusignan, ainsi que l'ont prétendu MM. de Sainte-Hermine et Charles Arnaud, d'après le bénédictin dom Fonteneau. C'est une question dont nous laissons la solution à de plus doctes que nous. Notre seul but a été de donner une nouvelle édition de l'ouvrage de Jean d'Arras.*

*La Melusine, réimprimée tant de fois, est devenue si rare qu'il est à peu près impossible de s'en procurer un exemplaire d'une bonne édition, et que les mauvaises éditions tronquées, imprimées à Troyes, chez la veuve Oudot, se vendent des prix très élevés, et encore en rencontre-t-on fort peu souvent.*

*Les diverses éditions du roman de Melusine diffèrent notablement entre elles. Nous avons dû rechercher le meilleur texte, et notre choix s'est arrêté sur celui de l'édition « imprimée par maistre Steinschaber, natif de Suinfurt, en la noble cité de*

Genève, l'an de grâce 1478, au mois d'aoust », *in-fol. gothique, avec des figures en bois.*

Notre savant homonyme s'exprime ainsi sur cette édition, dans son Manuel du Libraire : « Voici une » édition fort précieuse, et la première, sans doute, » de ce célèbre roman. Elle a été précédemment attribuée à Mathis Husz, imprimeur à Lyon vers » 1480, d'après l'exemplaire de la bibliothèque » Royale, dans lequel il manque le feuillet où doit » se trouver la souscription ci-dessus, et qui fait » partie de l'exemplaire complet appartenant à la » bibliothèque de Wolfenbützel. »

Nous ajouterons que l'édition de 1478 contient le plus ancien texte connu, et qu'elle renferme une partie des prouesses de Geoffroy à la Grant Dent, qui ne se trouvent pas dans toutes les autres éditions.

On y trouve encore, quoique pour ainsi dire détachée du roman, l'aventure du château de l'E-pervier, gardé par Mélior, seconde sœur de Mélusine; mais l'auteur ne parle pas de la troisième sœur, Palestine, condamnée par sa mère Pressine à rester enclose dans la montagne de Guigo pour y garder le trésor du roi Elinas, son père, jusqu'à ce qu'un chevalier de la lignée vienne la délivrer et gagner ce trésor, qui doit aider à conquérir la terre de promission. Nous avons vainement cherché cet épisode dans les diverses éditions et dans les manuscrits de Mélusine qu'il nous a été donné de consulter. Nous n'en avons trouvé qu'une relation imparfaite dans les manuscrits 630, 98<sup>6</sup>, et 2782, supplément 53, fonds La Vallière (Bibliothèque de la rue de Richelieu), qui contiennent le roman de Mélusine, mis en vers par un nommé Coudrette.

D'après cette relation, un chevalier anglais fait

*des prodiges de valeur pour conquérir le trésor, mais il succombe dans son entreprise parcequ'il n'est pas de la lignée : Godefroy à la Grant Dent, qui apprend cette aventure, veut entreprendre la conquête du trésor, mais, déjà âgé, il tombe malade et meurt.*

*Le livre imprimé par Steinschaber est rempli de fautes typographiques : nous avons tâché de les faire disparaître. Nous avons, en outre, ponctué et accentué l'ouvrage, qui, sans cette addition, serait parfois difficile à comprendre. Mais nous avons poussé le respect du texte jusqu'à conserver l'orthographe de certains mots écrits de diverses manières, bien que nous eussions pu, sans scrupule, considérer ces orthographes différentes comme des erreurs de typographie.*

*Sauf les corrections que nous venons d'indiquer, la nouvelle édition est la reproduction exacte du texte de celle de 1478.*



# MELUSINE

---

**E**n toutes œuvres commencer on doit toute premierement appeller le nom du createur des creatures, qui est vray maistre de toutes choses faictes et à faire qui doibvent aucunement tendre à perfection de bien. Pour ce, au commencement de ceste histoire presente, combien que je ne soye pas digne de la requérir, supplie très devotement à sa haulte digne majesté que ceste presente histoire me aide à achever et parfaire à sa gloire et louange, et au plaisir de mon treshault puissant et doubté seigneur Jehan, filz du roy de France, duc de Berry et d'Auvergne; laquelle histoire j'ay commencé selon les vraies croniques que j'ay heues comme de luy et du conte de Salebri en Angleterre, et pluseurs autres livres qu'ils ont cherchez pour ce faire; et pour ce que sa noble seur Marie, fille de Jehan, roy de France, duchesse de Bar, avoit supplié à mon dit seigneur d'avoir ladicte histoire; lequel, en faveur

de ce , a tant fait à son povoir qu'il a sceu au plus prez de la pure verité , et m'a commandé de faire le traictié de l'histoire qui ci aprez s'ensuyt ; et moy, comme cuer diligent, de mon povre sens et povoir, en ay fait veritablement au plus prez que j'ay peu. Si prie devotement à mon createur que monseigneur le vueille prendre en gré , et aussi tous ceulx qui l'orront lire, et que ils me vueillent pardonner se j'ay dit aulcunes choses qu'ilz ne soient à leur bon gré. Et commençay ceste histoire presente à mettre aprez le mercredi devant la saint Clement en yver, l'an de grace mil trois cens quatre vingz et sept. Et aussi supplie à tous qui la liront et orront lire que ils me pardonnent mes faultes se aulcunes en y a , car certainement je l'ay traicté le plus justement que j'ay peu, selon les croniques que je cuide certainement estre vrayes.







*Comment ce livre fut faict par le commandement de Jehan, filz du roy de France, duc de Berry et d'Auvergne.*

**D**avid le prophète dit que les jugemens et les pugnitions de Dieu sont comme abimes sans fons et sans ripve ; et n'est pas saige qui telles choses cuide comprendre en son engin , et cuide que les merveilles qui sont par l'universel monde sont les plus vraies, si, comme on dit des choses que on appelle faées et comme est de pluseurs aultres choses, nous n'avons pas la cognoissance de toutes. Or adonques la creature ne se doibt pas travailler par outrageuse presumption, que le jugement de Dieu vueille comprendre en son entendement, mais doibt-on, en pensant soy esmerveiller de celuy, et en soy merveillant, considérer comment elle puisse dignement et dévotement louer et glorifier celuy qui tellement juge et ordonne de telles choses à son plaisir et vouloir sans contredit.

La creature de Dieu qui est raisonnable doibt

moult songneusement entendre, selon que dit Aristote, que les choses qu'il a fait ça bas et créés, par la présence qu'elles ont en elles, certifient estre telles qu'elles sont. Si comme dit saint Pol en l'epistre qu'il fist aux Rommains en disant en ceste manière que les choses qu'il a faictes seront sceues et veues par la creature du monde, c'est assavoir par les hommes qui sçavent lire les livres, et adjoustent foy aux acteurs qui ont esté devant nous, quant à congnoistre et sçavoir les pays, les provinces et les estranges contrées, les diverses terres et royaumes visiter, ont trouvé de tant de diverses merveilles selon commune estimation et si tresnoble, que l'umain entendement est contraint de Dieu que ainsi qu'il est sans ripve ne sans fons. Et ainsi sont les choses merveilleuses en tant de divers pays, selon les diverses natures qui saulve leur jugement. Je cuide que oncques homme se Adam n'eut parfaicte congnoissance des choses invisibles de Dieu; pour quoy me pense de jour en jour prouffiter en science et en ouyr et veoir pluseurs choses que on ne croit estre veritables; lesquelles se elles le sont en ces termes cy je vous metz en avant, pour les grans merveilles qui sont contenues en ceste presente histoire, dont je vous pense atraicter au plaisir de Dieu et au commandement de mondit trespuissant et noble seigneur.

Laissons à present les acteurs en paix, et retournons veritablement à ce que nous avons ouy dire et racompter à nos anciens, et que cestuy jour nous avons ouy dire que du pais de Poetou on y a veu de fait, pour coulourer nostre histoire à estre vraie comme nous le tenons, et de la demonstrier et publier par les vraies croniques nous l'entendons. Nous avons oy racompter à nos anciens que en pluseurs parties

sont apparus à plusieurs tresfamilièrement plusieurs manieres de choses, lesquelles les ungz appeloient luytons, les autres faées, et les aultres bonnes dames, et vont de nuyt et entrent es maisons sans huys rompre et ouvrir, et ostent et emportent aucunesfois les enfans des berceaux, et aucunesfois ilz leur destournent leur memoire, et aucunesfois ilz les brulent au feu. Et quant ilz s'enpartent ilz les laissent aussi sains comme devant; et aucuns donnent grant heur en cestuy monde; et encore dit iceluy Gervaise que aucunes aultres fantaisies s'aparent de nuyt à plusieurs, en divers lieux, en guise de femme à face ridée, de basse et petite stature, et font tantost les bessours de nuyt es hostelz liberalement, et ne faisoient aucun mal. Et aussi dit que pour certain il avoit en son temps ung ancien amy qui estoit viel homme qui racomptoit pour verité qu'il avoit veu en son temps plusieurs fois de telles choses. Et dit encore ledit Gervaise que les dites faées se mettoient en guise de tresbelles femmes, et en ont eu aucunes fois plusieurs hommes aucunes pensées, et ont prins à femmes moiennant aucunes convenances qu'ilz leur faisoient jurer; les ungz qu'ilz ne verroient jamais l'ung l'autre; que le samedi ilz ne les enqueroient que elles seroient devenues en aucunes manieres; les autres que se elles avoient enfans, que leurs maris ne les verroient jamais en leurs gessines. Tant qu'ilz leur tenoient leur convenance, ilz estoient en audience et prosperité, et si tost qu'ilz defaillioient en celle convenance, ilz decheoient de tout leur bonheur. Et ces choses advenues d'avoir enfreint leurs convenances, les aultres se convertissoient en serpens en plusieurs jours. Et plus dit ledit Gervaise qu'il croit que ce soit pour aucuns meffais

estre fais en la desplaisance de Dieu, pour quoy il les pugnît si secretement et si merueilleusement, dont nul n'a parfaitement congnoissance, fors luy tant seulement. Et pour ce compte, il dit les secrez de Dieu abismes sans fons et sans ripve; car nul parfaitement ne scet riens au regard de luy, combien que aulcune fois de sa provision sont toutes choses sceues, non pas par ung seul, mais par pluseurs. Or voit-on souvent que quant l'omme n'aura issu de sa contrée, non obstant qu'il ait veu de merveilleuses choses veritables qui sont prez de ses contrées et regions, que pourtant jamais ne voudroit croire pour le dire ne ouyr se de fait ne le veoit; mais quant de moy qui n'ay esté guaires loing ay veu des choses que pluseurs ne pourroient croire se ils ne le veoient. Avec ce dit ledit Gervaise et met exemple d'ung chevalier nommé messire Rocher du chasteau Roussel, en la province d'Acy, qui trouva d'aventure sur le serain une faée en une prairie, et la vouloit avoir à femme; et de fait elle si consentit par telle convenance que jamais il ne la verroit nue; et furent long temps ensamble, et cressoit le chevalier de jour en jour en prosperité. Or advint grant temps aprez que il vouloit veoir la dicte faée, et tant que ladicte faée bouta sa teste dedens l'eau, et devint serpent; et oncques puy ne fut veue. Et depuis le chevalier de jour en jour peu à peu commença à decliner de toutes ses prosperitez et de toutes choses. Je ne vous veulx plus faire de proverbes ne d'exemples; et ce que j'en ay fait si est pour ce que je entens à traicter comme la noble forteresse de Lusignen fut fondée par une faée, et la maniere comment, selon la juste cronique et vraie histoire, sans appliquer nulle chose quelconque qui ne soit veritable et juste et de la propre matere. Et me orrez dire de la noble

lignée qui en est issue, qui regnera toujours jusques à la fin du monde, selon ce qu'il appert qu'elle a toujours regné jusques à présent. Mais pour ce que j'ay premierement commencé à traicter des faées, je vous diray dont celle faée vint qui fonda la noble place et forteresse de Lusignen dessusdit.

---

Cy après s'ensuyvent les noms et les estas des enfans qui furent au mariage de Raimondin et de Melusine. Et premierement en saillit le roy Urian qui regna en Chippre, et le roy Guion qui regna moult puissamment en Armenie; item le roy Regnauld qui regna moult puissamment en Behaigne; item Anthoine qui fut duc de Lucembourg; item Raimond qui fut conte de Foretz; item Geuffroy au Grant Dent qui fut seigneur de Lusignen; item en saillit Thieri qui fut seigneur de Parthenay; item Froimond qui fut moynne de Maillières, lequel Geuffroy au Grant Dent ardit l'abbaye et l'abbé avecq cent religieulx.

Il est vray qu'il y eut ung roy en Albanie qui fut moult vaillant homme, et dist l'istoire qu'il eut de sa première femme pluseurs enfans, dont dist l'istoire que Mathathas, qui fut pere de Florimont, qui fut son premier filz, et ce roy eut nom Elinas, et fut moult puissant et preus chevalier de la main. Et advint que, après le trespas de sa femme, il chassoit en une forest prez de la marine, en laquelle avoit une moult belle fontaine, et en ung mouvement prinst si grant soif au roi Thiaus de boire de l'eaue, et adonc tourna

son chemin vers ladicte fontaine, et quant il approucha la fontaine, il ouyt une voix qui chantoit si melodieusement qu'il ne cuida pas pour vray que ce ne fut voix angelique; mais il entendit assez pour la grand doulceur de la voix que c'estoit voix de femme. Adonc descendit de dessus son cheveu, affin qu'il ne fist trop grant effroy, et l'atacha à une branche et s'en alla peu à peu vers la fontaine le plus couuertement qu'il peut; et quant il approucha la fontaine, il vit la plus belle dame que il eut oncques veue en jour de sa vie, à son advis. Lors s'en arresta tout esbahi de la beaulté qu'il appercevoit en celle dame qui tousjours chantoit si melodieusement que oncques seraine ne chanta si melodieusement ne si doulcement; et ainsi il s'arresta tant pour la beaulté de la dame que pour sa doulce voix et son chant, et se mucha le mieulx qu'il peut dessoubz les feuilles des arbres, affin que la dame ne l'apperceut, et oubliatoute la chasse et la soif qu'il avoit par avant, et commença à penser au chant et à la beaulté de la dame, tellement qu'il fut ravy et ne sceut se il estoit jour ou nuyt, et ne sçavoit s'il dormoit ou veilloit.

Ainsi que vous pourrez ouyr fut le roy Elinas si abusé tant du tresdoulx chant comme de la beaulté de la dame, que il ne sçavoit se il dormoit ou s'il veilloit; car tousjours chantoit si melodieusement que c'estoit une melodieuse chose à oyr. Adonc le roy Thiaus fut si abusé qu'il ne luy souvenoit de nulle chose du monde, fors tant seullement qu'il oyoit et veoit ladicte dame, et demoura là grant temps; lors vindrent deux de ses chiens courans qui luy firent grant feste, et il tressaillit comme ung homme qui vient de dormir, et adoncques lui souvint de la chasse et si grant soif que, sans avoir advis ne mesure,

il s'en alla sur le bort de la fontaine et print le bassin qui pendoit sur laditte fontaine et beut de l'eau ; et lors regarda la dame qui eut laissé le chanter, et la salua treshumblement en luy portant le plus grand honneur qu'il peut. Adonc elle, qui sçavoit moult de bien et d'honneur, lui respondit moult gracieusement. Dame, dist le roy Thiaus, par vostre courtoisie ne vous vueille desplaire se je vous ay requis de vostre estat et de vostre estre et qui vous estes ; car la cause qui à ce me meut elle est telle que je vous diray. Treschière dame, plaise vous sçavoir que je sçay et congnois tant de l'estre de cestuy pays et d'environ, que de quatre à cinq lieues n'y a nul meschant chasteau ne forteresse que je ne sache, excepté celle dont huy matin m'en suys parti, qui est environ à deux lieues d'icy, et que je ne congnoisses les seigneurs et dames, et quieulx ilz sont, et pour ce je m'esmerveille dont une si belle et si gente dame comme vous estes peut estre venue si despourveue de compaignie ; et pour Dieu pardonnez-moy, car c'est à moi grant oultraige de l'enquerre ; mais le grand desir m'a enhardy et donné couraige de ainsi le faire.

Syre chevalier, dist la dame, il n'y a point d'oultraige, mais vient de grant courtoisie et honneur ; et sachiez, sire chevalier, que je ne seray pas longuement seule quant il me plaira ; mais j'en ay envoyé où je me devoie comme vous avez ouy. Lors vient à ce parler ung varlet bien abillié monté sur ung grant courcier, et menoit en destre ung palefroy se richement enharnacié que le roy Elinas fut moult esbahi du noble atour et de la richesse que il vit entour ledit palefroy, et dist en soy mesmes qu'il n'avoit oncques veu si riche palefroy ne atour.



Adoncques le varlet dist à la dame : Madame, il est temps de vous en venir quant il vous plaira ; et elle prestement va dire : De par Dieu ; puis dist au roy : Sire chevalier, à Dieu vous comment, et grant mercis de vostre courtoisie. Adoncques elle s'en alla au palefroy pour monter, et le roy s'avanca et lui aida à monter moult doucement ; et elle le mercia et s'enpartist ; et le roy vint à son cheveu et monta. Lors vindrent ses gens qui le querroient, et luy disdrent qu'ilz avoient pris le cerf, et le roy leur dist : Ce me plaist. Lors commença à penser en la beaulté de la dame, et la print si fort à amer qu'il ne sceut quelle contenance prendre, et dist à ses gens : Allez vous-en devant, je vous suivray tantost ; et s'en allèrent, et bien apperceurent que le roy avoit trouvé quelque chose. Et à tant s'en departirent de luy, car ilz ne luy osèrent contredire ; et adonc le roy tourne le frain de son cheveu, et s'en alla aprez tout hastivement par le chemin qu'il avoit veu la dame aller.

L'ystoire nous racompte que tant suyvit le roy Elinas la dame, qu'il la trouva en une forestz où il y avoit grant foison d'arbres haultz et drois ; et estoit en la saison que le temps est doulx et gracieux ; et le lieu de la forestz estoit moult delectable. Et quant la dame ouyt le fray du cheveu du roy Elinas qui venoit grant erre, elle dist à son varlet : Arrestons-nous et attendons ce chevalier, car je crois qu'il nous vient dire une partie de sa voullenté dont il n'estoit pas pour lors advisé ; car nous l'avons veu monter fort pensif. Dame, dist le varlet, à vostre plaisir. A tant vint le roy qu'il arriva d'encoste la dame comme se il ne l'avoit oncques veue, et la salua moult effreement, car il estoit si surpris de



s'amour qu'il ne sçavoit nulle contenance faire. Adoncques la dame, qui congneut assez que c'estoit et qu'il adviendroit à son entreprise, luy dit : Roy Elinas, que vas-tu querant aprez moy si hastivement ? Emporté-je riens du tien ? Et quant le roy se ouyt nommer, il fut moult esbahi, car il ne congnoissoit point celle qui parloit à luy ; et neantmoins il luy respondit : Ma chièrre dame, du mien n'emportez riens, fors tant seullement que vous passez parmy mon pays, et est grant vilonnie à moy, puy que vous estes estrangière, que je ne vous passe moult honnourablement parmy mon pays, ce que je feroie moult volentiers se je fusse en lieu propice pour ce faire. Adoncques, respondit la dame, roy Elinas, je vous tiens pour excusé, et vous prie que se vous ne nous voulez aultre chose, que vous ne laissez ja de vous en retourner pour ceste cause. Lors respondit le roy : aultre chose je quiers, dame. Et quoy, dist-elle, dictes-le-moy hardiement. Ma treschièrre dame, puyqu'il vous plait, je vous le diray. Je desire tant que nulle chose du monde à avoir vostre bonne amour et vostre bonne grace. Par ma foy, dist-elle, roy Elinas, à ce n'avez-vous riens failly ; mais que vous n'y pensez que tout honneur, car ja homme n'aura m'amour en sa ventance. Ha, ma trèschièrre dame, je ne pense en nul cas deshoneste. Adoncques vit la dame qu'il estoit empris de son amour ; et luy dist : Se me voulez prendre en femme par foy, par la foy de mariage, ensemble que vous ne mettrez ja paine de me veoir en ma gessine, ne ne ferez par voie quelconque que vous m'y voiez ; et se ainsi le voulez faire, je suys celle qui obeiray à vous ainsi comme femme doit obeir à son mari. Lors le roy luy va jurer : ainsi le

vous feray-je. Sans long parlement ilz furent espousez et menèrent longuement bonne vie ensemble. Mais le pays du roy Elinas estoit moult esbahi que celle dame estoit, combien qu'elle gouvernoit bien à droit saignement et vaillamment. Mais Nathas, qui estoit filz du roy Elinas, la haioit trop. Si advint qu'elle fut en gessine de trois filles, et les porta bien et gracieusement son temps, et les delivra au jour qu'il appartenoit. La première née eut nom Melusine; la seconde Melior; et la tierce Palatine. Le roy Elinas n'estoit pas lors présent en ce lieu, et le roi Nathas y estoit, et regarda ces trois seurs qui estoient si belles que c'estoit merveilles. Adoncques il s'en alla par devers le roy son père et luy dist ainsi : Sire, ma dame la royne Pressine vostre femme vous a porté les trois plus belles filles qui oncques furent veues; venez les veoir. Adoncques le roy Elinas, auquel ne souvenoit de la promesse qu'il avoit faicte à Pressine sa femme, dit : beau filz, si feray-je, et s'en vint apertement et entra en la chambre où Pressine baignoit ses trois filles. Et quant il les vit il dist en ceste manière : Dieu benoit la mère et les filles, et eut moult grant joye. Et quant Pressine l'ouyt, elle luy respondit : Faulx roy, tu as failly ton convenant, dont moult grant mal il vous viendra, et m'as perdue à toujoursmais; et sçay bien que c'est pour ton filz Nathas, et me fault partir de vous soudainement, mais encore seray-je vengée de vostre filz par ma seur et compaignie madame de l'Isle-Perdue; et ces choses dictes print ses trois filles et s'en alla à tout icelles, et oncques puis ne fut veue au pays.

L'istoire nous dit que quant le roy Elinas eut perdu Pressine sa femme et ses trois filles, qu'il fut si esbahi qu'il ne sceut que faire ne que dire;

mais fut par l'espace de sept ans qu'il ne faisoit que se plaindre , et gemir , et soupirer , et faire tous-jours griefs plains et piteuses lamentations pour l'amour de Pressine sa femme qu'il amoit de leal amour ; et disoit le peuple de son pays qu'il estoit asoté ; de fait ilz donnèrent le gouvernement à son filz Nathas, qui se gouverna vaillamment et tint son père en grant charité. Adoncques les barons d'Albanie luy donnèrent à femme une gentyfemme qui estoit dame Dicris ; et de ces deux issist Florimont dont dessus est faicte mention , qui depuys moult grant paine prenoit et traveillait. Toutesfois nostre histoire n'est pas entreprise pour luy , et pour ce nous nous en taisons sans plus parler , et retournerons à nostre histoire.

L'histoire dit que quand Pressine s'en partist à tout ses trois filles , elle s'en alla en Avalon , nommée l'Isle-Perdue , pour ce que nul homme , tant y eut esté de foy , n'y saroit jamais rassener , sinon de grant adventure ; et illec nourrit ses trois filles jusques en l'aage de quinze ans , et les menoit tous les matins sur une montaigne haulte , laquelle estoit nommée , comme l'istoire dit et racompte , Elinéos , qui vault à dire en françoys autant comme montaigne florie ; car de là elle veoit assez la terre de Ybernies ; et puy disoit à ses trois filles , en plourant et en gemissant : Mes filles , veés là le pays où fustes nées et où eussiez eu vostre bien et honneur se ne fut le dommaige de vostre père , qui vous et moy a mis en griefve misère sans fin jusques au jour du jugement de Dieu qui pugnira les mauvais et exaucera les bons en leurs vertus.

Melusine , la premiere fille , luy demanda : Quelle faulceté vous a fait nostre père pour quoy avons ceste

griefveté? Adoncques la dame leur commenca à raconter toute la manière du fait ainsi comme vous avez ouy raconter par avant. Et lors quant Melusine eut ouy sa mère raconter le faict, elle remist sa mère en aultres parolles en luy demandant l'ettre du pays, les noms des villes et des chasteaux d'Albanie; et en racontant ces choses, elles descendirent ensamble de la montaigne, et s'en revindrent en l'isle d'Avalon. Et adonc Melusine tira à part ses deux seurs, c'est assavoir Melior et Palatine, et leur dist en ceste manière: Mes chières seurs, or regardons la misère où nostre père a mis nostre mère et nous, qui eussions esté en si grant aise et si grant honneur en nostre vie; que vous est il advis qu'il en soit bon de faire? car quant de moy je m'en pense vengier; et ainsi que petit solas a impétre a nostre mère par sa faulceté, aussi peu de joye lui pensé-je faire. Adoncques les deux seurs luy respondirent en ceste manière: Vous estes nostre aînée seur, nous vous suivrons et obeirons en tout ce que vous en voudrez faire et ordonner. Et Melusine leur dist: Vous monstrez bonne amour et d'estre bonnes filles et leales à nostre mère, car par ma foy c'est très-bien dit. Et j'ay advisé s'il vous semble bon que nous l'enclorons en la haulte montaigne de Northumbelande nommée Brumbelioys, et en celle misère sera toute sa vie. Ma seur, dist lors chascune, or nous delivrons de ce faire, car nous avons grant désir que nostre mère soit vengée de la desleauté que nostre père luy a fait. Adoncques firent tant les trois filles que par leur faulce condition elles prendrent leur père et l'enclouirent en ladicte montaigne. Et après que ce fut fait, elles revindrent à leur mère, et lui disdrent en telle manière: Mère, ne

vous doibt challoir de la desleaulté que nostre père vous a fait, car il en a son paiement; car jamais ne iscera ne partira de la montaigne de Brumbelioys où nous l'avons enclos; et là il usera sa vie et son temps en grant douleur. Ha, ha, va dire adoncques leur mère Pressine, comment l'avez osé faire, mauvaises filles et dures de cuer? vous avez tresmal fait quant celluy qui vous a engendrées vous avez ainsi pugni par vostre orgueilleux couraige; car c'estoit celluy où je prenoie toute la plaisance que j'avoie en ce mortel monde, et vous me l'avez tolu. Si sachiez que je vous pugniray bien du merite selon la desserte. Toy, Melusine, qui es la plus ancienne, et qui de toutes deusse estre la plus congnoissant, et tout ce est venu par toy, car je sçay bien que ceste chartre a esté donnée par toy à ton père, et pour ce tu en seras la première pugnée; car non obstant la verité du germe de ton père, toy et tes seurs eut attrait avec soy, et eussiez bien briefment esté hors des mains de l'aventure de japhes et des faées, sans y retourner jamais; et desoresmais je te donne le don que tu seras tous les samedis serpent des le nombril en abas, mais se tu trouvez homme qui te vueille prendre en espouse, et qu'il te promette que jamais le samedi ne te verra ne descclera ne revelera ou dira à personne quelconques, tu vivras ton cours naturel et morras comme femme naturelle, et de toy viendra moult noble lignée qui sera grande et de haulte proesse; et par adventure si tu estoies decellée de ton mary, sachiez que tu retourneroyes au tourment auquel tu estoies par avant, et seras tousjours sans fin jusques à tant que le tres-hault juge tiendra son jugement, et toy apperras par trois jours devant la fortesse que tu feras et que tu

nommeras de ton nom, quant elle devra muer seigneur; et par le cas pareil aussi quant ung homme de ta lignée devra morir. Et tu, Melior, je te donne en la grant Arménie ung chastel bel et riche où tu garderas un esparvier jusques à tant que le maistre tiendra son jugement; et tous nobles chevaliers de noble lignée qui y voudront aller veillier la surveillance, la veille, le xx jour de juing sans sommeiller, auront ung don de toy des choses que on peut avoir corporellement, c'est assavoir des choses terriennes; sans point demander ton corps ne t'amour pour mariage ne aultrement; et tous ceulx qui te voudront demander sans eulx vouloir deporter, seront infortunez jusques à la neufiesme lignée, et seront dechassez de tout en tout de leurs prosperitez. Et tu, Palatine, seras enclose en la montaigne de Guigo à tout le trésor de ton père, jusques à tant que ung chevalier viendra de vostre lignee, lequel aura tout celui tresor et en aidera à conquerre la terre de promesse et te delivrera de là. Adoncques furent ces trois filles moult doulentes, et atant s'en departirent de leur mère. Et s'en alla Melusine parmy la grand forest et bocage; Melior aussi se departit, et s'en alla au chasteau de Lesprevier en la grand Arménie; et Palatine aussi s'en partit pour aller en la montaigne de Guigo où pluseurs luy ont veüe, et moy de mes oreilles le ouy dire au roy d'Arragon et à pluseurs aultres de son pays et de son royaume. Et ne vous veuille desplaire se je vous ay ceste adventure racomptée, car c'est pour plus adjouster de foy et verifier l'istoire où desorenavant je vueil entrer en la matière de la vraye histoire. Mais avant je vous diray comment le roy Elinas fina ses jours en cest siecle, et comment Pressine sa femme l'ensep-



velist dedens la dicte montaigne en ung moult noble sercueil, comme vous orrez cy aprez.

Long temps fut le roy Elinas en la montaigne, et tant que la mort qui tous affine le prinst. Adonques vint Pressine sa femme et l'ensepvelist en une si noble tombe, que nul ne vit oncques si noble ne si riche; et avoit en la chambre tant de richesses que c'estoit sans comparison. Et y sont candelabres d'or, et y a pierres precieuses, et aussi torches et chandeliers et lampes qui y ardent nuyt et jour; et au piet de la tombe mist une image de albastre de son hault et de sa figure, si belle que plus ne pourroit estre; et tenoit la dicte image un tablier doré auquel l'adventure dessusdicte estoit escripte; et là establit ung gayant qui gardoit celluy image, lequel gayant estoit moult fier et horrible, et tout le pays tenoit en subjection et patis; et aussi le tindrent après luy plusieurs gayans, jusques à la venue de Geuffroy à la grant dent; de quoy vous orrez cy aprez parler. Or avez ouy parler du roy Elinas et de Pressine sa femme; si vous vueil doresnavant commencer la verité et l'histoire des merveilles du noble chasteau de Lusignen en Poitou, et pour quoy et par quelle maniere il fut fondé.

L'histoire nous racompte qu'il y eut jadis en la brute Bretagne ung noble homme, lequel eut riot avecq le nepveu du roy des Bretons; et de fait il n'osa plus demourer au pays, mais prist tot sa finance et s'en alla hors du pays par les haultes forestz et les haultes montaignes; et si, comme racompte l'histoire, il trouva ung jour sur une fontaine une belle dame qui lui dist toute son adventure, et finalement ilz s'amourèrent l'ung de l'autre, et lui fist la dame moult de confort, et commencèrent en leur pays,

qui estoit désert, bastir et fonder pluseurs villes et fortresses et grans habitations; et fut le pays en brief temps assez bien peuplé; et appellèrent le pays Forestz, pour ce qu'ilz le trouvèrent plain de bocages; et encores au jourduy est appelée. Or advint que entre le chevalier et la dame eut discort, je ne sçay pas bonnement comment ne pourquoy; elle se departist tousoudainement d'avec luy, dont le chevalier fut moult doulent, et non obstant ce il croissait tousjours en grant honneur et en grant prospérité. Or advint que les nobles de son pays le pourveurent d'une gentille dame qui estoit seur au conte de Poitiers qui regnoit pour le temps, et eut d'elle plusieurs enfans masles, entre lesquieulx il en y eut ung, c'est assavoir le tiers, qui fut appelé Raimondin, qui estoit bel, gent et gracieux, et moult actentif, soubtil et intellectif en toutes choses, et en icelluy temps ledit Ramondin povoit avoir xiiii ans.

---

*Comment le conte de Poitiers manda le conte de Forestz de venir à la feste qu'il faisoit pour son filz.*

**L**e conte de Poitiers tint une moult grand feste pour ung filz que il avoit et vouloit faire chevalier, et n'avoit que celluy et une moult belle fille qui fut nommée en son propre nom Blanche; et le filz estoit appelé Bertrand. Adoncques le conte Emery manda moult belle compaignie pour l'amour de la chevalerie de son filz; et entre les autres manda au conte de Fo-



restz qu'il venist à la feste, et qu'il amenast trois de ses enfans les plus aagés, car il les vouloit veoir. Adoncques le conte de Forestz alla à son mandement le plus honnourablement qu'il peut, et y mena trois de ses enfans. La feste fut moult grande, et d'icelle furent faitz pluseurs chevaliers pour l'amour de Bertrand, filz du conte de Poitiers, qui fut fait chevalier; et aussi fut fait le aisé du conte de Forestz, et il josta moult bel et bien; et fut la feste continuée par huit jours, et fist le conte de Poitiers moult beaulx dons.

---

*Comment le conte de Poitiers demanda au conte de Forestz d'avoir Raimondin, lequel luy accorda.*

**E**t au departir de la feste le conte de Poitiers demanda au conte de Forestz qu'il lui laissast Raimondin son nepveu, et qu'il ne luy chaussist jamais de luy, car il le pourvoiroit bien. Et le conte luy ottoia; et demoura ledit Raimondin avec le conte de Poitiers son oncle, qui bien l'ama; et aussi s'en partist la feste moult honnourablement et amoureusement. Et cy s'en taist l'istoire de parler du conte de Forestz qui s'en alla luy et ses deux enfans et toute sa compagnie qu'il avoit amené avec luy, et commence nostre histoire à proceder avant et à parler du conte Aimery et de Raimondin.

L'istoire nous certiffie, et aussi les aultres vrayes croniques, que celluy conte Aimery fut grant père saint Guillanen qui fust conte et delaisa possessions mondaines pour servir nostre createur, et se mist en

l'ordre et religion des Blancs-Manteaulx ; et de ce ne vous veulz-je faire grand location , mais veulz procéder avant en nostre histoire et parler du conte Aimery et de nostre vraie histoire et matère. Et l'histoire nous dit que celluy conte fut merueilleusement vaillant chevalier , et qu'il aima toujours noblesse , et fut le plus saige en astronomie qui fust en son temps né depuys Aristote. En celluy temps que le conte Aimery regna , l'histoire nous monstre que de moult de sciences estoit plain , et specialement de la science d'astronomie , comme j'ay dessus dit ; et sachiez que il aimoit tant Raimondin que plus ne poyoit , et aussi faisoit l'enfant luy , et s'efforçoit moult de servir le conte son oncle , et de luy faire plaisir en toutes manières. Or est bien vray que le conte avoit moult de chiens , oyseaux , braches , levriers , chiens courans et limiers braconniers , oyseaulx de proye et chiens de grosse chasse de toute manières. Advint , si comme l'histoire dit , que l'ung des forestiers vint denoncier que en la forest de Colombiers avoit le plus merueilleux porc que on eust de longtemps veu , et que ce doibt estre le plus beau deduit que on eut pieça veu. Par ma foy , dist le conte , il me plaist bien ; faictes que les veneurs et les chiens soient prestz demain , et nous irons à la chasse. Monseigneur , dist le forestier , à vostre plaisir ; et tout ainsi s'en partist du conte , et apresta tout ce qu'il apartenoit à la chasse et pour chasser à l'eure qu'il avoit ordonnée.

---

*Comment le conte alla chasser, et Raimondin avecques luy.*

**E**t quand le jour fut venu, le conte Aimery se partist de Poitiers, et avec luy grand foison de barons et de chevaliers ; et estoit Raimondin au plus prez de luy, monté sur ung grant courcier, l'espée çainte et l'espieu sur le col. Et eulx venus en la forest, tantost encommençèrent à chasser, et fut trouvé le porc, qui estoit fier et orgueilleux, et devoura pluseurs allans et levriers, et prinst son cours parmy la forest, car il estoit fort eschauffé ; et on commença à le sievre grant erre ; mais le porc ne doubtoit riens, mais se mouvoit en tel estat qu'il n'y avoit si hardi chien ne levrier qui l'osast attendre, ne se hardi veneur qui l'osast enfermer. Adonques vindrent chevaliers et escuiers, mais il n'y avoit nul si hardi qui osast mettre piet en terre pour l'enfermer. Adonc vint le conte, qui cria à haulte voix en disant : Et comment, ce filz de truye nous esbahira-il tant que nous sommes ? Lors quant Raimondin ouyt ainsi parler son oncle, si eut grant vergongne, et descent de dessus le courcier à terre, l'espée au poing, et s'en alla vistement vers le porc, et le ferit ung coup par grand hayne, et le porc se tire à luy et le fist cheoir à genoulx ; mais tantost il ressaulte comme preus et hardi et vite, et le cuida enfermer ; mais le porc s'enfuyt et commença à courir par telle manière qu'il n'y eut oncques chevalier ne chien qui n'y perdit la veue et la trasse, fors seullement le conte et Raimondin son neveu, qui estoit remonté et le suivoit si asprement devant le conte et les aul-

tres que le conte en avoit tresgrant paour que le porc ne l'afolast, et lui cria à haulte voix : Beau nepveu, laisse ceste chasse ; que maudit soit celluy qui le nous annonça ; car se ce filz de truye vous affolle jamais je n'auray joye en mon cuer. Mais Raimondin, qui estoit eschauffé, ne reputoit pas sa vie, ne fortune bonne ne mauvaise qui lui advint, le suyvoit toujours moult asprement, car il estoit bien monté ; et tousjours le suyvoit le conte à traces qu'il avoit veues. Que vous vauldroit de ce tenir long parler ? Tous les chevaux commencèrent à eschauffer et à demourer derrière, fors seulement le conte et Raimondin ; et tant chassèrent qu'il fut obscure nuyt. Adoncques s'arrestèrent le conte et Raimondin soubz ung grant arbre ; lors va dire le conte à Raimondin : Beau nepveu, nous demourerons icy jusques la lune soit levée. Et Raimondin lui va dire : Sire, ce qu'il vous plaira. Adoncques il descendit et prist son fusil et fist du feu. Et tantost aprez, leva la lune belle et clère, et aussi les estoilles luy sans et clères. Adoncques le conte, qui scavoit moult de l'art d'astronomie, regarda au ciel, et vit les estoilles clères et l'air, puy la lune qui estoit moult belle, sans tache, ne nulle obscurété quelconques. Et adoncques commença à soupirer moult parfondement, et aprez les grans et aigres souspirs qu'il avoit faictz et jettez il disoit en ceste manière : Ha, ha, vray Dieu sire, comment sont grandes les merveilles que tu as laissé cha jus de congnoistre parfaictement les vertus et les natures merveilleuses de plusieurs et diverses conditions de choses et de leur expédition ; ce ne pourroit estre parfaictement se tu n'espandoies aulcunement ton sçavoir de ta plainiere et divine grace, et especialement de ceste merveil-

leuse aventure que je voy cy presentement ès estoilles que tu as là sus assises pour ta haulte science d'astronomie, dont, vray sire, tu m'as presté une des branches de congnoissance, de quoy je te doibs loer, mercier et gracier du cuer parfait en ta haulte majesté où nul ne se peut comparer. O vray et hault sire, comment pourroit-ce estre raisonnablement se ce n'estoit en ton horrible jugement, quant à congnoissance humaine, car nul homme ne pourroit avoir bien pour mal faire, et non obstant je vois bien par la haulte science et aussi de ta sainte grace qui m'as presté la congnoissance de sçavoir que c'est, et aussi dont je suys moult esmerveillé; commença à sospirer plus parfondement que devant. Adoncqes Raimondin, qui avoit alumé le feu et qui avoit ouy en partie ce que le conte Aimery avoit dit, luy dist en ceste manière : Monseigneur, le feu est bien alumé; venez vous eschauffer, et je croy que en peu de temps viendront aulcunes nouvelles, car je croy que la venason soit prise; j'ay ouy, ce me semble, bruit de chiens. Par ma foy, dit le conte, il ne m'en est de gaires plus, mais que de ce que je voy; et lors regarda au ciel et sospira plus fort que devant; et Raimondin qui tant l'amoit lui dist : Ha, ha, monseigneur, pour Dieu, laissez la chose ester, car il n'appartient pas à si haut prince comme vous estes à mettre cuer de enquerre de tels ars ne de telles choses; car il convient, et sera bien fait, de remercier Dieu qui vous a porveu de si hault et si noble seignourie et possessions terriennes dont vous vous en pouvez bien passer se il vous plaist, mais de vous y donner couroux ne ennuy pour telles choses qui ne vous peuvent aidier ne nuyre, c'est simplesse à vous. Ha, ha, fol, dist le conte, si tu sçavoies les grans

richesses et merveilleuses adventures que je vois , tu en seroies tout esbahi. Adoncques Raimondin , qui ne pensoit à nul mal , respondit en ceste manière : Mon treschier et doubté seigneur , plaise vous de le me dire , se c'est chose qui se puisse faire , et aussi se c'est chose que je puisse ou doibve sçavoir. Par Dieu , dist le conte , tu le sçauras , et je voudrois que Dieu , le monde , ne aultre , ne t'en demandast riens et l'adventure te deut advenir de moy mesmes ; car je suys desormais vieul et ay des amis assez pour tenir mes seigneuries ; et je t'aime tant que je voudrois que si grant honneur fut eschu pour toy ; et l'adventure si est telle que se à ceste heure ung subject occisoit son seigneur , que il deviendroit le plus puissant et le plus honnouré que oncques saillist de son lignage ; et de luy procederoit si noble lignée qu'il en seroit mention et ramembrance jusques en la fin du monde ; et sachiez de certain qu'il est vray. Lors respondist Raimondin qu'il ne pourroit jamais croire que ce fut chose veritable , et contre raison seroit que homme eut bien pour mal faire , ne pour impétrer telle mortelle traison. Or le croy fermement , dist le conte à Raimondin , que il est ainsi vray comme je te le dis. Par ma foy , dist Raimondin , si ne le croiray-je ja , car ce n'est chose que vous me faciez croire ; et lors commencèrent à penser moult fort , et adonc oirent au long du bois ung grant effray et derompre les menus ramonceaulx. Adoncques prist Raimondin son espée qui estoit à terre , et aussi le conte tret son espée , et attendirent ainsi en pensant longtemps pour sçavoir que c'estoit ; et se mirent au devant du feu du costé où ilz ouyrent les rames rompre ; et en tel estat demourèrent tant qu'ilz virent ung porc sanglier mer-

veilleux et horrible, moult eschauffé, tout droit à eulx menant les dens. Adoncques va dire Raimondin : Monseigneur, montez sus quelque arbre, que ce sanglier ne vous face mal, et m'en laissez convenir. Par ma foy, dist le conte, j'à ne plaise à Nostre Seigneur que je te laisse à telle aventure ; et quand Raimondin ouy ce, il s'en va mettre au devant du sanglier, l'espée au poing, par bonne volenté de le destruire, et le sanglier se destourna de luy et alla vers le conte. Adonc commence la douleur de Raimondin et le grant heur qui depuys luy advint de ceste tristesse, si comme la vraie histoire le nous racompte.

---

*Comment Raimondin occist le comte de Poitiers,  
son oncle.*

**E**n ceste partie racompte l'istoire que quant Raimondin vint à l'encontre du sanglier pour le destourner qu'il ne venist sur son seigneur, si tost que le sanglier l'aperceut, il se destourna de sa voie, et s'en va venir vers le conte grant erre ; et quant il le vit venir, si regarda devers soy, et vit ung espieu, et bouta son espée au fourrel, et prinst l'espieu et le baisse. Et adoncques va venir le sanglier à luy, et le conte, qui scavoit moult de la chasse, le va enferrer en les-cu de la pointe de l'espieu qui tant fut aguë ; mais le cuir du sanglier vira le conte à terre à genoux ; et adoncques vint Raimondin courant, en empoignant l'espée, et cuida ferir le sanglier entre les quatre jambes, et le sanglier estoit cheu à revers, du



coup que le conte luy avoit donné; et adoncques ataint Raimondin le sanglier du tranchant de l'espieu sur les soyes du dos, car il venoit de grant radeur, et la lumelle de l'espieu eschappa par dessus le dos du porc, et adonc vint le coup et ataint le conte, qui estoit versé d'autre part à genoux, parmy le nombril, et le persa de part en part parmy le dos. Ce fait, Raimondin fiert le porc tellement qu'il le mist à terre tout mort, et puy vint au conte et le cuida soubzlever; ce fut pour neant, car il estoit jà tout mort. Adoncques quant Raimondin apperceut la plaie et le sang en saillir, il fut moult merveilleusement couroucé, et commença à crier en plourant et gemissant moult fort et le regarder et plaindre, en faisant les plus grans lamentations que oncques vit homme jour de vie, en disant ainsi : Ha, ha, faulce fortune, comment es-tu perverse que tu m'as fait occire celluy qui parfaitement m'aimoit et qui tant de bien m'avoit fait? he, he, Dieu, père tout puissant, où sera ores le pays où ce faulx et dur pecheur se pourra tenir; car certes tous ceulx qui orront parler de ceste mesprison me jugeront, et à bon droit, de mourir de honteuse mort; car plus faulce ne plus mauvaise traison ne fist pecheur. Ha, terre, ouvre toy et m'englouti, et me metz avec le plus obscur ange d'enfer qui jadis fut le plus bel des autres, car je l'ay bien desservi. En ceste douleur et tristesse fut Raimondin par longue espace de temps, et fut moult couroucé et pensif, et se advisa en luy mesmes et dist en ceste manière : Monseigneur qui là gist me disoit que, se une telle adventure me venoit, que je seroie le plus honnouré de mon lignage; mais je voys bien tout le contraire, car veritablement je seray le plus maleureux et deshonnouré; car, par ma



foy, je l'ay moult bien gaigné, et est bien raison. Or non obstant, puy qu'il ne peut aultrement estre, je me destourneray de ce pays, et m'en iray querir mon adventure telle que Dieu la me voudra donner en aucun bon lieu là où je pourray amender mon pechié, se il plait à Dieu. Adoncques vint Raimondin à son seigneur, qui estoit tout mort, et le lascia en plourant de si triste cueur, qu'il ne povoit dire ung seul mot pour tout l'or du monde; et tantost qu'il l'eut baisé, il alla mettre le piet en l'estrier, et monta sur son cheveu, et se partist tenant son chemin au travers de la forest, moult desconforté, chevauchant moult fort, et non sachant quelle part, mais à l'adventure; si grand dueil demenant, qu'il n'est personne au monde qui peut penser ne dire la cinquiesme partie de sa douleur.

Quant Raimondin se partist de son seigneur et l'eut laissé tout mort en la forest auprez du feu, et le sanglier aussi, il chevaucha tant parmy la haulte forest, menant tel dueil que c'estoit piteuse chose à ouyr et à racompter, que il se approucha, environ la minuyt, de une fontaine faée nommée la fontaine de soif; et aucuns aultres du pays la nomment la faée pour ce que pluseurs merveilles y estoient pluseurs fois advenues au temps passé, et estoit la fontaine en ung fier et merveilleux lieu, et y avoit grant roche audessus de celle fontaine, et au loing de celle fontaine avoit belle prarie prez de la haulte forest. Or est bien vray que la lune luysoit toute clère, et le cheveu emportoit Raimondin à son plaisir où il vouloit aller, car advis n'avoit en luy de aucune chose, pour la grand desplaisance qu'il avoit en luy mesmes; et neantmoins qu'il dormoit, son cheveu l'emporta tant en celluy estat, qu'il approu-

cha la fontaine. Et pour lors sur la fontaine avoit trois dames qui là s'esbatoient, entre lesquelles en avoit une qui avoit la plus grant auctorité que les aultres, car elle estoit leur dame; et de ceste vous vueil parler selon que l'istoire racompte.

---

*Comment Raimondin vint à la fontaigne, où il trouva  
Melusine accompagnée de deux dames.*

**L'**istoire dist que tant porta le cheveu Raimondin, ainsi pensif et plein d'ennuy du meschief qui luy estoit advenu, qu'il ne sçavoit où il estoit, ne où il alloit, ne en nulle maniere il ne conduisoit son cheveu, mais alloit à son plaisir, sans ce que il luy tirast point les brides; et Raimondin ne veoit ne entendoit. Et en ce point passa par devant la fontaine où les dames estoient, sans ce qu'il les veist, et de paour que le cheveu eut quant il vit la dame, il eut effroy et emporta Raimondin grant erre. Adoncques elle qui estoit la plus grande dame des aultres dist en ceste maniere : Par foy, celluy qui passe par là samble estre ung moult gentil homme, et toutesfois il ne le monstre pas; mais il monstre qu'il ait de gentil homme rudesse, quant il passe devant dames ainsi sans les saluer; et tout ce disoit par courtoisie, affin que les aultres ne apperceussent ce à quoy elle tenoit; car elle sçavoit bien comment il y estoit, comme vous orrez dire en l'istoire cy aprez. Et adoncques elle va dire aux aultres : Je le vois faire parler, car il me semble qu'il dorme. Lors se partist elle des aultres, et s'en vint à Raimondin et prist le frain du

chevau et l'arresta en disant en ceste maniere : Par ma foy, sire vassal, il vous vient de grant orgueil ou rudesse de ainsi passer par devant dames sans les saluer, combien que orgueil et rudesse peuvent bien estre ensamble en vous. Et à tant se tint la dame, et il ne l'ouyt ne entendit, et ne luy sonnoit mot : et elle, comme moult couroucée, luy dist aultres foyes : Et comment, sire musart, estes-vous si despitieux que vous ne daigneriés respondre à moy ? et encores il ne luy respondist mot. Par ma foy, dist-elle en soy mesmes ainsi, je croy que ce jeune homme dort sur son chevau, ou il est sourt ou muet ; mais je croy que je le feray bien parler se il parla oncques. Adoncques elle prist par la main, et tira moult fort en disant en ceste maniere : Sire vassal, dormez vous ? Lors Raimondin fremist aussi comme ung qui s'esveille en sursault, et mist la main à l'espée comme celluy qui cuidoit fermement que les gens du conte son oncle, qu'il avoit laissé mort en la forest, luy venissent sus ; et adoncques la dame apperceut qu'il estoit en tel estat, et sceut bien qu'il ne l'avoit point encores apperceue, et luy va dire tout en riant : Sire vassal, à qui voulez commencer la bataille ? Vos ennemis ne sont pas cy. Et sachiés, beau sire, que je suys de vostre partie. Et quant Raimondin l'oyt, si la regarda, et apperceut la grant beaulté qui estoit en elle, et s'en donna grant merveille ; car il luy sembla que oncques mès si belle n'eut veue. Adoncques Raimondin sauta de dessus son chevau, et s'encline reveramment en disant : Ma treschière dame, pardonnez moy mon ignorance et vilonnie que j'ay fait envers vous, car certes j'ay trop mespris, et je ne vous avois ouye ne veue quant vous me tirates par la main ; et sachiés que je pensoie

moult fort à ung mien affaire qui moult me touche au cuer; et je prie à Dieu devotement que il me doinct grace et puissance de moy amender en vous, et de saillir hors de ceste peine à mon honneur. Par ma foy, dist la dame, c'est tresbien dit; car à toutes choses commencer on doit toujours appeller le nom de Dieu en son aide, et je vous crois bien que vous ne m'avez ouye ne entendue. Mais, beau sire, où allez-vous à ceste heure? Dictes le moy, se le povez bonnement descouvrir, et se ne sçavez le chemin, je vous aideray bien à le tenir, car il n'y a voie ne sentier que je ne sache bien, et de ce vous fiez en moy hardiement. Par ma foy, dist Raimondin, dame, grans mercis de vostre courtoisie; et sachiés, ma treschière dame, puy qu'il fault que je vous le die, j'ay perdu mon grant chemin par la plus grande partie du jour jusques à maintenant; et encores ne scay-je où je suys. Adoncques elle vit qu'il se celloit fort d'elle, si luy dist la dame : Par Dieu, beaul amy Raimondin, riens ne vous fault celler, car je sçay bien comme il vous va. Adoncques quant Raimondin ouyt qu'elle le nommoit par son propre nom, il fut si esbahi, qu'il ne sceut que respondre; et elle, qui moult bien apperceut qu'il estoit honteux de ce qu'elle sçavoit tant de son secret, luy dist en ceste manière : Par Dieu, Raimondin, je suys celle, aprez Dieu, qui mieulx te puy conseilier et avancer en ceste mortelle vie; et toutes tes malefices et adversitez fault revertir en bien; riens ne te le vault celler, car je sçay bien que tu as occis ton seigneur tant de mesprison comme de cas vouluntaire, combien que pour celle heure tu ne le cuidoies pas faire; et je sçay bien toutes les parolles qu'il te dist par art d'astronomie, dont en son vivant

il estoit bien garny. Quant Raimondin ouyt ce, il fut plus esbahi que devant, et luy dist : Treschière dame, vous me dictes la verité, mais je m'esmerveille comment vous le povez si certainement sçavoir, et qui vous l'a sitost annoncé. Et elle luy respondist en telle manière : Ne t'en esbahi point, car je sçay la plaine verité de ton fait, et ne cuides point que ce soit fantosme ou œuvre diabolique de moy et mes parolles, car je te certiffie, Raimondin, que je suys de par Dieu, et crois comme bon catholique doibt croire ; et sachiez que sans moy et mon conseil tu ne peus venir à fin de ton fait ; mais se tu veulz croire fermement toutes les parolles que ton seigneur te dist, elles te seront moult pourfitables à l'aide de Dieu ; et je dis que je te feray le plus grant seigneur qui fut oncques en ton lignage, et le plus grant terrien de tous eulx. Quant Raimondin entendit la promesse, il lui souvint des parolles de son seigneur qu'il luy avoit dictes, et considera en luy mesmes les grans périlz où il estoit, exillé, mort et dechassé de son pais, où il povoit estre cogneu ; il advisa qu'il se metteroit en l'adventure de croire la dame de ce qu'elle luy diroit ; car il n'avoit à passer que une fois le cruel pas de la mort. Si respondist moult humblement en ceste manière : Ma treschière dame, je vous remercie de la grand promesse que me offrez ; car vueillez sçavoir que ce ne demourera pas par moi à faire ne pour traveil que vous sachez adviser que je ne face vostre plaisir, et tout ce que vous me commanderez, se c'est chose possible à faire, et que crestien puisse ou doibve faire par honneur. Par ma foy, dist la dame, Raimondin, c'est dit d'ung franc cœur ; car je vous diray ne conseilleray chose dont bien ne doibve advenir ; mais avant, dist elle,

il fault tout premièrement que vous me promettés que vous me prendrez tout principalement à femme, et ne faictes quelconques doubte en moy que je ne soye de par Dieu. Et adoncques Raimondin va dire et jurer en ceste manière : Dame, par ma foy, puyz que vous me affermez qu'il est ainsi, je feray à mon pouvoir tout ce que vous voudrez et commanderez, et de fait je vous prometz leaulment que ainsi le feray-je. Or Raimondin, dist-elle, il fault que vous jurez aultre chose. Ma dame, quoy plus ? Je suys tout prestz, se c'est chose que doibve bonnement faire. Oui, dist-elle, et ne vous peut tourner à prejudice, mais à tout bien. Vous me promettez encore, Raimondin, sur tous les sacremens et seremens que ung homme catholique de bonne foy peut faire et doibt jurer, que jamais, tant que seray en vostre compaignie, le jour de samedi vous ne mettrez paine ne vous efforcerez en manière quelconques de me veoir, ne de enquerir le lieu ou je seray. Et quant elle eut ce dit à Raimondin, elle lui va dire en ceste manière : Par le peril de mon ame, je vous jure que jamais en celluy jour ne feray chose qui soit en vostre prejudice, ne qui y puisse estre, mais en tout honneur, et ne feray ne penseray chose fors en quelque manière je pourray mieulx acroistre en valleur vous et vostre lignée. Et Raimondin luy va dire en ceste manière : Ainsi le feray-je, au plaisir de Dieu.

Or, dist la dame, je vous diray comment je vous feray, et ne faictes doubte de chose qui soit, mais allez tout droit à Poitiers, et quant vous y serez, vous trouverez jà pluseurs qui sont venus de la chasse qui vous demanderont nouvelles du conte vostre oncle. Vous direz en ceste manière : Comment, n'est-il pas revenu ? et ilz vous diront que non. Et vous leur di-

rez que vous ne le veistes oncques puyz que la chasse commença à estre forte, et que lors vous le perdistes en la forest de Colombiers, comme pluseurs firent; et vous esbahissez moult fort comme feront les autres. Et assez tost aprez viendront les veneurs et aultres de ses gens qui apporteront le corps tout mort en une litière; et sera advis que la plaie est faicte de la dent du sanglier, et diront tous que le sanglier l'a tué; et encores diront-ilz que le conte aura tué le sanglier et le luy mettront sus, et le tendront à grant vaillance pluseurs. Ainsi la douleur commencera moult grant. Le conte Bertrand, son filz, et Blanche, sa fille, et tous les aultres de sa famille, grans et petits, feront ensamble grant dueil, et vous le ferez avec eulx, et vestirez la robe noire comme les autres. Aprez tout ce que noblement sera fait, et le terme assigné que les barons devront faire hommaige au jeune conte, et quant ces choses seront ainsi faictes et ordonnées, vous retournerez icy à moy parler le jour de devant que les hommaiges se devront faire, et vous me trouverez en ceste propre place. Et ad ce se departirent, qui proprement n'est pas departement. Tenez, mon redoubté amy, pour nous amours ensamble commencer, je vous donne ces deux verges ensamble, desquelles les pierres ont grandes vertus : l'une a que celluy à qui elle sera donnée par amours ne pourra mourir par nul coup d'armes tant qu'il l'aura sur luy; l'autre est qu'elle luy donnera victoire contre ses malveillans, se il se habandonne soit en plaidoirie ou meslée; et tant vous en allez seurement, mon amy. Et lors prist congié de la dame en l'acolant moult doucement, et la baisa moult honnourablement, comme celle en qui il se confioit du tout : car il estoit desjà si sur-



prins de s'amour que tant qu'elle lui disoit, il affermoit estre verité; et il avoit raison, si comme vous orrez cy aprez en l'istoire.

---

*Comment Raimondin, par le conseil de la dame, alla à Poitiers.*

**R**aymondin monta à cheveu, et de fait la dame le mist au droit du chemin de Poitiers; et se departist de la dame, et au departir Raimondin fut moult doulent: car il aimoit jà tant sa compaignie que bien eut tousjours voulu estre avec elle, pour ce que si bon conseil luy avoit donné de sa subtilité. Adoncques en pensant commença moult fort à chevauchier vers Poitiers, et la dame se retourne vers la fontaine où les aultres dames estoient et l'atendoient. Et icy l'istoire d'en parler s'en deporte.

Or dist l'istoire que Raimondin chevaucha tant qu'il fut à Poitiers, où il trouva pluseurs qui estoient retournez de la chasse, les aucuns dès le soir, et les aultres dès le matin, qui luy demandèrent: Où est monseigneur? Comme, dist Ramondin, n'est-il pas venu? et ilz respondirent que non. Et il leur dit: Je ne le vis oncques puy que la forte chasse commença et le sanglier se commença à eslargier des chiens. Et ainsi qu'ilz parloient de cette matère entre eulx ensamble, commencèrent à venir les gens de la chasse, les ungz aprez les aultres, en demandant nouvelle du conte; chascun disoit comme Raimondin. Et disoient aucuns que oncques n'avoient veu si oultrageuse chasse, ne si merveilleux asne de



sanglier estrange qui estoit passé hors de ses repaires. Adoncq chascun s'esmerveilleoit de ce que le conte demouroit tant, et vindrent atendre à la porte pour sçavoir se il venoit, et furent grant temps en l'atendant, et venoient tousjours gens qui disoient comme les aultres, et que ilz estoient toute la nuyt esgarez parmy la forest sans sçavoir congnoissance ne voie. Adoncques ils s'esmerveillèrent moult grandement, et la contesse, qui estoit en la salle de Poetiers; mais tantost furent mieulx courouccz, ainsi que vous oyrez cy aprez.

---

*Comment le conte fut apporté mort à Poetiers.*

**L'**ystoire nous racompte que tant attendirent à la porte ceulx qui estoient avec Raimondin, qu'ilz visdrent approucher ung grant troupeau de gens, et eulx approuchans ilz entendirent moult de piteuses voix qui griefvement se lamentoient, dont ilz furent moult fort esmerveillez. Et adoncques commencerent plusieurs à doubter qu'ilz n'eussent aucun empeschement de leur seigneur, et tant attendirent que ceulx qui apportoint leur seigneur se commencèrent moult fort à escrier et plourer, disans en ceste manière : Plourez, plourez, vestez-vous tous de noir : car ce filz de truye nous a tué nostre bon seigneur le conte Aimery; et aprez le corps venoient deux veneurs qui apportoint le sanglier moult grant à merveilles; et entrèrent en la cité moult grant dueil faisans; et commencèrent moult piteusement à crier : Ha ! ha ! maudit soit celluy de Dieu que ceste chasse anon-

cha , et la commença ; et fut la douleur si grant que oncques homme ne vit greigneur ; et en faisant tel dueil s'en vindrent jusques au palais , et là fut le corps descendu. Et pour ce que on ne doit pas maintenir dueil longuement je m'en passe briefvement. Adoncques la contesse et ses enfans menèrent merueilleusement grant dueil , et aussi firent les barons et les communes du pays ; et sachiez que Raimondin aussi , ainsi comme s'ensuyt.

Raymondin faisoit moult grant dueil plus que nul des autres , et se repentoit de son meffait , que ce ne fut l'esperance du confort que il prenoit de sa dame , il ne se fut peu tenir qu'il ne leur eut dit toute son adventure , pour l'amour de la moult grant contrition que il avoit de la mort de son seigneur. Or ne vous veulz-je pas longuement parler de ceste matère. Tantost lors que ce fut fait moult noblement et richement en l'eglise de Nostre Dame de Poitiers , selon la coustume du temps. Et devez sçavoir que les bonnes gens du pays qui eurent perdu leur seigneur furent moult doulens , et de chaude cole prindrent le sanglier et le portèrent en la place devant l'eglise , et l'ardirent en ung feu , devant l'eglise , que ilz firent de motes de terre. Or il est bien verité qu'il n'est douleur , tant soit angoisseuse , qui ne se adoulicisse sur les trois jours ; et adoncques quant tout ce fut fait , les barons du pays vont moult doucement reconforter la dame et ses deux enfans à leur pouvoir ; et tant firent que la douleur assoulagèrent. Mais la douleur de Raimondin croissoit tousjours de plus en plus , tant pour la cause qui le contrainoit à se repentir du meffait , comme de la grant amour qu'il avoit eue au conte son oncle ; et tant fist le conseil que tous les barons du pays furent man-

dez à ung certain jour pour faire leur hommaige à leur gracieux seigneur, le filz dudit conte jadis, du relevage de leurs terres et de leurs fiez. Et tantost que Raimondin le sceut, il monta à son cheveu, et tout seul saillit de Poitiers, et entra en la forest pour venir tenir son convenant à sa dame.

---

*Comment Raimondin retourna devers sa dame  
et vit une chappelle que oncques  
mais n'avoit veue.*

**L**'istoire nous dit que tant chevaucha Raimondin qu'il vint à Colombiers et trespassa la villette, et se mist sur la montagne et alla tant qu'il apperceut la prairie qui est dessoubz la roche qui estoit audessus de la fontaine de soif, et apperceut ung hostel fait de pierre, en manière d'une chappelle; et sachiés que Raimondin y avoit esté pluseurs fois, mais oncques ne l'avoit veue; et quant il approucha plus prez, il apperceut devant le lieu pluseurs damoiselles, chevaliers et escuiers, qui luy firent grant feste et le loèrent grandement, dont il s'esmerveilla moult fort, car l'ung luy dist : Sire, descendez, et venez par devers ma dame, qui vous attend en son pavillon. Par ma foy, dist Raimondin, ce me plait. Tantost descendit et s'en alla avec eulx, qui le conduirent vers la dame moult honnourablement. Et adonc la dame le prinst par la main et l'amena dedens le pavillon, et se assirent ensemble, main à main, sur une riche couche, et tous les aultres demourèrent dehors. Adonc commença la dame à aresonner Rai-

mondin, et lui dist en ceste maniere : Mon amy, je sçay bien que vous avez bien tenu tout ce que je vous avoie introduit; si en auray desoresmais plus grant fiance en vous. Dame, dist Raimondin, j'ay trouvé si bon commencement en vos parolles, que vous ne me sçaurez chose commander que corps humain puisse ou doibve bonnement comprendre, que je ne vueille faire et entreprendre à vostre plaisir. Raimondin, dist-elle, pour moy ne entreprendrez-vous nulle chose de quoy vous ne venez à bon chief. Adoncques vint ung chevalier qui se agenoilla devant elle et le honnoura moult, et dist en adressant ses parolles à la dame : Ma dame, il est tout prest quant il vous plaira. Et la dame lui respond et dist Couvrez-vous, sire. Et adoncques estoit tout prest et appareillé, si lavèrent et s'assirent, Raimondin et la dame, à une moult riche table; et aval le pavillon avoit grant foison des aultres tables dressées, où avoit moult de honnourables gens assis. Et quant Raimondin vist cet appareil, il fut moult esmerveillé, et demanda à sa dame dont tant de peuple luy estoit venu; et ad ce la dame luy respondist rien; pour quoy Raimondin luy va demander de rechief : Ma dame, dont vous viennent tant de gens et de si belles damoiselles? Par ma foy, dist la dame, Raimondin, mon amy, il n'est pas besoing que vous en donnez merveilles, car ilz sont tous en vostre commandement, et appareillez de vous servir, et moult d'aultres que maintenant vous ne voiés pas. A tant se taist Raimondin, et lors on apporta les metz à si grant habondance que c'estoit merveilles à regarder. Mais de ce ne vous vueil plus long plait faire : car quant ilz eurent disné et les napes furent ostées, ilz lavèrent les mains, et aprez les graces furent dictes

et toutes choses faictes. La dame prinst Raimondin par la main et le mena rasseoir sur la couche, et à tant chascun se retraist là où il leur pleut à retraire, ou que faire le devoient selon leur estat.

Lors dist la dame à Raimondin : Mon amy, à demain est le jour que les barons de Poitiers doibvent faire hommaige au jeune conte Bertrand ; et sachiez, mon amy, que il vous y fault estre et faire ce que je vous diray, s'il vous plaist. Or, entendez et retenez mes parolles. Vous attendrez là tant que tous les barons auront fait leur hommaige ; et lors vous vous trairez avant, et demanderez au jeune conte ung don pour le salaire et remuneration que oncques vous fistes à son père ; et luy dictes bien que vous ne luy demandez ne ville, ne chasteau, ne forresse, ne aultre chose que gaires luy couste. Et sçay bien que il le vous accordera, car les barons luy conseilleront ; et tantost qu'il vous aura accordé vostre requeste, si luy demandez en ceste roche et à l'environ autant de place que ung cuir de cerf peut comprendre et enclorre. Et il vous le donra si franchement que nul ne pourra mettre aulcuns empeschemens pour raison et hommaige de fief, ne par charge de rente ou aultre redevance quelconque. Et quant vous aura ce accordé, si en prenez et faictes tant que vous en avez bonnes chartres et lettres seelées du seel de la dicte conté et des seaulx des pers du pays. Et quant vous aurez tout ce fait, le lendemain, en vous en venant, vous trouverez ung homme portant en ung sac ung cuir de cerf conroïé en allant tout en une pièce moult gentement et sentivement. Et tantost l'achettez tout ce que le vous fera, et puyz faictes ce cuir taillier en une courroie le plus deslié que on le pourra faire bonnement, et puyz

vous faites delivrer vostre place que vous trouverez toute taillée et ordonnée où il me plaira que vostre place se comporte ; et au rapporter les bous ensamble , se la couroie croist , faictes le remener contre val la vallée , et illec souldra une fontaine , où naistrà et courra ung ruissel assez grant , que ung temps advenir aura bien besoing en cestuy pays. Allez et faictes hardiement , mon amy , et ne faictes doubte de riens , car toutes vos besongnes seront bonnes et bien faictes. Et vous retournerez à moy icy le lendemain quant on vous aura delivré vostre don , et en prenez les lettres et chartres. Et adoncques il respondist : Ma dame , je feray à mon povoir tout vostre plaisir. Lors se entrebaisèrent moult doucement et prindrent congié l'un de l'autre. Et à tant se taist l'istoire de plus en parler , et commence à parler de Raimondin , qui monta tantost à cheveu , et s'en alla tirant à Poitiers le plus tost qu'il peut oncques chevaucher.

---

*Comment Raimondin , aprez que les barons eurent fait hommage au jeune conte , luy demanda ung don , lequel luy accorda.*

**L**'istoire nous dist que tant chevaucha Raimondin que il vint à Poitiers , où il trouva de haultz barons grant foison et de contes qui là estoient venus pour faire hommage au nouvel conte Bertrand , qui luy firent moult grant honneur et louèrent moult grandement. Et le lendemain vindrent tous ensamble à Saint-Hilaire de Poitiers , et là firent le service divin moult richement et

honnourablement; et à icelluy service fut le jeune conte en estat de chanoyne comme leur abbé, et y feist son devoir comme il appartenoit et estoit acoustumé. Adonc vindrent les barons qui luy firent hommage; et aprez ces choses faictes se trahit Raimondin avant humblement, et va dire : Entre vous, messeigneurs, nobles barons de la conté de Poitiers, plaise vous entendre la requeste que je vueil faire à monseigneur le conte, et se il vous semble qu'elle soit raisonnable, qu'il vous plaise de luy prier qu'il me la vueille accorder. Et les barons luy respondirent : Tresvoulentiers nous le ferons. Et à tant s'en vindrent tous ensemble devant le conte. Et lors tout premierement Raimondin commença à parler moult advisement, en suppliant et disant en ceste manière : Treschier sire, je vous requiers humblement que en remuneration de tous les services que je fis oncques à vostre père, dont Dieu aye l'ame, qu'il vous plaise de vostre benigne grace à moy donner ung don, lequel ne vous coustera gaires, car rachies, sire, que je ne vous vueil demander ville, chasteau, ne fortresse, ne nulle aultre chose qui gaires vaille. Lors respondist le conte : Se il plaist à mes barons, il me plaist bien. Et adoncques ilz luy disdrent en ceste manière : Sire, puy que ce est chose de si petite value, vous ne luy devez pas refuser, et il le vault bien et l'a bien desservi. Et le conte leur va dire : puy qu'il vous plaist à le me conseiller, je le accorde, et demandez hardiement. Sire, dist Raimondin, grans mercis; sire, je ne vous requiers aultre don fors que vous me donnez au dessus de la fontaine de Soif, ès rochers et aux haultz bois, où il me plaira à prendre, tant de place que ung cuir de cerf se pourra étendre, et aprez la



cloisture de long de tous les esquarris. Par Dieu, dist le conte, je ne le vous doibs pas refuser; je le vous donne, dist le conte, franchement, que vous ne devrez, à moy ne à tous mes successeurs, foy ne hommaige, ne quelconque redevance. Adonc Raimondin se agenoilla et le mercia de ce humblement, et le requist de ce avoir bonnes lettres et chartres, lesquelles luy furent joyeusement accordées et faictes le mieulx que on peut faire et deviser; et furent seellées du grant seel du conte par la relation des douze pers du pays, qui mirent et pendirent leurs seaulx en congnoissance de affermer le don à estre raisonnable, avec ledit grant sel du conte. Adonc se departirent de ladicte eglise de Saint-Hilaire de Poitiers, et vindrent en la salle. Et là fut la feste grande, et y eut moult de seigneurs qui moult noblement furent servis de pluseurs services et de pluseurs metz en celluy jour; et y eut moult grant melodie de son de menestriers et aultres sons de musique. Et donna ledit conte au disner moult de riches dons. Mais il est vray que de tous ceulx qui furent en celle feste on reputoit et disoit que entre les aultres Raimondin estoit le plus gracieux, le plus bel, et de la meilleure contenance, que nul des aultres qui y estoient. Et ainsi se passa la feste jusques à la nuyt, que chascun s'en alla reposer. Et aprez lendemain au matin se levèrent et allèrent ouyr la messe en l'abbaye de Montiers, et là pria Dieu devotement Raimondin qu'il luy pleut aydier à son besoing et à le achever au salut de son ame et au prouffit et salut de son corps, et au prouffit et honneur de toutes les deux parties ce qu'il avoit commencé et entrepris. En faisant ainsi sa requeste à Dieu, il demoura en sa devotion au Montier jusques à l'eure de prime.



*Comment Raimondin trouva ung homme qui portoit  
ung cuir de cerf, et l'achetta.*

**Q**r dist l'istoire que quant Raimondin eut ouy la messe et fait sa devotion, que il saillist hors du moustier neuf, et à l'issue de l'abbaye, au delà du chasteau, il trouva ung homme qui portoit ung cuir de cerf sur son col, qui luy vint à l'encontre et luy dist en ceste maniere : Sire, achetez-vous ce cuir de cerf que j'ay en mon sac, pour faire bonnes cordes chasseresses pour vos veneurs ? Par ma foy, dist Raimondin, ouy, se te veulx ; et que coustera-il, en ung mot, ainsi qu'il est ? Par ma foy, sire, vous en paierez cent soulbz se vous l'avez. Amy, dist Raimondin, apportez le en mon hostel, et je vous paieray. Et il luy respondist : Voulentiers. Adoncques il suyt Raimondin jusques à son hostel et luy bailla le cuir, et il le paia. Et après manda Raimondin ung sellier, et luy dist ainsi : Mon amy, il fault, se il vous plait, que vous me taillez tout ce cuir le plus delié que vous pourrez, en forme d'une courroie qui se entretiengne tant que vous pourrez faire courrir. Et ainsi le fist le sellier ; et luy le mirent arriere au sac ainsi taillé. Que feroye plus long prolongation ? Il est vray que ceulx qui commis estoient à luy faire la delivrance de son don se departirent de Poitiers, et Raimondin avecques eulx ; et tant chevauchèrent ensamble qu'ilz vindrent sur la montaigne qui estoit au dessus de Colombiers. Et lors ilz apperceurent sur la roche de la fontaine de Soif que on y avoit fait grant trenchée et abbatis d'arbres d'une part et d'autres, dont ilz

se prindrent moult fort à esmerveiller : car oncques mais ilz n'avoient veu illec d'arbres trenchez, ne nul temps aucuns tronches. Adonques Raimondin, qui bien apperceut que la dame y avoit ouvré, se teut. Et quant ilz furent en la prarie, ilz descendirent et jetterent le cuir hors du sac.

---

*Comment ceulx qui estoient commis vindrent delivrer le don à Raimondin.*

**Q**uant les livreurs visdrent le cuir taillé si delié, ilz en furent tous esbahis, et disdrent à Raimondin qu'ilz ne sçavoient que faire; et sur ce vindrent deux hommes vestus d'ung gros burel, qui disdrent en ceste manière : Nous sommes icy envoieez pour vous aydier. Adonques ilz desvidèrent le cuir de la masse où l'avoit enroulé celluy qui l'avoit taillé, et le portèrent au fons de la vallée, au plus prez du rocher qu'ilz peurent; et là plantèrent ung pieu fort et gros, et y lièrent l'ung des bous du cuir; et avoit l'ung d'eulx ung grant fais de pieus que ilz fichèrent de lieu en lieu en environnant la roche, et ainsi que ilz trouvèrent la tranche faicte; et les aultres le sievoient en atachant le cuir au pieus, et par ceste maniere ilz environnèrent la montaigne; et quant ilz revindrent au premier pal, il y eut grant foison de remanant de cuir, et pour l'acomplir et fournir le tirèrent contre val la vallée, tellement qu'ilz parfournirent l'enchainte dudit cuir. Et sachiés que selon ce que on dist au pays, et que la vraie histoire le nous tesmoingne, que il sourdit ung ruisseau duquel plui-

seurs molins molurent et ont molu depuys. Adonques ceulx qui livroient la place furent moult esbahis tant du ruissel que ils veoient devant eulx souldainement sourdre , comme la circuïte du cerf comprenoit , car il contenoit bien deux lieues de tour.

L'ystoire nous racompte que les livreurs , comme devant est dit , furent moult esbahis quant ilz virent le ruissel sourdre souldainement , et courrir contre la vallée grans sourions d'eauë , et aussi se esmerveilloient-ilz de la grant ençainte que le cuir du cerf comprenoit ; et neantmoins delivrent-ilz à Raimondin la terre à luy donnée selon le texte de sa chartre. Et aussi tost qu'ilz l'eurent baillé , ilz ne sceurent oncques que les deux hommes vestus de burel devindrent , qui au devant estoient devant leurs yeulx. Lors se departirent tous ensamble pour eulx en aller à Poitiers ; et quant ilz vindrent là , ilz comptèrent au conte et à sa mère ceste merveilleuse adventure. Et adonques dit la dame en ceste maniere : Ne me croy jamais de chose que je die se Raimondin n'a trouvé quelque adventure en la forest de Colombiers , car celle forest est aulcunes loys moult plaine de moult merveilleuses adventures. Et lors dist le conte : Par ma foy , ma dame , je croy que vous dictes vray , et j'ay piecha oy dire que sur la fontaine qui est dessoubz celluy rocher , on a veu advenir pluseurs fois maintes merveilleuses adventures ; mais quant à luy , je prie à Dieu qu'il luy laisse jouir à son honneur et à son preu. Amen ; dist la dame. Ainsi qu'ilz parloient Raimondin arriva , qui tantost se agenoïlla devant le conte en le remerciant de l'onneur et de la courtoisie qu'il luy avoit faicte. Par ma foy , Raimondin , dist le conte , c'est peu de chose ; mais se Dieu plaît je feray mieulx

au temps advenir. Or, mon amy Raimondin, dist le conte, que on m'a compté moult grant et merveilleuse adventure qui est advenue à present en la place que on vous a delivré de par moy, laquelle je vous ay donnée legièrement; si vous prie tresaffectueusement que vous me vueillez dire la plaine vérité. Par ma foy, dist Raimondin, mon treschier seigneur, se ceulx qui ont esté avecques moy ne vous en ont compté fors que ce que ilz en ont veu, ilz ont bien fait; toutes fois il est vray de la place que le cuir du cerf a circuy de rond environ de deux lieues. Et quant est de ces deux hommes qui sont vestus de bureau, lesquels ont aydé à le mesurer et circuier, et aussi du ruissel qui est sours tout souldainement, c'est toute plaine verité, monseigneur. Par ma foy, dist le conte, Raimondin, vecy grant merveille. En bonne foy, Raimondin, ainsi comme il nous est avis, il faut que vous ayez trouvé quelque adventure; je vous prie que vous nous le dictes aulcunement, ainsi que vous le savez, pour nous en oster hors de merencolie? Mon seigneur, dist Raimondin, je ne ay encore trouvé que bien et honneur; mais, mon treschier seigneur, j'ay plus de plaisir de hanter en celluy lieu quant à present, que je n'ay ailleurs, pour ce que est commune renommée du lieu estre adventureux; et pour ce j'ay esperance que Dieu m'envoiera quelque bonne adventure qui, par son plaisir, me sera pourfitable et honnourable au corps et à l'ame. Et, mon trèschier seigneur, ne m'en enquez plus, car certainement aultre chose, pour le present, ne vous sçauroie bonnement que dire. Adoncques le conte, qui moult l'aimoit, se teut à tant pour ce qu'il ne le vouloit point couroucer; et ce fait Raimondin prinst congie du conte et de sa mère.

Et à tant me tairay quant à present de plus parler d'eulx, et diray comment Raimondin retourna par devers sa dame où il sçavoit bien qu'il l'avoit laissée.

---

*Comment Raimondin prinst congié du conte et retourna vers sa dame.*

**E**n ceste partie nous dist l'histoire que Raimondin, qui moult estoit enamouré de sa dame, se partit sur heure de Poitiers, tout seul, moult hastivement, et chevaucha tant qu'il vint en la haute forest de Colombiers, et descendit de dessus la montaigne au val, et vint à la fontaine où il trouva sa dame qui moult liement le receipt, et luy dist en ceste manière : Mon amy, vous commencez moult bien à celler nos secrez, et se vous perseverez à faire ainsi, il vous en viendra grant bien, et tantost vous vous en apperceverez et le verrez. Adoncques va Raimondin respondre en ceste manière : Ma dame, je suis tout prest de accomplir à mon pover tout vostre plaisir; par ma foy, Raimondin, dist la dame, tant que vous m'aiez espousée, ne povez-vous plus sçavoir ne veoir de nos secrez. Dame, dist Raimondin, je suis tout prest; non mie encore, dist la dame, il fault que il soit aultrement, car il convient que vous allez prier le conte, sa mère, et tous vos aultres amis, que ilz vous viennent faire honneur à vos nopces, en ceste place, au jour de lundy prouchainement venant, afin qu'ilz voient les noblesses que je pense à faire pour vostre honneur acroistre; pourquoy ilz ne soient pas plus en suspition que vous soiez petitement

marié selon vous , et tout leur povez bien dire seurement que vous prenez une fille de roy ; mais plus avant ne vous en descouvrez , mais bien vous en gardez si chier que vous avez l'amour de moy. Dame, dist Raimondin , ne vous en doubtez. Amy, dist la dame , n'aiez jà soing que pour grans gens que vous sachés amener , que ilz ne soient trestous bien receups et bien logez , et qu'ilz n'aient bien à vivre à grant foison pour eulx et pour leurs chevaux ; et allez tout seurement , mon amy , et ne vous doutez de riens. Et à tant se entre-accolèrent et baisèrent , et se partit Raimondin d'elle , et monta à cheval. Et à tant se taist l'istoire d'en plus parler , et commence à parler de Raimondin , qui va grant erre vers Poitiers.

Or nous dist l'istoire que tant erra Raimondin aprez qu'il fut parti de sa dame , que il vint à Poitiers , où il trouva le conte et sa mère , et grant foison des barons de Poitiers et du pays , qui moult fort le bienveignèrent , et luy demandèrent dont il venoit ; et il leur respondit qu'il venoit de soy esbatre. Et quant ilz eurent grant pièce parlé d'une chose et d'aulture , Raimondin vint devant le conte , et se agenoilla et luy dist ainsi : Treschier seigneur , je vous supplie humblement , sur tous les services que je vous pourray faire jamais , que il vous plaise à moy faire tant d'honneur de venir le lundi prochain à mes espousailles à la fontaine de Soif , et que il vous plaise de y amener vostre mère et toute vostre baronnie pour nous honnourer et nous faire compaignie. Et quant le conte l'entendit , il fut moult esbahi. Dieu , dist le conte , beau cousin Raimondin , estes-vous jà si estrange de nous que vous vous mariez sans ce que nous en aions riens sceu jusques à

l'espouser ? Pour certain nous nous en donnons grant merveilles, car nous cuidons que se vous eussies volenté de femme prendre, que nous fussions le premiers à qui vous en deussiez avoir pris conseil. Adoncques Raimondin respondit : Mon treschier seigneur, ne vous en vueille desplaire, car amours ont tant de puissance qu'ilz font faire les choses ainsi que il leur plaist, et je suys si avant allé en ce meschief que je ne puis reculer ; et se je pourroie ores endroit défaire, je ne le defferoie pas. Or, beau sire, dist le conte, au mains dictes qui elle est et de quelle lignée. Par ma foy, dist Raimondin, vous me demandez chose que je ne vous pourroie respondre, car oncques en ma vie de ce je n'enquis riens. Par ma foy, dist le conte, vecy grans merveilles ; Raimondin se marie et ne scet quelle femme il prent, ne de quel lignage. Monseigneur, dist Raimondin, puy qu'il me souffist, il vous doit bien souffire, car je ne prens pas femme pour vous ennoisier, mais pour moy ; si en porteray le dueil ou la joye, lequel Dieu plaira. Par ma foy, dist le conte, vous dictes bien. Quant est de moy, je ne vueil mie avoir la noise, se elle y est ; combien puy qu'il est ainsi, je prie Dieu devotement qu'il vous envoie paix et bonne adventure ensamble ; et tresvoulentiers nous irons aux nopces, et y menerons madame et pluseurs aultres dames et damoiselles, et nostre baronnie. Raimondin respondist : Monseigneur, tresgrans mercis, car je croy que quant vous viendrez là et vous verrez la dame, qu'elle vous plaira bien. Et à tant laissèrent le parler de ceste chose, et parlèrent d'une chose et d'autre tant qu'il fut temps de sopper. Et nonobstant ce, tousjours le conte pensoit à Raimondin et à sa dame, et disoit que c'estoit quel-

que fortune qu'il avoit trouvé à la fontaine de Soif.

En ceste manière pensa le conte longuement , et tant que le maistre d'ostel luy venist dire : Monseigneur, il est tout prest quant il vous plaira. Par foy, dist le conte , ce me plaist. Adonc ilz lavèrent et furent assis , et furent bien servis ; et aprez souper parlèrent de pluseurs matières , et puis s'en allèrent couchier. Lendemain au matin le conte se leva et ouyt sa messe , et fist mander ses barons pour aler avec luy aux nopces de Raimondin , et ilz vindrent delivrement. Et manda ledit conte le conte de Forestz , qui estoit frere de Raimondin , car son père estoit mort. Et demantiers la dame fist son appareil en la prarie de dessoubz la fontaigne de Soif , qui fut si grant et si noble , que à dire voir riens n'y failloit de quelque chose qui appartenist à honneur pour celle besongne , et fut ores pour ung roy recepvoir à tout son estat , et vous en parleray plus à plain. Le dimence vint , chascun se appareilla pour venir aux nopces ; la nuyt passa et le jour vint. Adonc le conte se mist en chemin et avecq luy sa mère , sa seur et sa baronnie à noble compaignie. Et adonc le conte enquiert Raimondin de l'estat de sa femme ; mais il ne luy en vouldist riens dire , dont le conte estoit moult doulent , et tant vont ensamble parlant qu'ilz montèrent la montaigne et qu'ilz virent les grans tranchées qui faictes avoient esté soudainement , et virent la fontaigne qui y sourdit habondamment. Adonc chascun s'esmerveilla comment celle chose povoit estre ainsi faicte si soudainement. Et aprez vont regarder contre val la prarie , et voient tant de pavillons si treshaultz , si grans et si chiers , et de si nobles et merveilleuses fasson , que chascun s'esmerveilleoit ; et par especial quant ilz voient si grant foison de nobles gens allans



et venans pour les affaires de la feste , les ungs les aultres conseillans , aval la prarie ; car là veissiés dames, damoiselles , chevaliers et escuiers de nobles atours ; là veissiez courir chevaux et palefrois à grant multitude , et contre val les estres à grant foison de cuisines fumans , où on faisoit grans et merveilleux apparelz. Et si voyoient au dessus de la fontaine la chappelle de Nostre-Dame, qui estoit belle, gracieuse et bien ordonnée que oncques mès n'avoient veu si belle chappelle, ne si noblement aournée. Si s'en vont esmerveillant en disant entre eulx : Je ne sçay qu'il adviendra en aprez du surplus , mais vecy tresbeau commencement , grant et apparant de grans noblesses et honneurs.

---

*Comment le conte de Poitiers vint aux nopces de Raimondin acompaigné de noble baronnie.*

**E**n ceste partie nous dist l'istoire que quant le conte et ses gens furent descendus de la montaigne, adonc ung chevalier ancien, noblement aourné et çainct d'une noble çaincture et riche et à pierres precieuses et perles , monté sur un hault palefroy liart , noblement acompaigné jusques au nombre de .xii. hommes d'onheur noblement aournez , s'en vint joieusement vers la route du conte. Et en la première route trouva le conte de Forestz et Raimondin son frère noblement acompaignez ; et sitost que le chevalier ancien aperceut Raimondin, que il congneut bien entre les aultres , il alla saluer honnourablement , et aprez le conte de Forestz son frère et toute leur compaignie.

Et à brief parler icelluy ancien chevalier et ceulx de sa compaignie les receurent joyeusement, disant ledit chevalier soy adressant envers ledit Raimondin : Monseigneur, faictes-moy mener vers le conte de Poitiers, s'il vous plait, car je veulx parler à luy ; et ainsi le fist-il faire. Et quant l'ancien chevalier vint devant le conte, il le salua doucement, et le conte luy va dire : Vous soiez le tresbien trouvé. Or me dictes ce pour quoy vous me demandez ; lors le chevalier dist au conte ainsi : Sire, mademoiselle Melusine d'Albanie se recommande à vous tant qu'elle peut, et vous mercie du grant et hault honneur que vous faictes à Raimondin vostre cousin, et à elle ; quant il vous plait de vostre grace de leur venir faire compaignie à leurs espousailles. Par foy, dist le conte, sire chevalier, en ce cas povez-vous dire à vostre damoiselle que cy n'a nul de merciement besoing, pour ce que je suys entenu de faire honneur à mon cousin. Sire, dist le chevalier, vous dictes vostre courtoisie, mais nostre damoiselle est saige pour sçavoir ce que on doibt faire, et, sire, elle m'a envoié à vous, et mes compaignons. Sire chevalier, dist le conte, il me plaist bien ; mais sachiés que je ne cuidois mie trouver logée damoiselle cy prez de moy de si hault affaire, qui eut tant de si nobles gens avecques elle. Ha, sire, dist le chevalier, quant il plaira à mademoiselle elle en aura bien plus, car il ne luy convient que demander. Et ainsi parlans les ungs aux aultres, ilz arrivèrent au pavillon et fut le conte logié au plus riche logis qu'il eut oncques mais veu. Et aprez fut chascun logié selon son estat, et disoient que en leurs propres hostelz ilz ne fussent point mieulx logez. Leurs chevaux furent logez ès grans tentes, et liez si à leur aise qu'il n'y eut var-

let qui ne s'en loast, et s'esmerveillèrent tous dont tant de biens et de richesses povoient si habundamment venir.

---

*Comment Raimondin et Melusine furent espousez.*

**E**n aprez vint la contesse, la mère au conte, et Blanche sa fille, et adoncques Melusine, qui fut moult saige, envoia au devant d'elle l'ancien chevalier qui avoit tenu compaignie au conte, et aussi avec celluy ancien chevalier s'en allèrent pluseurs dames et damoiselles de hault et noble estat, qui moult bienveignèrent et honnourèrent la contesse et sa fille, et les menèrent logier en ung moult noble pavillon de drap batu en or, perles et pierres precieuses. Si richement, à brief parler, furent logez que tous s'esmerveilloient de la grant richesse et du grant atour qu'elles visdrent au pavillon, et là furent-elles receues à moultz grans et melodieux sons de divers instrumens, moult honnourablement à toute sa compaignie, et furent tresbien logiés. Et quant la contesse fut ung peu reposée et habillée, et les seigneurs, dames et damoiselles qui estoient en sa compaignie, elles allèrent en la chambre de l'espousée, qui estoit sur toutes les aultres chambres la plus noble sans comparaison, et si estoit tant belle et si tresnoblement aournée que chascun disoit que oncques si belle ilz n'avoient veu jour de leur vie, ne si noblement aournée. Et se commencèrent tous à esmerveiller de sa beaulté et de la grant richesse de son habillement. Et adoncques la comtesse en soy-mesme

considerant l'estat, dist que en tout le monde elle ne cuidoie mie que on peut trouver royne ne emperresse qui peut finer autant d'avoir que les joyaulx qu'elle avoit sur elle valaient. Que ferois-je ores long plait? Le conte de Poetiers et ung des plus haultz barons, c'est assavoir le conte de Foretz, adressèrent et mirent à point l'espousée, et la menèrent moult doucement à ladicte chappelle, qui estoit tant noblement aournée que nul ne sçauroit priser la richesse tant des parements qui là estoient le plus estrangement ouvrez et si richement de fin or et de brodure de perles, que on n'avoit oncques mais veu nul temps les pareilz, come d'ymaiges et de croix, de crucifis d'or et d'argent, et si avoit de livres tant nobles que on ne pourroit plus au monde souhaidier. Et là fut ung evesque qui les espousa.

---

*Comment à disner ilz furent moult honnourablement servis.*

**E**t aprez le service divin ilz se reposèrent; et fut le disner en ung moult grant pavillon qui estoit moult riche et de noble atour, tout emmy la prarie, et furent servis de tant de metz si grandement, et de si bons vins estranges et aultres, et d'ipocras, si largement que chascun s'en esbahissoit dont tant de biens povoient venir, et les servoit-on si appertement en vaisseaulx d'or et d'argent que chascun s'esmerveilleoit, et quant ung mès estoit osté, l'autre estoit prest si tost que chascun s'esmerveilleoit comment les serviteurs estoient de ce faire si diligens.

*Comment aprez disner les chevaliers et escuiers  
joustèrent.*

**A**prez ce qu'ilz eurent disné et que les tables furent ostées et graces dictes , que on eut servi d'espices , pluseurs s'en allèrent armer et montèrent à cheveu ; et lors l'espousée et pluseurs aultres dames furent montées sur eschafaulz moult richement parez de draps d'or, et estoient les aultres dames sur pluseurs aultres eschafaulz. A tant commencèrent moult fort les joustes , et josta moult bien le conte de Poetiers et le conte de Forestz ; si firent les Poetevins. Mais le chevalier de l'espousée faisoit merveilles de bouter chevaux et chevaliers par terre. A tant est venu Raimondin sur un destrier liart qui moult noblement fut aourné, de blanc tout couvert , et lui avoit envoie la dame ; et au premier poindre qu'il fist à son cheveu , il abbatist le conte de Forestz son frere , et fist tant qu'il n'y eut chevalier d'ung costé ne d'autre qui ne le redoubtast. Adonc le conte de Poetiers s'esmerveilla moult qui le chevalier estoit , et joingt le sal au pis et s'en vient vers luy lance baissée ; mais Raimondin qui bien le congneut s'en tourna d'autre part , et assiet sur ung chevalier de Poetou et le fiert si roilement en la partie de l'escu qu'il le porta par terre luy et son cheveu ; et à brief parler tant fist Raimondin en celle journée que chascun disoit que le chevalier aux blanches armes avoit tresfort jousté. La nuyt approucha et la joute se departist , dont retournèrent les dames et s'empartirent avecques l'espousée , et s'en allèrent en leurs pavillons, et se

reposèrent ung peu ; et ne demoura gaires qu'il fût temps de soupper. Adonc se assamblèrent en la grant tente, et lavèrent et s'assirent à table, et furent moult richement servis , et aprez soupper furent les tables levées et graces dictes. Ce fait, les dames allèrent à leurs retrais et ostèrent leurs grandes robes, et vestirent plus cours habis , et firent feste moult belle ; et furent les honneurs moult grans , et tant que tous ceulx qui là estoient venus avecq le conte s'esmerveilloient du grant luminaire, des grans honneurs et des grans richesses que ils visdrent là. Et quant il fut temps, ilz menèrent l'espousée coucher moult honnourablement en ung tresmerveilleusement riche pavillon qui fut pour ce nouvellement tendu, et la livrèrent le conte de Poetiers et le conte de Forestz aux dames. Et lors la comtesse de Poetiers et les aultres grandes dames vindrent, qui menèrent l'espousée dedens, et l'administrèrent et instruirent en tout ce qu'elle devoit faire, combien qu'elle estoit assez pourveue de ce ; mais non obstant ce, elle les mercioit moult humblement de ce qu'elles luy montroient pour son bien et garder son honneur ; et quant elle fut couchée, elles attendirent autour du lict en devisant pluseurs choses tant que Raimondin venist, qui estoit encores demouré avec le conte et son frère, et le mercioit de ce qu'il avoit le premier combatu. Par ma foy, dist le conte de Poetiers, beau cousin de Forestz, vous avez piecha ouy dire que aulcunes foys l'amour des dames donne paine et travail aux amoureux et la mort aux chevaux. Monseigneur, dist le conte de Forestz, Raimondin mon frère le m'a huy monstré que c'est verité. Et Raimondin, qui fut ung peu honteux, va respondre en ceste manière : Beaulx seigneurs, frappez du plat,

et ne me donnez jà tant de los, car je ne suys mie celluy que vous pensez, puy que vous me congnoissez pour celluy aux blanches armes ; se ne suys-je pas ; je vouldroie bien que Dieu m'eut donné la grace de faire si bien. Et à ces parolles vint ung chevalier que les dames envoièrent, qui leur dist : Beaulx seigneurs, ne rigolez pas trop fort, car sachiés bien qu'il a aultre chose à penser. Par ma foy, dist le conte de Poitiers, je croy que vous dictes vray. Et de rechief va dire le chevalier : Mes seigneurs, amenez Raimondin, car les dames le demandent pour ce que sa partie est toute preste, et de ce commencèrent tous à rire, et disdrent que il ne luy en failloit jà de tesmoing, car c'estoit chose bien croiable.

---

*Comment l'evesque beneist le lict où Raimondin et Melusine estoient couchiés.*

**A** ces parolles admenèrent Raimondin au pavillon, et fut assez tost couché ; et lors vint l'evesque qui les avoit espousé, lequel beneist le lict, et aprez chascun prist congié, et furent les courtines tirées. Et à tant se taist l'istoire sans plus avant parler de la matère, et commence à parler des aultres qui s'en allèrent les ungz coucher, et les autres dansser et esbattre tant qu'il leur pleut. Et aprez vous parlera l'istoire de Raimondin et de la dame comment ilz se gouvernèrent, et les parolles qu'ilz se disoient au lict quant ilz furent couchiés ensamble.

En ceste partie nous dist l'istoire que quant tout

fut departi et les pans du pavillon furent jointz, que Melusine parla à Raimondin en ceste manière : Mon treschierseigneur et amy, je vous mercie du grant honneur qui m'a aujourd'uy esté faict de vostre lignée et amis, et aussi de ce que vous celez si bien ce que vous m'avez promis en nostre première convenance. Et sachiés pour certain se vous le tenez tousjours aussi bien que vous serez le plus puissant et le plus honnouré qui oncques fut en vostre lignée; et se vous faictes le contraire, vous et vos heritiers decherrez peu à peu de vostre estat et de la terre que vous tiendrez, quant vous ferez la faulte, s'il est ainsi que vous la facés, ce que Dieu ne vueille jà consentir, ne ne sera jamais tenue par nul de vos heritiers ensamble. Et adoncques luy va respondre Raimondin : Ma treschière dame, ne vous en doubtez mie, car ce ne m'aviendra jà, se Dieu plaist. Et lors la dame lui respond en ceste manière : Mon treschier amy, puys que ainsi est que je me suys mise si avant, il me convient attendre la voulenté de Dieu, et moy confier en vostre promesse. Or, vous gardez bien, mon treschier amy et compaignon, que vous ne me faillez de ce convenant, car vous serez celluy qui plus y perdrez aprez moy. Ha, ha, chière dame, dist Raimondin, de ce ne vous faut jà doubter, car à ce jour me faille Dieu quant je vous fauldray de mon pover de convenant. Or, mon chier amy, dist la dame, laissons ester le parler, car pour certain de ma part ny aura point de faulte que vous ne soiez le plus fortuné que oncques fut en vostre lignage, et en serez de tous le plus puissant, se il ne tient à vous. Et adonc en ce parti laissèrent aler de ceste matere, et pour ce nous dist l'istoire que en ceste nuyt fut engendré d'entre eulx deulx le preux vaillant Urian, qui de-



puys fut roy de Chippres , comme vous ouyrez bien cy aprez au long.

---

*Comment le conte de Poeitiers et de Foretz et les barons et dames prindrent congié de Raimondin et Melusine.*

**L**'histoire nous dist en ceste partie que tant demourèrent ces deux amans au lict que le soleil fut hault levé ; et adonques se leva Raimondin et se vestit , et saillist hors du pavillon . Et desjà estoit le conte de Poitiers et le conte de Forestz et les aultres barons qui attendoient Raimondin , et l'emmenèrent tous ensamble en la chappelle , et là ouyrent la messe moult devotement , et puy vindrent en la prarie ; et là de rechief commença la feste qui fut moult grande . Or vous en laisserons à parler , et dirons en avant de la contesse et des autres grans dames qui atournèrent Melusine et la menèrent moult richement appareillée en la chappelle ; et là ouyrent la messe , et fut l'offrande grande et riche ; et aprez ce que le service divin fut fait , se retrairent au pavillon . Que vous feroie ores long compte , la feste fut grande et noble , et dura par l'espace de quinze jours entiers , et donna Melusine de moult grans dons et joyaulx aux dames et damoiselles , aux chevaliers et escuiers ; et aprez la feste prindrent congié le conte et la contesse et toute la baronnie , pour eulx en aler . Et lors convoia Melusine la contesse et sa fille jusques oultre la villette de Colombiers ; et au departement donna Melusine à la contesse ung si riche fermail d'or que ce fut sans

nombre, et à sa fille ung chappeau de perles à saphiers, gros rubis, diamans, et aultres pierres precieuses; et tous ceulx qui veoient le fermail et le chappeau s'esmerveilloient de la beaulté, bonté et valeur d'iceulx. Et sachiez que Melusine donna tant aux grans et aux petis, que nul ne fut en la feste qui ne se louast des grans dons que Melusine leur donna, et s'esmerveilloient tous dont tant de biens povoient venir; et disoient trestous que Raimondin estoit moult grandement, puissamment et vaillamment marié. Et aprez toutes ces choses, Melusine prinst congié honnourablement du conte et de la contesse et de toute la baronnie, et s'en retourna en son pavillon en moult noble et belle compaignie; et Raimondin convoia tousjours le conte, et en chevauchant leur chemin le conte luy dist en ceste manière : Beau cousin, dictes moy, se faire se peut bonnement, de quel lignage est vostre femme; combien que quant le chevalier vint à nous de par elle pour nous logier, il nous mercia de l'onneur que nous vous venions faire, de par ma damoiselle Melusine d'Albanie, et je le vous demande aussi pour ce que nous en sçaurions volentiers la verité, car à tant que nous pouvons appercevoir de son estat et maintieng, il convient qu'elle soit saillie de moult noble et puissant lieu; et la cause qui nous meut de le volentiers sçavoir est pour ce que nous n'aions point mespris de luy faire l'onneur qui lui appartient. Par ma foy, monseigneur, dist le conte de Foretz, tout ainsi estoit ma volenté.

L'istoire nous dist que adonc Raimondin fut moult couroucé au cuer quant il ouyt la requeste que le conte de Poitiers, son seigneur, luy faisoit, et pareillement le conte de Foretz, son frère; car il amoit, doubtoit et prisoit sa dame tant qu'il haioit

toutes choses qu'il pensoit qui luy deussent déplaire; non pourtant il luy respondit moult froidement : Par ma foy, monseigneur, et vous mon frère, plaise vous sçavoir que par raison naturelle à qui que je cellasse mon secret, à vous deux je ne le debverois pas celler, voire se c'estoit chose que je le peusse dire, et aussi que je le sceusse; et pour ce je vous responderay à ce que vous m'avez demandé selon ce que je puy sçavoir. Sachiés que je ne demandé ne enquis oncques tant que vous m'avez demandé et j'à enquesté; mais tant vous en sçay bien dire qu'elle est fille de roy puissant et hault terrien; et par l'estat, gouvernement et maintieng que vous avez veu en elle, vous povez bien assez appercepvoir qu'elle n'est ne a esté nourie en mendicité ne en rudesse, mais en superfluité d'honneur et largesse de tous biens; et vous requiers comme à messeigneurs et amis que plus n'en enquerez, car aultre chose ne povez vous sçavoir de moy; et telle qu'elle est elle me plaist bien, et en suys trescontent, et congnois bien que c'est le sourion de tous mes biens terriens présens et advenir, et aussi crois-je certainement que c'est la voie première de tous mes biens et le saulvement de moy. Adonc, respondist le conte de Poitiers, par ma foy, beau cousin, de ma part je ne vous en pense plus à enquester, car comme vous avez saigement mis en termes de haultes honneurs, richesses et maintieng de ma cousine, vostre femme, nous devons de nous mesmes concepvoir qu'elle est de noble extraction, et de trespuissant et hault lieu. Par ma foy, monseigneur, dist le conte de Foretz, vous dictes vray; quant est de ma part je ne l'en pense jamais à enquester, j'à soit ce qu'il est mon frère, car je l'en tien tresbien asseuré selon mon advis. Las! depuys

il luy faillit de convenant, dont Raimondin emprist la dame, et le conte de Forestz emprist depuys, pour ce, mort par Geuffroy au grant dent, dont on vous parlera cy après plus à plain en l'istoire, mais quant pour cause de briefveté. Raimondin prist congié du conte et de son frère et des barons, et s'en retourna à la fontaine de Soif; et aussi le conte de Forestz prist congié du conte de Poitiers, de sa mère, de sa seur, et de tous les barons moult honnorablement, et s'en alla en sa conté et les mercia moult de l'onneur qu'ilz lui avoient fait aux nopces de Raimondin son frere. Et pourtant le conte de Poitiers, sa mère et sa seur, et ceux de son hostel retournèrent à Poitiers, et chascun des aultres barons s'en alla en sa contrée. Mais il n'y eut celluy qui ne pensast aux merveilles et richesses qu'ilz avoient veu aux nopces, et aux trenchis et au ruissel qui si souldainement leur estoit apparu estre fait; et disoient bien tous ceulx d'un commun d'illec environ, que d'aultres plus grans merveilles y adviendroient et apparroient. Et à tant se taist l'istoire à parler d'eulx et commence à parler de Raimondin et de sa dame comme ilz furent aprez la departie de la feste.

L'istoire nous racompte que quant Raimondin fut retourné devers la dame, qu'il trouva la feste encore plus grande que devant, et y avoit plus de nobles gens qu'il y eut devant. Toutes lesquelles gens lui vont dire à haulte voix : Monseigneur, vous soiez le bien venu comme celluy à qui nous sommes et à qui nous voulons obeir; et ce disdrent aussi bien les dames que les seigneurs; et adoncques Raimondin leur respondit : grans mercis de l'onneur que vous me offrez. Et à tant est venue Melusine qui moult honnorablement le bienveigna et le traist à part, et

luy recorda mot à mot toutes les parolles qui avoient esté entre le conte et luy, et entre luy et le conte de Forest; et luy dist la dame : Raimondin, tant que vous tiendrez ceste voie tous les biens vous habonderont; beau amy, je donneray demain congïé à la plus grant partie de nos gens qui cy sont venus à nostre feste; car il nous fauldra ordonner aultre chose, Dieu devant, que vous ferez bien prouchainement; et Raimondin respondist ainsi : dame, comme il vous plaira. Et quant vint le lendemain au matin, Melusine departist ses gens, et en y eut grant quantité qui s'en allèrent, et ceulx qui luy pleurent demourèrent. Et à tant se taist l'istoire à parler des choses dessusdictes, et commence à traicter et à parler comment la dame commença à fonder la forteresse de Lusignen, de quoy j'ay dessus parlé.

En ceste partie nous dist l'istoire que quant la feste fut departie de ses gens, que tantost aprez elle fist venir grant foison d'ouvriers et de pionniers, et fist tantost trencher et desracinier les grans arbres, et fist faire la roche toute nette par dessus, et le parfont trenchis, ainsi qu'elle avoit fait ordonner par avant, et ainsi que le cuir du cerf avoit environné; et puy fist venir grant foison de massons et tailleurs de pierre, et aprez fist commencer sur la vive roche nette et bastir le fondament tel et si fort que c'estoit merveilles à veoir; et faisoient les ouvriers dessusdis tant d'ouvraige et si soudainement, que tous ceulx qui par là passoient en estoient tous esbahis; et les paioit merveilleusement tous les samedis sans nulle faute, tellement qu'elle leur donnoit ung denier de reste, et trouvoient pain, vin et char, et toutes aultres choses qui leur faisoient besoing, à grant habondance. Et est vray que personne ne sça-

voit dont ces ouvriers estoient. Et sachiez que en brief temps fut la fortesse faicte, non pas une tant seullement, mais deux fortes places avant que on puisse venir ne aller au donjon; et sont toutes les trois places environnées de fortes tours machicollées et les voulées des tours tournées et aguies, et les murs haultz et bien carnelez; et en y a à trois pares de brayes bien haultes et puissans; et y a plusieurs tours ès dictes braies, et poternes fortes à merveilles, et au lez, vers le hault bois au dessus de la prarie, est la roche si haulte et si droite qu'en elle nulle creature pourroit habiter. Et avec tout ce il y a fortes braies entaillées de mesmes la roche. Or est vray que la fortesse est grande et forte à merveilles. Et sachiez que le conte de Poitiers et tous les barons et mesmes les gens du pays furent tous esbahis comment si grant ouvraige povoit ainsi estre fait et en si peu de temps; et adonc la dame se logea dedens la fortesse, et Raimondin fist crier une grande feste qui fut moult noble; et y furent le conte de Poitiers, sa mère, sa seur, les barons du pays, le conte de Forestz, et plusieurs aultres nobles du pays et de plusieurs nations; et aussi y furent tant de dames et damoiselles qu'il devoit bien souffire pour la journée. Et à la feste fut bien jousté et bien dancé, et menèrent moult joyeuse vie, et moult amoureusement furent assamblez. Et quant Melusine vit son bon point, si a dit aux deux contes et aux barons moult humblement en ceste manière : Mes beaulx et bons seigneurs, nous vous remercions de la haulte honneur que vous nous avez faicte, et la cause pour quoy nous vous avons prié de y venir je vous la declareray à present.

Seigneurs, dist la dame, je vous ay icy assamblez

pour avoir vostre conseil comment ceste fortresse sera appelée, pour quoy il soit memoire à jamais comment elle a esté fondée adventureusement. Par ma foy, dist le conte de Poitiers, belle niepce, et nous vous disons tant en général et voulons que vous mesmes luy donnez le nom qu'elle aura ; car il n'y a pas en tous nous assemblez autant de saigesse qu'il y a en vous seullement ; et sachiez que nul de nous ne se meslera de ce faire ; vous en avez tant fait que d'avoir achevé si tresbelle place que ceste est devant vous. Chier sire, dist Melusine, vous avez tout à pensement gardé ceste response pour moy rigoler ; mais quoy qu'il en soit, je vous requiers que m'en vueillez dire vostre entention. Par ma foy, dist le conte, ma niepce, nul de nous ne s'en meslera jà par dessus vous, car, par raison puy que vous en avez tant fait que d'avoir achevé si tresbelle place que ceste est quant à present la plus belle et la plus forte que j'ai point en nul lieu veue, vous mesmes, sans aultre, lui devez donner le nom à vostre gré. Ha, ha, monseigneur, dist Melusine, puy qu'il n'en peut aultrement estre, et que je voy qu'il est à vostre plaisir que je luy mette son propre nom, or doncques, puy qu'il vous plaist, elle a nom Lusignen. Par ma foy, dist le conte, ce nom lui affiert bien pour deux causes : car tout premierement vous estes nommée Melusine d'Albanie, en langaige gregois vault autant à dire comme chose qui ne fault ; et Melusine vault autant à dire comme chose de merveilles, ou merveilleuse chose ; et aussi ceste place est fondée merveilleusement, car je ne crois mie autrement que jamais, tant que elle sera, que on y trouve tous temps aucunes choses merveilleuses. Adonc respondirent tous d'ung assentiment en ceste manière :



Monseigneur, on ne luy pourroit donner nom qui luy miculx advenit selon l'estre du lieu, et aussi selon l'interpretation que vous avez faicte du nom propre. Et en ceste propre oppinion et parolle furent tous d'ung accord, et fut le nom si publié en peu de temps, qu'il fut sceu par tout le pays; et fut ainsi nommé et a tousjours esté jusques à maintenant, et jusques au jour du jugement ne perdra jà son nom. Et assez tost prindrent tous congié, et leur donna Melusine et Raimondin assez de riches dons; et ainsi se departist la feste tresamoureusement, et du surplus se deporta de parler d'eulx, et retourne à parler de Melusine et Raimondin, comme depuys ilz se gouvernèrent et tressaagement, puissamment et honnourablement.

Après ce que la feste fut departie, Melusine, qui moult estoit ensaincte, porta son fruit jusques au terme de l'enfanter; et quant vint le temps, au plaisir de Dieu elle se delivra d'ung enfant masle qui fut en tous estas bien formé, excepté qu'il eut le visage court et large à travers, et si avoit ung œil rouge et l'autre pers. Il fut baptisé, et eut nom Urian. Et sachiez qu'il avoit les plus grans oreilles qui oncques furent veues à enfant; et quant il fut parcreu, elles estoient aussi grandes comme les mamilles d'ung van. Adoncques Melusine appella Raimondin, et luy dist en ceste maniere: Mon tresdoulx compaignon et amy, je ne vueil pas que tu laisse perdre l'eritage qui te appartient, et qui de fait te est advenu par la mort de tes predecesseurs qui sont mors en Bretagne: car Guerende et Penicence doibvent estre à vous et à vostre frère, et toutes celles places et marches de pays. Allez-y, et somez le roy des Bretons comme il vous reçoipve en



droit, et luy dictes que vostre père avoit occis son neveu en gardant sa vie, et pour la doubte dudit roy qu'il n'avoit oncques mais osé se tenir au pays, mais s'en estoit estrangé. Et se il ne vous veult recevoir ne tenir en droit, ne vous en esbahissez jà pour ce, car aprez il sera tout joyeux quant il le vous pourra faire. Adonc respondit Raimondin : il n'est chose que vous me commandez que je ne face à mon pouvoir, car je vois bien et considère que toutes vos œuvres ne tendent que à honneur et à bien. Amy, dist la dame, c'est bien raison, puis que vous fiez du tout en moy, que je vous tienne verité. Il est vray que vostre père, de par ses antecesseurs, doibt avoir moult grans choses en Bretaigne, lesquelles choses vous seront declarées quant vous serez au pays. Or doncques vous vous en irez d'icy tout droit à un beau fort que on appelle Quemegnigant, et y trouverez ung ancien chevalier qui fut frère de vostre père, et l'appelloit-on Alain, et vostre père eut nom Henry de Leon; lequel fut en sa jeunesse moult aspre homme et de chaude colle. Et sachiez qu'il ne doubtoit ne craignoit chose que personne entreprist contre luy, car il estoit moult plain du feu de jeunesse et de hardiesse qu'il ne vouloit homme doubter ne crémir en regardant honneur. Si advint, pour ce qu'il estoit si abille, le roy des Bretons l'aima moult et le fist son senechal; et est vray que ce roy avoit ung neveu, lequel avoit, par l'introduction d'aulcuns, envie sur Henry vostre père, et grand indignation, car ilz luy firent accroire que le roy son oncle faisoit son heritier de Henry vostre père, et disdrent au neveu du roy en ceste manière : Ha, ha, droit heritier de Bretaigne, boute et gallesse, or estes-vous bien rué jüs et debouté de

la noble contrée de Bretagne; certes, se vous la vous laissez oster par lacheté de vostre cueur, tout le monde vous echervira et dira : Voiez là le fol qui par sa faintise de cueur s'est laissé dechasser de si noble pays et region comme le royaume de Bretagne. Et quant il entendist les mots d'iceulx envieux, il respondist : Et comment, dist-il, qui est celluy qui me pourroit faire tort? Sans ce que Dieu me vouldist nuire, il n'y a homme au monde que je craigne qui m'en puisse debouter dehors : car je sçay bien de verité que monseigneur le roy mon oncle n'a talent de faire ne d'avoir aultre heritier que moy. Par ma foy, va dire l'ung d'eulx, vous estes mal informé de ceste besongne, car vostre oncle a fait son heritier de Henry de Leon, et en sont les lettres passées. Quand le damoiseau, qui estoit filz de la seur au roy des Bretons, oyt ces motz, il fut trop doulent, et leur respondist ainsi : Sachiez de certain que se je sçavoie que ces parolles fussent veritables, que je y metteroie bien remède si hastivement que jamais il ne tiendroit terre ne possession. Adonc luy respondist ung chevalier nommé Josselin du Pont : Par ma foy, dist-il, il est ainsi. Et pour ce que nous ne voudrions avoir aultre que vous en Bretagne aprez le trespas du roy, pourtant vous en advisons-nous; car ceste chose a fait le roy vostre oncle tout secretement, affin que ne le puissiez savoir; et sachiez que nous qui cy sommes y fusmes presens avecques pluseurs aultres. Or demandez à mes compaignons se je dis vray. Et il leur demanda; et ilz luy disdrent d'une commune vouldenté à haulte voix : Et en verité, monseigneur, il vous a dit la pure verité. Or verra-on que vous en ferez.

Par foy, dist le jovencel, beaulx seigneurs, cy

trop grand mesprison, et plus de la part de mon oncle que de la part de Henri de Leon; combien qu'il en sera tresbien païé. Allez-vous en à vostre affaire; car sachez que j'en feray grant diligence, telle que qu'il ne me osterá pas mon heritaige. Et ilz prennent congíé, et s'en vont tous joyeux; car ilz avoient si grant envie sur Henry vostre père, pour ce que le roy l'amoit, croyoit et usoit en plusieurs choses de son conseil; car il ne leur chailloit à quelle perte il deut tourner, mais que ilz le peussent faire destruire. Et sachiez que lendemain au matin le nepveu du roy s'arma et agueta vostre père en ung petit bois, qui ne pensoit riens de tout ce, car ainsi comme vostre père s'en alloit à son eshatement desoubz Leon, le nepveu du roy lui escria à mort disant: Faulx triste, me veulx-tu tollir mon heritaige? et, en ce disant, traist l'espée et cuida férir vostre père d'estoc parmy le corps; mais il tressailloit, et au passer que le nepveu du roy fist, vostre père luy osta l'espée de la main; et va traire ung petit coustel agu dont de rechief il le cuida férir; et vostre père despassa et luy donna du pommeau de l'espée qu'il luy avoit tollue si grant coup en la temple, à ce que la coëffe de fer qu'il avoit affoullée n'estoit pas si forte que on pourroit bien dire, qu'il le tua contre terre tout mort; mais quant il advisa et congneut que c'estoit, il en fut moult doulent et s'en vint à l'ostel et prist toute sa finance, et vint en la contée que on appelle maintenant Foretz, et trouva moult grand aide et confort en une dame qu'il trouva, de laquelle je me tais de plus en avant parler quant présent, et aprez sa departie d'elle, qui si bien luy aidá à son premier gouvernement, à faire les forresse et fonder les villes et habitations, et peupler le

pays, il prinst à mariage la seur de celluy qui pour lors gouvernoit la conté de Poetou, et d'elle eut plusieurs enfans desquieulx vous estes l'ung.

Amy, dist Melusine, or vous ay devisé comment vostre père se partist dont il estoit, et laissa tous les heritaiges vacans qui doibvent estre vostres, lesquelles je ne vous prise pas en les laissant perdre; et sachiez bien que encores vit Josselin du Pont de Leon, et a ung filz qui gouverne à présent toute la terre de Leon, qui doit estre vostre. Or doncques, vous vous en irez devers vostre oncle Alain de Quemegnigant, et vous ferez congnoistre à luy, et il vous croira assez bien de tout ce que vous luy direz. Et sachiez qu'il a deux vaillans, riches et saiges filz chevaliers qui sont vos cousins germains, lesquieulx le roy des Bretons aime moult; et par l'ung de ces deux bons frères, appelez Josselin du pont de Leon par devant le roy, et luy mettez sus de faict comment il fist la traison de quoy le nepveu du roy vint courir sus à votre père; et sachiez qu'il a un filz appelé Olivier du Pont de Leon, qui vous en combatra; mais en assez brief temps vous le desconfirez, et seront le père et le fils condemnez à estre pendus, et congnoistra le père toute la traison, et vous sera ajugé avoir vostre terre, et serez mis en bonne, vraye et pacifique possession par les pers du pays. Or, mon tresdoulx amy et compaignon, allez vous-en hardiement, et ne doutez ne craignez riens, car certainement Dieu vous aidera en tous vos affaires qui seront vrayes et justes.

A ce mot Raimondin respondit : Ma dame, je feray mon devoir de achever votre commandement. Adonc Raimondin prinst congié de Melusine, et s'en partist à moult belle compaignie de chevaliers et escuiers,

jusques bien au nombre de deux cens gentilz hommes, et n'y allèrent pas si degarnis que chascun n'eust la coste d'acier, le pan, la pièce, et les har-noys de jambes; et les pages portoient les lances et les bassines; et tant vont ensamble chevauchant qu'ilz vindrent en brute Bretagne; et moult s'esba-hissait le peuple que celles gens queraient en leurs pays; mais de ce qu'ilz paioient bien et largement les asseuroit qu'ilz ne vouloient et ne queroient que bien; car l'ancien chevalier, qui estoit de la maisnée de Melusine, gouvernoit tout le fait de Raimondin. Et toutesfois le roy de Bretagne sceut que celles gens alloient armez en son pays, et ne sçavoit que penser, car il ne se doubtoit de nulluy. Adoncques il envoya tantost deux chevaliers de grant affaire devers Raimondin sçavoir que il queroit en allant ainsi parmy son pays de Bretagne tout armé, en lui demandant s'il vouloit point de mal au roy ne à son pays; adonc ceulx vindrent par devers ledit Raimondin et luy enquirent moult sagement qu'il queroit, et que le roy de Bretagne s'en esmerveilleoit. Adoncques respondist Raimondin humblement ainsi : Beaulx seigneurs, vous direz au roy que je ne viens fors que pour bien, et pour avoir droit en sa court de ce que je demanderay, selon la raison que le roy et son conseil verront que je auray et qu'il leur semblera bien à faire; car assez briefment je m'en iray par devers luy en sa court, et me complaineray devant sa maesté selon le droit que j'ay. Par foy, disdrent ceux, et vous soyez le tresbien venu, puisque vous y venez pour icelle chose; et sachiez bien que le roy vous fera droit et raison; mais dictes-nous, s'il vous plaist, où vous voulez aller d'icy. Par ma foy, dit Raimondin, je voudroie estre à Quemegnigant. Adonc,

dist l'un d'eulx, vous estes bien au chemin ; il n'y a pas d'icy plus de cinc lieues ; et sachiés que vous y trouverez Alain de Léon , qui vous fera tresbonne chièrre ; et y trouverez aussi deux chevaliers qui sont honnourables gens de bien et d'onneur ; et tenez tout ce chemin , et vous ne pourrez faillir ; et nous allons à vostre congié. Beaulx seigneurs, dist Raimondin , allez à la garde de Dieu qui vous conduise seurement, et me veuillez treshumblement recommander au roy.

Quant les deux chevaliers furent eslongez d'une lieue de Raimondin , si vont dire l'ung à l'autre. : Par foy, velà moult honnourables gens ; pour certain ilz ne viennent mie en ce pays sans grant affaire. Et adoncques vont dire entre eulx : Allons nous-en par Quemegnigant, et racomptérons leur venue à Alain. Par ma foy , dit l'autre , ce ne sera que bien fait ; et à tant tindrent leur chemin ensemble jusques audit Quemegnigant , où ilz trouvèrent Alain , auquel ils disdrent et annoncièrent la venue de Raimondin et de ses gens , qui s'en donna grant merveilles. Adoncques appela le preudomme ses deux filz chevaliers , dont l'aisné a nom Alain et le plus jeune Henry , et leur dist en ceste manière : Mes enfans , montez à cheveu et allez au devant de ces estrangiers , et les recepvez honnourablement , et les faictes tresbien loger ; car on m'a dit qu'ilz sont bien de six à sept cens chevaux ; mais pour neant en parle , car l'ancien chevalier de Melusine estoitjà venu devant , et avoit advisé qu'ilz ne pourroient pas bien tous estre logez dedens la ville , et avoit fait tendre grant foison de tentes et pavillons , et avoit envoié environ le pays querir vivres ; et payoit si largement que ou lui admenoit assez plus de vivres que ne luy en failloit. Et adonc Alain fut tout

esbahi quant on lui compta le grant avoir et le grant appareil que ces gens faisoient, et ne sçavoit que penser.

Or dist l'istioire que tant chevauchèrent les deux frères ensemble qu'ils rencontrèrent Raimondin et le bienveignèrent moult courtoisement, et le prièrent, de par Alain leur père, à venir loger au fort, et qu'il auroit moult bonne chièr. Beaulx seigneurs, dist Raimondin, grans mercis à vostre père et à vous de la grant courtoisie que vous offrez, mais à vostre requeste je iray par devers vostre père pour luy faire la reverence, et aulcuns de mes plus privez gens avecques moy; car j'ay bien grant voullenté de le veoir pour le bien que j'en ay ouy dire. En disant ces parolles et aultres, chevauchèrent ensemble tant que ilz vindrent prez de la ville. Adonc vint l'ancien chevalier, qui dist à Raimondin : Sire, j'ay fait tendre vostre pavillon et pluseurs tentes pour loger vous et vos gens, et sommes tresbien pourvus, Dieu mercy. Vous avez tresbien fait, dist Raimondin. Or pensez bien de nos gens et ne m'attendez huy mais, car je m'en vois au fort avecques ces deux gentilz hommes. Et à tant se part de l'ancien chevalier et vint au fort; et le sire de leans, qui sçavoit bien sa venue, s'estoit fait admener à l'entrée de la porte, et quant Raimondin le vit, il congneut tantost que c'estoit le seigneur de leans, et adonc le salua moult humblement. Que vous feroie ores longues parolles de leur accointance, fors que du fait de quoy doibz parler? Or doncques disons quant ilz eurent souppé, lavé et graces dictes, le sire de leans prinst Raimondin par la main, et le mena asseoir sur une couge pour deviser entre eulx tant que les derniers souppèrent; et ses deux filz



faisoient le plus d'honneur qu'ilz pouvoient ne sçavoient à ceulx qui estoient venus avecques Raimondin. Et lors le seigneur de leans, qui estoit moult subtil homme, et sçavoit de bien et d'honneur, mist Raimondin en parolles pluseurs, et luy dist moult honnourablement : Sire chevalier, j'ay moult grant joye de vostre venue, car certainement vous ressemblez assez ung mien frere qui fut moult vitte et appert, et se partist de ce pays il y a bien quarante ans pour une noise qu'il eut encontre le nepveu du roy qui lors regnoit en ce pays; et sachiez que veez cy le quart roy qui regne depuis celluy temps dont je vous parle; et pourtant qu'il me samble proprement que retraiés à mon frere de semblant, je vous en vois plus volentiers. Sire, va adonc dire Raimondin, tresgrans mercis, car je croy, avant que je me departe d'avec vous, que je vous feray tout certain pour quelle cause celluy inconvenient advint entre vostre frere et le nepveu du roy, et ne suys venu cy pour aultre chose que pour en monstrar publiquement la pure verité.

Quant Alain ouyt ces parolles, il fut moult esbahi, et prist moult fort à regarder Raimondin et moult asprement. Et quant il l'eut moult fort regardé si luy dist : Et comment se pourra ce faire ? vous n'avez pas encores l'aage de xxx ans; de vous me ferez acointe de ce fait que nul ne peut oncques sçavoir veritablement; car quant le coup du meffait fut advenu à mon frere, il s'en partist si souldainement que moy ne aultre n'en ouysmes oncques puy aultres nouvelles; et si a ja xl ans au plus prez. Sire, dist Raimondin, dictes moy, s'il vous plaist, vit-il nul homme en ces marches que, pour le temps que vostre frere regnoit en ce pays, fut a la court en auctorité ? Par ma foy,



dist Alain, si fait, mais il n'y en a que ung, et celuy mesmes tient l'eritaige de mon frere; car le roy luy en donna la fraiture a ung filz qu'il a, qui est comme est mon filz aisé, qui est chevalier. Par ma foy, dist Raimondin, je sçay bien comment il a nom. Et comment le sçavez vous, dist Alain? Par ma foy, dist Raimondin, sire, il est nommé Josselin du Pont de Leon, et son filz est nommé Olivier. Sire chevalier, dist Alain, c'est verité; mais or dictes comment vous poyez ce savoir. Sire, vous n'en sçaurez plus de moy, dist Raimondin, quant à present. Aprez, s'il vous plaist, vous viendrez acompaignier, vous et vos enfans, à la court du roy. Et sachiez que je vous declareray la querelle si clerement que vous en serez tout joyeux, se vous amastes oncques vostre frère Henry de Leon. Et quant Alain l'entendist, il fut plus esbahy que devant, car il ne cuidoit pas que son frere ne fut mort, si grant temps avoit que nul n'en eut memoire; et adoncq pensa moult longuement sans mot respondre.

Ainsi comme vous ay dit pensa moult longuement Alain, et puis il respondit : Sire chevalier, je vous accorde vostre requeste, puis que icy je ne puis sçavoir vostre volenté; car j'en ay grant desir. Je vous compaigneray volentiers à aller à la court du roy. Par ma foy, dist Raimondin, grans mercis, et je vous en garderay bien de dommaige. Que vous feroiez ores long compte? Alain manda grant foison de ses amis, et se mirent en grant estat pour aller à la court, et partirent à ung merdi devant la Pentecoste. Le roy, qui sceut leur venue, partist de Stoirrion où il estoit, et s'en vint à Nantes; car les deux chevaliers qu'il avoit envoié devers Raimondin estoient retournez, et avoient compté au roy la responce de Rai-

mondin, et le grant estat où il venoit ; et pour ce le roy c'estoit retraits à Nantes, et manda une partie de la baronnie, pour ce qu'il ne vouloit pas que Raimondin le trouvast despourveu de gens ; et entre les aultres, il manda Josselin du Pont de Leon, pour avoir son conseil sur la demande que Raimondin luy feroit, car il estoit moult saige. Que vous diroie plus ? l'ancien chevalier vint à tout le sommaige, et fist tendre tentes et pavillons, et appareiller moult richement ; et sachiez que tous ceulx de la ville s'esbahissoient des grans pourveances que faisoient ces gens. Adoncques vindrent Raimondin, Alain et ses deux filz, et descendirent au maistre pavillon, et se abillèrent moult richement pour aller devers le roy et luy faire la reverence, et partirent des tentes à bien XL chevaliers si noblement montez et parez, que c'estoit grant merveilles ; et avoit sa baronnie avec luy. A tant sont venus Raimondin et Alain, son oncle, ses deux filz et leurs gens ; et quant ilz entrèrent en la salle, toute la salle estoit emplie de noblesse, et vindrent Raimondin, Alain et ses deux enfans faire la reverence au roy, et puy les autres en suivant, et les receipt le roy moult joyeusement. Adoncques il appella Alain, et luy dist tout en ceste maniere :

Alain, je me donne grant merveilles de ce chevalier estrange de quoy vous estes ainsi acoincté, ne qu'il quiert en ce pays. Ha, ha, sire, dist Alain, je suis plus esmerveillé des parolles qu'il m'a dictes, cent fois que vous n'estes de sa venue ; mais assez tost serons esclerez de ce que nous desirons assavoir. Et lors traist avant, Raimondin, l'aisné filz Alain, et luy dist : Sire chevalier, dictes-moy, par vostre courtoisie, se ung que on appelle Josselin du Pont de

Leon est point en la compaignie du roy ; et lors luy dist Alain que ouy. Pleut ores à Dieu, dist Alain, que le roy ne s'en deute pas couroucer, et je l'eusse occis, car il tient l'eritaige qui fut à ung mien oncle, que nous deussions avoir. Et aprez ces parolles dist Alain à Raimondin : Voiez-le là celluy ancien qui est au plus prez du roy, et sachiés pour vray que c'est le plus plain de mauvais malice qui soit en dix royaulmes ; et si veez là Olivier son filz, qui ne poise pas mains une once. Par ma foy, sire chevalier, dist Raimondin, vous en serez tantost vengé, se dieu plaist. Et à tant en laisse le parler, et s'en vint devant le roy en disant telles parolles : Ha, hault sire et puissant roy, dist Raimondin, il est bien verité que commune renommée court par tous pays que vostre court est si noble et si raisonnable quelle est droite fontaine de justice et de raison, et que nul ne vient à vostre court à qui vous ne facez bonne justice et raisonnable, selon le bon droit qu'il a. Par foy, sire chevalier, dist le roy, c'est vray ; mais pour quoy le dictes-vous ? car je le vouldroie bien sçavoir. Par ma foy, sire, dist Raimondin, pour le vous faire à sçavoir je suys icy venu ; mais, sire, se il vous plaist, devant que je vous die, vous me promettrez que vous me ferez toute raison et tendrez en droit ; car ce que je diray est en partie pour vostre bien, prouffit et honneur ; car roy qui est accompagné de triste n'est pas bien logé ne bien asseuré. Par ma foy, dist le roy, il est vray ; dictes hardiement, car je vous jure par tant que je tiens de Dieu que je vous feray toute raison et justice, selon le bon droit que vous aurez ; et ce vous feray-je plainement, et fut maintenant contre mon frère. Sire, dist Raimondin, cent mille mercis, car vous dictes comme vaillant roy et preu-

domme; et pour ce fut le roy estably premierement pour tenir justice et verité.

Noble et puissant roy, dist Raimondin, il est bien verité que ung vostre predecesseur roy regna moult puissamment et vaillamment; ce fut au temps que Josselin du Pont estoit jeune, et aussi estoit Alain de Quemegnigant, qui sont cy presens de vostre face. Or avoit le roy que je vous dis ung moult beau et noble jouvenceau de nepveu. Et pour lors avoit ung baron en ce pays, appelé Henry de Leon, qui fut frère Alain qui cy est. Par ma foy, sire, dist Josselin, c'est verité; et oultre plus, celluy Henry de Leon occist le nepveu du roy vostre predecesseur en traïson, et s'enfouyt hors du pays, et oncques puis n'en ouyt-on aulcunes nouvelles; et lors le roy me donna toute sa terre qu'il avoit fourfaicte. Et adoncques le roy respondist : Nous avons assez ouy de ces matères; mais laissez ce chevalier parfaire sa raison qu'il avoit commencée.

Et ad ce respondist Raimondin : Sire roy, il a bien raison de en parler, car plus avant luy en conviendra dire, combien que j'à il a failly à dire verité de ce qu'il dit que Henry de Leon occist le nepveu du roy en traïson, car il sceut bien la querelle pour quoy ce fut, et n'est plus homme vivant qui véritablement sache le cas que luy, car ceulx de son accord sont tous mors; et dictes luy que il en die la plaine verité tout hault, sire, se il vous plaist. Et adonc quant Josselin entendit ce mot, il fut moult esbahi; et non pourtant il respondit en ceste manière : Sire chevalier, estes-vous venu en ce pays pour advenir sur moy ? Et Raimondin luy respond appertement : Par foy, faulx triste, il ne devine pas qui dist la plaine verité. Lors dist de rechief au roy :

Sire, il est bien verité que Henry de Leon fut moult hardi chevalier, courtois et bien moriginé, et l'amoient moult le roy et son nepveu, et usoit moult le roy par son conseil; or estoit Henry de Leon celuy en qui il se fioit le plus. Or advint que plusieurs tristes qui lors estoient en la court du roy, de quoy Josselin, qui cy est, estoit l'ung, fut le droit chief du meschief que pour lors ilz firent; car ils vindrent au nepveu du roy et luy disdrent en ceste maniere : Damoiseau, nous qui sommes icy sommes tous courrouceez de vostre grant dommaige et honteuse perte, quant vous serez desherité de si noble pays comme est le bon pays de Bretagne. Et il leur respondit : Comment se pourroit-ce faire ? Le roy n'a plus aultre heritier que moy. En mon Dieu, dist Josselin que veéz là, sachiés qu'il a fait son heritier de Henry de Leon; et je crois que il ait enchanté et les barons du pays aussi, car les lettres en sont jà passées et seellées de leurs seaulx avec le grant sel du roy. Et tout ce affermerent par foy et par serment estre vray. Par ma foy, dist doncques le damoiseau, icy a moult grant inconvenient, se il est vray ce que vous dictes. Et Josselin et les aultres qui estoient de son accord luy jurèrent de rechief que il estoit vray et certain; de quoy il commença à estre moult doulent. Et quant Josselin vit que il pensoit bien acertes, si luy va dire en ceste maniere : Se vous avez en vous tant de hardiesse que vous vous osez venger du tort que on vous fait, nous y aiderons tous. Et lors leur dist qu'il en avoit bien le cuer et la volenté. Lors dist Josselin : Or vous allez donc armer et vous mettez en tel estat que on ne vous puisse congnoistre, et nous vous attendrons au dehors de la ville, et vous menerons en tel lieu où vous vous en pour-

rez bien venger à vostre aise. Et il fist ainsi, et retourna par devers eulx pour ce faire. Or, noble et trespuissant roy, je ne quiers plus me celler, puy que je suys en court de droit et de justice, et que je vois mon ennemy devant moy; car je suys filz de Henry de Leon. Adoncques furent tous esbahis de ce mot, mais tous se taisèrent; et lors Raimondin reprist la parolle et dist en ceste manière :

Sire roy, mon père avoit pris congié du roy et s'en estoit allé en son pays, et avoit acoustumé qu'il alloit tousjours au matin esbatre au bois qui joint à la fortesse, en disant ses heures tout seul. Et ce faulx triste que voyez là et ses complices admenèrent le nepveu du roy, et se misrent en embuche; et mon père, qui ne se donnoit garde, vint à celle heure. Et quant Josselin l'apperceut, il dist au damoiseau : Or il est temps de vous venger, car il est sans armes ne cousteau; il ne vous peut eschapper; et aussi si nous voions qu'il vous soit besoing d'aide, nous tous vous aiderons. Et adoncques il s'en partist d'eulx espris de mal talent, et s'en vint vers Henri, mon père, l'espée toute nue tenant par la poignée, et de l'autre main par le millieu, en luy escriant : A mort, à mort, faulx triste. Et en ces paroles disant, il cria : Faulx desleal, de rechief, et cuida ferir mon père d'estoc parmi le corps; mais de la paour qu'il eut il tressaillit; et celluy qui venoit de grant volenté ireuse et tant eschauffé de mal talent et de felonnie, comme Dieu le voulut, car en ce n'avoit-il pas cuidé, faillist à l'assener. Et adoncques mon père retourna vers celluy qui ainsi voulut sans cause meurtrir, et luy sault sus, et luy oste l'espée des mains par grande force; et il s'en retourne aprez la course du cheveu, et tire un petit cousteau, et

en ferit mon père par la cuisse; mais il lui cuidoit bien avoir bouté parmy le corps. Et adoncques quand mon père se sentit fêru, et le sang degouster par la plaie, mon père le ferit du pommeau de l'espée en la temple ung tresgrant coup, à ce qu'il estoit fort et appert chevalier, et la coste estoit faible et mal seure, et le pommeau de l'espée estoit moult pesant; et adoncques l'adventure fut telle qu'il le rua à bas tout mort estendu sur la terre, et ce fist ainsi mon père.

Et adoncques quant mon père le vit gisir par terre, et qu'il ne se remouvoit point, il luy descouvrit le visaige, et lors il le congneut, et en mena en soy mesmes moult grant dueil, soy desconfortant et pensant qui avoit ce fait faire. Et il considera en soy mesmes que tel affaire ne luy venoit mie tant seulement du nepveu du roy, mais pouvoit venir d'autre pour aulcune mauvaise detraction de traïson; et ainsi aprez le fait il n'osa oncques plus arrester au pays; pour doubte du roy, et se traist où il avoit fiance, et la prist, et s'en alla en tel lieu où il conquesta du pays assez. Et adoncques Josselin le faulx triste dist à ses compaignons et complices: Or sommes-nous venus à chief de nostre intention, car le nepveu du roy est mort, et Henry, se il est tenu, ne peut eschapper sans mort; or ferons-nous du roy à nostre guise et à nostre vouloir; ne nous mouvons point tant qu'il soit eslongié, et puy ferons une bière de perches et le couvrirons de ramonceaulx et rames de bois, et le porterons devers le roy en luy disant que Henry de Leon a occis son nepveu en raison. Ha, ha, noble roy, ainsi et en la manière le fist le faulx triste que voiez là, et se il dist que non, je presente mon gaigne de luy faire congnoistre sa



faulceté et mauvaise gorge de tout ce que j'ay devant dit. Et pour ce, sire roy, que je veulz que chascun congnoisse que je ne fais pas cecy pour avarice, mais pour garder mon droit heritaige, et pour esclargir la vilonnie et mauvaise traïson que le faulx triste et ses complices firent à mon père pour le chasser d'entour du roy et hors de son pays, je vous prie, vaillant et noble roy, se il vous plaist, qu'il prengne son filz Olivier et ung aultre de ses plus prouchains amis, et je les combateray sans faillir, au regard du noble et juste jugement de vostre court, voire l'ung aprez l'autre. Et en ceste parolle disant, il jetta son gaige, mais il n'y eut qui mot respondist. Et quant Alain et ses enfants eurent ainsi ouy parler Raimondin, tantost ils le coururent baisier et embrasser de joye et de pitié qu'ils eurent quant ilz oyrent ainsi piteusement parler du fait de la traïson.

Et adonc quant le roy des Bretons apperceut que nul ne respondoit mot à celle parolle ainsi racomp-tée en sa presence, si a dit si hault que chascun le pouvoit ouyr : Josselin, estes-vous sourt ? Or vois-je bien que le proverbe que on dit communement est vray, que viel pechié fait nouvelle vergogne ; car ce chevalier estrange vous apporte par advis de pays une nouvelle moult estrange, et moult merveilleuse medicine de long pais. Advisez-vous de respondre, car il vous en est bien besoing. Adonc Josselin lui respond : Sire roy, je ne suys mie deshoresmais celluy qui doibve respondre à telles choses, et aussi je croy bien qu'il ne se fait que gaber. Et adoncques respondit Raimondin : Le gaber, faulx triste, desloyal, tournera sur vous. Or vous requiers-je, noble roy, que vous me vueillez tenir droit à vostre court, et que vous en facés bonne justice selon le droit et la



raison, soit de moy ou de luy. Lors dist le roy : Ne vous en doubtez, car si feray-je. Josselin, dist le roy, il fault que vous respondiez à ceste querelle. Adonc quant Olivier son filz ouyt ce que le roy disoit à son père, dist et respondist ces parolles : Sire, il a si grant paour qu'il tremble, cest chevalier ; je croy qu'il cuide prendre les grues en vollant ; par foy, il fault bien à ce qu'il vous a dit, car mon père est vray preudomme en tous cas, et je prens bataille ainsi comme il l'a ordonné, et voyez là mon gaige ; il sera bien fortuné se il me peut desconfire, et ung aultre de mon lignage que je esliray.

Quant le roy ouyt ceste parolle, il fut moult courroucé, et respondit en ceste manière : Ce n'aviendra ja en ma court, tant que je vivray, que ung seul chevalier combatte deux aultres pour vassal seul, pour une mesmes querelle ; et est grant honte à vous d'avoir pensé si tresgrant lacheté en vostre cueur, et sachiez que vous ne me montrez pas par samblant que votre père ait bonne querelle ; et d'icy je vous donne journée à la requeste du chevalier, de la bataille, au jour qu'il luy plaira assigner. Par foy, dist Raimondin, il me plaist tout maintenant, car j'ay mon harnois tout prest ; et Dieu vous vueille rendre le merite du loyal jugement que vous avez fait. Lors oyssiés grant murmure de toutes les gens d'environ, car tous disoient : Veez là le plus vaillant chevalier que nous veissions oncques en requerrant son droit. Mais quoi que en eut douleur Alain de Quemegnant, eut grant joye Alain et Henry ses filz, lesquieulx disdrent à Raimondin : Beau cousin, ne vous esbahissés de riens du monde ; prenez hardiement la bataille pour vous et pour nous deux contre ce faulx triste, car nous adviendrons bien briefve-

ment, au plaisir de Dieu, à chief. Beaulx seigneurs, dist Raimondin, prengne bataille pour soy qui voudra, car j'auray ceste en ma part, et ne doubtez point que je n'en vienne à bon chief, à l'aide de Dieu, et le bon droit que je y ay. Et me loe du roy et de sa bonne justice, et prie Dieu qu'il l'en vueille meriter en son glorieux paradis.

Endementiers que la murmure estoit entre les gens, et le roy de Bretaigne, qui estoit moult saige et subtil, pour ce que les parties estoient de hault lignage, doubtant que aulcun grant inconvenient n'en peut advenir entre eulx, il envoya souldainement fermer les portes, affin que par icelles nul ne saillist ne entrast, et les fist garder par bons gens d'armes bien armez à descouvert; et puy traist son conseil à part, et leur remonstra le fait, et leur racompta au long la querelle; adonc ilz conseillèrent tout ce qui estoit à faire. Lors retourna le roy en sa salle, et fist-on commandement de par luy, sur paine de la hart, que nul ne fut si hardi de sonner mot; et adoncques dist le roy : Or entendez, beaulx seigneurs; ceste querelle n'est pas petite, car c'est pour la vie ou deshonneur à tousjours de une partie. Et sachiez que je ne doibz ne ne veulz refuser jà faire droit en ma court. Olivier, dist le roy, voulez-vous deffendre vostre père de ceste traïson? Sire, dist-il, ouy certainement. Adoncq le roy respondit : Les lices sont toutes prestes et appareillées, et pour ce je vous ordonne à demain la bataille. Et sachiés se vous estes desconfy, vous ne vostre père ne eschapperez jà que vous ne soiez tous deux pendus; et aussi vostre adverse partie, si le cas luy advenait, n'en auroit jà mains. Delivrez-vous et baillez ostages; et tout le premier vostre père demourra; et à tant le

est mener par quatre chevaliers en une forte et grosse tour. Lors dist à Raimondin : Sire chevalier, baillez obstages ; adonc se met avant Alain son oncle et ses deux filz , et bien jusques à quinze chevaliers , qui tous disdrent à une voix : Sire , nous le lesgeons. Par foy, dist le roy, il souffit bien ; nous n'en tendrez jà prison ; car je sçay bien que le chevalier n'eut pas fait ceste entreprise se il ne l'eut voulu achever. Et ainsi se departirent les parties devant le roy ; et Raimondin s'en va avec ses gens et son oncle et ses cousins à ses pavillons ; et le soir alla veiller en la maistresse eglise ; et il fut moult grant espace de temps en devotion , et Olivier aussi vint en son hostel à grant foison de ceulx de son linage et fist mettre à point son harnoys et son cheveu. Et lendemain au matin oyrent la messe et puy s'en vont armer. Et adonc le roy et les haultz barons furent montez sur haultz eschafaulz environ les lices, furent les gardes du champ bien establies et ydoement , et les chaires assises à droit. Et environ l'heure de prime vint Raimondin à noble compagnie de champ, armé moult doucement et richement, escu au col, la lance sur le faultre , la coste d'armes estue brodée d'argent et d'asur, et entra es lices monté sur ung grant destrier liart moult bien armé jusques à l'angle du piet , si comme pour gaigne de bataille ; et fist reverence au roy et à tous les barons. Par foy, est chascun, il y a grant temps que nous ne vismes nul plus bel homme en armes, ne de plus belle contenance ; celluy n'a pas oeuvre laissée qui à tel homme a à besongner. Et adoncques descendist Raimondin de dessus le destrier aussi appertement comme si il ne fut point armé , et se assist en la chaire en attendant son adversaire. Or est-il vray que grant

temps aprez vint Olivier moult treshien et noblement armé, monté sur ung cheveu moult riche destrier, et moult bien sembloit homme de grant affaire, et aussi estoit-il. Et si y venoit-il Josselin son père devant luy sur ung palefroy gris, et fisrent moult noblement la reverence au roy comme ilz deurent. Moult sembloit ores Josselin moult esbahy, dont pour ce que chascun disoit que il avoit mauvaise cause. Aprez descendist Olivier moult vitemment. Que vous feroye ores long compte? Les saintes evangilles furent apportées, et jura Raimondin que Josselin avoit mauvaise cause, et que il avoit faicte la traison en la forme et manière qu'il avoit par avant declarée, et aprez se agenoilla et baisa les saintes evangilles, et puy se rassist en sa chaire; et aprez Josselin jura, mais pour baiser les evangilles il chancela tellement qu'il n'y peut oncques toucher; et aussi Olivier, qui bien sçavoit comme il estoit, jura lachement; et ce fait se rassist en la chaire, et tantost cria ung herault à haulte voix, de par le roy, que nul ne fut si hardi qui parlast mot ne fist signe aulcun que nul des champions peut entendre ne appercepvoir, sur peine de la hart. Et lors vuida chascun sa place, fors tant seullement ceulx qui furent commis à garder le champ et Josselin. Et adonques monta Raimondin à cheveu moult legierement, et prinst la lance; et d'autre part monta Olivier moult vistement, et prinst sa lance au fer trenchant. Et adonques cria ung herault par trois fois : Laissez aller vos chevaux et faictes vostre devoir.

Or dist la vraie histoire que quant le cry fut fait que Raimondin mist le bout de sa lance à terre et la coucha sur le col du destrier, et fist le signe de la croix

ar trois fois ; et en ce faisant, son ennemy l'apperceut  
t fiert son cheveu des esporons qu'il avoit si à main  
omme à son desir, et baisse la lance, et va fêrir  
Raimondin amy le pis, avant qu'il s'en donnast garde,  
moult rudement, car à ce faire il mist toute sa force.  
Raimondin n'en ploya oncques l'eschine, et la lance  
Olivier froissa jusques au poing, et de la force du coup  
la lance de Raimondin chait à terre. Ha, ha, triste,  
ist Raimondin, tu ensuys bien la tresfaulce lignée  
ont tu es parti ; mais ce ne te peut valoir. Et adonc  
rent l'estrier qui pendoit à l'arson de sa selle, lequel  
voit trois pointes bien asserées, chascune de sept  
oux de long, et au tourner, aprez son coup que Oli-  
ier cuida faire, il ferist sur le bassinet, qui fut moult  
ur et fort trempé, et le compassist. L'une des poin-  
es coula mal, et entrecouppa le bassinet et la visièrre.  
t aussi le coup qui descendit de grant ramenée avec  
force du bras de quoy il fut feru, l'ung' des clous de  
maisselle se rompist, et Raimondin tire fort à luy,  
llement que la visièrre demoura pendant d'ung cos-  
e, si que il eut le visaige tout descouvert. Et de ce  
esbahist moult Olivier ; et neantmoins il traist l'espée  
fait bien contenance de chevalier qui petitement  
edoubtoit son ennemy. Et en ce parti se combattirent  
rmement par grant espace, et se entredonnèrent  
moult de grans coups ; et en la fin Raimondin des-  
endist à piet et prist sa lance qui gisoit par terre, et  
int le grant pas vers son ennemy mortel, lequel, au  
ieulx qu'il pouvoit, se destournoit de luy, et le  
isoit aller aprez luy parmy le champ, car il avoit  
cheveu si bien à main comme s'il fut à son desir. Et  
ar telle manière cuidoit lasser Raimondin que il le  
ulsist arrester ou que la journée se passast ; mais  
aimondin s'advise, et vint à son cheveu qui estoit

aval le champ , et prinst le destrier à une main et à l'autre main la lance, et s'en vint pas pour pas vers son ennemy . Et quant Olivier le vist venir et aperçoit sa manière, si ne sceut comment ne en quelle manière Raimondin le vouloit assaillir , et point son cheveu en sursault et cuide venir hurter Raimondin emmy le pis comme il avoit fait aultresfois par avant ; mais Raimondin lui jetta de rechief l'estrier par grant hayr, et atainct le cheveu au front de si grant force que le gauffrain d'acier fut effondré dedans la teste du cheveu, qui, par la force du coup, convint aller à terre des jarrès de derrière. Et adoncques Olivier luy laisse le frain et le point des esporons, et au dresser que le cheveu fist, Raimondin le va ferir de la lance au costé, tellement que il le porta par terre de l'autre costé du destrier , et demoura à Olivier bien demy piet du fer dedans ; et fut la lance dedans le corps , et avant qu'il se peut relever , Raimondin le chargea si de coups qu'il ne se peut mouvoir, et luy erracha le bassinet de la teste par force et luy mist le genoul sur son nombril et la main senestre au col et le tint en telle detresse qu'il ne se poyoit mouvoir.

En ceste partie presente tient Raimondin Olivier par longue espace de temps, et quant il vit que il fut au dessus, il tira le coustel qui lui pendoit au destre, et luy dist : Faulx triste, rends-toy ou tu es mort. Par ma foy, dist Olivier, j'aime mieulx à mourir par la main d'un si vaillant chevalier comme vous estes que d'aultre main. Adoncques Raimondin prinst grant pitié de luy, et luy demanda, sur le péril de l'ame de luy, se il sçavoit riens de la traison que Josselin son père avoit fait, et il respondit que non , et qu'il n'estoit mie encores né au temps que le temps advint, et

que combien que il pleut à Dieu que fortune luy fut à present contraire, si tenoit-il encore son père pour preudomme loyal et non coupable d'icelluy fait. Adonc quant Raimondin, qui sçavoit bien le contraire, l'ouyt, si fut moult doulent, et le batist tant aux temples du poing à tout le gantelet, qui le fist si estourdi qu'il ne veoit ne oyoit, ne ne sçavoit chose que on luy fist. Et adonc se leva Raimondin, et le prinst par les deux piés et le traina jusques aux lices, et puy le bouta hors, et s'en tourna et vint devant l'eschafault du roy, la visièrè levée, en luy disant : Sire, ay-je fait mon devoir ? carse j'ay plus riens à faire, je suys tout prestz de le faire au regart de vostre court et ordonnance. Par foy, dist le roy, sire chevalier, vous vous estes bien acquitté. Et adoncques commanda le roy que Josselin et son filz fussent pendus ; et ceulx à qui le roy le commanda vont tantost et sans delay saisir Josselin, qui crioit au roy piteusement mercys. Et adoncques le roy luy va dire que il congneut la verité de la querelle, et par adventure il pourroit bien avoir grace.

Lors dist Josselin : Sire, le celler ne vault riens ; prenez vous pitié de moy s'il vous plaist. Certainement il fut en la forme que le chevalier le proposa, et sachiez que Olivier mon filz n'estoit pas encores né. Par ma foy, Josselin, dist le roy, cy a grant mauvaistié, et s'il n'eut pleut à Dieu que vous en fussiez pugny en ce monde, il ne vous eut pas tant laissé vivre ; et quant est de ma part, vous ne faldrez pas à la pugnition. Adoncques dist tout hault à ceulx qui estoient ordonnez que tantost le père et le filz fussent pendus. Et adoncques se traist avant Raimondin, et dist au roy : Sire, je vous mercie tant comme je puy plus au monde de vostre bonne jus-



tice et du droit que vous faictes en vostre court ; mais je vous prie par pitié, sire roy, par pitié et misericorde, qu'il vous plaise à moy donner la vie d'Olivier ; car veu la vaillance de luy, et aussi considéré qu'il n'a coulpe en la traïson, ce seroit grand dommaige de sa mort : car encores pourra il assés de bien faire ; et quant est du père, pour ce que je le voys vieil et foible, de ma part, sire roy, se il vous plaist à luy faire grace, je vous en requiers de bon cueur, pourtant que j'avoye mon heritaige et les prouffis et fructz qu'il a levé selon la mise de l'argent qu'il en pourra avoir eu, et que ce fut distribué pour fonder une prieuré et renter les moynnes d'icelluy prieuré, selon la quantité de l'argent, pour chanter à tousjours perpetuellement pour l'ame du nepveu du roy. Adoncq dist le roy à ses barons : Beaulx seigneurs, veez cy grant franchise de chevalier, qui prie que je respite ses ennemis de mort ; mais, par la foy que je doibz à l'ame de mon père, Josselin ne son filz ne feront jamais traïson et ne me chasseront homme nul de mon pays ; et tantost les fist tous les deux pendre, et rendist à Raimondin sa terre ; et luy donna avecq ce toute la terre de Josselin entierement, dont Raimondin le mercia moult humblement, et lui fist hommaige. Aprez commença la feste à estre moult grande, et tint le roy grant et noble court à tout homme ; et estoit moult joyeux de ce qu'il avoit recouvré ung si noble homme en son pays ; mais pour ueant s'en esjouissoit, car assez tost verra que Raimondin n'avoit gaires de volenté de demourer en Bretaine, car moult luy tarde de reveoir Melusine.

En ceste partie nous dist l'istoire que Raimondin fut moult festoié du roy de Bretaine, qui tint bien honnourable court pour l'amour de luy, et



furent les barons de Bretagne moult grant joye de sa venue, et par especial Alain son oncle et ses deux enfans, et ceulx de son lignage. Et adonc vint Raimondin au roy et luy dist ainsi : Sire roy, je vous prie et supplie qu'il vous plaise de vous accorder que je donne la baronnie de Leon, qui fut à Henry mon père, à qui Dieu fasse mercys, à Henry mon cousin; si aura la terre le nom de son droitturier seigneur, et vous le nom de vostre homme, car il est de la droite lignée. Par foy, dist le roy, sire, puy qu'il vous plaist, il nous plaist bien. Adonc appella le roy Henry, car il l'amoit moult, et luy dist le roy : Henry, recevez le don de baronnie de Leon que vostre cousin vous donne, et m'en faictes hommaige. Et il le fist et en mercia moult le roy et Raimondin. Et, ce fait, appella Raimondin Alain son cousin et luy dist ainsi : Beau cousin, je vous donne la terre que le roy m'a donnée, qui fut à Joselin du pont de Leon, et en faictes au roy hommaige. Et il en mercia moult humblement à genoulx, et en fist hommaige au roy, qui l'en receipt moult joyeusement. Mais les barons du pays commencèrent adonc moult fort à murmurer et disdrent : Par la foy, ce chevalier n'est mie venu en ce pays pour nulle convoitise ne avarice, mais seulement il a mis sa vie en tresgrande adventure pour conquerre son heritaige; quant si tost s'en est deffait, il convient bien qu'il ait grandes richesses ailleurs. Adoncques vint l'ancien chevalier à Raimondin, et, quand Raimondin le vit, il luy dist qu'il se delivrast de ce que la dame luy avoit commandé; et luy respondist : Monseigneur, pour ce suis-je venu par devers vous. Et adoncques presenta au roy, de par sa dame, une moult riche coupe d'or où il avoit moult de riches

pierres precieuses , et donna aprez à tous les barons moult de riches joyaulx , dont chascun s'esmerveilloit dont telles richesses venoient , et disoient tous que il convenoit que Raimondin fut moult puissant et riche homme. Et lors moult se refforcha la feste ; et avoient Alain de Quemegnigant et ses deux fils si tresgrant joye que nul ne le sçauroit bonnement exposer ; mais encores durant leur joye eut de l'autre part dueil du lignage du pont de Leon , qui n'oublièrent pas la mort de leur cousin , ainsi comme orrez cy aprez racompter. Et de ce plus parler se taist l'istoire quant à present , et ne parle plus de la feste , et commence à parler de Melusine , comment elle se gouvernoit tant comme Raimondin fut en ce voyage.

L'istoire nous dist que entretant que Raimondin fut en Bretagne , Melusine fist bastir la ville de Lusignen et fonder le mur sur une roche et edifier fortes tours et drues machicollées à couvert dedans les murailles pour deffendre à couvert tous les archiers , autant par dehors comme par dedans , et parfonds trenchers , et bonnes brayes , bastir entre le bourc et le chasteau une grosse tour de tuilles sarrazinoises à fort ciment ; et estoient les murs de la tour bien de XVI à XX piés d'espès , et la fist faire si haulte que les guestes qui estoient dedens veoient bien de tous costez qui venoit devers la ville ou le fort ; et establíst trompes qui trompoient quant ilz veoient quelque apparoistre. Et sachiés bien que tous les trenchiers d'entour le bourc furent curez là où il estoit besoing , comment encores il est apparant. Et fist la dame nommer celle tour la tour Trompée. Or retourne à parler l'istoire du roy et Raimondin , et de la feste que chascun faisoit à Raimondin.

En ceste partie nous dist l'histoire que moult fut grande la feste à Nantes, et moult honnoura le roy Raimondin, et y fist-on joustes esquelles Raimondin se porta moult vaillamment; et y furent toutes les plus gentilz dames du pays, et prisoient la contenance de Raimondin, et moult bien disoient qu'il estoit digne de tenir ung grant pays; et moult se esbahissoient de la grande richesse qu'ilz veoient entour Raimondin de jour en jour. Mais qui que fist feste de Raimondin, le chastellain d'Arval, qui fut nepveu de Josselin du Pont de Leon, faisoit tout le contraire; car il envoya soudainement à tous ses parens et proesmes et à tous les parens de Josselin, et leur faisoit assavoir comme la chose estoit allée, et que ilz fussent à ung certain jour qu'il leur manda en ung certain recept qu'il avoit en la forest de Guerende, si estoit à luy. Et quant ceulx ouyrent les nouvelles, ilz furent moult doulens, et se misrent bien ensamble environ deux cens hommes d'armes de toutes pièces armez, et s'en vindrent tout secretement audit recept où le chastellain les avoit mandez. Et adoncq le chastellain, le plus secretement qu'il peut, s'en partist de la court sans prendre congié du roy ne d'autres barons, mais il laissa à la court trois de ses escuiers pour sçavoir quel chemin Raimondin tiendrait, et qu'ilz l'anonçassent au recept dessusdit; et ilz respondirent que cy feroient-ilz. Et atant se partist le chatellain, et chevaucha tant qu'il vint au recept, où il trouva ceulx de son lignage qu'il avoit mandé, et leur compta toute la manière de l'aventure, et comment Josselin et son filz avoient esté pendus, et que ilz avoient en pensée de faire ou de le venger de Raimondin qui avoit fait pourchasser cest annoy, et à eulx à tousjours fait si grant blasme et si grant honte,

ou de le laisser en ce parti. Adoncq respondit pour tout le lignage ung moult estourdi chevalier qui fut filz du cousin germain Josselin : Chastellain , nous voulons que vous sachiez que ainsi ne demourra pas : car nous tous d'ung accord et d'une voulenté voulons mettre celluy à mort qui nous a fait celluy vitupère et deshonneur. Par foy, adonc va dire le chastellain, or tiens-je bien employé l'onneur que Josselin mon oncle vous a fait au temps passé, et je vous metteray tantost en lieu où nous pourrons bien accomplir nostre voulenté de celluy qui telle honte nous a fait; car, quelque costé qu'il saille du pays de Bretaigne, il ne nous peut par voye eschapper; car nous y avons bonnes espies qui le nous viendront noncer quant temps en sera. Et ilz respondirent tous à une voix : Benoit soiez-vous, et sachiés, quoy qu'il en doibve advenir, ceste entreprinse sera achevée, et occirons le faulx chevalier qui ce dommaige et ceste honte nous a fait. Si se taist l'istoire de plus en parler, et commence à parler du roy et de Raimondin, et comment Raimondin s'en partist moult honnourablement du roy et de toute sa baronnie, et s'en vint en la forteresse qui fut à Henry de Leon son père, qu'il avoit ja donnée à Henry son cousin.

L'istoire nous dist que la feste dura bien par quinze jours ou plus; le roy des Bretons et sa baronnie firent à Raimondin tant d'onneur que je ne le vous pourroie racompter. Et à tant me tairay d'en plus parler pour abregier, car ce me seroit longue chose, et parleray de Raimondin, qui prinst congie du roy et de ses barons, et mercya moult humblement le roy de sa bonne justice qu'il luy avoit faicte en sa noble court, et s'en partist moult honnourablement d'eulx tous. Et sachiés que le roy et plui-

seurs des barons furent moult doulens de sa departie ; et ainsi s'en partist Raimondin du roy, et avecq luy Alain son oncle et ses deux enfans chevaliers et ceulx de son lignage, et vont moult fort chevauchant vers Leon. Mais il est vray que l'ancien chevalier s'en estoit jà parti devant et avoit fait tendre tentes et pavillons, et toutes aultres choses ordonner comme mestier estoit. Et adoncques Raimondin, son oncle et ses deux enfans, et les plus prouchains de son lignage se logèrent au chasteau, et les aultres au bourc ; et fut la feste moult grande, et donna Raimondin à tous les barons qui là estoient de moult riches dons. Mais le peuple du pays sceut que celluy qui estoit filz de leur propre seigneur estoit venu, si en furent moult joyeux, et luy fisrent moult de beaulx presens, selon l'usage du pays, comme de vins, de bestiaulx, de poisson, de foin, d'avaine, et moult de aultres choses ; et estoient moult joyeux, puy que il ne plaisoit à Raimondin de demourer ne de tenir la terre, qu'ilz estoient eschous en la dicte lignée de leur seigneur, pour ce qu'ilz estoient hors de la subjection de la lignée de Josselin. Adonc Raimondin les mercia moult gracieusement de leurs presens, et leur pria et commanda qu'ilz fussent tous bons et leaulx subjectz à Henry, à qui il avoit donné la terre. Et ilz luy disdrent que si feroient-ilz. Et se taist l'istoire de plus parler en avant d'eulx, et commence à parler des espies qui là estoient mesmes en aiguet, dont l'ung se partist et s'en alla vers le recept où le chastellain de d'Arval et le lignage de Josselin estoient tous prestz. Et lors les deux aultres espies demourèrent pour sçavoir quel chemin Raimondin tiendrait.

En ceste partie nous dist l'istoire que Raimondin se partist de ceulx de son lignage de Leon, et s'en vint

à Quemegnigant, et là s'enforcha la feste moult fort ; et aprez la feste Raimondin vout là prendre congié de tout son lignage ; mais ilz misrent le plus grant remède qu'ilz peurent affin qu'il demourast encores huict jours, et oultre sa volenté ; mais non obstant il faisoit le plus bonnement leur plaisir qu'il pouvoit. Et en ce temps pendant vint à Henry, le filz de son oncle Alain, ung homme qui luy dist que, en trespasant par emprez le recept dessusdit où estoit le chastellain d'Arval à bien deux cens hommes d'armes, il avoit entendu par aulcuns des varlés d'icelluy chastellain que ilz actendoient gens à qui ilz ne vouloient point de bien ; mais il ne lui avoit pas descouvert qui ilz aguestoient ; et tous ces affaires compta-il à Henry. Et quant Henry l'entendist il prinst tantost ung de ses escuiers et l'envoya vers le lieu assavoir que c'estoit. Et celluy, qui fut moult diligent, fist tant qu'il en congneut la plus grant partie et quelle quantité ilz estoient, et tantost retourna à Henry, et lui compta ce qu'il avoit trouvé, et qu'ilz estoient bien de cinq à six cens combatans ; et, ces nouvelles ouyes par Henry, il deffendist au messagier moult expressement qu'il n'en parlast à personne, et tantost appella son frère Alain et aulcuns aultres des plus notables de son lignage, et leur compta tout cest affaire. Par foy, disdrent-ilz, nous ne sçavons que penser que ilz tendent à faire sinon que ilz se vouldissent venger de Raimondin nostre cousin, ou nous mouvoir guerre sur ceste querelle ; et toutesfois il est bon d'y pourveoir de remède, et mandons tous nos amis et nous tenons secretement ensamble, et verrons quelle fin ilz feront, affin que, se ilz venoient vers nous ne sur nous, que ilz ne nous trouvent à descouvert, et aussi se Raimondin se part, qu'il ne soit pas surprins d'eulx ; et

se ilz ont entention de luy mal faire, ce n'est que de luy oster la vie. Par foy, disdrent les aultres, c'est verité. Or, delivrons-nous de faire nostre mandement si brief et si celleement que on ne le sache que le mains que nous pourrons; et ainsi le firent-ilz, et eurent dedens le second jour jusques à quatre cens hommes d'armes, que de leur lignage, que de leurs aliez, avecques eulx, et les firent loger en ung bois où moult peu de gens le sceurent. Or advint que Raimondin ne vult plus demourer, et prinst congie de Alain son oncle, qui demoura à Quemegnigant moult doulent de sa departie; et ses deux enfans le convoièrent à bien grant foison de leur lignage; et comment qu'il fut ilz ne le voulurent oncques laisser aller, et faisoient tousjours leurs gens traire arriere sur le costé, et chevauchèrent tant qu'ils approuchèrent à une lieue prez de la foretsz où le recept du chastellain estoit, qui, par ses espies, sceut leur venue et e dist à ses parens en ceste manière: Or verra-on qui oncques ama Josselin ne Olivier son filz; il le levra bien monstrier ici pour venger leur mort; car cy povons à ce coup mettre à mort tout le lignage l'icelluy, et lui avec, qui nous a fait telle honte et aux nostres. Et ceulx luy respondirent que jà piet n'en eschappera qu'ilz ne soient tous mors; mais ainsi comme le proverbe dict, tel cuide venger sa honte qui l'acroit, car ainsi fut-il du chastellain et de ses parens. Et ce temps pendant vint le chevalier ancien à Raimondin, et luy dist en ceste manière: Sire, il vous est bien mestier que vous chevauchez par ceste forest tout armé, vous et vos gens, par ordonnance: car le lignage de Josselin que vous avez destruiect ne vous aime pas; si pourroient vous et vostre compaignie porter dommage se ilz vous trouvoient desgarnis; et le cueur me dit que nous



les trouverons assez tost. Et jà estoient armez Alain et Henry et tout son lignage, et avoient envoié tous leurs gens devant en embuche au mains à demy lieue du recept. Donc, quant Raimondin eut fait armer ses gens et eut mis le panon à vent, et veoit que ceulx de son lignage estoient tous armez, si ne sceût que penser, et aussi les aultres ne sceurent pas pour quoy Raimondin et ses gens estoient armez; mais ilz luy disdrent tantost toute la verité, et comment ilz avoient jà envoié devant quatre cens bassines pour le garder de leurs ennemis. Par foy, dist Raimondin, courtoisie ne doibt pas estre mise en oubli, ne elle ne sera mie, dieu avant, au temps advenir, se vous avez le besoing de moy. Et en ce parti chevauchèrent tant qu'ilz entrèrent en la forest; et faisoit moult beau veoir Raimondin chevaucher devant, le baston au poing, mettant ses gens en ordonnance. Et à tant se taist l'istoire de luy, et parle du chastellain et de ses parens, et qu'ilz firent.

L'istoire nous dict que le chastellain estoit en son recept, et attendoit l'espie qu'il avoit dernièrement envoié assavoir moult quant Raimondin entreroit en la forest; et il exploita tant qu'il vit approucher Raimondin. Lors retourna au recept, et dist au chastellain : Sire, voiez-le cy venir. Et quant le chastellain l'entendist, si escria à haulte voix : A cheveu, qui oncques aimas Josselin du Pont de Leon et Olivier son filz, si me suyvez. Adonc monta chascun à cheveu, et furent tant acreuz qu'ils furent bien huyt cens combatans, et se misrent à chemin parmy la forest à l'encontre de Raimondin, et passèrent par devant l'embuche que Henry et ses proesmes avoient envoié; et les laisserent passer sans eulx descouvrir; et puy se misrent aprez eulx en chemin, et ceulx chevauchè-



rent tant qu'ilz rencontrèrent Raimondin et sa route. Mais quant ils les visrent en chevauchant tous armez en ordonnance, si furent tous esbahis; et toutesfoiz n'avoit en celle première route que les varlès et environ cent hommes d'armes, et leur escrioient: A mort, à mort, mal acointastes celluy qui nous a fait la honte et le dommaige de Josselin nostre cousin. Et quant ceulx l'entendirent, si se mettent à part et font sonner leurs trompettes; et ceulx leur coururent sus, et firent moult grant dommaige aux gens de Raimondin avant que Raimondin y peut arriver, lequel chevauchoit de tire à desroy tant que le cheveu pouvoit courre, et se fiert entre ses ennemis, la lance baissée, et porta le premier que il rencontra par terre, et puis traist l'espée et fiert à tort et à travers, à destre et à senestre, et porte à ses ennemis moult de dommaige. Mais, quant le chastellain le vit, il fut moult douteux; et adoncques le monstra à trois de ses cousins germains: Voiez-vous le chevalier qui a fait la honte à tout nostre lignage; se nous estions delivrez de celluy, le remanant ne pourroit gaires durer contre nous. Adonc poignent à luy tous quatre leurs chevaux les lances baissées; les deux furent sur la comble de l'escu et les aultres deux sur la coupe du bassin; et tant le fièrent rudement que ilz ruèrent luy et son cheveu par terre, et s'en passèrent oultre; mais quant il vit qu'il estoit abbatu et luy et son cheveu, il point tantost, comme couroucé, le cheveu des espous, et le cheveu, qui fut fort et vitte, se remet sur ses genoux, et après ressault sur ses piés legièrement, que oncques n'en perdist les estriers ne l'espée de la main. Et adoncques se tourna sur le chastelain, et le fiert de l'espée sur le bassin si rudement, à ce que le bras fut fort et l'espée pesante, qu'il fut si estourdi

qu'il perdist les deux estriers, et luy va voler l'espée hors de la main ; et en passant le hurta de l'espaule tellement qu'il le fist tomber de dessus le cheveu à terre ; et en celluy point la presse des gens commença à venir si grande qu'il fut tout deffoulé des piés des gens et des chevaux. Lors commença la bataillè grande et fière, et y eut grant dommaige d'un costé et d'aulture. Et adonc est venu l'ancien chevalier , Henry et Alain par la meslée ; là eut grant meslée et moult aspre, là fait Raimondin moultz grans faitz d'armes, et de dommaige à ses ennemis ; mais le chastellain est hors de la presse, et luy ont rendu ses gens ung fort cheveu, et il monte sus. Là se refforcha moult la bataille, et quant ses gens le visrent remonté , ilz prindrent grant cueur en eulx, et se combatirent moult asprement ; et en y eut moult de mors d'une part et d'aulture ; et sachiés que Raimondin et ses gens soustenoient grans faitz, car l'adverse partie estoit moult forte, et moult bien se combatirent et vaillamment. Mais l'embuche de Henry leur vint par derrière et les assaillirent de tous costez que ilz ne sceurent que faire, ne ilz ne se peurent deffendre , ne ilz ne povoient fouyr. Et adonc fut pris le chastellain et fut rendu à Raimondin, qui le commanda à garder à l'ancien chevalier et à quarante de ses hommes, et furent tous les aultres pris et mors en peu d'eure.

Et ce fait s'en vindrent au recept , et dist Raimondin à ses parens : Or, seigneurs, je vous doibz bien aimer et gracier du noble secours que vous m'avez fait en ceste journée. Et je sçay bien de vray que se n'eust esté l'aide de Dieu et de vous , que ce triste m'eut mis à mort en traïson. Or regardons qu'il est bon de faire. Parfoy, dist Henry, sire, faictes-en vostre volenté. Je vous diray, dist Raimondin, que

nous ferons : faisons pendre tous ceulx qui sont du lignage de Josselin , environ ce recept ; et le chastelain et les aultres envoions au roy des Bretons pour tesmoingner la traison qu'il nous a faite ; si en prendra telle pugnition qu'il luy plaira. Parfoy, disdrent-ilz tous , vous dictes tresbien, sire. Adonc furent cherchez tous les prisonniers, et furent pendus aux fenestres et aux huys tout en l'environ du recept ; et tous ceulx qui estoient du lignage Josselin et le chastelain liez, et les envoya par Alain, accompagné de trois cens hommes d'armes, à Vannes par devers le roy, qui là estoit retrait ; et luy presenta Alain le chastelain de d'Arval tout le premier, et tous les autres aprez, et luy racompta Alain toute l'adventure, et luy dist comment Raimondin se recommandoit moult de fois à sa bonne grace, et qu'il ne luy vouldist displeire se il avoit pris vengeance de ses ennemis, qui l'avoient voulu destruire et murtrir en traison ; et qu'il luy envoioit le chastelain et les autres pour sçavoir la verité du fait, et qu'il en prist la pugnition à sa volenté. Et comment, dist le roy , chastelain, fustes-vous si hardi de faire tel outrage ne telle derision pour la raisonnable justice que nous avons fait faire en nostre royaume, veu et considéré la grant traison que Josselin et vostre oncle a congneu qu'il avoit fait ? Par Dieu , dist le roy , vous en fuste moult oultrecuidé , et c'est bien à droit se il vous en est mal advenu. A, noble roy , dist le chastelain , prengne vous pitié de moy , car la grand douleur que j'avoie de la deshonneur que Raimondin avoit fait à nostre lignage le m'a ainsi fait faire.

Par foy , dist le roy , c'est mauvaise compaignie que de triste ; il fait bon fermer l'estable avant que les chevaux soient perdus ; je vueil bien que vous

sachez que jamais ne voudrez occire gentil ne noble homme en traison, car jamais ne mengeray tant que vous soiez pendu avec vostre oncle : car vous luy tiendrez compaignie, et tous ceulx qui sont avec vous. Et adoncq le roy fist prendre tous ceulx de sa route, et furent pendus ; et envoya le chastellain à Nantes, et là il fut pendu emprez Josselin son oncle et Olivier son cousin. Et ainsi garda bien le roy des Bretons justice en son temps. Et se taist l'istoire quant à present d'en plus parler, et retourne à Raimondin et à ses parens.

Or dist l'istoire que, quant Alain fut retourné à Raimondin au recept, et qui luy eut compté et aux aultres ce que le roy avoit fait, ils disdrent que le roy avoit fait vaillamment et comme homme vaillant et loyal justicier. Adoncques appella Raimondin Henry, Alain et les autres de son lignage, et dist à Henry et Alain en ceste manière : Beaulx cousins, à vous enjoinctz que vous facés fonder une prieuré de la Trinité de huict moynes, et de la bien renter, à chanter à tousjoursmais pour l'ame de mon père et du nepveu du roy, et pour ceulx qui sont trespassez de celle folle entreprinse. Et ilz disdrent que si feroient-ilz ; et leur pria Raimondin que ilz le recommandassent au roy de Bretagne et aux barons et à Alain leur père. Et lors il prist congié d'eulx, et ilz furent moult doulens de son departement, et aussi de ce qu'il ne les laissa plus avant aller. Et sachiés que au departir menèrent les deux frères moult grant douleur ; et entretant il convint que ilz s'en departissent ; et à tant s'en retournèrent vers Quemegnant, et Raimondin s'en vint à Guerande, là où il fut moult festoié et moult chierement tenu. Et à tant se taist l'istoire de plus parler de luy pour le

présent, et retourne à parler comment Henry et Alain prindrent congîé de leur lignage et revindrent à leur père.

L'istoire dict que Henri et Alain prindrent congîé de leur lignage, et vindrent à leur père, et comptèrent toute l'aventure du chastelain, et comment s'en estoient partis de leur cousin, et comment il leur avoit enjoinct de fonder la priuré. Par foy, dist Alain, c'est bien le pays delivré du lignage de Josselin; Dieu ait des ames mercis, combien qu'ilz ne nous alassent oncques. Or, beaulx enfans, je vous diray ce que vous ferez. Tout premièrement vous irez au roy et luy requerrez qu'il vous donne place pour édifier la priuré; et luy dictes la manière comment vostre cousin le vous a enjoinct, et je croy qu'il vous en ira bonne responce. Et ilz luy respondirent que cy seroient-ils. Et à tant se partirent de leur père, et à tant chevauchèrent que ilz vindrent à Vannes, et trouvèrent que le roy estoit parti, et estoit allé à Bussinnon pour soy ésbatre et desduire à la chasse. Et adonc ilz montèrent à cheveu et vindrent au port, et passèrent et entrèrent en la forestz, et chevauchèrent tant qu'il vindrent au chasteau, et trouvèrent que le roy estoit allé au parc chasser; et les deux frères s'en allèrent après, et trouvèrent le roy dessoubz ung grant arbre sus ung estang, où il attendoit le cerf que les chiens chassoient. Adonc les deux frères se trairent à part, pour ce qu'ilz ne le voloient pas destourber le roy à veoir son deduit, qui les apperceut bien et leur en sceut moult bon gré; et ne demoura guères que le cerf est venu, qui se va ferir en l'estang; et fut pris par force de chiens, et fut tiré hors de l'eau: et fut faicte la curée et donné le droit aux chiens. Lors se trairent Alain et Henry par

dévers le roy, et le saluèrent moult honnourablement, et firent bien le messaige que Raimondin leur cousin leur avoit enchargé. Et adonc le roy les bienveigna, et moult leur enquist de l'estat de Raimondin; et ilz luy disdrent ce qu'ilz en avoient veu; et puy luy racomptèrent comment il leur avoit enjoinct de fonder et parfaire une prieuré de huict moynes, et de les renter pour chanter pour l'ame du nepveu du roy et pour l'ame de Henry son père, et pour tous les autres qui avoient receu mort pour celle querelle; et aussi comment ilz luy priaissent de par luy pour qu'il leur vouldist donner place pour fonder la dicte prieuré. Par foy, dist le roy, la requeste est moult raisonnable; et tout maintenant je vous meneray au lieu où je veulx qu'elle soit fondée. Adonc ilz saillirent de la garene et vindrent tout selon le mur au bout du clos; et adonc dist le roy: Beaulx seigneurs, faictes icy fonder une prieuré, et prenez tant de place comme vous vouldrez; et je vous habandonne la forest pour y prendre le boys à charpenter; et quant les moynes y seront establis, je leur en donne pour leur user et à tous leurs adhe-rens et habitans, et leur habandonne le pescher en la mer qui est prez de ceste place à ung quart de lieue, et de prendre en la forest oyseaulx et sauvaignie pour leur vivre et de leur hostel; et si leur donne toutes les terres arables qui cy sont environ à demy lieue; et de tout ce leur fist bonnes lettres. Et de ces choses le vont mercier moult humblement les deux frères, et font tantost venir massons et charpentiers, et font en peu de temps l'eglise et la prieuré achever, et y misrent moynes blancs jusques à huyt personnes religieux, qui portent en leur habis divers une croix azurme, et les rentèrent bien pour

leur vivre bien aisement , et encores y est. Et à tant se taist l'histoire du roy des Bretons et des deux frères, et commence à parler de Raimondin, et comment il se gouverna depuys.

En ceste partie nous tesmoigne que tant demoura Raimondin en la terre de Guerende qu'il mist à accord aulcuns barons qui estoient ensamble long-temps avant en grans dissessions ; et fist tant qu'ilz furent bons amis ensamble, et que le pays fut bien en paix. Et à tant prinst congié des barons et du peuple, qui furent fort doulens de sa departie. Et à tant chevaucha que il vint en la terre de Poetou, là où il trouva grant foison de haultz forestz non habitées, et en aulcuns lieux avoit grant foison de sauvaignie, comme cerfz, biches, dains et porcs, et autres bestes assez, et en d'autres lieux grant foison plainnes moult belles, praries et rivières. Par foy, dist Raimondin, c'est grant dommaige que en ce pays ne habite de peuple, car moult est grasse la contrée ; et en pluseurs lieux sur la ripvière y avoit moult belles places non habitées, lesquelles, à son advis, fussent moult pourfitables se elles fussent bien entretenues. Et à tant chevaucha Raimondin qu'il vint en une ancienne abbaye moult grande et grosse, qui estoit appelée Maillières, et avoit à compter l'abbé cent moynes sans les convers ; et là se herberga Raimondin, par la grant plaisance que il prist en ce lieu, par trois jours et trois nuïcts. Et y donna Raimondin de moult beaulx joyaulx, et puy s'en partist, et s'en vint chevauchant tant qu'il approucha Lusignen ; et premier appercent la tour trompée et le bourc, et lors il ne cuida pas estre là où il estoit, car il mescongnoissoit le lieu pour la tour et pour le bourc qui y furent faictz depuys qu'il estoit parti



et moult se esmerveilla quant il ouyt les trompettes de la tour tromper.

En ceste partie nous dict l'istoire que quant Raimondin vint au dessus de Lusignen, et il apperceut le bourc, qui estoit clos de haultz murs et grosses tours drues, et les fossez bien parfons tous taillez de pierre de taille, et vit la tour qui estoit grosse et entre le fort et le bourc, et qui le surmonte de haulteur plus d'une lance, et y ouyt les trompettes de plus en plus quant ilz appercevoient les gens qui venoient avec Raimondin eulx spacer et esbatre. Comment, dist Raimondin à l'ancien chevalier, que peut cecy estre? il me sembloit ores que j'avoie failly de venir à Lusignen; et encore me le semble-il. Adonc comença l'ancien chevalier à rire, et Raimondin luy va dire : Comment, sire chevalier, truffez-vous de moi? je vous dis pour certain que se ne fut la tour et le bourc que je vois, je cuidasse estre à Lusignen. Par foy, dist le chevalier ancien, tantost vous vous y pourrez trouver, se Dieu plaist, à grant joye. Or vous diray-je des queux, des varlès et des somniers qui estoient allez devant, et avoient annoncé la venue de Raimondin à Melusine; combien qu'elle les creut bien, elle n'en fist point de semblant, que tantost elle fist appareiller et apprester tout le peuple, et les fist aller à l'encontre de Raimondin; et elle mesmes y alla à grant foison de dames et damoiselles, chevaliers et escuiers, montez et arroiez moult honnourablement. Adonc Raimondin regarda devant soy, et voyt arriver les gens du font de la vallée, venans et saillans deux à deux par ordonnance; si se esmerveilla moult, et, quant ilz approuchèrent, si escrièrent tous à une voix : Ha ! Ha ! bien soiez-vous venu, monseigneur. Et adonc congneut Raimondin

pluiseurs de ceux qui le bienveignèrent , et leur demanda : Beaulx seigneurs , dont venez-vous ? Monseigneur, disdrent-ils, nous venons de Lusignen. Dist Raimondin : Y a-il gaires d'icy ? Par foi, monseigneur, dirent-ilz, qui apperceurent bien qu'il mecongnoissoit le lieu ou le bourc et la tour qui y estoient faitz depuys son departement dudit lieu ; monseigneur, vous ne le cognoissez pour tant que ma dame a cy fait faire ce bourc et celle tour depuys que vous vous en partistes ; et voiez la cha où elle vient à l'encontre de vous. Adonc fut Raimondin esbahi, et ne dist pas tant qu'il pensoit ; mais, quant il luy souvint qu'elle avoit fait le fort de Lusignen et le chasteau en si peu de temps , il ne se donna plus de merveilles. Et à tant vint Melusine, qui moult doucement le bienveigna et le receipt moult honnourablement en disant en ceste manière : Monseigneur, je suis moult joyeuse de ce que vous avez si bien besongné et si honnourablement en vostre voyage : car on m'a jà tout dit et compté. Et Raimondin lui respond : Madame , c'est Dieu mercis et vous. En parlant de ces choses , ils arrivèrent à Lusignen et descendirent, et fut la feste moult grande, et dura bien huict jours ; et y estoit le conte de Forestz, qui moult bienveigna Raimondin, son frère. Et aprez la feste se partirent de Lusignen, et vindrent à Poitiers par devers le conte , qui moult les bienveigna. Et adonc il demanda à Raimondin où il avoit si longuement esté ; et il lui recorda toute son adventure ; et , à brief parler, le conte Bertrand en fut bien joyeux ; et ce fait, prindrent les frères congié de lui. Et lors l'ung s'en alla en Forestz, et Raimondin à Lusignen, où Melusine le receipt moult liement. Et estoit pour lors la dame ençainte, et porta son terme, et accou-

cha en son temps du second enfant, qui fut ung filz, et eut nom en baptesme Odon; et eut une oreille sans comparaison plus grande que l'aulture; mais de tous aultres membres il estoit bel à grant devise, et estoit moult bien formé. Et celluy Odon eut puis espouse la fille au conte de la Marche, et en fut conte. Et à tant se taist l'istoire à parler de l'enfant et parle de Raimondin et Melusine plus avant.

L'istoire nous dist et certifie que la dame eut jeu son terme et qu'elle fut relevée, la feste fut moult grande, et y eut moult grant foison de nobles gens; et se partist la feste moult honnourablement. Et en celle année fist la dame faire le chasteau et bourc d'Annelle, et fist faire Waviront et Mermant; et puis fist faire le bourc et la tour de saint Maissant, et commença l'abbaye, et faisoit moult de biens aux povres gens.

Et, au second an aprez, eut ung fils qui eut nom Guion, et fut moult bel enfant; mais il eut ung œil plus hault que l'aulture. Et sachiés que Melusine avoit tousjours si bonnes nourrices, et estoit si tressongneuse de ses enfans, qu'ilz croissoient et amendoient si tresfort que chascun qui les veoit s'en donnoit grans merveilles. Et en celluy temps fist fonder Melusine nobles lieux par le pays qu'ils avoient ès mettes de la conté de Poetou et duchié de Guienne; elle fist le chasteau et le bourc de Partenay, si fort et si bel que ce fut sans comparaison; puys fonda les tours de la Rochelle et le chasteau, et commença de la ville une partie; et avoit une grosse tour à trois lieues que Julius Cesar fist faire, et l'appelloit-on la tour des Anglois, pour ce que Julius Cesar portoit l'aigle en sa banière comme empereur. Celle tour fist la dame environner de fortes tours et grosses, et fors murs,

et la fist nommer le chasteau Aiglon. Et depuis ediffia Pons en Poetou, et Saintes, qui pour lors estoit nommée Linges; et puy fist Tellemont et Tallemondoys, et moult d'aultres villes et forteresses, et acquist tant Raimondin en Bretaigne et Guienne et Gascongne, qu'il n'y avoit prince nul qui marchast à luy et qui ne le doubtast à couroucer.

Et aprez porta Melusine le quart enfant et s'en delivra à terme, et eut nom Anthoine. Nul plus bel enfant ne fut veu; mais au naistre il apporta en la joue ung grif de lyon, de quoi moult furent ceulx qui le visrent esbahys.

Sy nous dist l'istoire que le septiesme an aprez Melusine porta le quint enfant, et s'en delivra à terme, et eut nom Regnault. Nul plus bel enfant ne pouvoit-on veoir; mais au naistre il n'apporta que ung œil sur terre; mais il en veoit si cler qu'il veoit venir sur mer la nef, ou par terre aultre chose, de trois veues, qui montent bien xxj. lieue. Celluy fut doulx et courtoys, si comme vous orrez en l'istoire, ci-aprez.

L'istoire nous dist que le huitiesme an Melusine enfanta le siziesme enfant, qui fut ung fils, et eut nom Geuffroy, et au naistre il apporta sur terre ung grant dent qui lui sailloit de la bouche plus d'ung pouce, nommé Geuffroy au grand dent. Et celluy fut moult grant, hault et bien formé, et fut fort à merveilles, hardy et cruel, et tant que chascun le doubtoit, quant il fut en eage, qui en oyoit parler. Il fist en son temps moult de merveilles, ainsi comme orrez ci aprez en l'istoire.

L'istoire dist que la neufiesme année Melusine enfanta ung fils; ce fut le septiesme, et eut nom Froimond, qui fut assez beau; mais il eut au naistre sur le nez une petite tache vellue ainsi comme se ce fut

la peau d'une talpe ou d'ung fouant. Et fut en son temps moult devot, et fut puy, par le commun accord de son père et de sa mère, fait moyne de Maillières, dont vous orrez ci aprez en l'istoire.

En ceste partie nous dist l'istoire que Melusine demoura environ deux ans sans porter; mais il fut vray que la onziesme année elle porta ung filz qui fut le huitiesme, et ce fut moult grant merveilles, car il apporta au naistre trois yeulx sur terre, l'ung desquelz eut au front; et fut si cruel et si mauvais qu'il occit, avant qu'il eut quatre ans, deux nourrices. Et de cestuy-cy maint l'istoire, et comment il fut mort et enterré au moustier neuf à Poitiers.

Or dict la vraye histoire que tant nourrist Melusine ses enfans que Urian, qui fut le premier né, eut quelque XVIII ans, et fut moult grant et moult bel, et fort à merveilles, et faisoit moult de force et d'espartise; et le plaignoit chascun de ce qu'il avoit si estrange visaige: car il avoit court et large, l'ung des yeulx rouge et l'autre tout pers; et les oreilles si tresgrandes comme les mamielles d'ung vau. Et Odon son frère avoit XVII ans, et Guion XVI, et amoient l'ung l'autre Urian et Guion; et estoit Guion si vitte et si mauvais, et si appert, que tous ceulx qui le veoient s'en donnoient grans merveilles; et tousjours s'entretenoient Urian et Guion, et les amoient tous les nobles du pays, et les enfans l'ung l'autre tant qu'ilz ne povoient plus, et faisoient souvent faitz d'armes en joustes, en tournois et en becheris. Or advint que, en celuy temps, deux chevaliers poetevins vindrent de Jherusalem et comptèrent les nouvelles par le pays que le souldan de Damas avoit assiegé le roy de Chippre en sa cité de Famagosse, et que il le tenoit en moult grant destresse; et n'avoit

celluy roy de heritier que une seule fille , laquelle estoit moult belle. Et furent tant portées ces nouvelles par le pays que Urian le sceut ; et adonc il dist a son frère Guion : Par ma foy , beau frère , ce seroit grant aulmosne de secourir celluy roy encontre les Sarrazins ; nous sommes jà huit enfans masles ; la terre de nostre père ne demoura pas sans heritier , posé que de nous ne fut riens ; dont pour telle cause nous devons tant plus pener de voyager pour acquerir honneur. Par foy , dist Guion , vous dictes verité ; mais pourquoy le dictes-vous ? Car voiez moy cy prest à faire ce qui vous plaira. Par foy , dist Urian , vous dictes bien : or mandons les deux chevaliers qui sont venus du saint voiage d'oultre mer , et enquerons plus avant la verité de cest affaire. Et doncques mandèrent les deux chevaliers , qui vindrent moult liement ; et quant ilz furent venus , les deux enfans les bienveignèrent moult amiablement , et prez leur commencèrent à enquerir la manière de leur voyage , des usages et des manières du pays où ilz voient esté ; et ilz leur en disdrent la pleine verité. Par foy , dist Urian , nous avons entendu que vous avez passé par une yisle où y a ung roy cristien qui est moult oppressé d'ung souldan des Sarrasins ; si nous merveillons que vous ne demourastes en la guerre avec le roy cristien pour luy aider et conforter , vous qui estes renommés si vaillans chevaliers , ce qui nous semble que tous bons cristiens sont teus de aider l'ung l'autre contre les mescreans ; et aussi ce nous semble grant aulmosne de les reconforter en celle nécessité. Ad ce respondirent les deux chevaliers : Par foy , damoiseau , nous voulons bien que vous sachiez que , se nous eussions veu la voye comment nous eussions peu entrer en la ville sans estre

mors ou prins, nous y feussions moult volentiers entré, et eussions attendu l'aventure avecq le roy de Chippre telle que Dieu le nous eut voulu envoyer, et vousçavez que deux chevaliers ne pourroient mie porter le faitz contre bien lx. ou iiij. vingz mille Sarrazins; et ce fut la cause qui nous destourna d'y aller: car vous devez bien sçavoir que celluy est bien fol qui souffle contre le vent pour le cuidier faire taire et surmonter. Par foy, dist Urian, vostre excusation est bonne et juste; mais dictes-moy se gens qui auroient pouvoir de mener de xxij. à xxv. mille hommes d'armes y pourroient rien faire et venir à ses ententes pour secourir à celluy roy? Adoncques l'ung des deux chevaliers respondist: Par ma foy, Sire, ouy, veu et considéré que la cité est forte et le roy est moult vaillant et bataillereux de sa personne; et y a assez competamment de vivres et de bonnes gens d'armes pour garder la ville; et encore y a pluseurs fortresses où ceulx de Rodes se viennent refreschir, de quoy le roy de Chippre et ceulx de la cité ont grant reconfort. Et sachiés qu'ilz y viendroient bien, et voudroie que mon compaignon y vouldist aller en celle compaignie que vous dictes, et nous y deussions aller et entreprendre l'aventure avecq eulx. Par foy, dist Urian, mon frère et moy vous recepvrans et y menerons, Dieu avant, et ne demourra gaires. Et quant ceulx l'entendirent, ilz furent moult joyeux, et dirent que, se ilz y vont, qu'il leur meut de grant vaillance et grant noblesse de cuer. Or se tait l'histoire de plus parler des deux chevaliers, et commence à parler de Urian et Guion, comment ilz prindrent congié de leur père et leur mère, et de l'aide qu'ilz leur firent.

---



*Comment Urian et Guion prindrent congîé de leurs père et mère, et de l'ayde qu'ilz leur firent.*

**E**n ceste partie nous dict l'istoire que Urian et Guion vindrent à leur mère Melusine, et luy commença Urian à dire moult saigement : Ma dame, se il vous plaist, il seroit bien temps que nous allissions voyager pour congnoistre les terres, les contrées et les pays estranges, affin d'acquérir honneur et bonne renommée ès estranges marches, par quoy nous fussions introduictz de sçavoir parler diverses langues avecq les bons, et de diverses choses qui sont par les estranges marches et pays qui ne sont pas communes par decha; et aussi, se fortune ou bonne adventure nous vouloit estre amie, nous avons bien volenté de conquérir terres et pays: car nous regardons que nous sommesjà, Dieu nous croisse, huyt frères, et sommes taillez, se Dieu plaist, d'en avoir autant ou plus; et à dire que le vostre fut parti en tant de parties pour nostre gouvernement, celluy qui deveroit tenir le chief de la seigneurie ne pourroit tenir ne avoir gaires d'estat, considéré et veu le grant estat que monseigneur mon père et vous tenez; car dès maintenant mon frère Guion et moy quitons nostre part de ce qui nous pourroit escheoir de par vous, excepté tant seulement vostre bonne grace, parmy l'aide que vous nous ferez presentement, se il vous plaist, pour nostre voyage, se Dieu plaist, accomplir. Par foy, enfans, dist Melusine, vostre requeste vous vient de grant vaillance de cueur, et pour tant elle ne doibt pas estre refusée; et sur ceste matère je parleray à vostre père, car sans son con-

seil ne vous doibz-je pas accorder vostre requeste. Adonc se part Melusine de là, et vint à Raimondin, et luy compta la requeste de ses deux enfans, lequel dist : Par ma foy, dame, se il vous samble que ce soit chose qui soit bonne à faire, faictes-en vostre voulenté. Sire, dist Melusine, vous dictes bien ; et sachiés qu'ilz ne feront en ce voyage chose qui ne leur tourne à grant honneur et prouffit, au plaisir de Dieu. Adonc revint Melusine à ses deux enfans, et leur dist ainsi : Beaulx enfans, pensez desormais de bien faire, car vostre père vous accorde vostre requeste, et aussi fais-je ; et ne vous soussiés de rien, car dedens brief temps je vous auray ordonné de vostre fait, à l'aide de Dieu, tellement que vous m'en sçauvez gré. Mais or me dictes en quelle partie vous voulez aller, affin de vous pourveoir de ce que vous fauldra. Adonc respondit Urian : Madame, il est bien vray que nous avons ouy certaines nouvelles que le roy de Chippre est assiegé du souldan de Damas en sa cité de Famagosse, et là, Dieu avant, nous avons entention de nous en aller pour le secourir contre les faulx mescreans sarrazins. Or va donc dire Melusine : Cy fault pourveoir tant du fait de la mer comme de la terre, et, à l'aide de Dieu, mes enfans, j'en ordonneray tellement que vous souviendra de moy ; et ce feray-je bien brief. Et à tant se vont agenoullier devant leur mère en la remerciant moult de ce humblement. Et la dame les drescha sus et les baisa chascun en la bouche tout en plourant, car elle avoit grant douleur au cueur, quelque chière qu'elle fist, de leur departement, car elle les amoit d'amour de mère, non pas d'amour de nourrice.

L'istoire dist que Melusine fut moult curieuse de apprestre l'affaire de ses enfans, et fist arriver au

port de La Rochelle grant et riche navire , tant gal-  
lées comme rampins et grosses nefz ; la maindre de  
deux couvertes et aulcunes de trois ; et fut la navire  
si grant que pour mener quatre mille hommes d'ar-  
mes. Et entretant mandèrent les deux enfans les  
deux chevaliers qui dudit voiage les avoient acoin-  
tez, et leur disdrent que ilz se appareillassent d'eulx  
mouvoir bien briefment comme ilz leur avoient pro-  
mis. Et ilz leur disdrent : Seigneurs , nous sommes  
tous prestz , et si vous avons acointé plusieurs gen-  
tilz hommes qui se appareillent et sont tous prestz de  
eulx envenir en vostre compaignie ; et tous desi-  
rons de vous servir et de vous faire plaisir. Par foy,  
dist Urian , tresgrans mercis ; nous les mainerons , se  
Dieu plaist , et vous aussi. Or doncques , à brief par-  
ler, tant fist Melusine que tout fut prestz , et eut  
quatre barons , que de Poetou que de Guienne , à  
qui elle bailla ses deux enfans en gouvernement , et  
eut grant foison de chevaliers , d'escuiers et de gen-  
tilz hommes , jusques au nombre de deux mille et  
cinq cens hommes d'armes et de cinq cens arbales-  
triers. Et adoncques les vivres , l'artillerie , les har-  
nois et les chevaux furent chargés ès vaisseaulx , et  
aprez montèrent les gens ès navires. Là veissiés pan-  
nons , bannières et estandars au vent , et sonner trom-  
pettes et instrumens , et les chevaux hanir et bran-  
doier , que c'estoit moult grant beaulté à veoir. Et  
prindrent les deux enfans congié de leurs frères et  
des gens du pays , qui moult tendrement plourèrent  
de leur departie. Et Raimondin et Melusine convoiè-  
rent leurs enfans jusques en la mer ; et , quant ilz fu-  
rent là venus , Melusine les traist à part en disant :  
Mes enfans , entendez ce que je vous veulx dire et  
commander.

Enfans, dist Melusine, voiez cy deux aneaulx que je vous donne, dont les pierres ont une mesme vertu; et sachiés tant que vous userez de leaulté, sans penser à mal ne à faire tricherie, et que vous les aiez sur vous, vous ne serez ja desconfis en nul fait d'armes, mais que vous aiez bonne querelle, ne sort ne enchantement d'art magique ou poisons de quelque manière ne vous pourront nuire ne grever, que si tost que vous les regarderez, qu'ilz n'aient perdu vertu et force; et lors elle en bailla à chascun ung. Ilz lui mercièrent moult, les genoulx à terre. Et aprez Melusine reprinst la parolle en disant ainsi: Mes enfans, je vous encharge que en tous les lieux là ou vous serez, que tous les jours vous oiez le service divin avant que vous facés aultre chose, et aussi en tous vos affaires que vous reclamez devotement l'aide de nostre createur, et le servez moult diligemment, et l'aimez et craignez comme vostre Dieu et vostre createur; et honnourez tousjours de vostre povoir nostre mère sainte eglise, et la soustenez, et soiez ses vrais champions contre tous ses malvueillans. Aidez et conseillez les femmes vefves, 'nourrices, ou faictes nourrir les orphelins, et honnourez toutes dames; reconfortez toutes pucelles que on voudroit desheriter desraisonnablement. Amez les gentilz hommes et leur tenez compaignie. Soiez humbles, doulx et courtoys, humains et humilians aux grans et aux petits; et, se vous voyez ung homme d'armes qui soit povre ou en petit estat de vesture, en mesure donnez-luy du vostre selon vostre aisement, et selon qu'il sera de value. Soiez larges aux bons; et quant vous donnerez quelque chose, ne le faictes pas attendre longuement; mais tous temps regardez quant, combien, ne pour quoy, et la personne le

vault, ou se il est maistre de sa maistrise. Et se vous donnez pour plaisance, gardez bien que folle largesse ne vous sousprengne, affin que aprez on ne se puist moquer de vous; car ceulx qui auroient desservi que vous leur feissiés aulcun bien s'en tiendroient pour mal contens; et les estrangiers se moqueroient de vous en derrière. Et gardez que ne promettez chose qui ne puissés tenir; et se promettez aulcune chose, ne faictes pas trop attendre cellui aprez la promesse, car longuement attendre esteint moult la vertu du don. Gardez-vous bien de convoitier la femme de nulluy de qui vous vueillez estre amez. Ne croiés ja conseil de garson, ne l'atraiez ja prez de vous se vous n'avez assaié ses meurs et conditions. Aussi ne croiez ja conseil d'avaricieux, ne tel homme ne mettez en office, car ilz pourroient plus faire de deshonneur qu'ilz ne pourroient faire de prouffit en leur vivant. Gardez bien que vous ne acroiez chose que ne puissiez bonnement paier, et, se nécessité vous constraint à acroire, tantost que vous en aurez l'aisement faictes-en restitution. Et ainsi pourrez-vous estre sans dangier, et vivre honnourablement. Et se Dieu vous donne adventure que vous conquerez pays, gouvernez bien vos gens selon la nature et condition qu'ilz ont; et, se ilz sont rebelles, gardez bien que vous les surmontez sans riens laisser passer des droitz de vostre seigneurie, et que vous soiez sur vos gardes tousjours, tant que tousjours la puissance soit vostre; car se vous vous laissez sus marcher, il vous fauldroit gouverner à leur voulenté; mais toutesfois gardez bien, quoy qu'ilz soient durs ou de bonnes aises, que vous n'y eslevez point velles coustumes qui soient desraisonnables, et prenez sur eulx vostre droit seullement, sans les tail-

ler contre raison ; car se le peuple est povre le seigneur sera maudit , et se besoing luy survenoit de guerre ou d'aulture necessité , il ne se sauroit de quoy aidier , dont il pourroit venir et escheoir en grant dangier et servitude , et n'en seroit ja plaint des estrangers ne des privez . Car sachiés que une toison d'une année est plus pourfitable que celle qui a esté tondue deux ou trois fois . Or , mes enfans , encores vous deffens-je que vous ne croiez ne n'aiez fiance en jongleur n'en flatteurs , ne d'aulture homme qui d'aulture mesdit en derrière , ne ne croiez conseil d'omme exillié ne fuitif de son pays , où il puit toucher au desir de nuire à ceulx qui l'ont exillé , se il n'y a tresbonne raison , et vous aussi bonne cause de luy aidier : car ce vous pourroit moult empescher de venir au degré d'onneur . Et aussi sur toutes choses je vous deffens orgueil et vous commande à tenir justice , et de faire raison aussi bien au grant comme au petit , et ne desirez pas à venger tous vos tors faitz , mais prenez amende raisonnable , qui la vous offrira , de chose de quoi on doit prendre amende ou hommaige ; ne desprisez ja vos anemis , tant soient petits , mais soiez tousjours en vostre garde à toutes heures , et gardez bien que , tant que vous aurez à estre conquerans , que entre vos compaignons ne vous maintenez comme sire , mais commun au petit et au grant , et devez parler et tenir à chascun compaignie selon sa qualité , et puy à l'un et puy à l'aulture ; car tout ce fait les cueurs des creatures famiablement attraire l'amour de ceulx à qui ilz sont humains , doulx , courtoys et humbles en seigneuries . Aiez cueur de fierté de lyon envers vos ennemis , et devez monstrer vostre puissance entre eulx et vostre seigneurie . Et se Dieu vous donne du bien , departez en à vos

compaignons selon que chascun en sera digne. Et quant à la guerre, croiez le conseil des vaillans hommes qui ont hanté le mestier et l'usaige d'armes honnourablement. Et aussi je vous deffens que vous ne facés ja grant traicté à vos ennemis: car en long traicté gist aulcune foys grant deception et grant perte pour la puissante partie; car tous temps les sages reculent pour plus loingz saillir; et le sage, quant il voit qu'il n'a pas la puissance de resister à la force de ses ennemis, il pourchasse tous temps ung traictié pour disimuler tant qu'il se voie en puissance, et qu'il puisse nuire et grever ses ennemis; et adonc en peu d'eure ilz trouvent voie pour quoy les traictez sont nulz. Et pourtant vous chastie que ne portez ja vostre ennemy où le puissies mettre en subjection par honneur, et lors se vous luy faictes courtoisie, il vous sera tourné à tresgrant honneur, et vous luy faictes mains par traicté, posé que se trouvast d'un costé et d'autre sans deception, se pourroient les aulcuns dire ou penser que vous y eussez aulcune doubte; combien que je ne dis pas que on doibve refuser bon traicté, qui le peut avoir, mais qu'il soit si brief ou si long que ce soit à tousjours mais sans plus en faire de memoire aux vivans, et au rouffit et l'onneur de celluy qui y pense avoir le plus grant droit, et qui luy a selon la commune renommée. Et ainsi comme vous avez ouy chastia et enseigna Melusine ses enfans, lesquelz l'en mercièrent moult humblement. Et adonc leur dist: Enfans, je vous envoie en vostre navire assez or et argent pour tenir vostre estat et pour bien paier vos gens jusques à quatre ans; et n'aiez doubte que vous n'aiez assez pain, biscuit, eaue doulce, vinaigre, cher, bissons sallées et bons vins jusques à grant temps;



et allez vous-en en la garde de Dieu, qui vous vueille garder, conduire et ramener à joye, et veus que vous pensez de bien faire, et de faire et de tenir à vostre pouvoir tout ce que je vous ay enjoinct.

---

*Comment Urian et Guion prindrent congïé de leur mère et entrèrent au navire.*

**A** doncques ils prindrent congïé de leur père et mère et entrèrent en leur vaisseau; ce fait, les ancrs furent tirées et les voilles levez. Les patrons firent leur recommandation à Dieu, selon leur coustume, que Dieu par sa benigne grace leur laisse faire et accomplir leur voyage, et puy s'empoindirent en la mer; et le vent se fiert en les voilles, et ilz s'en vont si rudement que en peu d'eure on en perdit le veoir. Adoncques s'en partirent Raimondin et Melusine et leurs gens, et s'en vindrent au chasteau Aiglon. Et se taist histoire à parler de eulx, et retourne à parler de Urian et Guion son frère, et de leurs gens qui vont nagant par la mer moult fort, et font adrescher leur chemin le plus droit qu'ilz pevent vers Chippre.

L'istoire dict que quant Urian et Guion furent partis de la Rochelle, que ilz errèrent par la mer moult grant temps, et passèrent par devant mainte ysle, et se refreschirent en plusieurs lieux. Et tant nagèrent qu'ilz virent venir par la mer pluseurs vaisseaulx qui chassoient moult fort deux gallées, et adonc tantost le patron aux deux frères dist ce; et ilz luy respondirent et demandèrent quelle chose estoit bonne à faire. Par foy, dist le patron, il est

bon de envoyer une gallée assçavoir moult quelles gens  
ce sont , et ce pendant nous ferons armer nos gens  
sur toutes adventures. Par foy, dist Urian, ce nous  
plaist. Et ainsi le firent. Et adoncques la gallée se  
part, et vint à l'encontre des aultres deux en escriant :  
Qui estes-vous là ? Et ilz respondirent : Nous sommes  
deux gallées de Rodés, qui avons esté trouvez des Sar-  
razins qui cy nous chassent , et nous voyons bien que  
vous estes cristiens , et le sont aussi tous ceulx qui  
vous suyvent. Par foy, disdrent ceulx de la gallée,  
ouy. Par mon chief, dist l'ung des patrons de Rodés,  
or les allez faire haster, car vous avez trouvé belle  
adventure : là sont des gens du souldan de Damas  
qui s'en vont au siège de Famagosse ; et qui les pour-  
roit ruer jus il auroit fait grant secours au roy de  
Chippres , et grant dommaige du souldan. Adonc  
quant ceulx de la gallée l'oyrent , ilz se retournèrent  
tout court , et le vont noncer aux frères et à leurs  
gens. Et lors vint monter sur les chasteaulx des mas,  
gens, lances et dardes ès poingz , et paveizier nefz et  
gallées , et habiler et monter canons et arbalestriers,  
sonner trompettes , et courir sus les Sarrazins , et par-  
tir ses gallées à force de rames. Par foy, c'estoit grant  
beaulté à veoir ; et quant les Sarrazins apperceurent  
si grant navire venir sur eulx , ilz ne sceurent que  
penser ; car jamais ilz ne eussent cuidé que si grant  
puissance de cristiens fut si prez de là. Et toutes fois  
ne mirent-ilz en arroy en reculant ; mais nos gallées  
es vont environner tout entour , et commencèrent à  
faire jeter leurs canons moult horriblement d'ung  
costé et d'autre. Et quant les Sarrazins virent que c'es-  
toit acertes , et que ilz ne pourroient fouyr, si prin-  
rent ung vaisseau qu'ilz avoient prins sur ceulx de  
Rodés et avoient jetté les gens qui dedens estoient en

la mer, et l'emplirent de buche, de huile et gresse, avecq souffre; et quant ils virent nos gens approuchier, ilz boutèrent le feu dedens; et quand le feu fut bien allumé, ilz l'esquippèrent vers nos gens crestiens. Mais ilz s'en donnèrent bien garde, et s'en sceurent bien garder, car ilz les vindrent assaillir de l'autre costé; et maugré eulx ilz entrèrent entre eulx. Et là commença le tret des arbalestriers et des canons; mais la grant flotte de nos gens vint sur eulx, et par force d'ondes, la nef qui ardoit se bouta en eulx, et ne sceurent si bien garder qu'elle ne leur embrasast trois de leurs nefz, et furent tous ceulx qui estoient dedens noiez et peris, et ce qui estoit dedens enfondré en la mer; et finalement les payens furent desconfis et tous mors ou prins; et gagnèrent nos gens grant avoir, que les deux frères donnèrent tout aux compagnons et à ceulx des deux gallées de Rodes, et s'en vindrent refreschier en l'isle de Rodes; et donnèrent aux frères de la religion les fustes qu'ils avoient conquises; et là refreschirent leurs caues et sejournerent quatre jours; et le maistre de Rodes leur pria qu'ilz voulussent venir en la ville esbatre, et ilz si firent, et moult honnourablement ilz furent receus. Et le maistre leur enquist adonc de leur voyage la cause, et ilz lui disdrent qu'ilz alloient secourir le roy de Chippre. Et adoncques il leur demanda moult doucement qui ilz estoient, et les deux frères luy en disdrent la verité. Lors fist le maistre plus grant feste qu'il n'avoit fait par avant, et leur dist qu'il manderait de ses frères, et qu'il s'en iroit avecques eulx secourir le roy de Chippre; et les frères l'en mercièrent moult humblement.

Or dist l'istoire que tant demeurèrent les frères à Rodes, que le maistre eut fait son asssemblée de six

gallées où il avoit moult d'aspres gens d'armes et grant quantité de bons arbalestriers; et vont tant vaugant par la mer qu'ilz approchèrent de l'isle de Coles, et vont appercevoir grant fumière. Adonques le grant maistre de Rodes, qui fut en la gallée, va dire à Urian : Sire, en bonne foy il seroit bon que on envoiast vers celle isle ung rampin ou deux, assavoir se il y a gens, et s'ilz n'y sont, il n'y a gaires qu'ilz s'en sont allez. Il me plaist bien, dist Urian. Et adonques ils envoyèrent; et le rampin s'en va senglant à effort de nager, tant qu'ilz vindrent à l'isle; et y descendirent pluseurs, et y trouvèrent grant foison de feus et de logis, dont à l'expérience qu'ilz virent, il leur sambla qu'il y povoit bien avoir logé quelque xxx. mille hommes d'armes, et que ilz povoient avoir là sejourné par quatre ou cincq jours; car ilz trouvèrent au dehors des logis grant foison de cornes de bestes mortes. Adonques se retrairent au vaisseau, et vindrent à l'encontre de nos gens et leur disrent tout ce qu'ilz avoient trouvé. Par foy, dist le maistre, je croy que ce sont Sarrazins qui s'en vont au souldan vers le siège, et que ceulx que vous avez desconfis, dont vous nous avez donné la fuste de leurs vaisseaulx, estoient de leur compaignie, et les attendoient en celle ysle; et pour certain si estoient-ilz. Et à tant en laissèrent le parler, et s'en vont tout senglans par mer tant qu'ilz visrent une abbaie sur la mer, qui estoit sur une montagne, et y aouroit-on monseigneur saint Andrieu. Et dist-on que là est la potence ou Dimas le bon larron fut mis en la croix quant nostre seigneur fut mis en la croix pour nostre redemption. Sire, dist le maistre, il seroit bon à entrer en ce petit port, tant que vous et moy eussions envoyé à Lymasson pour en sçavoir des nouvelles, et

pour sçavoir moult s'ilz nous vouldroient recepvoir pour mestre nostre navire à saulveté dedens leur clos. Maistre, dist Urian, or en soit fait au nom de Dieu. Lors arrivèrent et entrèrent au port, et mandèrent au port et à l'abbaye que ilz ne se doublassent pas, car ils estoient leurs amis, et le maistre de Rodes estoit avec; et quant ceulx ouyrent les nouvelles, ilz furent moult joyeux, et avallèrent du cap monseigneur saint Andrieu, et firent moult grant joye à nos gens, et envoièrent à Lymasson ung de leurs frères anoncier la venue du secours qui venoit pour secourir le roy en son pays. Adoncques quant ung capitaine du lieu, qui estoit chevalier, ouyt la nouvelle, il fut moult joyeux, et fist tantost arriver une galiote et se mist dedens, et en peu d'eure il vint à nos gens, et demanda le seigneur de ceste armée, et celui à qui il le demanda le mena là où Urian, Guion son frère, le maistre de Rodes et pluseurs d'autres barons estoient en ung riche pavillon qu'ilz avoient fait tendre sur la rue du port, et lui monstra Urian, qui se seoit sur une couche avec luy, son frère et le maistre de Rodes. Et quant le chevalier l'apperceut, il fut moult esbahi de la grandeur et de la fierté de luy, et neantmoins il le va honnorablement saluer, et Urian le receut moult doucement. Sire, dist le chevalier, vous soiez le tres-bien venu en ce pays. Beau sire, dist Urian, moult grans mercis. Sire, dist le chevalier, on m'a donné à entendre que vous estes partis de vostre pays à intention de venir aidier au roy de Chippre. Par foy, dist Urian, il est vray. Donc, sire, dist le chevalier, c'est raison que on vous œuvre par tout là où vous vouldrez par le royaulme de Chippre, par toutes villes et fortresses là où il vous plaira à aller; mais quant est

de celle qui est à mon tresredoubté seigneur le roy de Chippre, elle vous sera appareillée et ouverte quant il vous plaira, et aussi le port ouvert pour mettre vos vaisseaulx à saulveté. Par foy, dist Urian, sire, vous dictes bien, et tresgrant mercis. Sire chevalier, il en est doncques temps de mouvoir, car mon frère et moi avons grant desir de nous approcher de ses Sarrazins, non pas pour leur prouffit, mais pour leur dommaige, se il plaist à Dieu que nous le puissions faire. Sire, dist le chevalier, il est bon que vous facés traire hors de vos chevaux tant que il vous plaira, et prenez de vos gens, si nous en irons par terre. Par foy, dist Urian vous dictes tresbien. Et ainsi fut fait; et fist Urian armer jusques au nombre de iiij. cens gentilz hommes des plus haultz barons, chevaliers et escuiers, et luy-mesmes et son frère s'armèrent et montèrent à cheveau, et allèrent, bannière desployé, brodée d'argent et d'asur à l'ombre d'ung lyon de gueule, en moult belle ordonnance. Et le maistre de Rodes et les aultres se esquipperent en la mer, et s'en allèrent vers le port. Adoncques Urian chevaucha tant, luy et sa route, avecques le chevalier qui les guidoit, qu'il vint en la ville, et furent moult bien logez. Et adonc vint la navire ferir au port, et fist-on traire les chevaux hors de la nef, et tout ce qu'il leur pleut, et se logèrent aux champs au hors de la ville en tentes et pavillons; et ceulx qui n'en avoient aulcuns se logèrent et firent leurs logis au mieulx qu'ilz peurent; et fut moult grant beaulté à veoir l'ost quant il fut logé. Les plus haultz barons se logèrent en la ville, et la navire fut traite, et firent bouter au clos; et ilz comirent bonnes gens et bons arbalestriers pour la defendre et garder le clos se Sarrazins y venissent pour mal faire. Or vous laisseray à parler ung peu de

Urian , et vous diray du capitaine de la ville , qui moult bien advisa l'ost et le maintien des gens , et moult le pris en son cuer ; et dist bien que c'estoient gens de fait et de grant entreprise , quant si peu de gens entreprennent d'avoir victoire contre le fort souldan , qui avoit plus de cent mille Sarrazins . Et à tout rompre , Urian n'avoit mie encores , à compter les gens du maistre de Rhodes , plus de quatre mille combatans ; si le tient à grant audace de cuer et à grant vaillance . Et quant il considera la grandeur et la fasson de Urian et la fierté de son visaige , et aussi de Guion son frère , il dist à ses gens : Ceulx sont dignes de conquerir tout le monde . Et il dist en soy mesmes que Dieu les avoit envoyé là de sa benigne grace pour secourir le roy et pour exaulcer la foy cristienne , et qu'il le mandera tantost au roy par certain messagier .

L'istoire dist que le chevalier fist faire un brief où il fist mettre tout en escript la matère de Urian et de son frère , et de leurs gens , et de leur venue , et comment les deux frères avoient eu nom , et de quel pays ilz estoient ; et aprez il appella ung sien nepveu , et lui dist en ceste manière : Il faut que vous portez ceste lettre à Famagosse , et la baillez au roy , et quoy qu'il adviengne , dont se Dieu plaist ne vous adviendra que bien , force est que vous le facés . Par foy , sire , dist-il , vous mettez et moi et les lettres en tresgrant adventure ; car se par aulcun meschief comme il advient souvent , dont Dieu me vueille garder , se j'estoye priz de Sarrazins il n'est riens de ma vie , et vous le sçavez bien ; mais pour l'amour de vous , mon oncle , et du roy faire confort et donner cuer et esperance d'estre mis au plaisir de Dieu à delivre du peril mortel où il est , je m'en metteray en l'adven-



ture. Et je prie à Dieu devotement qu'il luy plaise de sa benigne grace de moy mener et ramener à saulveté. Par ainsi doit-on servir son seigneur, et, se Dieu plaist, il vous sera bien merité. Et adonques il prinst la lettre et monta sur ung petit courcier de Barbarie, et se met au chemin. Mais vous lairay à present de plus parler de luy tant que temps en sera, et je m'en retourneray où j'ay laissé à parler de Urian, comment il se gouverna cependant que le messagier alla par devers le roy, combien que il ne le sçavoit pas.

L'istoire dist que Urian appella le maistre de Rodes et le capitaine du lieu, et leur demanda ainsi : Beaulx seigneurs, le souldan est-il gaires jeune homme, ne de grant emprinse ? Et ilz respondirent que ouy pour certain. Et comment, dit Urian, fut-il oncques mais au lieu du cap faire guerre que ceste fois ? Ils respondirent que non. Et qui donques, dist Urian, l'a meu de passer la mer maintenant, puy qu'il est homme de prise ? Je m'esmerveille qu'il s'en est tant tenu à ce que vous luy estes prez voisins, et aussi qu'il a si grant puissance, ainsi comme on m'a dit. Par foy, sire, dist le capitaine, il est bien vray que nostre roy a une tresbelle fille de l'age de quinze ou de seize ans, laquelle le souldan a voulu avoir par force, et nostre roy ne luy a voulu accorder se il ne se faisoit baptiser. Et vueillez sçavoir que tousjours nous avons eu trèves ensamble, et, par devant ce, les nostres, de si longtemps qu'il n'est memoire du contraire ; et quant le souldan a veu que nostre roy ne luy a voulu accorder sa fille, il luy a envoyé la trevoye avecques une deffiance ; et estoit jà sur la mer à tout bien cent et l. mille Sarrazins, et s'en vint bouter au havre, et fist tantost son harnoys traire à

terre , et vint mettre le siège soudainement devant Famagosse, où il trouva le roy tout despourveu de sa baronnie, qui ne sçavoit riens de sa venue. Mais depuis ilz sont entrez assez gens malgré luy, et y a eu maintenant belle escarmouche où il y a eu moult grant perte d'ung costé et d'autre. Et depuis se sont les Sarrazins refrechis par deux fois de gens nouveaulx, tant qu'ilz ont bien maintenant cent mille ; mais à ce dernier voiage ilz ont perdus une partie de leurs navires et de leurs gens que ilz ont attendu en l'isle de Coles ; car une nostre gallée de la noire montaigne qui les poursuivoit nous a dit que ilz mirent en chasse deux gallées de l'ospital, et sachiés qu'ilz ne sçavent qu'ilz sont depuis devenus, car depuis ilz attendirent bien par l'espace de six jours en l'isle ; mais quant ilz virent qu'ilz ne revenoient point, ils s'en partirent et s'en vindrent au siège. Par foy, sire, dist le maistre de Rodes, cecy pourroit estre bien vray ; mais voiez cy monseigneur Urian et son frère, qui en sçauroient bien respondre, car ilz ont esté tous mors et desconfis, et nous ont donné leurs fustz et leur navire. En bonne foy, dist le chevalier, ce me plaist moult, et loé en soit Dieu. Monseigneur, dist le capitaine, or vous ai-je compté pour quoy la guerre est mue, et pour quoy le souldan a passé la mer. Au nom de Dieu, dist Urian, amours ont bien tant et plus de puissance que de telle entreprise faire. Et sachiés, puy que le souldan l'entreprist par force d'amours, tant est-il plus à doubter, car il est vray que amours ont tant de puissance qu'ilz font de coups hardis, et de faire tresgrant entreprise, et que au devant il ne l'osast passer ; et pourtant dont il est tout certain à ce que le souldan est hardi et entreprenant que tant se fait-il plus à doubter ; toutesfois soit faicte la vou-

lente de nostre Seigneur, car nous partirons d'icy, au plaisir de Dieu, demain au matin aprez le service divin, pour les aller visiter. Adonc a fait crier à la trompette que chascun apprestast son harnois et s'en partist au tiers son de la trompette en bonne ordonnance, chascun dessoubz sa banière, et qu'ilz suivissent la bataille de l'avant-garde, et ilz si firent. Là peussies ouyr grant martellis à reclaver petites plates gantelles, harnois de jambes, aserrer lances, et chevaux tourner, costes d'acier, et jasserans, et abillier et mettre à point toutes choses necessaires. Et sachiés qu'en celle nuyt commanda Urian moult fort à faire le guet à ung vaillant chevalier de son ost, à cinq cens hommes d'armes et cinq cens arbalestriers. Or vous laisseray ung peu de plus parler de luy, et revendray où j'ay laissé, c'est assavoir du nepveu du capitaine, qui moult fort chevaue et s'en va vers Famagosse; et tant exploita son chemin qu'il vint environ minuyt au cornet du boys sur une petite montaigne et regarda en la vallée; et lors commença à veoir l'ost des Sarrazins, où il y avoit moult grant clarté de feuz qui se font par les logis, et aperçoit la cité si environnée de Sarrazins que il ne sceut de quelle part traire pour entrer en la ville; et là fut long temps en celle pensée. Or advint que environ le point du jour iiii. vingz bassines d'estrangers de pluseurs nations saillirent hors par une poe-terne de la cité, et s'en vindrent tout commouvoir l'ost pour manière de bataille, et à celle heure le guet se partoit et avoit jà retourné le plus au logis. Et ceulx entrèrent en l'ost avec aucuns de ceulx du guet qui oncques ne s'en donnèrent garde, et cuidoient qu'ilz fussent de leurs gens, et vindrent prez jusques à la tente du souldan. Et adonc commencèrent moult fort

et moult asprement à ferir des lances et des espées sus, tant qu'ilz rencontroient des Sarrazins, et coupèrent cordes de pavillons à desroy et de tref et de tentes, et font moult horrible occision de payens selon la quantité qu'ilz estoient de cristiens. Adoncques s'effrea l'ost et commencèrent à crier à l'arme ; là se commença l'ost à armer ; et quant ceulx veoyent la force , ils commencèrent à aller le petit pas vers la cité , occisans et jettans par terre tout ce qu'ilz rencontroient en leur chemin. Et quant le messagier vist si grant effroy et bruit , il vient en adventure et fiert le cheveu des esporons , et vint passer au dehors des logis , et passa tout l'ost des Sarrazins , et il n'eut pas longuement allé qu'il ne se trovast entre la ville et ceulx qui avoient esmeu l'ost. Adonc il congneut bien assez tost que c'estoient de ceulx de la garnison de la cité ; si leur escria : Ha , beaulx seigneurs , pensez de bien faire , car je vous apporte bonnes nouvelles ; car la fleur de la noble chevalerie de cristieneté vous vient secourir , c'est assavoir les deux damoiseaulx de Lusignen qui ont jà desconfi une grant partie des gens du souldan sur mer , et amainent en leur compaignie bien quatre mille combatans. Et adoncques quand ilz l'entendirent , ilz lui firent moult grant joie , et entrèrent en la ville sans aulcune perte , de quoy le souldan fut moult couroucé et moult doulent. Et adonc il vint commencer l'escarmouche devant les barrières , et en y eut moult de mors et de navrez ; lors firent les Chippriens reculer les Sarrazins par force , et en y eut moult de mors et de navrez , et fist le souldan sonner la trompette pour retraire quant il vit qu'il n'y pourroit faire aultre chose. Et adoncques le messagier vint au roy , et luy fist la reverance de par son oncle , et lui presenta la lettre ;

et le roy le bienveigna moult, et rompist la cire, et voit le noble secours que le capitaine luy escript qui luy vient; et tent ses mains vers le ciel en disant ainsi : Ha, ha, vray glorieux père Jhesu-Christ, je te regracie et mercie treshumblement et devotement de ce que tu ne m'as pas oublié, qui suys ta povre creature et ton povre servant, qui ay long temps vescu icy dedens en grant doubte et en grant misère de ma povre vie, et moy et les miens. Adoncques il fist anoncer par toutes les eglizes que on sonnast les sains, et que on fist procession à croix de cristiens à bannières et à torches ardents, en louant et regraciant le createur des creatures, et en le depriant moult humblement qu'il les vueille de sa benigne grace preserver des mains et dangiers des mescreans Sarrazins. Adoncques commença moult fort la sonnerie, et fut la joye moult grande quant la venue fut espendue par la ville. Et quant les Sarrazins ouyrent et entendirent la joye et le glay que on faisoit par la cité, ilz furent moult esbahis pour quoy ilz faisoient si grant feste. Par foy, dist le souldan, ilz ont ouy quelques nouvelles que nous ne sçavons pas, ou ilz le font pour donner à congnoistre qu'ilz ont de gens assez et assez de vivres pour eulx deffendre et garder de nous. A tant se taist l'istoire à parler du souldan, et commence à parler de Hermine, la fille du roy, qui ouyt en sa chambre les nouvelles du secours que les enfans de Lusignen emmenaient; la pucelle eut grant desir d'en savoir la pure verité.

L'istoire nous dist ainsi que quant la damoiselle ouyt la nouvelle du secours, que tantost elle manda querir celluy qui les avoit apportées, et il vint à elle en sa chambre, et luy fist la reverence. Amy, dist Hermine, vous soyez le bien venu, mais or me dic-

tes de vos nouvelles. Et il luy dist tout ce qu'il en estoit. Amy, dist la pucelle, avez-vous veu celles gens qui nous viennent secourir? Par ma foy oy, damoiselle, dist le messagier; ce sont les plus apertes gens d'armes et les plus beaux hommes qui oncques entrassent en ce pays, et les mieulx habillez. Or nous dictes, dist la damoiselle, de quel pays ilz sont, et qui est le chief d'eulx. Par ma foy, damoiselle, ilz sont poctevins, et les mainent deux jeunes enfans damoiseaulx qui se nomment de Lusignan, dont l'aisné a nom Urian, et l'autre Guion, et n'ont barbe ne grenom. Amy, dist la demoiselle, sont-ilz si beaulx damoiseaux comme vous dictes? Par ma foy, dist le messagier, l'aisné est moult grant, et droit, et fort, et advenant à mesure; mais il a le visaige court et large en travers, et ung oeul rouge et l'autre pers, et les oreilles grandes à merveilles; et sachiés que de membres et de corps, c'est un des beaulx chevaliers que je vis oncques; et sachiés que le maisné n'est mie si grand, mais il est moult bel de membres et de visaige, à droit de vis, excepté qu'il a ung oeil ung peu plus hault que l'autre, mais pourtant il ne luy meschiet pas trop; et dist chascun qui les voit qu'ilz sont dignes de conquerer tout le monde. Amy, dist Hermine, irez-vous avecques eulx gaires tost? Et il respondit: Mademoiselle, si tost que je pourray avoir lieu et temps propice pour saillir de la cité, et que je voye que je puisse bonnement eschapper des Sarrazins. Amy, dist la damoiselle, vous me salurez les damoiseaulx, et donnerez à l'aisné cest fermail, et luy dictes qu'il le porte pour l'amour de moy; et cest aneau d'or et cest dyamant le donnerez au mainsné, et le salurez beaucoup de foys. Et celluy respond: Ma damoi-



elle, je le feray tresvoulentiers. Et à tant se depart d'elle, et vint au roy, qui eut fait escrire la responce, et lors il fist armer grand foison de gens d'armes, et les fist saillir hors de la ville tout convertement, et se ferirent en l'ost; et ainçoys que l'ost fut armé, ilz firent grand dommaige. A tant issirent les barrazins de leurs tentes à desroy, qui les rechassèrent jusques aux barrières, et là eut grant escarmouche et fière, et maint homme mort et navré d'ung costé et d'autre; tout l'ost arrivoit où l'escarmouche estoit. Adoncques fut mis hors le messagier par une autre porte par devers l'ost, au trait d'ung arc, que nul ne fut apperceu; et adoncques chevaucha tout alaine vers son oncle, car moult luy tarδοit que là il peut estre arrivé pour lui dire toutes ces nouvelles. Et ne dura gaires l'escarmouche, car le souldan fist cesser pour ce qu'il vit qu'il pouvoit plus perdre que gaignier. Or cy laisseray de plus parler de ce pour le present, et retourneray à parler de Urian et de son frère, et comment ilz se gouvernèrent.

En ceste partie nous dist l'histoire que Urian fist sonner sa trompette à l'aulbe du jour, et se leva; et puis fist tromper pour trousser et mettre les selles; puis oyrent les deux frères leur messe, et samblablement firent les autres princes et barons. Et apres la messe fist crier Urian que qui voudroit boire une chose qu'il beut, et que on donnast de l'avaine aux chevaux, et que en l'autre coup de la trompette chascun se mist en ordonnance qui seroit de l'avant garde; ce fait, ilz deslogèrent. Et la chose estant en tel estat, est venu et arrivé le nepveu du capitaine, qui a baillé la lettre à son oncle que le roy li avoit baillée; et il la baisa en la recepvant et rompt la cire, et voit comment le roy luy



mande qu'il mette la ville au commandement des deux frères, et aussi qu'il commandast à toutes bonnes villes, chasteaux, fortresses, pors, passages, qu'ilz les laissassent entrer et sejourner, et qu'ilz obeissent à eulx. Et quant le capitaine voit cecy, il monstra la lettre à Urian et à Guion son frère, lesquelz la leurent; et quant ilz l'eurent leue, ilz appelèrent le capitaine, le maistre de Rodes et les deux chevaliers qui leur avoient annoncé l'adventure du siège, et leur leurent la lettre tout hault. Adonques dist au capitaine : Nous mercions le roy de l'honneur qu'il nous a fait, mais quant à nous, nostre intention n'est pas d'entrer en ses villes ne chasteaux tant que nous peussions bonnement passer ailleurs, mais pensons, au plaisir de Dieu, à tenir les champs, et faire bonne guerre au souldan; et dictes-nous quel nombre pourroit saillir de toutes vos garnisons, les fors gardez; et sachiez qu'il nous est nécessité de le sçavoir, et se ilz sont gens de quoy on puisse estre seur et y attendre; car, au plaisir de Dieu, nous avons intention de combatre le souldan, et de mettre à termination et fin ceste guerre, car pour ce sommes-nous venus par dessà. Par ma foy, dit le capitaine, ce sera moult fort à faire, car les Sarrazins sont en nombre bien cent mille et plus. Ne vous en chaille, dist Urian, nous avons tresbon droit; en tous cas, ilz nous sont venus courre sus sans cause, et posé que nous les fussions allé courre sus en leur pays, nous le devons faire; car ilz sont ennemis de Dieu; et ne faictes doubte pour tant se ilz sont tant de gens et nous peu; car plus point ung grain de poyvre que ung sac de fourment; et la victoire ne gist pas en grant multitude de peuple, mais en bon gouvernement. Et bien est vray que Alixandre, qui

conquist tant de pays, ne vout oncques avoir plus de dix mille hommes d'armes contre tout le monde pour une journée. Adoncq quant le capitaine l'ouyt parler si vaillamment, si le tient a grant bien, et bien prisoit qu'il conquisteroit encores moult de pays; si luy dist en ceste manière: Je vous trouveray quatre mille hommes combatans, et bien deux mille brigandiniers, que arbalestriers que aultres. Par ma foy, dist Urian, c'est assez; or faictes que nous les ayons à demie journée prez de nos ennemis. Et il luy respondist qu'il n'y auroit point de faulte. Et à tant est venu le nepveu du capitaine, qui se agenoulla devant Urian et Guion, en disant en ceste manière: Nobles damoiseaux, la plus belle pucelle et la plus noble, que je sache, vous salue moult de foy, et vous envoie de ses joyaulx. Adoncques il prinst le fermail d'or où il y avoit mainte pierre riche, et dist ainsi à Urian: Sire, tenez, recepvez cest fermail de par Hermine, la fille de nostre seigneur le roy, qui vous prie treschierement que vous le portez pour l'amour d'elle. Et adoncques Urian le prinst moult lieement et le fist atacher à sa costé d'armes, et luy dist: Mon amy, tresgrans mercis à la demoiselle qui tant d'honneur me fait; sachiés que je le tiendrai moult chier pour amour d'elle, et grant mercis au messagier. Et apres presenta à Guion l'aneau, aussi de par la damoiselle, et luy dist qu'elle le prioit qu'il le portast pour l'amour d'elle. Et il luy dist que si feroit-il, et le bouda son doit et en mercia moult la damoiselle et le messagier. Et donnèrent les frères au messagier moult riches dons. Et tantost la trompette sonna, et chascun se mist en chemin, et là veoit-on moult belle compaignie; et le capitaine envia par tous les fors, et fit vuider et assembler tous les gens d'armes. Et en

y eut bien, oultre le nombre que le capitaine avoit dit aux deux frères, cinq cens. Lors Urian se loga sur une petite ripvière, et lendemain au matin ilz se deslogèrent et cheminèrent tant qu'ilz vindrent, ung peu avant midi, en une belle prairie sur une grosse ripvière; et y avoit foison d'arbres, et aussi y avoit, comme à ung demy quart de lieue, ung grant pont où il convenoit passer, et de là n'avait que sept lieues jusques à Famagosse; et là fist Urian logier ses gens, et dist qu'il actendrait le capitaine et les gens qu'il devoit amener. Là demourèrent celle nuyt et le lendemain jusques à heure de tierce. Toutesfois aucuns chevaliers et escuiers s'estoient allez esbattre vers le pont, et virent qu'il avoit environ quinze hommes d'armes qui là estoient descendus et avoient les lances aux poingz et les bassines mis en la guise qu'ilz s'armoient en la contrée; et d'autre part ils veoient sourdre environ quatre cens hommes d'armes qui moult fort se mettoient en peine de passer oultre pour grever ceulx de dessà. Adoncques vint un de nos chevaliers à eulx et escria : Qui estes-vous? et l'ung respondist : Chrestiens, et sommes au roy de Chippre, et ceulx de delà sont Sarrazins, et les suyvent bien six mille payens qui viennent de fourrager sur le pays, et ceulx nous ont trouvé et ont bien occys cent de nos compaignons. Or, beaulx seigneurs, se vous vous povez un peu tenir, vous aurez par temps secours. Par Dieu, dist l'ung, nous en aurons bien besoing; allez-vous en, et nous actendrons tant comme nous pourrons resister. Adoncques fiert le chevalier des esperons, et s'en vint vers ses gens et compaignons, et leur compta en brief toute l'adventure; et quant ilz oyrent ce, ilz se hastèrent tantost de venir en l'ost, et rencontrèrent vingt arbalestriers et leur disdrent que tantost se trouveront là,

et allez aidier à garder le pont où il y avoit quinze hommes d'armes encontre les payens. Et quant ceulx l'entendirent, ilz s'en allèrent hastivement vers le pont, et à l'approchier ilz virent qu'il avoit sur le pont trois cristiens qui jà estoient abbatus de coups de lances. Avant, dist l'ung, nous demourons trop : ne voiez-vous pas comment ces matins oppressent vaillamment ces vaillans cristiens. Et adoncques ilz tendirent bonnes arbalestres, et misrent viretons en coche, et laissèrent tous aller à une foys, et en ruèrent tous mors en ceste première fois dessus le pont jusques à viugt et deux. Quant les Sarrazins virent ce, ilz furent moult esbahis, et s'en allèrent ung peu reculant jus du pont. Adoncques les cristiens allèrent redresser leurs compaignons qui avoient esté abbatus sur le pont, et adoncques firent grant joye et reprindrent bon cuer. Lors les arbalestriers commencèrent à tirer si tresfort que il n'y eut si hardi Sarrazin qui osast mettre son piet sur le pont ; mais firent venir leurs archiers, et là commença l'escarmouche moult fort à refforcer ; mais mieux vaulsist aux Sarrazins qu'ilz se fussent trais arière, car les chevaliers vindrent en l'ost et recommencèrent la nouvelle. Adoncques Urian s'arma moult appertement, et aussi fist armer hastivement jusques au nombre de mille hommes d'armes et cent arbalestriers, et ordonna autres mille hommes d'armes et cent arbalestriers pour le suyvre, se besoing en avoit, que ilz fussent prez de les secourir, et pour les mener et conduire ordonna ung baron poetevin, et commanda que tout l'ost fut armé en bataille, et les laissa en garde à Guion son frère et au maistre de Rodes. Et adoncques fist-il tantost partir avant l'estendard en chevauchant en bataille moult ordonneement, et fut Urian devant, le baston au poing, et les tint

ensamble si bien unis et si tresbien serrez que l'ung ne passoit point l'autre plain poulce ; mais avant que ilz fussent au pont, furent arrivez sept mille Sarrazins qui moult fort oppressoient nos gens, et les avoient jà reboutez prezque jus du pont ; atant vint Urian, qui met piet à terre et la lance au poing, et aussi firent ses gens moult vistement, et fait desploier sa banière, et furent les arbalestriers d'ung coste et d'autre du pont, et commencèrent moult fort à opprresser Sarrazins et les firent reculer. Et adoncques Urian crie Lusignen à haulte voix et monta sur le pont, sa banière devant et ses gens aprez, moult asprement, et les Sarrazins d'autre part, et alla commencer fort à bouter des lances. Urian ferist ung Sarrazin parmy le pis, de la lance, tellement qu'il luy perça le foye et le poumon. Là veissiés fier toullis ; mais en la fin Sarrazins perdirent le pont, et en cheurent pluseurs en la ripvière ; lors passèrent cristieus le pont isnellement, et à tant commença la bataille fière ; et en y eut de mors et de navrez, et reculèrent Sarrazins et perdirent place grandement. Urian fist passer le pont aux chevaux, car il percut bien que Sarrazins se retraient et montent ; à tant vint l'arrière garde qui moult asprement passa le pont. Et quant Sarrazins apperceurent, ilz commencèrent tous communement qui peut à monter à cheveu, et s'en tournèrent fuyans vers leurs gens, qui emmenoient leurs proyes de beufz, de vaches, de moutons, de porcs, et autres troussages. Adoncques Urian monta à cheveu et fist monter ses gens, et commanda à l'arrière garde qui passoit le pont qu'ilz le suyvisent en belle bataille, et ilz si firent. Et adoncques Urian et eulx suyvirent les payens à desroy qui s'en alloient grant erre, et tous ceulx qui estoient atains estoient mis à

mort ; et dura l'occision bien prez de cinq heures. Et adoncques rataignèrent les Sarrazins leurs gens , et leur firent laisser et guerpier toute leur proye , et vindrent sur une montaigne haulte vers Famagosse , et là se misrent les Sarrazins en ordonnance ; et à tant vint Urian et ses gens , les lances es poingz baissez ; là eut à assamblar maint homme mort et navré d'ung costé et d'aultre ; et se tindrent moult fort les Sarrazins , car ilz furent grant gens ; et Urian les assailloit moult asprement et faisoit tant d'armes que chacun s'en esbahissoit. Lors vint l'arrière-garde où il y eut mille hommes et cent arbalestriers , et perdirent Sarrazins place et tournèrent en fuyte ; et en y eut bien quatre mille mors sur la place , sans ceulx qui furent mors au pont ; et dura la chasse jusque prez de l'ost des Sarrazins. Adoncques fist Urian ses gens retraire , et amenèrent avecques eulx la proye que les payens avoyent laissée. Et ainsi se eslongèrent en peu d'eure les ungz des aultres , et s'en retournèrent nos gens au pont ; et les Sarrazins allèrent tout droit à leur ost criant à l'arme ; et la veissiés Sarrazins courir aux armes et issirent hors de leurs tentes. Et adoncq compta ung Sarrazin au souldan l'adventure qui leur estoit advenue. Et quant le souldan eut oy ce , il s'esmerveilla moult qui pouoit avoir amené celles gens qui tant luy avoient porté de dommaige ; lors y eut moult grant effroy en l'ost de trompettes , d'instrumens , et tous Sarrazins , dont ceulx de la ville s'esmerveilloient quelle chose pouoit estre advenue en l'ost , et s'armèrent et se mist chacun en sa garde ; et là vint à la porte de la ville ung des chevaliers qui avoit esté au pont , lequel avoit passé à l'adventure tout parmy l'ost des Sarrazins , et sçavoit la commune d'une part et d'aultre ,

et aussi les grans faitz d'armes que Urian avoit fait; si s'escria à haulte voix : Ouvrez la porte , car je vous apporte bonnes nouvelles. Et lors luy demandèrent : Qui estes-vous ? Et il respondist : Je suys ung des chevaliers du fort de la Noire-Montaigne. Adonques ilz luy ouvrirent la porte , et il entra dedens , et le menèrent devant le roy , qui le congneut tantost , car aultresfois il l'avoit veu. Adonc le chevalier s'enclina devant le roy et luy fist la reverence ; et lors le roy le bienveigna moult , et luy demanda des nouvelles ; et il luy compta de mot à mot tout le fait , et comment Urian avoit rescous la proye , et l'adventure du pont , et toutes les aultres choses , et comment il avoit intention de venir combatre le souldan bien brief. Par ma foy , va dire le roy , cest homme me devoit bien Dieu pour rescourre mon pays des fellons Sarrazins , et pour la sainte foy cristienne soubstenir et exaulcer ; et par Dieu je feray demain sentir au souldan que le secours m'est prez et que je ne le doute gaires. Mon amy , dist le roy au chevalier , allez dire ces bonnes nouvelles à ma fille. Sire , dist le chevalier , moult volentiers. Adonc s'en vint en la chambre de la pucelle , et la salua moult doucement , et luy compta toute l'adventure. Comment , sire chevalier , futes-vous en la bataille ? Par foy , mademoiselle , dist-il , oy. Et comment , dist-elle , ce chevalier qui a si estrange visaige est-il si bataillereux que on dist ? Par ma foy , mademoiselle , mais plus cent foyz , car il ne craint homme nul , tant soit grant ou puissant. Et sachiés , quoy que on vous en die , c'est ung des plus preux chevaliers que je vis oncques en ma vie. Par ma foy , s'il vous avoit ores loué pour le loer , si a il bien employé sa mise. Par ma foy , mademoiselle , je ne parlay onc-



ques à luy; mais il vault mieulx que je ne dis. Adoncques, respond-elle au chevalier : Amy, bonté vault mieulx que beaulté. Et à tant me tairay de plus parler d'eulx, et diray de Urian, qui demoura au pont, et trouva son ost logé par dessà le pont, et aussi le capitaine qui avoit amené les gens d'armes qu'il avoit levé des garnisons et des fortresses à tant de nombre que ilz furent de quatre à cinq mille hommes d'armes et deux mille et cinq cens arbalestriers; et y avoit moult de gens de piet, et furent tous logez en la prarie de la ripvière, où Urian trouva son pavillon levé, et les aultres qui avoient esté à la poursuite des Sarrazins; si se logèrent et aisèrent le mieulx qu'ilz peurent celle nuyt, et firent bon guet. Et cy se taist l'istoire de plus parler maintenant, et commence à parler du roy de Chippre, qui fut moult joyeux du secours qui ainsi luy estoit advenu, et regracia moult doucement Nostre Seigneur; et en ce parti passa la nuyt. Mais qui que fut aise, ce ne fut pas Hermine, car celle ne povoit nullement du monde saillir de la pensée de Urian, et le desiroit moult à veoir, pour le mieulx que on luy en disoit, que elle disoit en soy mesmes que se il avoit ores le visaige plus estrange et contrefait qu'il n'estoit, si est-il bien taillié, pour sa proesse et sa bonté, d'avoir la fille du plus hault roy du monde à amie; et ainsi pensa la damoiselle toute nuyt à Urian; car amour luy fist penser par son hault pouvoir. Et cy ce taist l'istoire de plus parler d'elle, et commence à parler du roy son père, et comment il se gouverna le lendemain.

L'istoire nous dist et racompte que le lendemain au point du jour eut le roy ses gens tous prestz, et baillist de la cité à bien mille hommes d'armes et bien mille que brigandiniers, que arbalestriers, qui

l'attendoient en embuche au deux costez de la barrière pour le recueillir se il estoit trop pressé des Sarrazins. Adonc le roy se ferist en l'ost, et y porta moult grant dommaige pour les Sarrazins; car il avoit commandé moult expressement, sur paine de la hart, que nul ne prist prisonnier, mais qu'ilz missent tout à mort, et ce fist-il pour ce qu'ilz n'amasent la despouille et la proie pour avarice, et en la fin qu'il les puet tenir ensamble pour retraire sans perte. Et adoncques commença l'ost à esmouvoir, et venoient qui mieulx Sarrazins à la meslée. Et quant le roy apperceut qu'ilz venoient à effort, si remet ses gens ensamble, et les fist retraire le petit pas, et se met derrière, l'espée au poing; et quant il vcoit ung chevalier approchier, il retournoit et le faisoit reculer entre les Sarrazins, et quant il actaindoit, il le chastioit tellement qu'il n'avoit plus talent de le suyvir. Et si porta le roy si vaillamment que chascun disoit qu'il estoit moult vaillant et preux de la main, et n'y avoit si hardi Sarrazin qui ung coup l'osast actendre. Lors vint le souldan avecq grant route de Sarrazins, armé, sur ung grant destrier, qui tenoit ung dart envenimé; et adoncques quant il vit le roy qui ainsi mal menoit ses gens, il luy jetta le dart par grant ire, et le ferist au senestre costé tellement qu'il le perça de part en part, et le jasseran qu'il avoit vestu ne le peut oncques garantir; et assez tost aprez le roy sentist moult grant angoisse, et traist le dart hors de son costé, et le cuida rejeter au souldan; mais il tourna le destrier si apertement que le dart passa oultre, et ferist ung Sarrazin parmy le corps tellement qu'il le rua tout mort par terre, à ce que il n'estoit pas bien armé. Et avant que le souldan, qui s'estoit trop avancé, se

peut retourner, le roy le ferist de l'espée tellement sur la teste qu'il l'abbatist tout estendu sur la terre. Lors vindrent les payens si tresfort qu'il convint par leur moyen reculer le roy entre ses gens, et fut le souldan redressé et remonté tantost sur ung grant destrier. Et adonc fut grant la presse, et les payens furent fors, et tant qu'ilz reboutèrent le roy et ses gens dedens leur barrière. Lors commencèrent les Chippriens qui gardoient le pas à traire et à lancer les flèches et les viretons de grant manière, et là eut occis grant foison des Sarrazins; mais ilz estoient si tresfors que ilz reboutèrent les cristiens dedens leurs barrières comme est devant dit, et aussi le roy avoit perdu moult de son sang et affoiblissoit moult fort, et ses gens se commencèrent moult fort à esbahir, et jà soit ce que le roy souffrist moult grant douleur, neantmoins resjouissoit-il moult ses gens et leur donnoit cuer, et tant firent que les mauvais mescreans Sarrazins ne peurent riens conquerer que ilz ne perdissent plus assez; et fut l'escarmouche moult fière et perilleuse, et ainsi en reconfortant, par le roy de Chippre, ses gens de la vaillance de luy et de la noblesse de son cuer qui à paine et grant douleur remist ses gens dedens la ville; et estoit merveilles comme ung tel seigneur navré mort se povoit tenir sur cheveu, pour tant qu'il estoit blessé du coup mortel; et n'estoit le coup mortel, si non pour le velin, car le dart estoit envenimé; et en peu de temps il apparut bien, car il morut de celluy coup; mais il avoit pour vray, comme le fait le monstroït, le cuer plain de si grant vaillance, qu'il ne se daignoit plaindre à ses gens du mal qu'il souffroit, jusques à tant que l'ung des barons s'en apperceut, parce qu'il avoit du senestre costé depuys

la hanche jusques au tallon tout rouge de sang qui decouilloit de la plaie ; et tantost que il se arrestoit, la place estoit toute vermeille de son sang , lequel chevalier luy dist : Mon seigneur, vous avez cy trop demouré ; venez-vous en et faictes vos gens retraire en la ville avant qu'il soit plus tard, affin que les payens ne se boutent par la meslée avecques nous. Le roy, qui sentoit grant douleur, luy respondist : Ainsi faictes en vostre voulenté. Adonc le chevalier fist mettre cent hommes d'armes , qui c'estoient re-freischis , au devant de la barrière de la cité, et leur fist arriere recommencer l'escarmouche avec cent arbalestriers , moult fort et moult roide. Et par ainsi furent Sarrazins reculés, dont le souldan fut moult couroucé ; et escria moult fort à ses gens : Avant, seigneurs barons , penez vous de bien faire vos devoirs, car la ville sera nostre au jourd'huy, elle ne peut nous eschapper. Adonc renforça la meslée ; et là veissiés bien assaillir et bien deffendre d'ung costé et d'aultre ; mais quant le roy de Chippre veoit que les Sarrazins se refforçoient, il prinst cueur en luy et leur fist une pointe moult vertueusement, et là souffrist tant de paine qu'il eut pluseurs vaines de son corps ouvertes, et toutes routes, de quoy aucuns dirent que de ce sa vie fut moult abre-gée , et de celle envaye furent Sarrazins moult reculez, et en y eut de mors et de navrez. A tant la nuyt approcha moult fort, et y eut moult grant perte d'ung costé et d'aultre ; et toutesfoys les Sarrazins se partirent, car le roy ravigoroit tellement ses gens que ilz ne doubtoient mie les coups non plus que se ilz fussent de fer ou d'acier. Et quant les Sarrazins furent partis, le roy et ses gens se retirèrent en la ville ; mais quant ilz sceurent l'adventure du roy ilz

commencèrent grant dueil, et le roy, ce voyant, leur dist : Mes bonnes gens, ne faictes mie telle douleur, mais pensez bien de vous deffendre du souldan, et Dieu nostre seigneur vous sera en aide, s'il luy plaist, et je luy en prie tant humblement et devotement comme je puy au monde, que tous temps vous vueille secourir et estre en aide; car se il luy plaist, je seray tantost gueri. Adoncques fut rapaisé le peuple en peu d'eure, et toutesvoya le roy, qui disoit ces parolles pour son peuple resjouir, sentoit en luy mesmes qu'il ne pavoit eschapper sans mort. Adoncques il commanda à ses gens que on fist bon guet, et leur donna congié, et vint au palais, et descendist et vint en sa chambre. Et adoncques va venir sa fille, qui avoit ouy ung petit de la nouvelle du peuple, qui le desarma; mais quant elle apperceupt que son harnoys estoit plain de sang, et puy la playe, adoncques elle chait toute pasmée comme se elle fust morte. Adonc commanda le roy qu'elle fust portée en sa chambre, et ainsi fut-il fait. Apres, les chirurgiens vindrent veoir le roy, et fut couché en son lict; et lors luy dirent qu'il n'avoit garde, et que il ne se esbahist pas. Par foy, dist le roy, je sçay bien comment il me va, la vouldenté de Dieu soit faicte. Il ne peut estre celle qu'il ne fut sceu par la cité; et adonc commença la douleur par la cité moult grande, et plus assez sans comparaison qu'elle n'estoit pas avant. Mais cy se tait l'histoire du siège et du roy, et n'en parle plus avant; mais commence à parler de Urian et de son frère, et comment ilz exploitèrent depuys qu'il vint à son logis, qu'il trouva par dessà le pont son pavillon tout tendu; et sachez qu'il fut moult lié des gens que le capitaine avoit amené; et le lendemain au matin il manda à tous les

capitaines qui avoyent gens dessoubz eux que ilz venissent faire leur monstre atout leurs gens.

En ceste partie nous dist l'istoire que le lendemain au matin, que fut jeudi, fut Urian, aprez la messe ouye, devant la tente; et là fist venir l'ung aprez l'autre tous les capitaines, panons et estandars avant, et leurs gens avecques eulx, et tous armez de toutes pièces, pour eulx faire visiter, et comment ilz estoient, et les fist mettre à part en la prarie jusques ad ce que tous fussent visitez, tant les estrangiers comme les siens; et en ce faisant les regardoit moult et leurs contenances, et retint bien en son cueur ceulx qui luy sambloit, en leurs condicions, les plus hâtifz. Et fist tantost faire le nombre de tous les gens d'armes qui là estoient assemblez en la prarie, tant les siens comme ceulx au maistre de Rodes et du capitaine, et trouva que sur le tout ilz povoient bien estre de neuf à dix mille combattans. Adoncques leur dist Urian : Acoustez tous, beaulx seigneurs : nous sommes cy assemblez pour soustenir la foy de Jhesucrist, de laquelle il nous a tous regenez et saulvez, comme ung chascun de nous scet bien que il a premierement souffert crueuse mort pour l'amour de nous, affin de nous rachetter des peines d'enfer. Adonc, seigneurs, veu et consideré en nos cueurs qu'il nous a fait ceste grace, nous ne devons pas re-soingnier la mort ou l'aventure qui luy plaira à nous donner et envoyer pour soustenir les saints sacremens qu'il nous a administrez pour le salut de nos ames. Combien maintenant que nous avons à faire à forte partie, car nos ennemis sont bien dix contre ung de nous; mais quoy, nous avons bon droit, car ilz nous sont venus assaillir sans avoir bonne cause sur nostre droit heritaige, et aussi nous ne devons

pas ressongner, car Jhesucrist prinst tout seul la guerre pour nostre salvation, et par sa mort seront tous les bons compaignons saulvez qui ses commandemens tiendront; dont vous devez sçavoir tout certainement que tous ceulx qui y morront seront saulvez, et auront la gloire de Paradis. Et pour ce, beaulx seigneurs, je vous dis en general que j'ay entention, au plaisir de Dieu, de presentement mouvoir pour approchier noz ennemis et de les combattre le plus brief que je pourray. Si vous prie amiablement que se il y a homme en ceste place qui ne sente son cueur ferme pour attendre l'adventure qui plaira à Dieu nous envoyer, qu'il se traye à part, car par un seul couhart failly est aulcunes foys perdue une besoingne. Et sachez que tous ceulx qui n'y voudront venir de bonne volenté, tant de mes gens comme d'aultres, je leur donray assez argent pour leurs necessitez, et leur donneray navire et vitaille pour passer la mer. Aprez ces parolles fist lever sa baignière ung trait d'arcq dessus la montaigne, et la fist tenir Guion son frère sur un hault destrier, et puyz leur dist tout en hault : Tous ceulx qui ont devotion de vengier la mort de nostre Seigneur et createur, et de exaulcier la foy cristienne, et de aidier au roy de Chippre, si se traye soubz ma baignière; et ceulx qui auront volenté contraire, si passent par delà le pont. Adoncques les nobles cueurs luy ouyrent dire ce mot, si l'entendirent et tindrent à grant sens et à moult grant vaillance, et s'en allèrent tous en une flotte ferir soubz sa baignière en plourant de joye et de pitié du mot que Urian leur avoit dit; ne n'y demoura pièce que ne se retraist soubz la baignière de Urian. Lors fut moult joyeux Urian, et tantost fit sonner ses trompettes; tout fut



troussé et se mirent au chemin. Adoncques le maître de Rodes et les capitaines de Lymasson se mirent tous ensamble, et chevauchèrent en bataille, et dirent bien que envers Urian et ses gens n'auront nulz hommes durée ne nul peuple ; et ainsi chevauchèrent tant qu'ilz vindrent prez de la montaigne, et comme my voye de la place où la bataille avoit esté le jour devant. Par foy, seigneurs, dist Urian, là dessoubz, sur ceste ripvière, seroit bon que nous alissions logger tant que nous fuissions refrechis, et entre tant nous regarderons comment nous pourrons, pour le plus seur, grever nos ennemis. Et ilz respondirent que c'estoit bon affaire. Adonc s'en allèrent logger tous ensemble affin que on ne les peut prendre à descouvert. Or cy se taist l'istoire de plus parler d'eulx, et commence à parler du souldan, et qu'il fist.

L'istoire dist que le souldan avoit en la ville secretes espies, par quoy il sceut bien que secours venoit au roy, et tant que le peuple de la ville en fut moult rebaudi, et aussi comme le roy estoit navré, de quoy la cité estoit moult troublée. Adonc eut le souldan cause de faire assaillir la ville ; et lors fist sonner les trompettes quant le soleil fut levé, et fist ordonner ses batailles et ses arbalestriers et pavilliers, et vindrent aux fossez et aux barrières. Là commença adonc la peleterie ; arbalestriers tiroient moult vistement par dehors et par dedens ; là eut maint Sarrazin mort, car ceulx dedens tiroient de gros canons et d'espringalles. Adoncques vint le souldan, qui s'escria à haulte voix : Avant, seigneurs chevaliers, or mettons paine de prendre ceste cité avant que le secours leur vienne. Par Mahon, celluy qui pourra dedens entrer le premier, je lui donneray son pesant d'argent en tel estat qu'il y entrera ; qui

lors les eut veu assaillir aux fossez portans pics, hoiaux, pieulx de nayire et aultres instrumens, et eulx efforcer à toute puissance d'entrer et assaillir, c'estoit grant merveille à veoir; mais ceulx qui estoient dessus les murs leur jettoient pierres, pieux agus, huilles chaudes, plong fondu, poinsons plains de chaulz vive, tonneaux plains destouppes engres-sées et ensouffrées tous ardens, tellement que, malgré eulx, il leur fallut laisser la place et remonter d'autre part; et y demoura maint Sarrazin ars et affollé et grant foison de blessez. Et adonc le souldan fist renforcer l'aussault de nouvelles gens; mais ceulx de dedens se deffendoient moult vaillamment comme preux et hardis, et aussi ils avoient leurs cœurs plus vigoureux, pour la fiance qu'ilz avoient du secours qui leur estoit bien prez. Or si vous laisseray de plus en parler, et vous diray de Urian et de ses gens, qui jà avoient envoié leurs espies secretement, lesquelles espies, quant ilz sceurent et virent comment le souldan faisait assaillier la ville, ilz s'en retournèrent tantost, et disdrent à Urian comment la ville estoit en grant adventure d'estre prise s'elle n'estoit secourue bien brief, et comment le roy estoit blessé. Adoncques quant Urian et Guion entendirent ces nouvelles, ilz furent en leurs cueurs bien marris et doulens.

---

*Comment le Souldan fut tué devant Famagosse.*

**E**n ceste partie nous dist l'histoire que quant Urian ouyt les nouvelles, il fist sonner ses trompettes et fist tantost armer l'ost, et se mist en quatre batailles, dont il eut la première, son frère la seconde, le maistre de Rodes la tierce, le capitaine la quarte; et après fist demourer en la vallée tout le sommaige, et les fist bien garder de cent hommes d'armes et cinquante arbalestriers, et aprez commencèrent à monter la montaigne. Et adonc ilz virent l'ost des Sarrazins, et comment ilz assailloient moult fort la cité. Adonc Urian va dire à ses gens: Seigneurs, ces gens sont moult grant nombre; mais sachiés que pour certain, Dieu avant, ilz seront tous nostres, et bien brief. Or doncques il va dire: Allons tous contre l'ost, sans eulx riens meffaire, et allons premierement assaillir ceulx qui assaillent la cité, et je croy fermement, à l'aide de Dieu, que ilz ne nous pourront endurer. Et ilz lui respondirent que ainsi estoit bon affaire. Adonc il voulut devaller la montaigne et passer par derrière l'ost; et quant ilz cuidèrent passer, les Sarrazins les advisèrent, et virent qu'ilz n'estoient pas de leurs gens; et adonc commencèrent à effroyer et crier à l'arme. Si dist Urian au capitaine qu'il tournast sa banière sur ceulx de l'ost, et que les combattist moult fort; là eut grant partie asssemblée; et Urian et les deux aultres batailles se mirent entre le guet et ceulx qui assailloient la ville; tant attendirent tous, que ceulx qui gardoient les logis furent tous mors et desconfis. Adonc ilz laissèrent gens

pour les garder, et puyz tantost et sans delay ilz s'en allèrent vers l'assault ; mais il fut que on vint dire au souldan : Sire, toutes les tentes et pavillons sont pris et les gardes mors, et nous viennent courir sus les plus malvaises gens que je vis oncques. Adonc se retourna le souldan, et vist venir banières et pignons, et les gens si serrez ensamble qu'il ne sembloit pas qu'ilz fussent la moetié du nombre qu'ilz estoient. Adonc fut le souldan moult courroucé, et fist sonner ses trompettes pour le retraite et pour mettre ses gens en ordonnance ; mais avant qu'il les eut assemblez à moetié, Urian vint et sa bataille, qui leur courut sus moult asprement ; et là commença moult grant l'occision et perte ; mais pour certain la plus grant perte tourna sur les Sarrazins, car ilz n'eurent pas loisir de eulx ordonner, et estoient moult foullez de l'assault ; et si n'estoit mie chascun soubz sa banière quant on leur courut sus, gens qui estoient moult aspres et durs du mestier d'armes, que en peu d'eure plusieurs se mirent en fuyte ; mais le souldan, qui fut plain de grant courage et de grant vaisselage, ralia ses gens entour luy, et livra moult fort assault à nos gens et moult fierement. Là eut maint homme mort et affollé, et se faisoit fort redoubter, car il tenoit une hache à deux mains et frappoit à destre et à senestre, et faisoit moult grant occision de nos gens ; et mal advient à celluy qui ne se destourne de son chemin. Adoncques quant Urian le vit ainsi besongnier, il en fut moult doulent, et dist en soy mesme : Par ma foy, c'est grant dommaige que cest Tourc ne croit en Dieu, car il est moult preux de la main ; mais pour le dommaige que je voy qu'il fait de mes gens, je n'ay mie cause de le plus deporter, et aussi nous ne

sommes mie en place de tenir longues parolles. Adoncques il estremist l'espée au poing moult fièrement, et hurta le cheveu des esporons, et vint vers le souldan grant erre; et quant le souldan le vist venir, il ne le reffusa pas, mais empoingna sa hache et cuida ferir Urian sur la croix du chief; et Urian se destourna hors du coup; la hache fut pesante, et à la basser qu'il fist par la force du coup, la hache luy volla hors du poing. Et adonc Urian le ferist de l'espée sur le heaulme moult grant coup de toute sa force, et fut le souldan si chargé du coup qu'il fut si estourdi qu'il ne veoit ne attendoit, et perdist le frain et les estriers, et le cheveu l'emporta là où il voulut. Et adoncq Urian le ferist de la bonne espée entre le chief et les espaulles; car lors le souldan estoit tout embroché et le heaulme estoit tendre par le derrière; l'espée trouva adonc le col à my, excepté tant seullement ung peu de la garnison de la gorgerete, et trencha l'espée la garnison tout oultre et les deux maistresses vaines et les tendans au gorgeron. Adonc le souldan chait par terre, et y eut là si grant foulle de chevaux d'une part et d'autre, que la bataille y fut si tresdure et si tresforte que ses gens ne luy peurent aidier, et seigna tant qu'il luy faillist là morir par la force du sang qu'il jetta; et tantost que Sarrazins percheurent que le souldan estoit mort, ilz furent tous esbahis, ne oncques puy ilz ne combattirent de bon cueur. Adonc Urian et son frère Guion faisoient tant d'armes que nul ne les veoit qui ne les prisast. Et sachiés bien que Poete-vins et les aultres barons s'esprouvoient si bien et si vaillamment, que en peu d'eure Sarrazins furent tous desconfis, si que mal soit de celluy qui ne fut mort ou prins. Et adonc Urian et ses gens se logè-

rent ès logis des Sarrazins, et fut le sommaige des cristiens mandé, et les gardes, qui furent moult joyeux de la victoire, et s'en vindrent moult liement en l'ost, et se logèrent bien aisement; et firent les deux frères partir la conquête que chascun s'en tint à bien payé. Et cy se taist l'istoire de plus parler de Urian, et commence à parler du capitaine de Ly-masson, qui vint tantost à Famagosse.

En ceste partie nous dist l'istoire que aprez la desconfiture de la bataille, le capitaine se departist des deux frères, avecques luy xxx. chevaliers de noble affaire, et s'en vint en la cité, où on luy ouvrist les portes moult liement; et entra dedens, et il trouva les gens par les rues, dont les ungz faisoient grant feste pour ce que ilz se voioient delivrez des mains des Sarrazins, et beneissoient l'eure que oncques les enfans de Lusignen avoient esté nez, et l'eure que ilz entrèrent au pais; et les aultres gens faisoient moult grant dueil et menaient moult grans pleurs et douleurs pour la blessure du roy, et que on disoit que il n'y avoit remède que il ne perdist la vie; si ne sceut pas bien que penser, car il ne sçavoit pas encore que le roy fut blessé. Et adoncques tant exploita, qu'il vint au palais et là descendist, où il trouva le peuple bien mat. Et il leur demanda qu'il leur failloit. Par foy, dist l'ung, assez; car nous perdons le plus preudomme et le melleur qui oncques fut en ce royaume. Comment, dist doncques le capitaine, le roy est malade? Ha, ha, sire, n'en sçavez-vous plus? lui respond ung chevalier; nous saillismes hyer encontre nos ennemis, et au retourner fut le roy feru du souldan d'ung dart envenimé, tellement que l'on n'y treuve point de remède; car nous pensions tousjours que ces deux nobles hommes et

leurs gens deussent venir trois jours a. Et sachiez que la fille du roy meyne telle douleur que c'est grant pitié à veoir, car il y a jà deux jours qu'elle ne volut boire ne menger ; il nous sera bien mal advenu se nous perdons nostre roy et nostre damoiselle ; car se ce advenoit, le pays seroit en grant orphanité de seigneur. Beaulx seigneurs, dist le capitaine, il n'est pas encores perdu tout ce qui en peril est. Ayez fiance en nostre seigneur Jhesucrist, et il vous aidera. Je vous prie menez-moy vers le roy. Par ma foy, c'est legier à faire, car il gist en celle chambre là, où chascun peut aller comme se il n'avoit nul mal. Il a jà fait son testament, et a ordonné du sien à ses serviteurs que chascun s'en tint pour bien payé, et est confessé, et a receu nostre Seigneur, et est administré de tous les sacremens. Par foy, dist le capitaine, il en vault mieulx, et a fait que sage ; et lors entra en la chambre et s'enclina devant le lict du roy, et lui fist la reverence. Capitaine, dist le roy, vous soiez le bien venu, et vous mercie de la bonne diligence que vous avez faicte de acompaigner ces deux nobles hommes par quoy ma terre est hors de la subjection des Sarrazins, car je n'avoie plus puissance de gouverner mes gens en mon pais ; je vous prie que vous leur allez dire de par moy qu'il leur plaise de moy venir veoir devant que je meure ; car j'ay grant volenté de leur satisfaire à mon pover de l'amour et de la courtoisie qu'ilz m'ont faicte, et aussi ay-je grant desir de les veoir et de parler à eulx pour certain cas que je leur vueilz declarer. Monseigneur, dist le capitaine, je les vois querir à vostre congié. Or allez, dist le roy, et les me faictes cy venir demain dedens prime. Et se partist et saillist de la ville et s'en



vint vers l'ost. Et lors le roy commanda à encour-tiner toute la grande rue, de la porte par où les frères devoient venir, jusques au palais, et fist appareiller le plus richement qu'il peut contre leur venue. Et cy se taist l'istoire de luy, et parle du capitaine.

L'istoire nous dist que tant erra le capitaine qu'il vint en l'ost et en la tente des deux frères, qui moult le bienveignèrent. Et lors il leur compta comment le roy estoit moult fort blessé, et qu'il leur prioit humblement qu'il leur pleut de venir devers lui pour les mercier du noble secours qu'ilz lui avoient fait, et eulx satisfaire de leur paine et despence à son pouvoir, et aussi pour parler à eulx d'autres cas. Par foy, dist Urian, nous ne sommes pas cy venus pour estre souldoiez pour argent, mais tant seulement pour soutenir et exaulcer la foy catholique, et nous voulons bien que chascun sache que nous avons assez finance pour paier nos gens; mais toutesfois nous irons volentiers vers luy. Et sachiés que quant à moy je pense aller par devers le roy en tel estat que je me partis de la bataille, car, se il luy plaist, je vueil recepvoir l'orde de chevalerie de sa main, pour la vaillance et l'onneur que chascun dist de luy. Et vous, capitaine, luy povez aller dire que demain, à l'eure que il a mandé, moy, mon frère et le maistre de Rodes, Dieu avant, irons devers luy, et cent de nos plus haultz barons. Adoncques prinst congié le capitaine et s'en vint en la cité, où on le receipt moult honnourablement; et tantost il vint au palais, où il trouva le roy en aussi bon point comme il avoit laissé; et y estoit sa fille Hermine, qui moult estoit doulente du mal de son père; mais non obstant ce elle se reconfortoit fort de ce que on luy disoit que les deux frères damoisaulx devoient venir le lendemain; et

sachiés qu'elle desiroit moult à voir Urian. Et adonc saltia le capitaine le roy. Vous soiez le bien venu, dist le roy; quelles nouvelles de vostre messaige, et verra-on point ces deux jeunes damoiseaulx? Sire, ouy, dist le capitaine, eulx centiesme; et il vous plaise assavoir que ilz ne veulent rien du vostre, car, comme ils dient, ilz ne sont pas souldoiers pour argent, mais ilz se disent souldoiers de nostre seigneur Jhesucrist. Et tant, sire, m'a dit Urian que demain, Dieu avant, devant qu'il soit prime, il viendra par devers vous en tel point qu'il saillist de la bataille, car il veut recepvoir l'ordre de chevalerie de vostre main. Par ma foy, dist le roy, je loe nostre seigneur Jhesucrist quant devant ma mort il luy plaist que je face chevalier d'ung si vaillant et hault prince; et sachiés que j'en morray plus aise. Adoncques quant Hermine oyt dire celle nouvelle, elle en eut si grant joye au cuer qu'elle ne sçavoit quelle contenance faire; mais pourtant elle n'en monstra nul semblant; ainçoys monstra qu'elle sentoit grant douleur au cuer. Adoncques elle prinst congié de son père et le baisa moult doucement en plourant, et s'en vint en sa chambre; et là commença moult fort soy plaindre une heure de la douleur qu'elle avoit de son père, et l'autre heure de la grande joye et desir qu'elle avoit de voir Urian, dont la demourée luy tarde moult, et fut moult grant pièce en pensée tellement argue que oncques toute nuyt ne dormit, et ainsi se passa la nuyt jusques à lendemain heure de prime.

En ceste partie nous dist l'istoire que lendemain matin fist le roy commandement que tous les nobles et non nobles feissent parer les rues pour faire feste et honneur à la venue des deux frères et de leurs gens, et que à chascun quarrefour eut menestriers et trom-

pettes , et que on jouast de tous aultres instrumens qui pourroient estre trouvez en la ville, et de toutes aultres melodies de quoy on se pourroit adviser pour festoyer et honnourer les damoiseaulx ; et pour certain le peuple en fist bien son devoir , et plus que le roy ne sceut commander. Que vous feroij-je plus long prologue ? Les deux frères dedens prime vindrent montez moult noblement sur deux haultz destriers ; et estoit Urian tout armé , ainsi ne plus ne mains comme il se partist de la bataille, l'espée toute nue au poing ; et Guion son frère estoit vestu d'ung moult riche drap de Damas bien fourré ; et alloient par devant eulx trente des plus haultz barons en noble arroy , et devant eulx , au plus prez , estoit le maistre de Rodes et le capitaine de Lymasson ; et aprez les deux frères venoient en moult noble arroy soixante et dix chevaliers et leurs escuiers, leur compaignie, et leurs pages ; et en ce point entrèrent en la cité. Là vessiés commencer la feste moult grande, et les trompettes et menestriers faire leur mestier ; et y avoit aultres instrumens, pluseurs de melodieux sons, et parmy la ville veissies gens de grant honneur qui estoient moult bien et richement habillez , qui crioient à haulte voix : Ha , ha , bien veignez , prince de victoire , par qui nous tenons et sommes tous resucitez du cruel servage des ennemis de nostre seigneur Jhesucrist. Là veissiez dames et damoisselles aux fenestres , et les anciens gentilshommes et bourgoys si s'esmerveilloient de la grant fierté du noble Urian, qui estoit tout armé, le visaige decouvert , ung chapeau vert sur le chief , l'espée toute nue au poing ; et le capitaine luy portoit son heaulme devant , sur le tronson d'une lance ; et quant ilz apperceurent la fierté de son visaige , ilz disdrent

entre eux ensemble : Cest homme est pour soubzmettre tout le mondé en son obeissance. Par ma foy, disoient les aultres, il le montre bien, car il est entré en ceste cité comme se il l'eut conquise. En nom de Dieu, disoient les aultres, la rescousse du dangier dont il nous a ostez vault autant et est assez conquise. Par ma foy, disoient les aultres, combien que son frère n'ait pas si fière philozomie, si semble-il bien homme de bien et de haulte entreprinse. Et ces paroles disant, ils les convoièrent jusques au palais, où ils descendirent. Et cy se taist l'istoire de plus parler du peuple, et commence à parler comment les deux frères vindrent devant le roy.

---

*Comment Urian et Guion vindrent devers le roy,  
luy estant au lict, tout armez.*

**L**'istoire nous dist que les deux frères moult honnourablement vindrent faire la reverence au roy, et le roy les receipt moult liement, et les mercia moult gracieusement de leur secours, et leur dist que, aprez Dieu, ilz estoient ceulx par qui luy et tout son royaulme estoit ressuscité du plus cruel pas que de la mort; car se ilz ne fussent venus, les Sarrazins les eussent tous destruis ou contrains à eulx convertir en leur foy, que leur eut pis valu que mort temporelle, car ceulx qui eussent à ce consenti de cueur ilz eussent eu à tousjoursmais damnation perpetuelle. Et pourtant, dist le roy, est-il raison que je vous merite à mon pouvoir, car je n'ay aultre vöulenté que d'en faire

mon devoir, combien, certes, que je ne le pourroye accomplir à la value du hault honneur que vous m'avez faict; mais je vous supplie humblement prendre en gré ma petite puissance. Par ma foy, dist Urian, de ce ne fault riens doubter, car nous ne sommes pas venus chā pour avoir de vostre or ne de vostre argent, ne de vos villes, chasteaux, ne terres; mais pour acquerir honneur et pour destruire les ennemis de Dieu, et exaulcer la foy catholique; et vueil, sire roy, que vous sachez que nous tiendrons bien nostre paine bien employé se il vous plaist à nous faire tant d'onneur que nous vueillez faire, mon frère et moy, chevaliers de vostre main. Par ma foy, dist le roy, nobles damoiseaulx, j'à soit ce que n'en soye pas digne de vous accomplir cette requeste, si la vous accordoye; mais avant sera la messe dicte. Sire, ce dist Urian, ce me plaist moult bien. Et adoncq le chappellain fut tantost prest, et lors Urian et son frère et tous les aultres devotement ouyrent la messe et le service divin, et après le service divin Urian vint devant le roy; et adoncques il traist son espée du fourreau et s'agenoulla devant le liect où le roy gisoit, et luy dist en ceste manière: Sire roy, je vous requiers pour tout salaire du service que je vous puy faire ne pourroye avoir fait ne faire jamais en toute ma vie, qu'il vous plaise moy faire chevalier de ceste espée, et vous m'aurez bien remuneré de tout ce que vous dictes que moy et mon frère avons fait pour vous et vostre royaulme; car de main de plus vaillant noble chevalier et noble seigneur n'en puy recevoir l'ordre de chevalerie que de la vostre propre. Par ma foy, dist le roy, sire damoiseau, vous me portez plus de honneur que vous ne me devez et m'en dictes cent fois plus que je ne vaulx, car celluy

don vous accordé-je, et il n'est pas à refuser d'ung si noble damoiseau et en faire ung chevalier; mais aprez ce que je vous auray accomply ce que vous m'avez requis, vous m'aurez en convenant, se il vous plaist, que, aprez ce, vous me donnerez ung don, lequel ne vous tournera jà à prejudice ne dommaige du vostre, mais tournera à vostre tresgrant prouffit et honneur. Par ma foy, sire, dist Urian, je suis tout prest et appareillé de accomplir vostre voulenté à vostre plaisir. Adoncques eut le roy grant joye, et se dressa en soy seant, et prinst l'espée par le pommeau que Urian luy tendoit, et luy donna l'acollée en disant en ceste manière : En nom de Dieu, chevalier soyez, qui vous ottroye amendement. Et puyz lui rebaila l'espée; et ce faisant ses plaies lui escreurent et en saillist le sang à grand randon parmy le bendeau; de quoy Urian fut moult doulent, et aussi furent tous ceulx qui le veirent; mais adoncques le roy se bouta arrière dedans son lict tout soubdainement, et dist qu'il ne se sentoit nul mal. Et après commanda à deux chevaliers que on luy allast querir sa fille; et ilz le firent et l'admenèrent au mandement de son père; et quant le roy la vit, il luy dist : Ma fille, merciez ces nobles hommes du secours qu'ilz ont fait à moy, et à vous et à nostre royaulme, car ce n'eust été la grace de Dieu et leur puissance, nous estions tous destruis, au mieulx venir exillez hors de nostre pays, ou il nous eut fallu convertir à leur loy, qui nous eut pis vallu que de morir temporellement. Et adoncques elle se agenoulla devant les deux frères et les salua et mercia moult humblement. Et sachiés qu'elle estoit en telle manière esmeue comme se elle fut ravie, et ne sçavoit comment proprement faire contenance, tant de la douleur qu'elle avoit au cueur del'angoisse

que son père sentoît, que des pensées qu'elle avoit à Urian ; et tant qu'elle estoit comme une personne qui est issue nouvellement de son somne ; mais adonc Urian, qui bien apperceut qu'elle avoit l'esprit troublé, la saisit moult doucement et la dressa en estant contre mont, en soy enclinant contre elle ; et en ce faisant se entrefirent moult d'honneur. Et là disoient ceulx du pays : Se ce noble homme avoit jà pris nostre damoiselle à femme, bien nous iroit ; nous n'aurions doubte de payen ne de homme qui nous voulsist mal. Et adonc appella le roy sa fille, et luy dist ainsi : Ma fille, seez vous icy emprez moy, car je croy que vous ne me tendrez plus gaires grant compaignie. Et elle se assist tout en plourant emprez luy. Et adoncques tous ceulx qui là estoient commencèrent à plourer de la pitié que ils eurent du roy et aussi de la douleur que ilz veoient que sa fille, qui estoit pucelle, menoit si piteusement. Et adoncq prinst le roy à parler.

L'istoire nous dist que le roy fut moult dolent quant il vit sa fille mener telle douleur ; si luy dist moult amiablement : Ma fille, laissez ester celle douleur et ce grant dueil que vous menez, et vous en prie ; car en chose que on ne peut amender, c'est folle de soy en donner trop grand couroux, combien que c'est raison naturelle que chascune creature soit dolente de son amy ou de son proesme quant on le pert ; mais se Dieu plaist je vous pourvoiray si bien que vous vous en tendrez contente avant que je me parte de cette mortelle vie, et aussi seront tous les barons de mon règne. Et adonc commença la pucelle à plourer plus fort que devant, et aussi tous les barons menoient telle douleur que c'estoit grand pitié à veoir ; mais Urian et Guion furent moult couroucez et



moult doulens , et le roy voyant leur douleur leur va dire : Belle fille , et vous tous aultres , ceste douleur ne vous est pas necessaire à mener , car je n'en amende ne vous aussi en quelque manière , mais me accrois-sés ma douleur ; pour quoy je vous commande à tous que vous cessez ceste douleur , se vous amez que je demoure encores en vie une pièce de temps avecques vous. Et après ilz s'en tindrent le mieulx qu'ilz peuvent pour la parolle que leur avoit dicte le roy. Et de rechief prinst la parolle le roy , soy adressant à Urian , et lui dist : Sire chevalier , la vostre mercis vous m'avez donné ung don , voire par tel convenant que du vostre , ne de vostre chevance , ne vous demanderay-je riens. Par foy , dist Urian , demandez tout ce qu'il vous plaira , car se c'est chose de quoy je puisse finir , je le vous accompliray volentiers sans faillir. Grand mercis , sire , dist le roy ; sachiés qu'en ce que je vous demanderay je vous donneray noble chose. Or , sire chevalier , je vous prie qu'il vous plaise de prendre ma fille à femme et tout mon royaume , et dès maintenant je le metz en vostre main et m'en demès à vostre profit. Et est vray qu'il avoit fait apporter la couronne , laquelle , à ses parolles , il prinst , et dist : Tenez , Urian , ne refusez pas la requeste que je vous fais. Lors furent les barons du pays si joyeux qu'ilz larmoyent de pitié et de joye qu'ilz en avoient. Et quant Urian entendist ces parolles , il pensa ung peu , et sachés qu'il en fut moult doulent , car il avoit moult grant volenté de aller par le monde pour veoir les pays et les contrées , et acquerir honneur ; mais toutesfois puis qu'il avoit accordé au roy le don , il ne s'en volut pas desdire. Et quant les barons du pays le visrent ainsy penser , si s'escrièrent tous à haulte voix moult piteusement : Ha , a , noble homme , ne vueil-

lès pas refuser ceste requeste au roy. Par ma foy, seigneurs barons, dist Urian, non ferai-je. Adonques s'enclina Urian devant le lit du roy, et prist la couronné; et la mist à Hermine sur son giron en disant : Damoiselle, elle est vostre, et puys que la chose est ainsi venue, je vous aideray à la garder tout mon vivant, au plaisir de Dieu, contre tousceulx qui la voudront suppediter. Adonques eut le roy si tresgrant joye, et aussi eurent tous les barons, et puys fist venir l'archevesques de la cité, qui les fiança; mais Hermine dist qu'elle verroit quelle fin son père prendroit de sa maladie avant qu'elle en fist plus. Adonques Urian dist : Damoiselle, puys qu'il vous est bel, il me plaist bien. Lors fut le roy moult doulent et lui dist : Hermine, belle fille, vous monstrez bien que vous ne m'amez gaires, quant la chose que je desiroie plus en ce monde veoir devant ma fin vous ne voulez accomplir; or voye-je bien que vous desirez ma mort. Quant la pucelle l'entendist, si fut moult doulante, et se mist à genoulx toute en plourant, et dist en ceste manière : Mon tresredoubté seigneur et père, il n'est chose au monde que je vous refusasse jusques à morir, commandez-moy vostre plaisir; vous dictes que vraye fille doibt doubter et soy garder de irer son père. Adonques, dist le roy, or vous commandé-je à tous et à toutes que vous laissez ce dueil et tendez et appareillez ceste salle, et menez grant joye; et faictes appareiller la messe; et aprez le service faites dresser les tables, et aprez disner faictes icy devant moy la feste comme se je fusse maintenant sur piés; car sachiés bien que ce allegera bien mon mal. Et adonques eulx tous firent ce qu'il leur commanda; lors la messe fut dicte, et s'assist-on au disner, et fut Hermine assise en une table mise devant le

lict du roy son père, et Urian en costé d'elle, et Guion servoit devant Hermine. Lors eut le roy moult grant joye ; mais sachiés qu'il faisoit meilleur samblant que le cueur faire ne povoit ; car certes, quelque chière qu'il fist, il souffroit moult grant douleur, car le velin qui estoit en la plaie luy vermissoit tout le corps ; mais pour resjouir la baronnie, il monstroït semblant comme se il n'eut mal ne douleur ; et aprez disner commença la feste et dura jusques au soir ; et lors le roy appella Urian et luy dist : Beau filz, je vueil que vous espousez ma fille demain, et vous vueil couronner de ce royaulme, car sachiés que je ne puis plus gaires vivre, et pour ce je vueil que tous les barons du royaulme vous fassent hommaige avant ma mort. Sire, dist Urian, puy qu'il vous plaist, votre voullenté est la mienne. Et là estoit Hermine presente, qui pas ne refusa à faire la voullenté de son père.

---

*Comment Urian espousa Hermine, la fille du roi de Chippre.*

**L**e lendemain à heure de tierce fut l'espousée parée moult noblement, et fut la chappelle dressée moult richement ; et les espousa l'archevesque de Famagosse ; et aprez vint Urian devant le roy, et s'agenoilla devant son lict ; et le roy prist sa couronne et luy mist sur sa teste, et Urian le mercia. Et adonc appella le roy tous les barons du pays, et leur commanda à faire hommaige au roy Urian son filz, et le firent moult joyeusement ; et aprez fut la messe commencée ; et la messe dicte, ilz se assirent à disner, et puy commença la feste,

et dura jusques au soir. Et aprez le soupper commença la feste, et quand temps fut l'espousée fut couchée, et aprez se coucha Urian, et le dit archevesque benist le lict, et ces choses faictes chascun se departist; et s'en allèrent les ungz coucher, et les autres danser, et s'esbatirent; et Urian fut avecques sa femme, qui moult doucement se entracointèrent; et lendemain ilz vindrent au roy comme devant; et fut la messe commencée, et la royne amenée au destre par Guion son frère et par l'ung des plus haultz barons du pays.

En ceste partie nous dist l'istoire que le lendemain à heure de tierce vint le roy Urian acompaigné de la baronnie de Poetou et du pays de Chippre devant le roy, et s'enclina, et le salua moult humblement et doucement. Beau filz, vous soiez le tresbien venu, dist le roy; je suis moult joyeux de vostre venue; faictes venir ma fille, si orrons le service divin. Adoncques vint Hermine sa fille moult noblement acompaignée de dames et de damoiselles; et elle venue devant son père, elle s'enclina et le salua moult doucement. Lors luy dist: Ma fille, vous soiez la tresbien venue; je suis tresbien joyeux quant Dieu me fait tant de grace en mon vivant que je vous vois si haultement assenée, et sachiés que j'en mourray plus liement, pour ce que je suys asseuré que vous et mon pays estes hors de doubte des Sarrazins; car vous avez bon garant et avez bonne garde de tresbon prince et bataillereux, qui moult bien vous garantira et gardera contre tous vos malveillans, et par especial contre les anemis de Jhesucrist. Et à ce mot commença le chapellain la messe, et fut nostre Seigneur levé; et adoncques fist le roy appeler Urian et aussi Hermine sa fille, et leur commença à dire en

ceste manière : Mes beaulx enfans , je vous prie que tresaffectueusement que vous pensez de bien amer , garder , honnourer , et de porter et tenir bonne foy l'ung à l'autre , car je ne vous puy plus tenir compaignie. Or je vous commande au roy de gloire , qui vous ottroie paix et amour ensamble , et vous vueille donner bonne vie et longue tous temps par amende-mens , et vous ottroye puissance et victoire contre les ennemis de Dieu. Et en disant ce mot , il cloyt les yeux , et alla à Dieu si doucement qu'il leur sembla qu'il fut endormy ; mais quant ils apperceurent qu'il fut mort , adonc commença la douleur moult grant. Lors fut menée Hermine en sa chambre , car elle faisoit tel dueil que c'estoit grant pitié à veoir. Qui vous voudroit de ce tenir longues parolles ? Le roy fut ensepveli le plus honnourablement que on peut , et furent vigilles et la messe dictes , aussi le obsèque ; le corps enterré moult honnourablement et richement selon l'usage du pays. Et sachiés que tout le peuple du pays estoit moult doulent ; mais ils se reconfortoient fort de ce qu'ilz avoient trouvé et recouvré seigneur de si grant proesse plain , et estoient avecques tous assoulagez ; et ainsi de peu à peu si cessa la douleur. Et assez tost aprez ala Urian parmy son pays visiter les lieux et les fortz , et bailla une partie de ses gens à Guion son frère et au maistre de Rodes , et les fist entrer en mer pour aller sçavoir moult se ilz orroient nouvelles que Sarrazins revenissent point armer sur mer pour venir sur son pais : Car sachiés , ce dist le roy Urian , que nous ne pensons pas à entendre tant qu'ils nous viennent requérir , car nous les irons encores bien briefment , se Dieu plaist , visiter , mais que nous ayons avant sceu l'ordonnance de nostre pays. Et à tant s'en partirent ledit Guion et le mais-

tre de Rodes et le capitaine de Lymasson, et entrèrent Guyon et le maistre de Rodes en mer atout trois mille combatans. Et cy se taist l'istoire de plus parler d'eulx, et commence à parler comment luy et Hermine allèrent visiter leurs pays.

L'istoire nous dist que le roy Urian avec la royne Hermine sa femme allèrent visiter parmy leur pays et leur royaulme, leurs bourcs et bonnes villes, là où on leur fist de moult beaulx dons et presens, et y furent receups moult honnourablement à grant joye; et vindrent ceulx des grosses villes à l'encontre du roy et de la royne, tous hors des villes à grandes processions, et les bourgeois à grans sons de instrumens, dont le roy Urian s'en tint à bien content. Et sachiés qu'il pourveut moult à tous ses fors de toutes choses necessaires pour la guerre, se aulcune chose advenoit au temps advenir. Et pour vray chascun estoit esmerveillé de sa grandeur et de sa fierté et puissance de corps; et bien disoient les gens du pays que c'estoit homme qu'ilz eussent oncques mes veu qui plus se fesoit à doubter de couroucer. Et par ceste manière alla Urian de lieu en lieu par son royaulme, et tout ce qui estoit en bonnes mains par raison et justice faire il amoit, et ne movoit point les officiers; et où il voyoit qu'il estoit besoing, il y pourveoit de remède par bon conseil de ses barons; et leur commandoit à tous qu'ilz feissent raison et justice en tous temps, tant au petit comme au grant, sans avoir aulcune faveur à nulluy, ne aulcune moleste ne extorsion; mais leur chargea et commanda moult expressement d'aller parmy juste verité, ou aultrement se ilz faisoient le contraire, il les pugniroit si cruellement que les aultres y devroient prendre exemple. Et lors luy, sa femme et leurs gens s'en retournèrent à Famagosse,

et fut la royne ençainte. Et cy se taist l'istoire d'en plus parler, et commence à parler de Guion et du maistre de Rodes, qui vaugeois par la mer encontre de Surye, de Damas, de Baruli, de Tupppe, de Damiette, pour sçavoir se ilz pourroient avoir nouvelles des Sarrazins.

Or nous dist l'istoire que tant vaugeois les cristians par la mer que ilz virent et apperceurent approchier d'eulx, ainsi comme d'une lieue, une certaine quantité de vaisseaulx; mais par semblance ilz ne povoient pas estre grant nombre. Adonques ilz envoierent une gallée par devers nos gens, qui jà c'estoient mis en ordonnance, et leur dirent les nouvelles; et tantost ilz tirèrent les voilles amont et allèrent par force de vent et de voilles tant que la navire des Sarrazins les apperceut. Et quant ils les congurent, ils furent moult esbahis, et se cuidèrent bien retraire au port de Baruli; mais nos gallées les avancèrent, et leur coururent sus de tous costez. Là eut grant occision, et, à brief parler, Sarrazins furent desconfis, et leurs navires prises et jettez à bort, et les gens en la mer; et estoit la navire plaine de moult beaulx biens. Et aprez nos barons se mirent en la mer pour retourner en Chippre; mais par fortune et force de vent et de la mer qui se tourmenta ung peu, ils arrivèrent en Truli en Armanie. Et quant le roy d'Armanie, qui estoit frère au roi de Chippre, le sceut, il envia tantost sçavoir quieulx gens c'estoient. Et adonques le maistre de Rodes leur dist: Seigneurs, dictes au roy que c'est le frère de Urian de Lusignan, roy de Chippre, qui vient de visiter la mer que Sarrazins ne feissent armée pour courir sus aux Chippriens, pour le souldan, qui a esté descoufit et mort, et tous ses hommes, à la grosse bataille de Famagos-



se. Comment, disdrent ceux d'Armanie, y a il aultre roy en Chippre que le roy qui estoit frere à nostre roy ? Par foy, dist le maistre de Rodes, ouy : car le roy fut navré d'ung dart envenimé par le souldan, tellement qu'il en est mort ; et en son vivant il maria sa fille au preux Urian de Lusignen, qui occit le souldan en la grosse bataille et desconfit tous ses gens. Adoncques, quant ceulx l'entendirent, ilz le vindrent denoncer à leur roy, qui fut moult doulent de la mort de son frere ; mais, nonobstant, il vint à la mer à grant compaignie d'armes, et entra au vaisseau où Guion de Lusignen et le maistre de Rodes estoient. Et quant Guion sceut sa venue, il luy alla à l'encontre, et s'entrefirent moult grant reverence. Et adoncques dist le roy au grant prieur de Rodes : Maistre, puy que ce jeune damoiseau est frere du mari de ma niepce, je serois mal courtois, quant il est arrivé en ma terre, si je ne luy faisois sa recepte si honnourablement qu'il luy appartient ; et de cecy je vous prie que vous luy priez de par moy qu'il luy plaise à venir, et nous luy ferons la meilleure chière que nous pourrons. Par foy, dist le grand prieur, Sire roy, je le feray. Adoncques il en parla à Guion, et il luy respondist moult doucement : Car je feroie bien et volentiers plus grande chose pour le roy, se faire le pouvoye, car bonne foy et raison le veulent. Et lors se partirent ensamble, et mena Guion belle chevalerie de Poetevins avec luy ; et toutesfoys avoit chascun d'eulx vestu la coste d'acier, et estoient en moult bon arroy commes gens duys du mestier d'armes, et entrèrent en petis vaisseaulx, et arrivèrent en terre, et aprez monterent à cheval et s'en allèrent vers le Cruli. Et cy se taist l'istoire ung peu de parler de ce, et commence à parler de

Florie , fille du roy d'Armanie, qui en celluy temps estoit à Cruli.

L'istoire dist que le roy d'Armanie avoit adonques une tresbelle fille qu'il avoit eue de sa femme, laquelle estoit allée de vie à trespasement n'avoit pas encores gaires que deux ans, et n'avoit le roy plus d'enfans. Et sachiés que luy et son frère le roy de Chippre avoient en espouse les deux seurs, qui furent filles du roy de Mallègres, et eurent chascun une fille de leurs femmes, dont celle que Urian avoit espousée, qui avoit nom Hermine, en fut l'une, et l'autre la pucelle Florie, dont je vous ai commencé à traicter; la pucelle se tenoit pour lors à Cruli. Adonques fut la pucelle moult joyeuse; car moult desiroit à veoir les estrangiers; et lors se vestit et se para moult richement, et fist moult bien aourner ses dames et damoiselles; et tantost entra le roy en Cruli, et vint au chasteau; et là descendist, et la compagnie qui venoit avec luy, et montèrent en la grant salle. Et adonques Florie, qui moult desiroit leur venue, vint à l'encontre, et se humilia moult encontre son père; et il luy dist : Faictes feste à ces nobles gens et les bienveignez, et especiallement le frère du mari de ma niepce de Chippre, vostre cousine. Et quant la pucelle entendist ce, elle fut moult joyeuse. Adonques elle s'en vint à Guion et le prinst par la main moult doucement en disant : Sire damoiseau, vous soiez le tresbien venu au royaulme monseigneur mon père. Mademoiselle, tresgrant mercis. Adonques commença la feste moult grande, et firent moult bonne chièr, et furent moult grandement servis de moult grantz beaulx et riches mès; et Guion et la damoiselle s'entredisoient de moultz gracieuses parolles. Et sachiés de vray, se Guion

eut le loisir, il lui eut dit avec sa pensée ; mais ce pendant que ilz estoient en grant solas, vint une galliote au port, qui venoit de Rodes, et furent ceulx de dedens moult joyeusement receups de la ville, et y furent moult joyeux quant ilz trouvèrent leurs gens, et tantost demandèrent où estoit leur maistre ; et il leur fut dist qu'il estoit au palais devers le roy avecques le frère du roy de Chippre, lesquieulx le roy d'Armanie festoioit au fort. Or tost, dist l'ung, allez leur dire qu'il a passé par devant nostre ysle moult grosse navire de Sarrazins, et ne sçavons où ilz sont tournez ; mais toutes fois ilz ont pris le vent pour aller en Chippre, et dist-on que c'est le caliphe de Bandas à tout sa puissance. Adonc s'en partist ung frère chevalier, et vint au fort, et dist au maistre de Rodes : Telles nouvelles nous sont venus ; pourvoies y de remède. Adoncques quant le maistre l'entendist il vint à Guion et luy dist : Sire, il est bien temps de nous en aller ; pour certaines nouvelles qui sont venues, il est bon de nous en retourner en Chippre. Pour quoy ? fist Guion ; sçavez-vous chose de nouvel qu'il soit besoing de nous en retraire si hastivement ? Par foy, dist le maistre, ouy ; car il est vray que le caliphe de Bandas est passé par devant l'isle de Rodes, à grant multitude de grosses navires, et y avoit dedens grant multitude de peuple de Sarrazins, et tournent le chemin de Chippre. Adonc quant Guion ouyt ceste nouvelle, il dist moult doucement à la pucelle qu'il tenoit par la main : Damoiselle, je vous prie treschierement que aiez souvenance de moy, car je ne puys plus avecques vous demourer, mais il me fault partir en présent ; et toutesfoys voiez cy tous temps vostre vassal à faire tout ce qu'il vous plaira de moy comman-

der. Beau sire, dist la damoiselle, tresgrans mercis. Et aprez Guion vint au roy et prinst congié de luy au plus bel qu'il peut; mais quand le roy sceut la nouvelle pour quoy ilz s'en partoient si hastivement, il fut doulent, et les convoia jusques au port; et tantost ilz montèrent sur la mer, levèrent leurs voilles, et allèrent sanglans à force de vent à plains voilles tirans vers Chippre. Et sachiés que Florie estoit adonc montée aux fenestres d'une haute tour, et tant qu'elle peut oncques veoir la veye ne se partist oncques des fenestres. Et cy se taist l'istoire à parler de Florie et du roy son père, et aussi de Guion, et commence à parler du caliphe de Bandas et ses gens et de la contrée vers où ilz tournèrent.

L'istoire nous racompte et dist que le caliphe de Bandas et le roy de Brandimont de Tarche, qui estoit oncle du souldan de Damas, avoient oy les nouvelles comment le souldan avoit esté occys et desconfy en l'isle de Chippre avecques toutes ses gens, dont ilz furent moult doulens; et se mirent en mer; et pour ce assemblèrent leurs gens à bien soixante mille payens, pour venir destruire l'isle de Chippre et tous les habitans; et ce cuidoient-ilz bien faire à peu de paine; car ilz cuidoient fermement que les Chippriens n'eussent point de roy, pour ce qu'ilz sçavoient que leur roy avoit esté occis en la guerre du souldan; et pourtant ilz se avançoient le plus qu'ilz povoient d'arriver et descendre au pays sans ce qu'ilz feussent apperceus; et tout ce faisoient-ilz pour mieulx venir en leur intention. Mais ceulx de Rodas l'avoient fait à sçavoir au roy Urian, qui avoit jà fait assamblar toutes ses gens et les fist mettre en bonne ordonnance pour recepvoir la bataille, et avoit jà ordonné bonnes gardes sur les portz, que

tantost qu'ilz les verroient venir au port qu'ilz feroient signe par feu; par quoy en mains d'une nuyt on le sçauroit par tout le pays, et se traiteroit chascun celle part qui pourroit armes porter; et ainsi l'avoit fait crier le roi sur la hart. Et sachiés que le roy tenoit les champs au millieu des portz de son royaume pour estre plus tot là où les Sarrazins arriveroient pour prendre terre, et faisoit le roy si grant semblant qu'il donnoit à ses gens si grant cueur que avecques luy et en son entreprinse ilz eussent bien osé combattre le caliphe et toutes ses gens et sa puissance. Or advint par la grace de Dieu que fortune se leva en la mer et orage et tempeste si horrible que Sarrazins furent moult esbahis; et les departist tellement la tempeste qu'ilz ne sceurent en gaires de temps que huit de leurs navires devindrent; et lendemain, environ heure de prime, l'aer fut tout cler et le vent attempré; et luisoit le soleil bel et cler. Adoncques la grosse navire des payens se tint ensemble et s'en tourna son chemin vers le port de Limasson. Et d'eulx vous laisseray à parler, et vous diray de huit vaisseaulx qui furent esgarez par la tourmente et quel chemin ilz tindrent; et en ces huit vaisseaulx estoit toute l'artillerie des Sarrazins, tant de canons que de trait, eschelles, pavars, et telles besongnes, et s'en venoit celle navire pour arriver au port de l'ost et au champ; et tout ce chemin venoit Guion et le maistre de Rhodes et leurs gens, qui furent bien quatre mille. Adonc apperceut l'une navire l'autre, et quant ils aprochèrent, et nos gens apperceurent et congneurent que c'estoient Sarrazins, et les Sarrazins apperceurent que les aultres estoient cristieus, commença moult fort l'effroy à estre moult grant d'ung costé et d'autre. Là com-

mencèrent à traire de canons et d'arbalestres, et à l'approchier l'ansoient dars si fort et si dru que ce sambloit estre gresle des viretons qui voloient; et fut la bataille moult grande, dure et forte; mais Guion, le maistre de Rodes et leurs gens les assailloient si asprement que Sarrazins ne sçavoient quelle part tourner pour eulx deffendre; car nos gens qui estoient ès gallées tournoient si trespasprement entour eulx que payens en furent tous esbahys; là leur ouyt-on fort reclamer leurs dieux, et neantmoins ilz furent desconfis et mors. Adoncques quant l'admiral de Cordes, qui estoit maistre de l'artillerie, veist la desconfiture tourner sur les payens, fist getter hors de la grant nef une petite galiote à huyt rames qui estoit en celle nef, et y entra jusques au nombre de huyt de ses plus privez, et prindrent l'aventure du vent, et allèrent si roidement que tous nos gens s'en esmerveilloient; mais oncques ne firent samblant de les suyre, ainçois se abordèrent ès vaisseaulx et entrèrent dedens et commencèrent à jeter tout à bort; toutesfois ilz prindrent bien de Sarrazins en vie jusques au nombre de deux cens ou environ, dont Guion en donna cent au maistre de Rodes pour rendre aulcuns cristiens, frères de leur religion, qui avoient esté pris des Turcs en une bataille qu'ilz avoient eue sur la mer contre le grand Carmen, et luy donna aussi deux des nefz conquises, que le maistre envoya tantost à Rodes, et remercia Guion. Et aprez, Guion prinst les aultres cent Sarrazins et les deux plus riches nefz de celles qui avoient esté conquises, et les bailla à ung chevalier de Rodes, et lui dist : Menez-moi ces deux nefz et ces cent Sarrazins au Cruli, et me recommandez au roy et à sa fille; et de par moy presentez à la pucelle les deux



nefs comme ilz sont garnies, et au roy les cent payens. Et de ce faire se chargea le frère chevalier, et s'en partist, et exploita tant qu'il vint au Cruli, et fist son message du present bien et sagement; et en le faisant il leur compta toute la desconfiture et le vaillant gouvernement de Guion. Par foy, dist le roy, vous soiez le tresbien venu, et grans mercis au damoiseau. Et la pucelle fut tant joyeuse de ces nouvelles, quelle n'eut onques mais si grant joye; et sachiés qu'elle amoit tant Guion qu'elle ne pouvoit au monde plus. Adoncques le roy et sa fille donnèrent au chevalier moult de riches joyaulx, dont il les mercia moult; et prinst congïé d'eulx et s'en retourna tantost en Rodes. Et après son departement, le roy d'Armanie enquesta aux payens où l'armée du caliphe de Bandas et du roy Brandimont devoient prendre terre, el ilz luy vont dire : En Chippre, pour venger la mort du souldan de Damas, que les Chippriens avoient occys en bataille et toutes ses gens. Par foy, dist le roy d'Armanie, quant à vous, vous avez failly à grater le roy de Chippre, mon nepveu. Et adoncques il les fist tous mettre en fers et en fin fons de fosse. Et firent les deux vaisseaulx vuidier, et l'avoir qui estoit dedens, et porter au port. Or est temps que je vous parle de Guion et du maistre de Rodes, qui avoient enquesté aux Sarrazins où la grosse flotte alloit prendre terre, et ilz leur dirent : En Chippre. Adoncq eurent nos barons conseil, pour ce qu'ilz avoient trop vaisseaulx et peu gens, que ilz metteroient toute l'artillerie que ilz avoient conquise en leur nef; et aussi des aultres choses necessaires; et ainsi fut fait, et Guion donna le fust et le demourant au maistre de Rodes, qu'il envoïast à Rodes, fors tant seulement ce que il avoit



departi si largement à ses compaignons que aucune chose ne luy demoura pour luy. Et quant ce fut fait ilz tendirent leurs voilles, et allèrent grant erre vers Chippre. Et cy se taist l'istoire de plus parler d'eulx, et commence à parler de la galliote où l'admiral se mist quant il s'en partist, qu'elle devint, ne où elle prinst port.

L'istoire nous dist que l'admiral de Cordes et le Caliphe de Bandas furent moult doulens de leur perte. Et tant erra l'admiral par la mer qu'il choisist le port de Lymasson; et adoncq vist grosse navire devant la ville; et quant il fut ung peu prez, il ouyt sonner trompettes et jetter canons moult horriblement; et à l'approcher il congneut bien que c'estoit le Caliphe de Bandas et le roy Brandimont de Tarche qui assailloient moult fort ceulx qui gardoient le port, pour le prendre. Mais le capitaine du lieu estoit atout bons pavars, arbalestriers et ses gens, qui si vaillamment deffendirent le port que Sarrazins ne sceurent riens faire; et regrettoient moult fort le Caliphe de Bandas et le roy Brandimont leurs vaisseaulx, lesquels estoient tous esgarez par la mer pour le tourment qui estoit, esquieulx vaisseaulx toute l'artillerie estoit et leur mieulx. Et lors vint l'admiral en escriant en hault: Par foy, Caliphe, mal vous va, car vostre navire que nous conduisons en la mer avez-vous perdue en vostre trait, car Cristiens nous ont rencontrez sur la mer, et nous ont desconfis, que mal en soit de piet qui en soit eschappé, que tant seulement nous qui cy sommes; et est tout perdu, à ung mot parler, car le long parler ne vous vault gaires. Adoncques quant le Caliphe l'entendist, il fut moult doulent. Par ma foy, dist-il, seigneurs, icy a dures nouvelles, car je vois bien que fortune dort pour

nous quant à present, et jà a fait grant temps ; mais elle vault maintenant moult fort pour les cristieus, car il y pert bien à nous quant à present, et aussi a-il fait au souldan nostre cousin, lequel et tous ses gens ont esté mors et desconfis en ceste yse ; que de mal feu soit-elle arse et brulée. Et adoncq luy va dire l'admiral : Sire, se vous monstrez semblant à vos gens que vous soiez esbahy, ilz cuideront que vous soiez du tout desconfit ; et, d'aulture part, sachiés, à ce que je apperçoy de ces gens qui sont au port ; ilz n'ont tallent de vous laisser arriver sans riote ; car ilz ne monstrent pas qu'ilz vous craignent gaire, ne que ilz se doubtent point de vous ; si vous l'ouroye que nous nous retraissions en la mer et les laissons refroidir, et au point du jour serions-nous à ung petit port qui n'est mie loingz d'icy, que on appelle le cap Saint-Andrieu ; et n'aurons là qui nous deffende à prendre terre. Et ainsi le firent-ilz. Et adonc quant nos gens les virent partir ilz boutèrent tantost ung rampin arriver hors du port, qui les suyvit tant qu'il vit que sur le soir se ancrèrent environ une lieue du port et audessous dudit cap Saint-Andrieu. Et adoncques commença le rampin à s'en retourner au port de Lymasson, et dist ces nouvelles à nos gens. Lors fist le capitaine faire du feu sur la garde d'ung follet, et puy cliner devers la mer, et la plus prouchaine garde le vit du feu et le signe, et tantost le firent de garde en garde qu'il fut sceu tantost par tout le royaume. Et adoncques se met hors chascun à chemin, tant de piet que de cheveu, et se tirèrent en la place où le roy Urian estoit, qui jà avoit envoyé ses espies pour sçavoir où ilz prendroient terre ; et manda que chascun se tenist en sa forteresse et que on les laissast prendre terre paisible-

ment, excepté tant seulement que on ne se laissast pas surprendre, afin que les mauvais mescreans sarrazins ne prissent nulles de leurs fortresses ; car, avecques l'ayde de Dieu, il ne rapassera jà piet de là la mer. Et cy se taist l'istoire de plus parler du roy Urian, et commence à parler du Caliphe et du roy Brandimont.

En ceste partie nous dist l'istoire que les Sarrazins qui estoient entrez en la mer, sitost qu'ilz apperceurent l'aube du jour ilz desancrèrent, et vindrent tous d'une flotte au port, et prindrent terre. Et sachiés que ceulx de l'abbaye les apperceurent bien, qui tantost le mandèrent à Lymasson ; et le capitaine le manda tantost au roy Urian, qui en eut moult grant joye, et se commença tantost à apprestre comme se se fust pour la bataille. Et le Caliphe fist tout tirer à terre, et fist faire ses logis emprez et delez eulx, ainsi comme à demie lieue du port, sur ung gros ruisseau d'eaue douce qui cheoit en la mer, en la cornière de ung petit boys, pour luy refforchier, et laissa bien quatre mille payens pour garder la navire. Et cependant vint Guion, le maistre de Rodes et leurs gens qui arrivèrent à Lymasson, et leur commença à dire comment les Sarrazins avoient pris terre, et comment leur navire estoit à une lieue du cap Saint-Andrieu. Par foy, dist Guion, si l'irons-nous visiter, car qui la pourroit oster aux Sarrazins, jamais piet ne s'en retourneroit en Surye ne en Tarse ; et en disant ceste parolle, ilz se empoindirent en la mer, et allèrent legierement, exploitant tant qu'ils vindrent si prez des Sarrazins qu'ilz veoient le port du cap Saint-Andrieu et la navire, qui estoit grande. Adonc mirent toutes leurs choses à point, et se mirent en bonne ordonnance ; et ce fait, ilz s'en vindrent comme fouldre et tempeste frapper sur les navires des

Sarrazins à force de trait et de jet dedens si terriblement que mal soit de Sarrazin qui se mist en deffence ; mais qui peut saillir sur terre et courir hastivement devers l'ost, il s'en tint pour cureux ; et par ce moyen fut toute la navire prise et tous les Sarrazins qui furent atains. Adoncq envoièrent nos gens de leurs biens qu'ilz avoient pris sur les Sarrazins à moult grant foison en l'abbaye, et emmenèrent ce que bonnement ilz peurent desdictz vaisseaulx si chargez de l'avoir des Sarrazins que plus ne povoient, et au demourant ilz boutèrent le feu, et fut toute la navire qui demoura emprise en feu et en flame ; et ceulx qui eschappèrent des vaisseaulx vindrent en l'ost criants à haulte voix : A l'arme, à l'arme ; et dirent comment les cristiens avoient assailly la navire. Adonc s'esmeut l'ost et s'en vint qui mieulx peut vers le port, et trouvèrent moult de leurs gens morset aulcuns qui estoient mussiés parmy les boissons. Et quant ils virent que nos gens s'en tournoient, ilz vindrent vers la mer, et recouvrèrent de leurs vaisseaulx jusque à six qu'ilz preservèrent de bruler. Et quant le Caliphe percut le dommaige, il fut moult doulent. Par Mahon, dist-il au roy Brandimont, ces cristiens qui sont cy venus de France sont moult durs et appertes gens d'armes, et se ilz durent gaires ilz nous porteront moult grant dommaige. Par Mahon, dist le roy, je ne me partiray jamais de ce pays tant que je soy du tout desconfit. Ne moy, dist le caliphe. Adoncques mirent les six vaisseaulx dedens qui leur estoient demourez, et y mirent et laissèrent bonnes gardes ; et à tant retournèrent à leurs gens. Et si se taist l'istoire d'eulx, et retourne à parler du roy Urian.

Or dist l'istoire que le roy Urian fut logé en une

belle prarie sur une ripvière, et fut en la place mesmes où les fourriers du souldan furent desconfis au pont; et avoit le roy envoyé ses espies à sçavoir où les Sarrazins se logeroient. Et lors vint le maistre de Rodes qui descendist devant la tente du roy et le salua moult haultement; et le roy, qui fut moult joyeux de sa venue, le bienveigna, et luy demanda comment Guion son frère se portoit. Par foy, monseigneur, dist le maistre de Rodes, bien comme le plus asseuré homme que je vis oncques; sire, il se recommande à vous tant comme il peut. Par foy, dist le roy, ce m'est bel. Or me dictes comment vous avez fait depuys que vous vous departistes d'avecques nous. Et le maistre lui racompta de branche en branchetoutes les adventures qui leur estoient advenues, de la navire du caliphe que ilz avoient destruite au cap Saint-André, et comment ilz l'avoient arse. Par ma foy, dist le roy Urian, vous avez moult vaillamment voyagé et moult bien eurement; j'en loe mon createur; et quant est de mon oncle, le roy d'Armanie, je suys moult joyeux que vous l'avez laissé en bonne prosperité; mais il nous fault adviser aultre chose comment les Sarrazins soyent desconfis, et quant est de moy et de mes gens, je me deslogeray presentement pour eulx approchier, car ilz ont trop sejourné en nostre pays sans avoir aulcunes nouvelles de nous. Allez-vous en devers mon frère, et luy dictes que je me desloge pour aller combattre les anemis de Dieu. Adoncques le maistre prinst congie du roy, et s'en vint grant erre vers Limasson, et sur piet le roy fist deslogier son ost et vint loger à une lieue du caliphe; et ne sçavoient riens de leur venue Sarrazins. Et le maistre vint à Guion noncer les nouvelles comment le roy c'estoit deslogé pour aller com-

batre ses anemis. Adonc Guion fist sonner ses trompettes et desloga , et vint logier sur une petite ripvière qui cheoit en la mer ; et sur celle mesmes ripvière estoient les Sarrazins logez , et n'avoit entre eulx que une montaigne qui tenoit bien une lieue de tour. Et se taist l'istoire de plus parler de luy quant à present , et commence à parler du roy Urian , son frère , qui fist moult grant vaillance de combattre Sarrazins.

L'istoire nous dist que le roy Urian estoit moult desirant de sçavoir où les Sarrazins estoient logez , et aussi de sçavoir leur commune , et comment ils estoient ; et pour ce appella un chevalier chipprien qui bien sçavoit toute la contrée , et lui dist : Armez-vous , et montez sur le plus seur cheveu que vous aiez , et revenez cy devant mon logis tout seul , et n'en dictes mot à personne ; et viendrez avec moi où je vous voudray mener. Et tantost le chevalier fist son commandement , et partist et s'arma , monta à cheveu et revint à luy , et trouva le roy qui estoit jà monté sur ung legier courcier , et estoit bien à main , et dist à pluseurs de ses princes : Ne vous mouvez jà d'icy jusques à tant que vous aiez nouvelles de moy ; mais se je ne revenoye , faictes ce que je vous manderay par cestuy mien chevalier. Et ilz disdrent que ainsi feroient-ilz. Mais pour Dieu , gardez bien où vous vous en allez. Ne vous en doubtez , dist le roy. Et lors se partirent ; et quant ilz vindrent hors du logis , le roy dist au chevalier : Menez-nous au plus court chemin où je puisse veoir le port où les Sarrazins sont arrivez. Et celluy le mena environ une lieue sur une haulte montaigne , et luy dist : Sire , voiez là le port et l'abbaye audessus. Et comment , dist le roy , on m'avoit dit que leur navire estoit arse , et encores



velà des vaisseaulx ; d'où maintenant peuvent-ils estre venus ? Et adonc regarda le roy à senestre , au font de la vallée , et vist l'ost de son frère qui c'estoit logé sur la ripvière ; et d'aulture part il vist l'ost des Sarrazins , qui estoient moult grant multitude. Par m' foy , dist le roy , voiez là grant peuple de Sarrazins ceulx congnois-je assez ; mais ceulx qui sont par dessà , je ne congnoys mie quieulx gens ils sont ; attendez-moy cy , et je iray sçavoir si je les pourray congnoistre. Et le chevalier luy respondit : Allez , de par Dieu. Lors se partist le roy , et exploita tant qu'il approcha de l'ost et trouva ung chevalier qui sailloit du port , qu'il congneut bien , et le nomma par son nom , et luy demanda : Mon frère est-il en ceste route ? Adonc quant le chevalier l'entendist parler , il le regarda et le congneut tantost , et s'agenoilla en luy disant : Monseigneur, oy. Or luy allez dire qu'il vienne parler à moy sur ceste montaigne. Et il se partist , et vint en l'ost , et dist à Guion ces nouvelles ; et il monta à cheveu , et le maistre de Rodes avecques luy , et le roy retourna à son chevalier et luy dist : Amis , bien va , c'est Guion mon frère qui est logé là dessoubz. Puy vint Guion et le maistre de Rodes. Et adoncques les deux frères s'entrefirent moult grant joye. Lors leur monstra le roy l'ost des payens ; et quant ilz le virent , ilz dirent : Nous ne le sçavions pas si prez de nous. Or avant , dist le roy , à l'aide de Dieu , ilz ne nous pevent eschapper se ce n'est par ceste navire que je vois là en ce havre. Et quant Guion le vist , il fut tout esbahy. Et comment , dist-il , en ont encores apporté , les diables , des aultres ; nous leur ardimes , n'a pas trois jours , toutes leurs navires. Adoncq dist le maistre de Rodes : Je suppose bien que c'est elle , et que par adventure il



avoit aucuns demourez ès vaisseaulx, qui ne furent pas trouvez, qui ont recoups ce pou que voiés là. Par foy, dist le roy, ainsi peut-il bien avoir esté; mais il y convient mettre gardes, car, par ce, pourrions-nous perdre le chief et les plus grans, qui aprez nous pourroient nuire en aultre temps. Comment, dist le maistre de Rodes, il samble que vous les aiez jà tous desconfis jusques au caliphe et à Brandimont roy. Adonc respondit le roy: Se il n'y avoit plus que ces deux, selon ce que je vous ay ouy dire, il n'y faudroit pas besoing de tant de gens que Dieu nous a prestés; il n'y faudroit que Guion mon frère, il s'en seroit tantost delivré. Ha, ha, monseigneur, dist Guion, quant vous vous serez rigollé de moy et d'ung aultre encore, ne seront-ce que deux; mais je loe Dieu de la vertu qu'il m'a donnée, combien qu'elle ne se pourroit comparer à la vostre, laquelle Dieu vous maintienne. Mon frère, dist le roy, je ne me cuide pas rigoller de vous, car se vostre fait estoit achevé à ces deux, je me fie tant à Dieu et en vous que j'attenderoie l'aventure telle que Dieu nous vouldroit donner. Sans doute, monseigneur mon frère, dist Guion, se la besoigne ne tournoit ailleurs, il ne faudroit point attendre aventure; mais il est bon de laisser le parler et de adviser comment nos anemis seront destruis. Guion, dist le roy, vous dictes bonne raison. Adonc dist le roy à son chevalier: Allez en l'ost et faictes armer nos gens sans faire aucun effroy, et les faictes partir des logis en bonne ordonnance, et les faictes venir au piet de ceste montaigne. Et adonc il partist et fist le commandement du roy; et ceux de l'ost obeirent à luy, et vindrent soubz la montaigne en bonne ordonnance; et lors dist le roy à Guion son frère qu'il allast faire armer ses gens, et qu'il approchast si prez de leur ost

qu'il peut bien appercevoir leur contenance, et comment il verroit que la besongne se porteroit, et que bien se gouvernast. Et vous, maistre de Rodes, mettez-vous en mer à toutes vos gens, et vous en venez sur le pas du port, affin que se les Sarrazins se mettoient en leurs vaisseaulx, qu'ils ne peussent eschapper; et je m'en vois ordonner mes gens pour combatre ces Sarrazins. Et ainsi se sont departis de la montaigne, et fist chascun d'eulx tout ce que le roy Urian avoit ordonné.

Le roy adone vint à ses gens et les ordonna, et s'en vint en belle bataille rengée, les archiers et les arbalestriers sur les elles, et vindrent, et au descouvert de la montaigne virent l'ost des payens. Adoncques s'en allèrent le beau pas en bel arroy jusques à une arche prez de l'ost, avant que les payens s'en aperceussent à plain; mais quant ilz apperceurent, ils commencèrent à crier : A l'arme, à l'arme. Adoncq l'ost s'arma de tous costez. Lors le roy Urian envoya courans à force de chevaux jusques au nombre de mille hommes d'armes parmy eulx, qui moult les dommagerent et les empeschèrent tellement qu'ilz n'avoient bonnement loisir d'eulx ordonner à leur aise. Et non obstant ce ilz se mirent au mieulx qu'ilz peurent en arroy, et nos gens se assamblèrent avec eulx; là eut moult grant occision de trait sur les Sarrazins. Adonc vint le roy Urian, qui se penoit moult fort de exillier ses ennemis, et faisoit tant d'armes qu'il n'y avoit si hardi Sarrazin qui l'osast oncques attendre, mais fuirent devant luy comme fuyt la perdis devant le lamier; et quant le caliphe de Bandas l'apperceut, il le monstra au roy Brandimont en disant : Nous sommes bien doulens folz; se pour cestui homme icy sommes esbahis, le demourant nous prisera et doubtera peu. Adonc il poindist le cheveu

de si grant ire que le sang luy sailloit par les deux flans. Et sachiés que c'estoit l'ung des fiers et des puissans que de son corps qui point vivoit en celluy temps, et tourna la targe derrière le dos et empoigna l'espée à deux mains et ferist Urian sur le coing du bassinet de toute sa force; et la coupe du bassinet fut moult dure, et pour ce l'espée glissa et vint le coup descendre sur la col du destrier, et entra si avant en la char qu'il lui trencha les deux maistresses vaines qui soutenoient la teste du cheveu. Et adonc le destrier s'enclina, qui ne se povoit plus soustenir, et lors le roy Brandimont s'approcha du roy Urian, et luy, qui sentoit son cheveu aller par terre, laissa aller l'espée et embrascha le roy Brandimont par le foy du corps, et le tira à terre malgré qu'il en eut, et le mist soubz luy; et là eut grant triboulement, tant de Chippriens comme de Sarrazins, pour recouvrer leur seigneur; et là eut moult fière bataille d'une part et d'autre, et moult horrible, et y eut foison de mors et de navrez. Lors tira le roy Urian ung court et fort coustel qui luy pendoit au destre costé, et puisa dessoubz la gorgerete du roy Brandimont tellement qu'il le mist jus tout mort, et puy se dressa sur les piés et cria à haulte voix : Lusignen, Lusignen. Lors vindrent Poetevins qui l'ouyrent et se frappèrent en la presse par telle vertu que les Sarrazins perdirent la place. Adonc fut le roy Urian remonté sur le destrier du roy Brandimont, et lors suyvirent le caliphe de Bandas; et ainsi se renforcha plus fort que devant la bataille, et tant qu'il y eut grand perte d'ung costé et d'autre. Pour yray, les Sarrazins furent fort grevez, tant de la mort du roy Brandimont que de leurs gens; et cependant vint Guion de Lusignen qui se ferist en la bataille à bien deux mille hommes

frès et nouveaulx , là où moult se combatirent. Adoncques quant le caliphe vist qu'il estoit ainsi surprins , si se partist de la bataille , luy dixiesme , le plus couvertement qu'il peut , et s'en vint en la mer. Là fut l'admiral de Damas , qui les fist entrer en une petite galliotte dont il estoit aultres fois rechap-pé , si comme je vous ay dit si-dessus , et fist la navire qui luy estoit demourée tantost partir du havre. Et si se taist l'istoire à parler de luy tant que le temps en sera , et retourne à parler de la bataille.

En ceste partie nous dist l'istoire que la bataille fut moult grant et horrible , et y eut moult grant oc-cision ; mais quant les mauvais Sarrazins apperceurent que le roy Brandimont de Tarse estoit mort et que le caliphe de Bandas les avoit laissez en ce peril , ils furent moult esbahis , et se commencèrent tresfort à desrenger et à perdre place et aussi à fouyr vers la marine ; mais ce ne leur vault gaires , car toute la navire estoit partie avec le caliphe et l'admiral de Cordes. Que vous feroye ores long parler ? Les payens furent tous mors , et les pluseurs se nayèrent en la mer. Et adoncques retournèrent les barons aux logis des payens , où il y avoit moult de richesses. Et cy se taist l'istoire de parler du roy Urian , et parle du caliphe qui s'en alloit moult doulent par la mer , et jura ses dieux que se il peut arriver à Damas à sanneté , que encores fera-il grant ennuy aux Chip-priens ; et ainsi qu'il vaugeois par la marine et cuidoit bien estre eschappé du peril des mains des cristieus ; mais de ce que fol pense il demoure souvent la plus grant partie à faire ; car le grant maistre de Rodes estoit ja pieçà en aiguets sur la mer , à toutes ses gens , en gallées. Adonc il appercent les Sarrazins venir , et se pensa bien que la bataille des Sarrazins estoit desconfite ;

il en loua et remercia nostre seigneur Jhésuscrit. Et adoncques il escria aux seigneurs et aux gens d'armes qui estoient avec luy et dist : Beaulx seigneurs et sergans de Jhesucrist, nous eschapperont ainsi ces ennemis ? Par foy , il sera moult faulte à nous. Qui lors veist mettre gensen ordonnance et courir sus Sarrazins et jetter canons et traitz d'arbalestres, c'estoit moult grant horribleté à veoir. Quand l'admiral de Damas percut le meschief qui tournoit sur eulx , si haulça le voile et fist avancer les rames, et eschappa des dangiers de nos gens malgré que nos gens en eussent ; et fut la galliotte si eslongée en peu d'eure que nos gens en perdirent la veue, et veirent bien que le poursuyvir leur pouoit plus nuire que aydier ; si les laissent à tant, et en peu d'eure furent les vaisseaulx desconfis et les paiens ruez en la mer, et ramenèrent les six vaisseaulx au cap Saint-Andrieu avec eulx, et puy saillist le maistre de Rodes de la mer à tout cent frères de sa religion, et vint au logis, et alla compter au roy et à son frère et aux aultres barons l'aventure, et comment les payens furent tous pris, mors et desconfis, et leurs vaisseaulx ramenez au port, et comment le caliphe et l'admiral de Damas estoient eschappez en une galliotte ; de quoy le roy fut moult doulens, et aussi ses barons. Et aprez departist tout ce qui avoit esté gaigné sur les Sarrazins à ses compaignons, sans qu'il en retenit oncques à son proffit qui vaulsist ung denier, excepté tant seullement aulcunes des tentes et l'artillerie, et de là s'en partist, et donna congié à pluseurs de ses barons et à leurs gens, et les remercia moult chascun en son endroit. Quant ilz partirent, ilz s'en alloient tous riches, dont ilz louoient moult le roy Urian, et disoient que c'estoit le plus vaillant roy qui

regnast pour celluy temps. Le roy Urian, ces choses faictes, vint à Famagosse, avec luy son frère et le maistre de Rodes et ses barons qu'il admena de Poetou, et tous les plus haultz barons de son royaume. Là les receut la royne Hermine moult liement et courtoisement, le roy son mari, son frère, et le maistre de Rodes, et tous les barons, et rendit moult devotement graces à Nostre-Seigneur de la victoire qu'il leur avoit donné.

Or nous dist l'histoire que la royne Hermine estoit moult ensainte, et avoit fait le roy crier une moult noble feste où il vouloit en paix et en repos festoyer ses barons de Poetou et tous aultres princes et estrangers; et en celluy jour que la feste devoit estre, huyt jours avant commença à arriver moult grant peuple en la cité, de quoy le roy fut moult joyeux, et fist crier, sur painne de corps et d'avoir, que nul n'encherist de vivres; et fut vray que trois jours devant la feste, la royne Hermine accoucha d'ung moult beau filz. Adonc commença la feste à estre moult grande, et fut l'enfant baptisé, et eut nom Henry, pour l'amour du tronc du roy, qui eut nom Henry. Adoncques fut la feste moult grande, et donna le roy moult de riches dons, et avoient aucuns des barons de Poetou qui avoient prins congie du roy, de son frère et de la royne pour eulx en aller; et leur avoit donné le roy moult de richesses, et estoient environ six chevaliers et leur route qui se misrent en mer; et leur avoit le roy baillé lettres pour porter à son père et à sa mère. Or vueil-je laisser à parler de ceulx qui s'en vont par la mer, et diray de la feste, qui fut moult grande et noble; mais elle fut en peu d'eure troublée pour l'amour du roy d'Armanie, dont les nouvelles vindrent à la cour. L'histoire nous dist que ainsi que la feste estoit au plus



grant bruit, vindrent jusques au nombre de xvj. des plus haultz barons du royaume d'Armanie, tous vestus de noir ; et sembloit bien à leur contenance qu'ilz fussent au cueur bien couroucez. Et quant ilz vindrent devant le roy, ils le saluèrent moult doucement, et le roy les bienveigna et leur fist moult d'honneur. Et ilz luy disdrent : Sire, le roy d'Armanie vostre oncle est allé de vie à trespassement, Dieu par sa grace lui face mercy, et nous est demouré de luy une tresbelle pucelle et bonne, laquelle est sa fille, et n'y a plus de heritier qu'elle de sa char. Or veuillez sçavoir, noble roy, que en sa plaine vie il fist faire ceste lettre, et nous commanda qu'elle vous fut apportée, et nous chargea et dist que nous vous requerrissions pour l'amour de Dieu que de ce dont il vous fait requeste ne luy veuillez pas faillir, car nous sçavons bien que la chose est à vostre prouffit et honneur. Par foy, beaulx seigneurs, dist Urian, se c'est chose que je puisse faire bonnement je le feray volentiers. Et adonc print Urian la lettre et la lut. Et la teneur d'icelle lettre est telle : Treschier seigneur et tres-aimé, je me recommande à vous tant comme je puy, et vous m'aiez treschièrement devers ma treschière et amée niepce vostre femme pour recommandé. Et par ces lettres je faitz à vous deux la première requeste que oncques je vous fis, ne que jamais je feray, car certainement quant ces presentes lettres furent escriptes je me sentoie en tel point que en moy n'avoit point d'esperance de vie. Or je n'ay point de heritier de mon corps que une seule fille, laquelle Guion vostre frère a bien veue. Je vous supplie humblement qu'il vous plaise de le prier de par moy qu'il la vueille prendre à femme, et le royaume d'Armanie avecques. Et se il vous samble qu'elle



n'en soit digne, si luy aidez à assener à quelque noble homme qui bien sache le pays gouverner et defendre des ennemis de Jhesucrist. Or y vueillez pourvoir de remède convenable, car à tout dire, se il vous plait, en la fin je vous fais mon heritier du royaulme d'Armanie; mais pour l'amour de Dieu prenez en garde et ayez pitié de mon povre enfant, qui est orpheline desolée de tout conseil et de tout confort, se vous luy faillez. Adonc quant Urian oyt ces piteux mos, il fut moult doulent de la mort du roy, et eut moult grant pitié au cuer des piteux mos qui estoient escripts en la lettre. Adonc respondist aux Hermeniens en disant ainsi : Seigneurs barons je ne fauldray mie à cest besoing, car se mon frère ne se veult à ce accorder, si vous feray-je tout le confort et aide que je vous pourray faire. Sire roy, disdrent les Hermeniens, nostre seigneur le vous vueille meriter, qui vous doinct bonne vie et longue. Et adonc appella le roy Urian Guion son frère, qui jà sçavoit nouvelles de la mort du roy d'Armanie, de quoy il en estoit moult doulent. Et luy dist le roy Urian les parolles qui s'ensuivent : Guion, tenez ce don, car je vous vueil faire heritier du royaulme d'Armanie et de la plus belle pucelle qui soit en tout le pays, c'est à assavoir de Florie ma cousine, la fille du roy d'Armanie, qui, de la voulenté de nostre seigneur, est allé de vie à trespasement. Or je vous prie que ne refusez pas ce don, car telle offre n'est pas à refuser. Par ma foy, beau frère et monseigneur, dist Guion, je vous en mercie moult humblement, et luy qui est trespasé, de ceste offre et de ce present. Adonc eurent les Hermeniens si grant joye que plus ne povoient au monde. Et adoncques quant il eut consenti la parolle, ilz se agenoullèrent

devant luy et lui baisèrent les mains à la guise du pays. Adonc renforça la feste plus grande que devant. Et cependant le roy commanda à appareiller toute sa navire qui estoit au havre du port de Limasson, et ordonna à mettre moult de richesses aux vaisseaux, et ordonna à y entrer moult belle baronnie, tant de Poetou comme de Chippre, et le maistre de Rhodes, pour le conduire en Hermanie, et furent aux nopces, et le firent couronner et prendre la possession de tous les pays et les hommaiges de tous ses subjectz. Et sachiés qu'ilz fussent plus tost departis pour eux en aller se ne fut pour attendre la relevée de la dame royne, laquelle fut relevée à moult grant joye et grant solennité, et y eut noble feste et grande, et donna le roy Urian de grans et riches dons aux Hermeniens. Et aprez la feste finée prist Guion congïé de sa seur la royne, qui fut doulente de sa departie, et lors le conduit le roy jusques au port de Limasson; et quant ilz entrèrent en la mer les deux frères s'entrebaisèrent. Adonc drescha-on les voilles et fist-on desancrer la navire, et aprez se empaignèrent en la mer à moult noble compaignie, bien pourvus comme se ce fut pour aler en guerre, pour doubte des Sarrazins. Et tant allèrent, tant de jour comme de nuyt, qu'ilz apperceurent et visrent la ballet du Crub, qui est la maistresse ville du royaume d'Armanie, où on desiroit moult leur venue, et y estoient assamblez moult des nobles du pays, qui nuyt et jour attendoient leur venue.

En ceste partie nous dist l'histoire que ceux de Caliz furent moult joyeux quant ilz virent approcher la navire, car jà sçavoient les nouvelles que leur seigneur venoit, pour ce que les barons qui estoient allez en Chippre pour porter les lettres dont je

vous ay fait mention par avant , leur avoient mandé toute la verité , affin de ordonner et pourveoir de le recepvoir honnourablement : et y estoient tous les haultz barons du pays et les dames et damoiselles venues pour le festoier et honnourer. A celle heure la pucelle Florie estoit à la maistresse tour, qui regretoit moult la mort de son père, et si avoit moult grant paour que le roy Urian ne le vouldist pas accorder à son frère ; et estoit une cause qui moult luy angoissoit sa douleur. Mais adoncques une damoiselle luy vint dire en ceste manière : Mademoiselle, on dist que ceulx qui estoient allez en Chippre arriveront bien brief au port. De ces nouvelles fut Florie moult joyeuse, et vint à la fenestre, et regarda en la mer, et vit navires, gallées, et aultres grans vaisseaulx qui arrivoient au port, et oyt trompettes sonner, et pluseurs aultres instruments de divers sons. Adonc fut la pucelle moult lie, et vindrent les barons du pays au port, et recepvoient moult honnourablement Guion et sa compaignie, et le menèrent à mont vers la pucelle, laquelle luy vint à l'encontre de luy. Et Guion la salua moult honnourablement en ceste manière : Ma damoiselle, comment a-il esté à vostre personne depuis que me partis d'icy? Et elle luy respondist moult amoureusement et dist : Sire, il ne peut estre gaires bien, car monseigneur mon père est nouvellement trespasé de ce mortel monde, dont je prie à nostre Seigneur Jhesucrist, par sa sainte grace et misericorde, qui luy face vray pardon à l'ame, et à tous aultres ; mais, sire, comme povre orpheline je vous remercie et gracie tant humblement comme je puy des vaisseaulx que vous m'envoias-tes, et aussi de la grant richesse et avoir qui estoit dedans.

*Comment Guion espousa la pucelle Florie  
et fut roy d'Armanie.*

**A** donc l'ung des barons d'Armanie parla moult hault, adressant sa parolle à Guion, et dist : Sire, nous vous avons esté querir pour estre nostre seigneur et nostre roy ; si est bon que nous vous delivrons tout ce que nous vous devons bailler. Et voiez cy ma damoiselle qui est toute preste de acomplir tout ce que nous vous avons promis et au roy Urian vostre frère. Par foy, dist Guion, ce ne demourera mie à faire pour moy. Adonc furent fiancez, et le lendemain espousez à grant solemnité, et fut la feste moult noble et grande, et dura par l'espace de quinze jours ; et avant que la feste departist firent tous les barons hommaige au roy Guion. Aprez ces choses, les barons de Poetou et de Chippre prindrent congié, et aussi fist le maistre de Rodes, qui fist les barons arriver à l'isle de Rodes, et leur fist moult bonne chière et grande ; et aussi firent tous les frères de la religion. Et au bout de huyt jours se misrent les barons en mer, et en brief temps arrivèrent en Chippre, et comptèrent au roy Urian toute la verité du fait et la bien venue et la recuelie que son frère avoit eu en Armanie, et comment il estoit roy paisiblement, dont Urian loua moult doucement et humblement nostre seigneur Jhesucrist de bon cueur. Et en brief temps pluseurs des barons de Poetou prindrent congié, et le roy le leur donna avec moult de beaulx dons, et par eux rescript à son père et à sa mère tout l'estat de luy et de son frère. Et ainsi se partirent les barons, se mi-

rent en mer où ilz trouvèrent les vaisseaulx tous prestz, tous garnis et advitaillez de tout ce que mestier leur estoit, et entrèrent en iceulx, et s'empaignirent en mer. Adoncques prindrent les barons le plus droit chemin qu'ilz peurent pour arriver à la Rochelle. Et cy s'en taist l'istoire, et commence à parler de ceulx qui par avant c'estoient partis.

---

*Comment les messagiers apportèrent les lettres  
à Raimondin et à Melusine de ses deux  
enfans qui estoient roix.*

**Q**r nous dist l'istoire que les barons qui c'estoient partis aprez le relever de la royne Hermine senglèrent tant par la mer qu'en brief temps ilz perçoirent le port de la Rochelle et y arrivèrent, au plaisir de Dieu, à grant joye, et retrairent tout le leur en la ville, et se refreschirent par l'espace de trois jours, et puis s'en partirent et errèrent tant qu'ilz arrivèrent à Lusignen, où ilz trouvèrent Raimondin et Melusine et leurs aultres enfans, qui les receuprent à moult grant joye. Et adonc ilz leur baillèrent les lettres du roy Urian et de Guion leurs deux filz; et quant ilz eurent oy et veu la teneur des lettres, ilz furent grandement joyeux, et loèrent moult devotement nostre seigneur de la bonne adventure qu'il avoit donné de sa grace à ses enfans, et donnèrent moult de riches dons aux barons qui avoient apportez les nouvelles. Et en ce temps fonda Melusine l'eglize de Nostre-Dame de Lusignen et pluseurs aultres abbayes en celluy paysen Poetou, et les renta moult richement. Et fut adonc

traité le mariage de son filz Odon à la fille du comte de la Marche, et en fut fait la feste moult grande et moult noble dessoubz Lusignen en la prarie. Et la feste durant, arrivèrent à la Rochelle les barons du Poetou qui c'estoient dernièrement partis de Chippre; mais quant ilz sceurent les nouvelles de la feste, ilz montèrent moult joyeusement à cheveu, et tant chevauchèrent qu'ilz vindrent à Lusignen trois jours au devant de la departie de la feste, et là firent reverence au père et à la mère moult honnourablement, et présentèrent leurs lettres. Et quant Raimondin et Melusine sceurent certainement de leur filz Guion les nouvelles qu'il estoit roy d'Armanie, et aussi des aultres victoires qu'il avoit eu sur les paiens, ilz en louèrent nostre seigneur Jhesucrist moult devotement, et furent les messagiers receups à moult grant joye de tous costez, et eubrent de beaulx dons et riches; et se refforcha la feste, et dura plus de huict jours entiers pour l'amour de ces nouvelles et nobles.

L'istoire nous dist que Anthoine et Regnauld furent moult joyeux quant ils oyrent les haultes et nobles nouvelles des conquestes et victoires que leurs frères avoient eues sur les mauvais Sarrazins, et de l'onneur que Dieu leur avoit faict en cy peu de temps que d'avoir conquesté deux nobles royaumes. Et disdrent l'ung à l'autre : Mon treschier frère, je vous diray que doresmais seroit temps que nous allissions charcher les adventures par le monde, car pour cy demourer ne pourrons-nous conquerer ne los ne pris. Adoncques vindrent à leur père et à leur mère en disant moult humblement : Monseigneur et vous madame, se il vous plaisoit, il seroit bien temps que nous alissions par le monde à nous adventures pour acquerir l'ordre de chevalerie, car ce n'est pas de

l'intention de nul de nous de la prendre fors que au plus prez que nous pourrons l'avoir , comme Guion et nos frères l'ont eue ; combien que nous ne sommes pas dignes de l'avoir si tresnoblement ne en si noble place ; mais, se Dieu plaist, c'est notre intention d'en faire bonne diligence. Et lors elle respondist : Beaulx enfans , s'il plaist à monseigneur vostre père , il me plait bien. Par foy, dist Raimondin, dame, faictes-en vostre voulenté ; car ce qu'il vous plait me plait. Sire, dist Melusine, il me semble qu'il est bon que desoresmais ilz commencent à voiaeger pour congnoistre le monde et les estranges marches, et aussi pour estre congneus et congnoistre le bien et le mal ; et à l'aide de Dieu je y pourvoieray si bien qu'ilz auront bien de quoy paier leur despeuce. Adonc les deux enfans se agenoulèrent devant leurs père et mère en les remerciant moult humblement de la haulte bonté et de l'onneur qu'ilz leur promettoient faire. Et cy se taist ung peu l'histoire à plus parler d'eulx, et parle d'autre matère ; mais assez tost je y retourneray.

En ceste partie nous dist l'histoire que es parties d'Alemaigne , entre Loraine et Ardanne , avoit en ce temps moult noble terre qui estoit appelée la conté de Lucembourg , qui ores est appellé duché ; et pourtant l'appelleray-je en ceste histoire duché ; pour lors , que je dis , y estoit mort ung vaillant prince qui fut moult renommé , et eut nom Asselin, qui fut nommé sire du pays ; et n'avoit demouré de luy nul héritier que une fille , laquelle estoit nommé Cristienne, et fut moult belle et bonne. Et avoit en la terre de Lucembourg moult noble et grant foison de chevalerie et escurie , qui tous firent hommaige à la pucelle comme à la droite héritière. Pour celluy temps en Anssay eut ung puissant roy auquel n'estoit



demouré de sa femme que une fille, de laquelle elle trepassa en gessine; et fist le roy nourir celle fille, qui eut nom Melidée, honnourablement. Or advint que il oyt nouvelles que le seigneur de Lucembourg estoit trespasé, et ne lui estoit demouré que une fille qui estoit moult belle. Adoncques le roy d'Anssay la fist demander pour estre sa femme. Mais la pucelle ne se vouldist oncques accorder, dont le roy d'Anssay fut moult doulent, et va jurer Dieu, comment qu'il fut, que se il povoit qu'il l'auroit. Adoncques fist son mandement et deffia la pucelle et tous ses aidans; adoncques quant les barons, les nobles et les communes du pays le sceurent, ilz jurèrent, puisque leur dame ne le vouloit prendre à mary, qu'ilz luy monstreroient qu'il avoit tort vers la pucelle et eulx. Et tantost ilz firent garnir leurs fors et leurs pays, et se trairent la plus grant partie des barons au bourc et au chasteau de Lucembourg avec Cristienne, qui estoit leur propre dame. Que vous feroie-je ores long parlement? ilz n'estoient pas pour lors assez fors pour combatre le roy, car il venoit à moult grant effort, et dommageoit moult le pays, et s'en vint tout ardent planter le siège devant Lucembourg. Et de fait il y eut plusieurs escarmouches, et y eut moult grant perte d'ung costé et d'autre. Or advint qu'il luy eut ung homme qui estoit moult terrien et ung des plus grans gentilz hommes du pays, qui avoit esté avec le roy Urian, et à la conquete de Chippre et aux victoires qu'il avoit eu sur les Sarrazins, lequel s'en estoit revenu avec les premiers Poetevins, qui estoit piecha venu à Lusignen comme vous avez oy dessus; et lui avoient Melusine et Raimondin donné de moult beaulx dons et beaulx joyaulx; et avoit veu Regnault et Anthoine, qui jà

estoient moult fors et grans, et de moult forte contenance et fière; et luy sambloit bien que ilz devoient assez ensievyr la condition et meurs et la manière de leurs frères et leur haulte proesse et entreprise; lequel gentil homme estoit moult vaillant homme d'armes, et estoit dedens Lucembourg, que le roy avoit jà assiegé. Adonc celluy, qui estoit saige du mestier d'armes et de la guerre, trait les nobles du pays à part, et leur dist en ceste manière: Beaulx seigneurs, vous povez bien appercevoir que, au loing aller, nous ne povons resister à la puissance de cestuy roy; pour laquelle chose, se il vous samble bon, mon oppinion seroit de y pourveoir remède plus tost que plus tart; car il fait bon fermer l'estable devant que le cheveu soit perdu. Et adoncques ceulx respondirent: Cest vérité; mais nous ne pouvons, ne ne voions pas qui y peut remedier sans la puissance de Dieu. Non par foy, dist celluy, sans la puissance de Dieu ne peut-on gaires faire de choses; mais avec ce fait-il bon aide qu'il le peut faire. Par Dieu, dient-ilz, c'est une bonne raison et pure verité; se vous sçavez nul bon chief pour nostre pucelle garder et aussi pour nostre prouffit, si le dictes, et vous le ferez bien; car vous y estes tenu pour ce qu'elle est vostre souveraine dame comme à nous. Adoncques prend le gentil homme la parolle et leur va tout compter de chief en chief comment Urian et Guion, son frère, c'estoient partis de Lusignen, et toute l'adventure de leur voiage et de leur noble conquete, l'estat de leur père et mère, le maintieng de Anthoine et Regnauld, et qu'il sçavoit de certain que qui iroit requerre le secours aux deux frères, qu'ilz luy viendroient à grant puissance, qui leur compteroit le fait. Par foy, disdrent les nobles, vous dictes

moult bien. Adoncques mandèrent Cristienne et luy comptèrent mot à mot cest affaire. Et elle leur dist : Leaulx seigneurs , je vous recommande ma terre et la vostre, et en faictes comme il vous samble pour le mieulx en l'onneur de moy et de vous ; car sachiés de certain, pour mourir ne estre desheritée , je n'auray jà le roy d'Anssay à mary ; non mie qu'il ne vaille mieulx que pour moy, mais pourtant qu'il me veut avoir par force. Et ilz luy respondirent : Ne vous en doubtez jà , madame , car, se Dieu plait , il n'aura jà tant de puissance tant que nous nous aiderons du corps. Seigneurs , dist la pucelle , moult grans mercis. Et lors se departist de là. Adoncques ung des barons reprint la parolle en disant au gentil homme en ceste manière : Vous qui nous avez mis en ceste querelle , dictes-en tout ce qu'il est bon de faire. Par foy, dist-il, je le feray volentiers ; et se il vous samble bon vous me baillerez deux de vous aultres, et irons veoir à Lusignen sçavoir se nous pourrons trouver chose qui nous soit prouffitable. Par foy, dient-ilz, nous le ferons volentiers. Adoncques choisirent entre eulx, c'est assavoir deux des plus notables pour aler avecques luy, et s'en partirent environ le premier somme, montez sus chevaux d'avantaige, et saillirent par une poterne, et passèrent à l'ung des costez de l'ost, que oncques ne furent veus ; et se exploitèrent tant qu'ils vindrent environ soleil levant à huit grosses lieues de là , et se pennèrent moult fort de chevaucher tant comme ilz peurent. Et cy se tait l'istoire ung peu de parler d'eulx , et parle de Melusine et de ses enfants, assavoir de Regnault et Anthoine.

L'istoire nous dist que la feste fut moult grande lessoubz Lusignen en la prarie , et y josta-on

moult bien vaillamment ; mais sur tous les jeunes damoiseaulx qui là estoient, Anthoine et Regnauld joustèrent le mieulx, au dit des dames qui là furent, et aussi des chevaliers ; et y eut donné moult beau pris et riches dons et joyaulx. Mais endementiers Melusine pensoit à l'estat de ses deux filz, et leur fist faire de moult et de riches et grans habis, et se pourveoit de nobles hommes et saiges pour eulx gouverner honnourablement par tout là où ilz iroient. Et pendant ce temps vindrent les ambassadeurs de Lucembourg, qui firent moult honnourablement la reverence à Raimondin et à Melusine, et aussi à toute la compaignie, et ilz furent moult liement receups, et fut tantost congneu le chevalier qui avoit esté à la conquete de Chippre en la presence de plusieurs qui là estoient, et fut moult grandement festoyé. Et luy demanda Anthoine, pour le bien qu'il avoit oy dire de luy, se il luy plairoit de aller avec luy et avecques Regnauld son frère en voiage où il avoit intention d'aller, à l'aide de Dieu, qu'il seroit moult bien guerdonné. Et il lui demanda : Monseigneur, où avez-vous intention de aller ? Et Anthoine luy respondist : A l'aventure que nostre Seigneur nous voudroit donner pour trouver et avoir honneur de chevalerie. Par ma foy, dist le chevalier, et je vous enseigneray la plus belle aventure et la plus honnourable que jamais gentilz hommes eussent en eulx adventurant, et la plus honnourable entreprise. Et quant les damoiseaulx l'entendirent, ilz le vindrent acoler en lui disant en ceste manière : Noble homme, vueillez nous dire que c'est. Par foy, messeigneurs, volentiers, tant pour ce que je seroie bien joyeux de vostre advancement et de raison soustenir, et de manifester le bien faire, et de admo-

nester tous ceulx qui vueillent avoir honneur de ensievyr le chemin et la voye de bien et honneur avoir.

Mes chiers seigneurs, il est verité que tous ceulx qui veullent et aiment verité et honneur et chevalerie, ilz doibvent aidier à soustenir en leurs drois les vefves, dames et orphelins, et orphelines. Et pourtant, mes treschiers seigneurs, il est ainsi que en la marche de Lorraine et d'Ardenne a une moult riche contrée et noble, que on appelle la duché de Lucembourg, laquelle duché a par long temps gouverné comme son propre heritaige et demaine ung tresnoble et vaillant homme. Or advint que depuys ung peu de temps en cha, celluy noble homme est allé de vie à trespasement, et n'est demouré nul heritier fors que une tresnoble et belle pucelle, à laquelle tout le pays et bonnes villes ont fait hommaige. Et, mes treschiers seigneurs, plaise vous sçavoir que le roy d'Anssay la demande à femme; mais elle pour riens qu'il soit ne s'i est voulu consentir, pour ce qu'il a esté autresfois marié; lequel roy d'Anssay en a tel despit qu'il a deffié la pucelle et tout son pays, et y est entré à banière desployée, faisant guerre de feu et de sang, et tout ce fait par son outrage, sans cause et sans raison, et a assiegé la pucelle et ses gens en sa ville de Lucembourg, et a juré qu'il n'en partira jamais jusques à ce qu'il l'aura prise, et dict que comment qu'il soit, il l'aura par force ou par amour. Donc, messeigneurs, il me samble qu'il n'y a au monde plus honnorable voiage, ne plus raisonnable que cestuy; car tous ceulx qui aiment honneur et gentillesse doibvent celle part tirer. En bonne foy, dit Anthoine, vous dictes verité, et sachiés que je parleray à madame, assavoir moult

l'aide que monseigneur mon père et elle nous voudront faire ; et comment qu'il soit , à l'aide de Dieu, nous irons secourir la pucelle que le roy d'Anssay veult avoir par force , dont il me samble qu'il est mal conseillé ; car quant on les a euz par leur bon gré accordez à la loy de mariage , si y a il aulcune fois entr'eulx grant riote et grant discorde. Par foy, monseigneur, dit lors l'escuier, c'est pure verité ; mais s'il vous plaist aprendre le voiage, moy et mes compaignons, deux gentilz chevaliers qui cy sont venus avec moy, vous y conduirons et vous aiderons de tout nostre povoir. Et adonc les frères luy respondirent : Grans mercis, et sachiés que là nous irons au plaisir de Dieu. Et atant ilz s'en vont vers leur mère, et l'escuier s'en retourna vers ses compaignons, et leur dist comment il avoit exploité en ses parolles, et que sans leur requeste auroit le secours des deux frères, et seront encores prié de les y conduire, et leur disoit toute la manière comment il avoit compté le fait aux deux frères en demonstrent que c'estoit aulmosne bien grande de aidier à la noble et bonne pucelle, sans ce que les frères sceussent qu'ilz feussent de riens tenus à elle. Or vraiment, dirent les deux barons, c'est tressaigement besoigné ; or en soit Dieu loué.

Or nous dist l'istoire que Anthoine et Regnauld vindrent à leur père et mère, et leur denoncèrent ces nouvelles, en leur requerant que ilz leur voulsissent aidier à faire ceste entreprise. Par foy, dame, dist Raimondin, en ceste raison cy a moult bel commencement d'armes faire. Et pourtant je vous prie treschièrement que vous leur faictes leur arroy tel et si honnorable que y ayons honneur et prouffit. Par foy, dit Melusine, et pour vostre volenté acomplir

je m'en efforceray aprez la departie de ceste feste, et acompliray vostre commandement tellement, se Dieu plaist, que vous en serez content. Adonques fist crier à la trompette que tous gentilz hommes du pays et aultres quelconques, que ilz sceussent, qui vouldroient aller aux gaiges de Anthoine et de Regnauld de Lusignen, que ilz se trouvassent dedens ung jour, à Lusignen, qui seroit nommé; et que là seroient paieez de leurs gaiges tout entierement pour ung an. Et aussi le fist crier par tout le pays de Poetou, et par toutes marches d'environ; et ne demoura que la feste se departist tantost dont je vous avoie parlé, et se departit moult honorablement et amiablement, et se retrahit chascun en son pays. Et si me tairay de la feste, et vous diray comment Melusine fist l'appareil de ses deux enfans pour eulx en aller au secours de la pucelle.

En ceste partie nous dist l'istoire que dedens le jour que Melusine eut fait annoncer et crier les gaiges, se assemblèrent en la prarie de Lusignen moult grant foison de gentilz hommes, tant de Poetou comme des marches voisines d'entour, lesquelz furent nombrez à quatre mille bassines et cinq cens que archiers, que arbalestriers. Et sachiés qu'il ny avoit nulz paiges, fors gros varlés d'armes armez de gros jaques et capellines; et furent logez en tentes et pavillons, et si bien ordonnez que chascun s'en louat. Et leur fist Melusine delivrer et paier leurs gaiges tout entierement pour ung an. Et tandis qu'elle faisoit leur appareil, les deux frères tenoient l'escuier en parolles, et les deux barons aussi, en leur demandant de l'estat de la pucelle et de son pays; et ceulx leur en dirent la pure verité, et estoient moult joyculx en cuer de l'apparence du noble secours que



ilz veoient si prestement appareiller; car ilz eussent bien pris en gré à demy an tel appareil. Adoncques commencèrent moult devotement à louer nostre Seigneur Jhesuscrist et la vierge Marie, sa benoïste et doulce mère. Et quant ilz congneurent toutes ces choses, ilz envoïèrent puntement ung message aux barons de Lucembourg, et pour leur anoncier et faire assavoir le noble secours que Dieu leur envoïoit, dont ilz furent moult esjouys. Et aprez, les barons vont dire les nouvelles à la damoiselle, qui moult s'en reconforta, et commença moult devotement à loer Dieu son createur. Et adoncques quant la damoiselle oy la nouvelle et fut espandue par la ville, ilz eurent chascun si grant joye que ilz ne povoient plus, et firent adoncques sonner les trompettes et les menestriers; et firent moult grant feuz par les carefours de la ville, disant à haulte voix ces parolles: Joye et victoire à nostre pucelle. Et quant ceulx de dehors les oyrent, ils s'en donnèrent si grant merveille, et le allèrent noncer au roy, qui adoncques fut trespensif. Et lors lui vint certaine personne qui lui dist: Sire roy, soiez sur vostre garde, car ceux de la ville si se actendent d'avoir secours bien brief. Par mon chief, dist le roy, je ne sçay, ne ne puis sçavoir en nulle manière adviser dont secours leur peut advenir; je ne me doubte pas que je ne les ayes ou par force ou par famine. Et ainsi se assura le roy d'Anssay; mais depuys il s'en trouva bien deceup. Or vous lairay au present de plus parler de luy et commenceray à parler de Melusine, et comment elle eut tout accomply ce qu'il failloit à ses deux enfans; elle les fist faire chevaliers à leur père et y eut bel behordis en la prarie de Lusignen; et en y eut trois aultres chevaliers en celle journée pour l'a-

mour des deux frères; et eurent chascun robes, chevaux et harnois, de la finance largement, et fut tout prest comme pour mouvoir.

Adoncques appella Melusine ses deux enfans, en leur disant en ceste manière : Enfans, vous vous departez de la compaignie monseigneur vostre père et de moy, et est tresgrande adventure se je vous revoiy par decha. Et pourtant je vous vueille enseigner et introduire pour vostre bien et avancement; ce que je vous diray et l'entendez et retenez bien, car il vous sera bien besoing au temps advenir. Et tout premierement, aimez, doubtez et servez Dieu, nostre createur, tous les jours continuellement; et tenez bien fermement, justement et saintement le commandement de nostre mère sainte Eglise et tous ses degrez et commandemens de nostre foy catholique. Soiez humbles, doulx aux bons, et bien aspres aux mauvais. Et soiez tous temps de belle responce aux grans et aux petitz, et tenez parolle à chascun quant temps sera; ne promettez chose que vous ne peussiez briefvement accomplir selon vostre pouvoir; ne actraiez jà rapporteurs de parolles devers vous; ne croiez jà envieux, ne ne croiez mie legierement, car ce fait aulcunefois maint ennemy; ne ne mettez en office nulz avaricieulx, ne aussi nulz felons; ne ne vous acointez de femmes d'aultruy; departez à vos compaignons loyaulment de ce que Dieu vous donra. Soiez doulz et debonnaire à vos subjectz, et à vos ennemis fiers et cruelz, tant qu'ilz soient soubmis en vostre obeissance, se par force le fault faire; et ce c'est pour traictiez, si les traictiez amiablement à vous, et prenez raison d'eulx et l'offrez aussi selon le cas, mais convient qu'il soit; ne tenez jà long traictié, car pour ce ont esté plusieurs princes de-

ceupz. Gardez-vous bien de trop menasser, de vanter; mais faictes vostre fait à peu de parolles ce que faire se pourra. N'aiez jà nulz de vos ennemis en despit, tant soit petit, mais soiez tousjours sur vostre garde; ne soiez pas entre vos compaignons comme sire, mais soiez commun, et honnourez chascun selon son degré, et leur donnez du vostre selon vostre aisement et que la personne le vauldra. Donnez aux bons hommes d'armes chevalx, cottes d'acier, bassines, des premiers, et argent selon raison, et vous, se vous voiez ung bon homme de la main qui vienne devers vous mal vestu ou mal monté, si l'appellez moult humblement et luy donnez robes, chevaux et harnois, selon la valeur de sa personne et selon le pover que vous avez alors. Or, mes enfans, je ne vous sçay plus au present que dire, fors que tenez verité tousjours à tous vos affaires. Tenez, je vous donne à chascun ung agnel d'or, dont les pierres ont une mesme vertu; car sachiez que tant que vous avez bonne cause que vous ne serez ja desconfis en bataille. Et lors les commença à baisier tous deux amoureusement comme leur mère, et ilz la mercièrent et prindrent congié de leur père, qui fut moult doulant de leur departie. Et lors firent sonner leurs trompettes, et se mirent tout devant, et se desloga l'avant-garde, et puyz aprez tout le sommage, et la grosse bataille aprez, et puyz l'arrière-garde, en si tresbonne ordonnance que c'estoit grant beaulté à veoir l'estact de l'avant-garde; et l'avoit à gouverner ung tresgrant et vaillant chevalier de Poetou; et les gentilzhommes et les deux ambassadeurs de Lucembourg et les deux frères menèrent la grosse bataille; et en l'arrière-garde furent les deux chevaliers poetevins, qui menèrent Urian et

Guion de Chippre, et qui premierement leur comptèrent comment le souldan avoit assiegé le roy de Chippre; et à ces deux chevaliers avoit jà recommandé Raimondin et Melusine l'estat de ses deux enfans. Et est vray que la première nuyt ilz se logèrent dessoubz une moult forte ville, sur une petite ripvière, et estoit icelle ville nommée Mirabel, et la fonda Melusine. Et en celle nuyt commencèrent les deux frères à faire bon guet, ainsi comme se ilz fussent ores en la terre de leurs anemis, dont plusieurs se donnoient grans merveilles; mais ilz ne l'osoient refuser, car Anthoine estoit si cruel que chascun le doubtoit. Le lendemain au matin, aprez messe oye, firent les deux frères crier sur paine de perdre harnois et chevaux et estre banny de leur compaignie, que chascun chevauchast armé soubz sa banière en belle bataille. Nul ne l'osa refuser, ains fut ainsi fait, dont chascun se donna grant merveille; et en ceste manière chevauchèrent bien par l'espace de dix journées, et tant qu'ilz vindrent en Champaigne; et estoient plusieurs anuyés de porter leurs harnois, tant pour ce qu'il n'estoit nul besoin, comme pour ce qu'ilz ne l'avoient pas acoustumé et en parloient les aulcuns. Adoncques vint le chevalier de l'avant-garde aux deux frères en disant ainsi : Messeigneurs, le plus de vos gens se tiennent à malcontens de ce que vous les contraindés à porter leurs harnois; car il leur semble qu'il n'en est nulle nécessité tant qu'ilz viendront à approchier la terre de vos ennemis. Et comment, sire chevalier, dist Anthoine, ne vous samble-il point que la chose qui est acoustumée de longue main ne soit mieulx congneue de ceulx qui la excercent que telle qui est nouvellement aprise, et si en est mains grevable. Par

foy, dist le chevalier, c'est bien dict. Il vault mieulx, dist Anthoine, qu'ilz apprennent la paine de soutenir leurs harnois en temps qu'ilz le peuvent faire à leur aise et eulx refreschier seurement, pour en sçavoir la manière comment ilz le pourroient aisement soustenir et souffrir quant mestier en sera; car se il leur convenoit aprendre entre leurs ennemis, il leur doubleroit la paine plus grande; et vous sçavez qui n'apprent son mestier en sa jeunesse, à grant paine pourra-il estre bon ouvrier en sa viellesse. Par foy, monseigneur, vous en parlez vaillamment, et est votre raison moult bonne. Et adoncqes se departist de luy et nunça à pluseurs ceste raison, tant que ceste nouvelle fut sceue parmy l'ost, dont chacun s'en tint à bien content, et disrent tous que les enfans ne pourroient faillir à avoir grant bien, se Dieu leur donnoit vie, et qu'ilz viendroient à grant perfection de bien et à treshault honneur.

L'istoire nous dist, en ceste partie, que celle nuyt se loga l'ost sur une ripvière qui estoit lors appelée Aisne. Et quant vint au premier sompne, les deux frères firent crier à l'arme moult effroiement parmy l'ost. Adoncqes eubt grant trouble, et chacun se arma de toutes pars, et se misrent en bataille, chacun soubz sa banière devant leurs tentes, en bon arroy. Et estoient treshien acompagniez de nobles gens à grant foison de torces et de fallos treshien alumez. Et y avoit sy grant clarté comme se il fut jour, et toutes les banières se approcèrent de l'aler en belles batailles. Et sachiés bien que c'estoit grant beaulté à veoir la bonne contenance et la noble ordonnance des gens d'armes et des deux frères, quy alloient de bataille en bataille, et là où il avoit faulte de ordonnance, ilz luy mettoient. Et les trois embas-

sadeurs de Lucembourg regardoient moult bien leur contenance, et disoient l'ung à l'autre : Par foi, ces enfans sont moult bien taillez de conquerre encores une grande partie du monde. Ores peut bien dire le roy d'Anssay qu'il comperra sa folie et sa folle entreprise et le dommage qu'il a fait à nostre pucelle et à son pays. En ces parties furent moult longue espasse de temps que les coureus eurent par tout descouvert, et qu'ilz furent retournez en l'ost, et disdrent qu'ilz n'avoient riens oy ne veu ; dont tous se donnèrent moult grant merveille qui avoit fait tel effroy. Mais en la fin il fut bien sceu que les deux frères l'avoient fait faire ; et viindrent les deux chevaliers de l'arrière-garde, et aussi ceulx de l'avant-garde, aux enfans, en disant en ceste manière : Mes seigneurs, c'est bien simplesse à vous de faire ainsi travailler vos gens d'armes pour neant. Comment ! dist Anthoine, quant vous faictes faire ung habit nouyel, ne le faictes-vous pas assaier pour sçavoir moult se il y a que amender ? Et tous respondirent : Par ma foy, sire, oy, et c'est à bon droit. Dont dist Anthoine : Se j'ay voulu assaier mes compaignons, ainçoys qu'il en soit temps, pour sçavoir comment je les auroie prest à mon besoing, considéré et veu que nous approuchons prez de nos ennemis, affin, se aulcune chose y eubt de faulte, que nous y eussions pourveu de remède convenable ; à mains de dommage que se besoin en fut. Adoncques, quant ilz entendirent ceste parolle, ilz respondirent : Monseigneur, il est bien vray que icy n'a que raison. Et se donnèrent moult grant merveille de leur gouvernement et de leur sens ; et disoient à eulx mesmes qu'ilz viendroient encores à grant perfection. Il ne demoura gaires que le jour vint ; la messe fut chantée, les



trompettes sonnèrent; l'avant-garde, le sommaige et le charroy se deslogèrent, et puyz aprez l'ost, et allèrent tant par leurs journeez, que ung soir se logèrent sur une ripvière nommée Meuse, audessoubz d'une fortresse nommée Dam Chastel, et de là n'avoit pas plus deux logis jusques au siège de Lucembourg. Adonc vindrent les ambassadeurs aux deux frères, en disant : Mes seigneurs, il n'y a plus que douze lieues jusques au siège, et seroit bon que vous feissiés refreschier vos gens sur ceste ripvière, car cy a assez bon sejour a bonne prarie; et aussi de vous adviser comment vous voudrez et devrez faire.

Lors respondist Anthoine moult baudement : Par foy, beaulx seigneurs, l'advis est tout fait dès que nous partiesmes de Lusignen; car si tost que mon frère et moy aurons envoié par devers le roy d'Ans-say, se il ne veult faire ce que nous luy manderons, il se peut bien tenir tout seur de la bataille, et en donnera Dieu la victoire à qui qu'il luy plaira; mais quoy! il nous samble que nous avons bonne querelle, et pourtant nous avons bonne esperance que Dieu nous aidera; et aussi nous luy pensons à requerir raison devant que luy combatons; mais il faut adviser qui portera nostre message. Par foy, Sire, dist le chevalier de l'avant-garde, moy, se il vous plaist, et ce gentilhomme, qui scet le chemin et le pays, irons. Au nom de Dieu, dist Anthoine, et il me plaist bien; mais ce ne sera mie encores jusques à tant que j'auray approuché de deux ou de trois lieues près, affin que se la bataille venoit vers nous, que nous ne tardissions pas trop largement, car se il la veult, nous voudrions jà estre arrivez là. Et ainsi les laissèrent jusques au matin. Adonc le lendemain après la messe se desloga l'ost, et passa la ripvière



dessoubz Dan en belle ordonnance, et chevauchèrent tant qu'ilz vindrent loger à ung soir entre Ver-ton et Lucembourg. Et le lendemain bien matin, Anthoine envoya le chevalier de l'avant-garde et le gentilhomme devers le roy d'Anssay en disant les parolles qui cy après ensievent. Adonc tant exploitèrent qu'ilz vindrent à l'ost du roy d'Anssay, qui furent bien congneus que c'estoient messagiers, et furent tantost menez au roy, lequel ilz saluèrent, et firent la reverence comme ilz deurent. Et adonques le chevalier lui dist : Sire roy, nous sommes cy envoie de par Anthoine et Regnaud de Lusignan, frères, pour vous monstrier la faulte et l'outraige que vous faictes à madamoiselle de Lucembourg, lesquelz vous mandent que se vous voulez restablir ses dommaiges et luy amender raisonnablement l'injure et vilonnie que vous avez faicte à elle et à ses gens et à son pais, vous ferez bien, et de vous departir de ce pays; se non leur intention est de vous le faire reparer ou comparer à force d'armes; et m'en respondrez ce qu'il vous plaira à faire, et puy à vous en diray plus avant; selon ce que je suys chergé je vous le diray. Comment! sire chevalier, dist le roy, estes-vous venu cy pour preschier? Par ma foy, petit y povez conquerer, car pour vous ne pour vos lettres ne laisseray-je mie mon intention; mais tant povez preschier qu'il vous plaira, car je prens mon esbatement en vos preschemens. Et aussi je crois que vous ne faictes ne dictes ces choses sinon pour truffe. Par mon chief, sire roy, dist le chevalier, qui fut moult couroucé, se vous ne faictes promptement ce que mes seigneurs vous mandent, bien brief la truffe vous sera monstrée à certes, au plus tart dedans trois jours prochainement venans. Sire cheva-

lier, dist le roy, menasser povez assez, car autre chose n'emporterez-vous de moy ; car vostre maistre ne vostre menasser ne prisé-je pas ung festu. Dont, roy, dist le chevalier, je vous deffie de par les deux damoiseaulx de Lusignen et de par tous leurs aidans. Or bien, dist le roy, je me garderay de mesprendre et de perte. Par mon chief, dist le chevalier, il vous en sera bien besoing. Et atant s'en partist sans plus dire, et quant il vint au dehors du logis, le gentil-homme print congié de luy et alla à Lucembourg pour compter les nouvelles des deux frères, et quant il vint à la porte, il fut moult bien congneu, et luy fut la planche avallée et la porte ouverte, et tantost on luy demanda des nouvelles. Par foy, dist l'escuyer, faictes bonne chièrre, car vous aurez tantost le plus noble secours qui fut oncques veu, et sachiés bien que le roy d'Anssay attend qu'il sera certainement ou pris ou mort, et toutes ses gens seront ou mors ou desconfis. Adoncques commença telle joye parmy la ville que ceulx de l'ost en oyrent le bruit, et adoncques s'en donnèrent grant merveilles que ce povoit estre, ne quelle chose leur povoit estre advenue de nouvel ; et adonc le nuncèrent au roy. Par ma foy, dist le roy, ilz se recomfortent au secours de ces deux damoiseaulx de par qui ce chevalier nous a deffié ; je croy bien qu'ilz en ont oy nouvelles, et pour ce font-ilz telle joye. En nom de Dieu, dist ung ancien chevalier, tout ce peut bien estre, et seroit bon de s'en prendre garde, car il n'est nul petit anemy. N'ayez doubte, dist le roy ; je les cognois assez bien par semblant, car devant qu'ilz soient venus de Poetou, nous devons avoir achevé une partie de nostre volenté. Or vous laisseray atant de parler du roy, et parleray de l'escuyer qui estoit

venu à Lucembourg pour apporter nouvelles à la oucelle. Et adoncques luy va compter la pure verité du fait, et elle lui enquist moult des choses des deux frères, de leur contenance et de leur estre; et luy dist comment Anthoine portoit la griffe du lyon en la joe, et de la grant fierté et grant puissance de luy; et luy dist et compta de Regnauld, qui n'avoit que ung œil, et de la beaulté de leurs corpz et de leurs membres, dont elle se esmerveilla moult, et dist que c'estoit grant dommaige quant il y avoit leffaultz ès membres de telz nobles hommes. Et à tant se taist l'istoire d'en plus parler, et parle du chevalier poetevin qui retourna grant erre vers l'ost.

L'istoire nous dist que tant erra le chevalier qu'il vint en l'ost des deux frères, et leur recorda comment il avoit fourni tout son message, et leur compta le mot à mot l'orgueilleuze responce du roy, et comment il l'avoit deffié de par eulx, et aussi comment l'escuier estoit parti de luy et s'en estoit allé à Lucembourg compter les nouvelles de leur venue. Et quant les deux frères l'oyrent, ilz furent moult joyeux, et firent tantost crier parmy l'ost que tous ceulx qui n'avoient bonne volenté de venir à la bataille se missent d'une part, et qu'ilz leur donneroient congïé de retourner en leur pays, mais ilz s'escrièrent tous à haultes voix : Ha, ha, francs damoiseaulx, faictes donner vos trompettes et mettez-vous en chemin, car nous ne sommes point venus en votre compaignie fors que pour prendre l'adventure telle que Dieu nous la vouldra donner. Ha, ha, seigneurs, allons courir sus à nos ennemis, car, à l'aide de Dieu et à la bonne volenté que nous avons, ilz seront tantost desconfis. Adoncques quant les deux frères oyrent la responce de leurs gens, ilz furent moult

joyeux , et tantost firent leur host desloger , et vindrent loger sur une petite ripvière ; et furent l'avant-garde et la grosse bataille logez ensamble , et aussi l'arrière-garde , pour ce que on ne povoit plus aller avant ; et souppèrent tous ensamble , et puis s'en alla chascun reposer ; et fut ordonné que chascun fut tout prest au point du jour ; et laissèrent pour garder les logis deux cens hommes d'armes et cent arbalestriers ; et adonc se mist l'ost en chemin. Là veissiés bannières et panons au vent ; là povoit-on veoir fleur de chevalerie ; là veissiés bassines reluire et harnois cliquer ensamble que c'estoit grant beaulté à veoir ; ilz se serroient ensamble si que l'ung ne passoit l'autre d'ung doit. Anthoine et Regnauld furent au premier front, montez sur deux beaux destriers , armez de toutes pièces , et en tel estat allèrent tant , que environ le soleil levant ilz vindrent sur une petite montagne , et veoient en la vallée la ville et le chasteau de Lucembourg et le grant siège à l'environ. Et sachiés que ceulx du siège n'avoient point encores aperceu l'ost des deux frères de Lusignen ; mais ilz estoient tous asseurs que ilz devoient avoir la bataille. Adoncques envoya Anthoine jusques à quatre cens bassines pour estourmir l'ost ; et venoit aprez le petit pas en belle bataille ; et sur les elles avoit chevaliers et arbalestriers en tresbonne ordonnance. Or disons des quatre cens arbalestriers qui allèrent estourmir l'ost du roy.

L'istoire nous dist que les quatre cens combatans vindrent en l'ost , et se ferirent dedens à cours de cheveu en criant Lusignen ; et alloient parmy l'ost , occisans et abatans tout ce qu'ilz rencontrèrent , et quant ilz furent approuchez de la tente du roy , et qu'ilz tendoient venir à celle tente , les gens du guet

de la nuyt, qui n'estoient pas encores desarmez, leur furent au devant, par le cry et tumulte qu'ilz faisoient en exploitant leur entreprise; et à l'encontre des ungs et des aultres, y eubt grant foison de lances brisées, et tourna à moult grant dommaige sur ceulx du siège. Mais soudainement le roy se arma et se mist soubz sa banière devant sa tente, et se pendant qu'ilz tenoient piet, tout l'ost fut armé et se tirèrent à la banière du roy, qui leur demanda : « Beaulx seigneurs, quelle noise est-ce ? » Par foy, dist ung chevalier, se sont gens d'armes qui s'en sont venus en vostre ost fierement et crient Lusignen, et vous ont jà fait grant dommaige, et se le guet de la nuyt n'eut esté, ilz vous eussent fait assez greigneur, car ilz leur sont venus au devant et les ont combatus fort et ferme au dehors des logis, où ilz les ont reboutez par force. Par foy, dist le roy, ces danoiseaulx qui m'ont deffié ne musent gaires à moy porter dommaige, mais je m'en pense bien vengier. A tant est venu Anthoine et sa bataille, qui fist sonner ses trompettes moult clerement; et quant le roy l'aperceut, il s'en vint au dehors des logis en belle bataille rangée, et adoncques les batailles s'entre-encontrèrent, et s'approuchèrent archiers et arbalétriers, et commencèrent à traire; et là eubt de mors et de navrez grant foison des Ansoys, et neantmoins ilz se assablèrent à grandes batailles, et là eubt grant occision et fière meslée. Et adonc Anthoine poingnit le cheveu des esporons, la lance baissée, et ferit ung chevalier par telle roideur, que la large ne le jacerain ne le peurent oncques garentier que il ne le ruast tout mort par terre. Adoncques traist l'espée et frapport à destre et à senestre bien rans coups et pesans, tant que en peu d'eure il fut

si congneu par toute la bataille, que le plus hardi d'eulx trestous ne le osoit point attendre. Lors vint Regnault sur ung grant courcier, criant Lusignen, qui faisoit tant d'armes que tous ses ennemis le doubtoient; adonc moult se requèrent d'une part et d'autre bien vaillamment, et fust la bataille et l'ocision moult fière et horrible, mais toutesfois la greigneur parte tourna sur le roy d'Anssay et ses gens, lequel en fut moult doulent, et se envertuoit fort et faisoit de moult beaulx vaisselages; mais tout ce ne luy vallut riens, car les Poctevins estoient moult fors et durs, aspres et fiers comme lyons, et estoient leurs deux seigneurs si puissans que nul, tant fut hardi, ne les osoit attendre. Lors veoit bien le roy aux effors qu'il ne pouvoit souffrir leur force.

---

*Comment Antoine et Regnault desconfirent le roy d'Anssay devant Lucembourg, et comment le roy fut pris.*

**A** donc le roy, qui fut fort vaillant homme et roide, cria à haulte voix : Anssay, Anssay ! avant, seigneurs barons, ne vous esbaisiez pas, car la journée est nostre; et disoit : Faisons poindre leurs chevaux, en disant : entretenons-nous ensamble, et tantost les verrez tous desconfis. Adoncques se rassemblèrent entour leur roy, et firent une fière envaye aux Poctevins; là eut maint homme mort et occis à grant douleur. La matinée fut belle et clère, et le soleil resplendissoit sur les bassines qui faisoit reluire l'or, l'argent et l'a-



zur, et les couleurs des bannières et des panons ; les destriers brandissoient, et les pluseurs alloient par les champs sans point de maistre, leur raines trainans. Adonc la noise fut moult grande du charpentis des espées et des haches, du bruyt et du cry des abattus et navrez, et du son dez trompettes ; et pour ce entendirent ceulx de la ville l'effroy, et coururent aux armes et chascun à sa garde ; car moult fort se doubtoient de traison. Adoncques l'escuier qui là estoit venu pour anuncer le secours et estoit en la maistre tour avecques la pucelle et la damoiselle, il oyt la noise, et bouta son chief dehors par une fenestre, et lors il aperceut la bataille moult fière et mortelle, et bien congneut, entre les aultres combatans, que c'estoient Anthoine et Regnauld qui estoient venus combatre le roy et ses gens ; si s'escria moult hault : Ma damoiselle, venez veoir fleur de chevalerie, proesse et hardiesse ; venez veoir honneur en son siège royal et en sa majesté ; venez veoir le dieu d'armes en sa propre figure. Amy, dist la damoiselle, qu'esse que vous me dictes ? Je vous dis, dist le chevalier, que vous venez veoir toute la fleur de chevalerie, noblesse et toute courtoisie, qui de long pays est cy venue pour combattre vos ennemis, pour vostre honneur garder, et vostre pays et vos gens. Ce sont les deux enfans de Lusignen qui vous sont venus deffendre et garder du roy d'Anssay et toute sa puissance, et de adventurer leur honneur et leur vie, et pour vostre honneur garder. Adoncques vint la damoiselle à la fenestre, et regarda la mortelle bataille et horrible meslée. Adoncques commença à dire en ceste manière : Vray Dieu, que fera ceste povre orpheline ? Mieulx vaulsist que je me fusse noyée ou fait mourir d'autre mort cruelle ou que je fusse



mort née, que tant de nobles creatures fussent periez pour mon pechié. Moult fut la pucelle dolente en son cuer du grand meschief qu'elle voit qui vient par elle, et de la grosse bataille; et pour vray l'occision fut moult grande d'une part et d'autre, car le roi reconforta ses gens et leur rendit moult grant cœur; car à celluy poindre fist moult grant dommaige le roy au Poctevins. Et voyant Anthoine le grant dommaige que le roy d'Anssay luy faisoit, il luy en desplaunt moult. Par ma foy, dist-il, sire roy, vostre dureté sera moult courte ou la mienne. J'aime mieulx à morir que je veisse ainsi murtrir mes gens devant moy. Et adoncques Anthoine commença à poindre le cheveu des esporons par grant fierté, comme couroussé contre le roy, l'espée au poing, et le ferit sur le bassinet par telle force que il le fist embrancher et encliner sur le col du cheveu, si estourdi que il ne sceut se il estoit jour ou nuyt, ne il n'eut force ne pouvoir de soy aidier ne soustenir; et ce voyant Anthoine, il rebouta son espée au fourel et le print par my le corps et le tira hors du cheveu, et le jeta si roidement encontre la terre que peu failist que il ne lui crevast son cœur ou son ventre; et puy il le bailla à quatre chevaliers à garder, et leur commanda sur leur vie que ilz luy en sceussent respondre, et ilz luy disdrent que si feroient-ilz. Adoncques le lièrent et l'emportèrent hors et destournèrent dessoubz un arbre, et appelèrent de leurs gens vingt et cinq bassines pour le aider à garder. Et aprez ces choses faictes, Anthoine retourna à la bataille en criant à haulte voix : Lusignen, avant, barons, frappez tant fort que vous pourrez, sans espargnier; la journée est à nous, la Dieu mercy, car j'ay pris le roy d'Anssay, qui tant a fait de vilonnie à la pu-

celle Cristienne. Lors y eubt rude meslée, et là firent les deux frères tant d'armes, que chascun qui les veoit disoit que oncques mais n'en virent deux chevaliers qui tant en fissent. Que vous vouldroit ores long compte? Quand les Ansoys sceurent que leur roy estoit pris, il n'y eubt oncques deffence; mais furent tous que mors que pris. Et là gagnèrent Poetevins noble conquete, et se logèrent ès pavillons du roy d'Anssay et de ses gens. Et adoncques fut mené le roy à la tente de Anthoine, qui estoit logé en la propre tente qui avoit esté au roy d'Anssay; et adoncques il ne se peut tenir qu'il ne leur dist: Par foy, damoiseaulx, bien dist vray celluy qui dist: En peu d'eure Dieu labeure; car au jour d'huy matin on n'eut gaires fait de chose ceans pour vous. Sire roy, dist Anthoine, c'est pour vostre musardie et pour vostre pechié, qui faictès guerre aux pucelles sans cause, et les volez avoir par force. Et sachiés que vous en serez bien païé selon vostre droit; car je vous renderay en la subjection de celle que vous voulez avoir par force subjecte. Adonc quand le roy l'entendit, il fut moult honteux, et luy respondist moult tristement: Or puy qu'il m'est ainsi infortueusement advenu, j'aimes mieulx ma mort que ma vie. Nenny, dist Anthoine, je vous renderay en la merci et en la subjection sans doubte de la pucelle.

---

*Comment le roy d'Anssay fut mené devers la pucelle  
Cristienne.*

**A** doncques il appela les deux chevaliers qui vindrent à Lusignen avec le gentil homme en ambassade, et oultre douze chevaliers de Poetou, en disant en ceste manière : Menez moy ce roy en la ville devers la pucelle, et luy dictes que je lui envoie son ennemy pour en faire à sa volenté. Et lors ceulx partirent, et menèrent le roy comme charge leur estoit, et vindrent en la ville, où il furent moult bien festoiez ; car bien sçavoit la pucelle la verité de la victoire ; et doncques les citoiens les menèrent à moult grant joye devers la pucelle Cristienne, qui les receipt à moult grant joye. Ma damoiselle, disdrent les messagiers, les deux jouvenceaulx du Lusignen se recommandent à vous chierment, et vous envoient ce roy qui est votre ennemy prisonnier, pour en faire à vostre volenté. Beaulx seigneurs, dist la pucelle, cy appartient grant guerdon ; mais je ne suys mie assez puissante de les guerdonner. Je prie Dieu devotement qu'il les vueille meriter par sa sainte grace. Mes beaulx seigneurs, je vous prie qu'il vous plaise à dire à mes deux seigneurs qu'il leur plaise de venir loger ceans, et amener avec eulx de leur baronnie tant qu'il leur plaira ; et tandis on fera ensevelir les mors et ardoir les chevaux mors ; et aussi mon conseil se advisera comment on les pourra satisfaire de leur painne et despense au mieulx que nous pourrons. Et vous, sire roy, jurez par vostre royauté que vous ne partirez pas de ceans sans le gré des no-

bles damoiseaulx qui cy vous ont envoié devers moy; car je sçay tant encores, Dieu mercy, que je mesferoie de vous mettre en prison fermée, non mie tant seulement pour l'amour de vous, mais pour l'amour de ceulx qui cy vous ont envoié. Adoncques quand le roy eubt oy les parolles de la pucelle, il luy respondist tout honteux : Mademoiselle, je vous jure, par ma foy, mettez-moy où il vous plaira, car je ne me partiray jà de ceans sans votre congié, le leur aussi; car j'ay veu tant de bien, tant d'honneur et tant de vaillance en eulx, que je desire moult à estre accinté d'eulx, pour ce que j'en pourray mieulx valoir, combien qu'ilz m'ont porté moult grant dommage de mes gens; et quant à l'avoir, ne me chault gaires. Et lors la damoiselle le fist mettre en une moult riche chambre, et avec luy dames et damoiseselles, chevaliers et escuiers, pour luy faire oublier sa perte et pour le resjouir et oster hors de merancolie. Et ce fait, les messagers se retournèrent aux tentes et racomptèrent le mandement et la prière de la pucelle aux deux frères. Et ilz eubrent conseil de y aller, et ordonnèrent le mareschal de l'ost pour gouverner leurs gens tant qu'ilz retournassent, et aussi luy commandèrent à faire ensepvelir les morts et faire nestoier la place où la bataille avoit esté. Lors s'empartirent à belle baronnie, et vindrent au devant d'eulx jusques à cent gentilz hommes, et aussi les barons du pays, qui vindrent faire la reverence aux deux frères, et eulx encore prier de par la pucelle qu'ilz se venissent loger en la ville, et ilz leur respondirent que cy feroient-ilz volentiers. Adonc montèrent à cheveu les deux frères, accompagniez bien de deux cens chevaliers moult noblement. Et Anthoine estoit monté sur ung grant des-

trier liart et vestu d'ung jaques de velours cramoisy tout brodé de perles moult riches, et le baston au poing; et estoit son frère tout pareillement vestu et ordonné; et quant les barons visrent les deux frères, ilz furent moult esbahis de leur fierté, grandeur, et de leur puissance, et bien disoient qu'il n'estoit homme qui peut contrestre ne arrester contre leur puissance, et s'emmeilloient moult de la griffe du lyon qu'ilz apperceurent sur la joue de Anthoine; et disoient que se ne fut cela, qu'il n'eut plus bel homme au monde; et moult plainnoient Regnault pour ce qu'il n'avoit que ung œil; car il parfaisoit toute beaulté du surplus, que nul ne savoit que deviser de sa beaulté.

En ceste partie nous dist l'istoire que en noble estat entrèrent les deux frères en la ville de Lucembourg, et y avoit devant eulx trompettes à grant foison, avecques heraus et menestriers; et avoient adonc les bourgeois encourtinez les rues jusques au chastel, de riches draps, et y avoit de notables bourgeois qui estoient en leurs fenestres moult richement parées et vestues selon leur estat.

L'istoire dist que les deux frères partirent de leurs tentes à moult noble baronnie de leurs gens, avec la baronnie du pays; et chevauchèrent tant qu'ilz vindrent à Lucembourg; et y furent moult regardez des habitans de la cité, et disoient l'ung à l'autre: Voiés les deux frères fiers hommes qui moult se font à redoubter; celluy n'est pas sage qui à celles gens prend noise ne debat. Et avoient moult grant merveille de la joe d'Anthoine, et en verité c'estoit une moult estrange chose à veoir; mais la grant beaulté qui estoit au demourant de luy faisoit cela oublier; et aussi il ne lui mesceoit pas fort. Et ainsi allèrent

vers la maistresse fortresse. Les dames et les damoiseaulx les regardoient par les fenestres et disoient que oncques mais n'avoient veu deux damoiseaulx de plus noble affaire. Et lors vindrent au chasteau, et descendirent devant la salle; et leur vint à l'encontre du piet du degré Cristienne la pucelle, moult bien acompaignée de dames, damoiselles, chevaliers et escuiers, et les receipt et festoia moult honnourablement en les prenant par leurs mains, estant au millieu d'eulx deux. Et ainsi montèrent les degrés de la grant salle, qui estoit tendue moult noblement de riche tapisserie, selon l'usage du pays et le temps de lors; et de la salle entrèrent en une chambre moult riche; et lors prist la pucelle le parler en disant en ceste manière : Mes chers seigneurs, je vous mercie tant comme je puis du noble secours que vous m'avez fait; je n'ay mie tant vaillant que je vous puisse bonnement remunerer; non obstant je feray tout mon pövoir pour engagier ma terre dix ans. Et aussi, mes seigneurs, vous m'avez envoieé de votre bonne grâce et franchise le roy d'Anssay, mon ennemy, dont plaise vous sçavoir que je ne suys mie telle qui vueille ne doibve prendre pugnition de luy, ne le tenir prisonnier; mais à vous appartient d'en faire vostre bon plaisir, qui en avez eu la paine et le peril de le conquerer; si vous doibt demourer, car c'est raison; et aussi du don que vous m'avez fait je vous remercie tant que je puis plus au monde, et le vous remetz en votre possession; et à vous, mes seigneurs, est de sa mort ou de sa vie, lequel qu'il vous plaira à faire; car quant est de moi, je ne m'en quiers jamais à mesler par dessus vous, mais le vous quitte tout à plein. Ma damoiselle, dist Anthoine, puy qu'il vous plaist, nous en ordonnerons

tellement que ce sera à vostre honneur et prouffit, et à sa grande honte et confusion; et de ce ne vous en doubtez mie. Et sachiés que mon frère et moy ne sommes pas venus pour vous aidier pour argent, mais pour droit et raison soubstenir, et aussi que tous chevaliers doibvent aidier les vefves, les orphelins et les pucelles, et pourtant que on nous avoit dist et tresbien informé que le roy d'Anssay vous faisoit grant guerre; pourtant ne vous doubtez mie que du vostre veuillons la vallue d'ung petit denier, fors tant seulement vostre bonne amour et grace, sans vilonnie. Adoncques quant la pucelle entendist ces parolles, elle fut moult esbahie du grand honneur que les deux frères luy faisoient; non obstant elle respondist ainsi: Par ma foy, mes seigneurs, au mains ne seroit-ce mie raison que je ne païasse bien vos gens, qui sont cy venus à vos gaiges soudoyez. Damoiselle, dist Anthoine, souffrés vous-en, car monseigneur nostre pere et madame nostre mère les ont satisfaits d'ung an avant qu'ilz partissent de nostre pays; et il n'y a mie encores ung mois acomply que nous en partismes; et d'aultre part, nous avons or et argent assez; si ne veullés plus perdre vos parolles, car certes, mademoiselle, il ne se fera aultrement. Et adoncques de rechief elle les remercia moult humblement.

Lors vint ung maistre d'ostel qui moult doucement se agenoilla devant la pucelle et luy dist: Ma damoiselle, il est prest, quant il vous plaira à laver. Par foy, dist-elle, quant il plaira à mes seigneurs qui cy sont. A quoy respondist Anthoine: Damoiselle, nous sommes tous prestz, quant il vous plaira. Et lors se prindrent par les mains, et fist Anthoine mander le roy d'Anssay, et le fist seoir à table le premier, et



puis après la pucelle, et puis Regnault, frère dudit Anthoine; et après eulx s'assirent quatre des plus haultz barons du pays, et après par la salle s'assist qui mieulx, chascun selon son degré. Du service des mets ne vous fault jà tenir long compte, car ilz furent si grandement servis qu'il n'y failloit riens; et, quant ilz eubrent disné, ilz lavèrent, et finablement les tables furent ostées et graces dictes. Ce fait, le roy d'Anssay prist la parolle en disant en ceste manière : Seigneurs damoiseaulx, veuillez moy escouter : il est vray qu'il a pleu à Dieu que fortune m'a à ce amené que par vostre haulte proesse je suys et ay esté, moy et mes gens, desconfis, et moy vostre prisonnier; et vraiment, je ne m'en prise pas mains, pour quelque dommaige qu'il m'en puisse advenir, pour ce que je vois en vous tant de bien, tant d'onneur, de proesse et de vaillance, que je prens grant plaisir à vous veoir, et ne pourroye que amender de vous. Or, beaulx seigneurs damoiseaulx, à moy tenir longuement prisonnier ne povez vous conquerer guères; si vous supplie humblement tant comme je puy qu'il vous plaise à moy mettre à finance raisonnable, et qu'il vous plaise à moy faire tant de grace que je ne soie pas destruiet ne desherité du tout de ma seignourité; mais vous y plaise à regarder en pitié, et ne vueillés pas avoir trop grand regard à ma folle entreprinse en vostre riguer, combien que j'ay desservi à estre tresbien pugni rigoureusement. Par mon chief, dist Anthoine, sire roy, qui vous pugnirait selon droit et raison, vous n'avez pas de quoy amender à ceste pucelle la vilonnie, l'injure et dommaige que vous luy avez faicte sans cause; mais, pourtant que vous recongnoissés vostre verité, vous en aurez plus legière penitance; et je vueil que vous

sachés que mon frère et moy ne sommes pas venus de nostre pays pour la fiance de gagner pécune sur vous ne sus aultruy, mais pour desir et esperance de acquerir honneur et bon regnom; sans avoir en nous nul appetit ne voullenté d'avarice; et pourtant, dès maintenant nous vous quittons, quant est de nostre part, mon frère et moy, vostre prison, par ainsi que nous vous tauxerons à restituer à ma damoiselle qui cy est tous ses dommages, tant de larrecins, comme de pillages de proyes, de bestes, et aussi de toutes aultres choses quelconques, au regart et jugement de preudomme et hommes dignes de foy, qui sur ce seront eslus pour le dommage priser et taxer; et sur ce baillerez bons ostages avant que vous partirez, et le jurerez et prometterez par vostre foy et aux saintes Evangelles de Dieu, et en ferez presentement lettres soubz vostre sellé de acomplir et entretenir ce que j'ay dessus dit. Et oultre ferez plus en convenant que jamais ne porterez ne soufferez porter à vostre pouvoir dommaige à ma damoiselle qui cy est, mais aiderez et conforterez elle, son pays et tous ses hommes, envers tous et contre tous ceulx qui dommaige ne injure leur vouldroient faire ne pourchasser. Et vueil bien que vous sachés que si vous ne voulez jurer et accorder de vostre bon gré tout ce que je vous ay dit, que je vous enverrai en tel lieu dont vous n'en eschapperez jamais en vostre vivant. Et quant le roi entendist ceste parolle, il respondist en ceste manière : Sire, par ma foy, je tiens ceste taxation et ordonnance à vous fiablement tenir, mais que ma damoiselle en soit contente. Par foy, dist-elle, ouy, puyqu'il plaist à messeigneurs et damoiseaux. Et adonc reprint Anthoine la parolle, et dist encore ce qui s'ensieut :

Bon roy, je n'ay pas tout dit ce que je vueil que vous facés, car il faut que vous facés fonder une priouré de douze moynnes et le prieur, et les renter bien et deuement, en tel lieu qu'il plaira à madamoiselle et à son conseil, pour prier pour les ames de tous ceulx qui sont mors, tant de vostre costé que de ceulx de ce pays, comme de nos gens, qui par vostre coulpe sont peris et mors, et de ce vous fault bailler et livrer bons plaiges. Par foy, damoiseaulx, dist le roy, je l'accorde. Adoncques le roy le jura par sa foy et sur saintes Evangilles à tout ce que dist est tenir et acomplir, et en bailla bons ostages; et en firent faire bonnes chartes sellées de son sel et des seaulx de tous les barons du pays. Et ce fait, Anthoine dist au roy : Je vous rends quitte et delivre tous les prisonniers que nous et nos gens avons, et toutes vos tentes et pavillons; mais l'avoir qui est reparti entre mes compaignons ne vous pourroie rendre. Et adoncques lui fist delivrer jusques à quatre mille prisonniers, tous gens de fait et d'estat; et lors le roy s'enclina et le remercia moult humblement. Que vous feroie ores long compte? La feste commença à estre moult grande parmy Lucembourg et au chasteau. Et adoncques chascun tint à grant vaillance ce que Anthoine et son frère avoient fait au roy d'Anssay.

---

*Comment le roy d'Anssay appella les barons  
de Lucembourg à conseil.*

**L**ors appella le roy d'Anssay tous les barons du pays à conseil, et leur dist : Beaulx seigneurs, entretant que le fer est chault, on le doibt batre ; combien que j'aye esté mal vueillant de vous et de vostre damoiselle , la chose est venue certainement que je vouldroie son honneur et son pourfit et le vostre. Oyés, beaulx seigneurs : Dieu vous a envoyé belle adventure se vous la sçavez prendre en gré. Or, sire roy , puyss-que si avant avez parlé, conseillez-nous et vous plaise à dire que c'est. Par foy, dist le roy, volontiers, il fault que nous façons tant que Anthoine de Lusignen prengne vostre damoiselle à femme, et sera vostre seigneur ; et lors vous pourrez dire seurement que vous n'avez besoing ne marchissant nul si hardi qui osast prendre sus vous une poullaille sans congié. Et ceulx respondirent ainsi : Sire roy, se Anthoine la vouloit prendre , certainement nous en serons tous joyeux. Ores donc, beaulx seigneurs, laisse-moy convenir, dist le roy : car ce, dist le roy, j'en viendray à bout de ce faire. Or me attendez ung pou icy, et je m'en vois devers luy. Adonc vint le roy à Anthoine et luy dist : Sire damoiseau, les barons de ce pays vous prient moult chièrement que vous admenez vostre frère et vostre conseil en ceste chambre , car ilz ont grant desir de parler à vous pour vostre pourfit. Par ma foy, dist Anthoine, tresvolentiers ; et lors appelle son frère et les dessus dis de son conseil, et entra en la chambre ; et les barons

du pays, qui là estoient, s'enclinèrent vers les deux frères et leur firent grant honneur. Adoncques dist le roy d'Anssay : Beaulx seigneurs, ces deux nobles damoiseaux sont venus à vostre mandement ; dictes-leur pourquoy vous les avez mandé. Et ceulx luy respondirent : Sire roy, nous vous prions chièrement qu'il vous plaise à luy declarer nostre intention, car vous le sçavez mieulx et plus honnorablement faire que nous. Par mon chief, dist-il, volontiers. Et adoncques dist le roy ces parolles qui cy sont escriptes :

Anthoine, franc et noble chevalier, les barons de ceste contrée ont regardé et considéré le grant honneur que vous avez fait à leur dame, à son pais et à eulx ; et aussi ilz ont considéré que vous ne voulez rien avoir du leur, ne de leur dame ; si ont en leurmeismes considéré et advisé que, se ainsi demourroit vostre raison, elle seroit petitement gardée, et pour tant ilz vous prient qu'il vous plaise à leur accorder ung don, et ce sera sans vostre coust. Par mon chief, dist Anthoine, beau seigneur, se c'est chose que je puisse faire pour mon honneur, je le vous accorde. Par mon chief, dist le roy, dont est leur requeste passée, car ilz ne requièrent que vostre pourfit et honneur. Or dictes donc, dist Anthoine. Damoiseau, dist le roy, ilz vous vueillent donner la duchesse de Lucembourg, leur dame, qui est l'une des plus belles dames de toute sa contrée. Or, Anthoine, ne refusés pas ce noble don. Adoncques quant Anthoine l'entendit, il pensa en soy-meismes moult longuement, et aprez grant pièce il respondist : Par ma foy, beaulx seigneurs, je ne cuidoie pas estre venu en ceste contrée pour ceste querelle ; mais, puy-que je le vous ay ottroyé, je ne m'en desdiray ja.

Or soit la damoiselle mandée, car, se il luy plait, il me plait. Adoncques fut la damoiselle mandée par quatre des plus haultz barons, et, en venant, ilz luy comptèrent ceste nouvelle, dont elle fut bien joyeuse, combien qu'elle n'en fist aucun semblant. Et, quant elle vint en la chambre, elle s'enclina devant Anthoine et tous les barons aussi, et en le regardant elle se mua en une couleur plus vermeille que rose. Adont les barons la benirent moult et luy comptèrent cest affaire, et, quant la pucelle les eut ouys, elle leur respondist par ceste manière : Beaulx seigneurs, je rendz premierement grace à Dieu et à sa benoite mère, et à vous aprez, de l'onheur qui à present me survient : car si povre orpheline que je suys n'est pas digne d'estre assignée en si hault lieu que d'avoir la fleur de chevalerie et de noblesse de cristieneté; et d'autre part je sçay et congnois que vous, qui estes mes hommes, qui voies plus cler en mes besoingnes que je ne faitz, ne me conseilleriez mie volentiers chose qui ne fut à mon pourfit et honneur; je ne vous doibs ne vueil desdire, mais suys preste de obeir à tout vostre plaisir.

---

*Comment Anthoine espousa Xpistienne, duchesse de Lucembourg.*

**P**ar Dieu, damoiselle, dist chascun des barons, vous dictes tresbien. Que vous feroit ceste chose plus longuement demenée? car, à brief parler, ilz furent fiancez à grant joye, et le lendemain furent espousez, et fut la

feste moult grande et moult noble, et en furent ceulx du pays moult joyeux quant ilz sceurent les nouvelles. Et celle nuyt coucha Anthoine avecques sa femme, et fut engendré ung moult vaillant hoir, et fut appelé Bertrand, et fut la feste des neupces moult grande, et dura par quinze jours, et donna le duc Anthoine moult de beaulx joyaulx et de riches dons, et prist et receut les hommages et fiés. Et donna le roy d'Anssay congié à ses gens de retourner en leur pais, et demoura avec Anthoine à privet maisgnée pour acomplir ce qu'il avoit promis au traictié de la paix. Et alloit le duc avec son frère et le roy d'Anssay et la baronnie parmy le pays, visitant leurs villes et fortresses, et mist tout en bonne ordonnance, que chacun disoit que c'estoit ung des saiges princes qu'ilz eussent oncques mais veu. Et quant il eut visité tout le pays il retourna à Lucembourg, où la duchesse Cristienne le receut moult liement; et lors eut conseil le duc Anthoine de porter sur ses armes l'ombre d'ung lyon, à cause de sa duchié; et aussi la duchesse l'en avoit par avant souventes fois prié. Et ainsi s'en retournèrent à Lucembourg, par l'espace de deux moys, le duc, le roy et Regnauld à moult grant deduit et esbatement; et ce pendant vint ung messagier de Behaigne de par le roy Phedrich, qui estoit frère au roy d'Anssay, lequel les payens et Sarrazins avoient assiégé en la ville de Pragne.

---



*Comment le roy de Behaigne envoya ung messagier  
par devers le roy d'Anssay, son frère.*

**E**n ceste partie nous dist l'istoire que ung messagier vint à Lucembourg de par le roy Phedrich de Behaigne, qui moult estoit vaillant preud'omme, et qui moult fort avoit soubztenu la foy catholique en son temps contre les Sarrazins, le roy de Craco, et les autres rois xpistiens marchissans à luy; et pourtant luy avoient couru les Sarrazins en son pays, et n'estoit pas le roy Phedrich assez fort; et pourtant il c'estoit mis et retrait en la cité de Pragne, luy et la plus grande partie de ses gentilzhommes. Or est vray que ce-luy roy n'avoit de heritier que une seulle fille, qui avoit nom Aigentine. Et est certain que celluy roy Phedrich estoit frère du roy d'Anssay, et pourtant envoya-il vers luy à secours. Le messagier avoit esté à Anssay, et là on luy avoit dit que il estoit à Lucembourg; et, à brief parler, tant enquist le messagier qu'il trouva le roy d'Anssay et lui presenta les lettres de son frère Phedrich; et tantost il rompit la cire et les ouvrit et les lut; et par icelles il vit et congneut le meschief en quoy son frère estoit, et dist si hault que chascun le povoit oyr et entendre : Ha, ha, Fortune, comment tu es perverse et peu feable! certes l'omme est bien deceu qui en toy ne en tes dons se fie en riens. Or n'a pas gramment que du plus hault de ta roe m'as mis au plus bas, et encore ne te souffist-il mie, mais me veulz pardestruire, quant mon frère, qui est ung des prud'ommes et vaillans roys du monde, tu veulz

ainsi desemperer et debouter de son roiaulme, se Dieu par sa grace n'y mest remède. Adoncques se tourna devers le duc Anthoine, en disant : Ha, a, tresnoble et tresvaillant seigneur, or me va de mal en pis : car vostre tresnoble chevalerie et puissance ne m'a pas tant seullement maté ne amendry de mon honneur, mais avecques moy le plus preud'omme et le plus vaillant roy qui fut en toute la lignée, et qui plus vaillamment a deffendu la foy catholique contre les ennemis de Dieu. Or est ainsi que je ne le puis aulcunement secourir contre ses anemis; et ainsi sommes-nous deux roys exilliez par vostre proesse, non pas par vous, mais par ma folle emprinse; car Dieu m'a pugni moins assez que je n'ay desservi. Et lors commença à mener tel duel que c'estoit grant pitié à veoir.

Moult fut doulent le duc Anthoine quant il eut entendu les piteux regrès que le roy d'Aussay avoit fait; et adonc lui dist : Sire roy, dictes moy pour quoy vous menez si grant douel. Par Dieu, ce dist le roy, il y a bien bonne cause; et vous plaist à regarder en ceste lettre, et vous verrez la douleur et le meschief où mon frère est, auquel je ne puis aidier, ne le reconforter, car vous avez confondue ma puissance. Alors prist le duc la lettre et la lut de chief en chief, et vit le grant misère où le roy Zelodus de Craco tenoit le roy Phedrich de Behaigne, en Pragne la cité, où il n'avoit, comme disoit la teneur des lettres, nulz vivres au mains pour plus de trois ou quatre mois. Et veant le duc Anthoine le meschief où les Sarrazins tenoient le roy, si en eut grant pitié, et en luy mesmes dist en son cœur que pas ne demourera en cestuy party, et que les Sarrazins achetteroient la paine qu'ilz font souffrir aux

xpistiens. Et lors dist au roy : Sire roy, se je vous vouloie aidier à secourir vostre frère, y voudriés vous point aller ? Et quant le roy entendist ceste parolle, il se jetta à genoulx en disant : Sire, se vous me voulez faire ceste grace, je vous jure que je feray Regnauld vostre frère roy de Behaigne aprez le decès de mon frère le roy, qui est aîné de moy prez de vingt ans : car sachiés que mon frère n'a hoir, fors seullement une belle fille, qui a nom Aiglentine, et a environ xv ans ; et celle donneray-je, se il vous plaist, à Regnauld, vostre frère. Par foy, dist le duc, et je l'accorde. Or vous en allez en Anssay, et faictes vostre mandement ; et soiez cy dedens trois sepmaines, et vueillés logier là en ces prez, en vos tentes qui encores y sont ; et entretant je manderay mes gens qui sont en la guerre avecques ung mien chevalier en la leffe où on lui avoit fait tort. Et le roy luy respondist : Sire duc, celluy le vous merite qui souffrist mort et passion. Et adoncques print congié du duc et de la duchesse, de Regnauld et de toute la baronnie, et monta à cheveu, et s'en erra avecq sa mesnie tant comme il a peut vers son pays d'Anssay, dolent de sa perte, et joyeux du secours que le duc Anthoine luy promist à faire pour secourir le roy Phedrich, son frère, qui guerroyoit contre les mauvais Sarrazins.

La vraie histoire nous tesmoingne que tant chevaucha le roy d'Anssay qu'il vint en son pays, où il fut moult bien venu de sa baronnie, et s'en alla tantost veoir Metidée, sa fille, qui n'en avoit pas deux ans accomplis ; et aprez il retourna avec ses barons, et leur compta tout son affaire, et comment il luy convenoit aller secourir son frère, et comment le duc Anthoine et Regnault, son frère, le iroyent

aidier à secourier son frère à toute leur puissance. Par foy, disdrent les barons, dont ne peut-il estre que la besoingne ne se porte bien : car encontre leur effort ne pourront paiens contrestre. Or vous delivrés, sire, de faire vostre mandement, car nous irons tous avecques vous. Lors fist le roy son host semondre et mander par tous ses amis et ses alliez ; et en pou de temps assembla bien de six à sept mille combatans, et se partist de son pais, et y laissa bon gouverneur ; puis erra tant que, au bout de trois sepmaines, il se loga devant Lucembourg, en la prarie et tentes qu'il y avoit laissées ; et les gens du duc Anthoine, qui estoient revenus de la guerre où ilz estoient allez ; et tant qu'ilz furent en nombre cinc mille bassines et mille cinc cens arbalestriers et archiers assemblez, sans compter ceulx de la duché, qui furent deux mille ; mais, non obstant, il n'eut pas voulu mener que mille, et laissa le remanant pour garder le pays, et leur recommanda la duchié, et aussi à ung baron de Poetou, nommé le seigneur Dargemon.

---

*Comment le duc Anthoine prinst congié de la  
duchesse Cristienne et s'en alla vers Pra-  
gne avec son ost.*

**E**n ceste partie nous dit l'istoire que, quant le duc Anthoine print congié de la duchesse, qu'elle fut moult doulente ; mais elle n'en osa montrer samblant ; toutesfois elle le pria de revenir au plus tost qu'il pourroit, et il lui dist que si feroit-il, et luy dist

oultre : Duchesse , pensez bien de vous et de vostre fruit ; et se Dieu , par sa grace , donne que ce soit ung filz , faictes-le baptiser , et vueil qu'il soit nommé Bertrand. Et la duchesse lui dist : Monseigneur , à vostre plaisir. Lors se entrebaisèrent , et partist le duc , et vint à ses gens , et fist sonner ses trompettes. Adoncques se desloga l'ost et se mist à cheval. La peussés oyr grant effroy de gens et de chevaux . Adoncques l'avant-garde chevaucha , laquelle conduisoit le roy d'Anssay et Regnauld de Lusignan , qui estoit monté sur un hault destrier liart et armé de toutes pièces , excepté du bassinet , et tenoit ung gros baton au poing , et ordonnoit ses gens moult bien ; et sembloit prince de hault cœur et de haulte entreprinse ; et aprez l'avant-garde venoit le sommage et la grosse bataille ; et puis alloit l'arrière-garde , que le duc Anthoine faisoit : car on lui avoit dit qu'en celluy pays avoit grans robeurs et larrons ; mais le duc leur manda de fort en fort que , se ilz estoient si hardis de prendre riens sur luy ne sur ses gens , qu'il en feroit telle justice que les aultres s'en chastiroient. Et en ce parti passa toute la leffe qu'il n'y eut homme si hardi de riens prendre sur son ost. Or est vray que une nuycrée il se loga devant Ays atout son ost ; et luy firent les bourgeois de la ville de moult riches dons , dont Anthoine les mercia moult , et leur offrist son service , se mestier en avoient. Et le lendemain , aprez la messe , il se desloga , et erra tant qu'il se logea sur le Rin , qui est une moult grosse ripvière et merveilleuse ; et firent ceulx de Coulongne grant dangier de laisser passer l'ost parmy la cité au pont.

Anthoine adonc fut moult doulent quant il sceut que ceulx de Coulongne faisoient grand dangier de

luy et de son host laisser passer par la cité. Adonques leur manda fierement comment il avoit en son intention de lever le siège que le roy de Craco avoit mis à soixente mille Sarrazins devant la cité de Pragne, et par ce moyen avoit assiegé le roy de Behaigne, qui estoit dedens; et que ilz luy mandassent se ilz estoient de la partie des Sarrazins, et il auroit sur ce advis que il feroit; et aussi que malgré eulx il trouveroit bien bon passaige, mais non pas si brief que par leur ville, et que, se il s'eslonguoit d'une journée, qu'il sçavoit bien comment ilz lui feroient retour de quatre. Et quant ceulx de Couloingne oyrent ce mandement et furent bien informez de la fierté des deux frères, ilz eubrent grant doute, et tantost envoièrent par devers le duc Anthoine quatre des plus notables bourgeois de la cité, qui moult humblement luy firent tresgrande reverence, et furent moult esbahys de sa fierté et contenance. Non obstant ilz lui disdrent en ceste manière : Tresnoble et puissant seigneur, les bourgeois de la cité de Coulongne nous ont envoie par devers vous; et saches qu'ilz vous laisseront volontiers passer paisiblement parmy la cité de Couloingne, par ainsi qu'ilz soient seurs que vous ne leur laisserez porter dommage de vous ne de vos gens. Par ma foy, dist Anthoine, se je eusse eu volenté de leur porter contraire, je leur eusse fait à sçavoir; et aussi je n'ay pas cause de ce faire, car je ne sçay pas que ilz m'aient riens meffait, ne aux miens aussi; combien qu'ilz me font penser qu'ilz m'aient meffait ou que je leur aye meffait, que jamais je n'eusse pensé se empeschement ne moy eussent mis. Allez, et leur dictes se ils ne sentent de viel temps aulcun meffait devers moy ou devers les ducs mes predecesseurs,

dont ilz n'aient eu ou fait accord, qu'ilz me laissent seurement passer, sinon qu'ilz le me facent assavoir. Quant ilz entendirent la parolle, ilz prindrent congïe, et annoncèrent aux bourgoys le mandement du duc. Et ceulx assamblèrent leur conseil et les anciens, ettrouvèrent que jamais n'avoient eu discord aux ducs de Lucembourg, ne à leurs amis ne aliez, et que, puy's qu'il estoit si vaillant et si notable homme, qu'ilz le laisseroient passer; et luy remandèrent ces nouvelles, et avec ce lui envoièrent moult de beaulx dons, tant d'avaine comme de pain, grant foison de vin, chars et vitaille à grant foison. Et quant le duc Anthoine ouyt la response et vit leurs grans presens, il les mercia moult, et fut bien joyeux quant ceulx de la ville de Coulongne vouloient estre leurs amis, et leur dist que quand ilz auroient de luy besoing, luy et son pouvoir seroit en leur commandement; et ceulx l'en remercièrent moult humblement. Et le duc Anthoine fist donner à ceulx qui avoient amené les presens de moult riches dons, qui autant ou plus valloient que les presens et dons à luy faitz de par la ville: car il ne vouloit pas que les habitans d'icelle ville pensassent qu'il vouldist rien avoir du leur. Si luy tourna à grant vaillance, et ainsi demoura celle nuyt.

En ceste partie nous dist l'istoire que ceste nuytée sejourna l'ost devant Couloigne; et fut moult bien aisé et refrechi des biens de la cité: car le duc les fist partir tant que chascun en eut largement. Et le lendemain bien matin le duc entra en la ville atout deux cens hommes d'armes, et fist crier sur paine de la hart que nul ne fut si hardi de riens prendre en la ville sans paier. Adonc passa l'avant-garde en belle ordonnance, et disdrent ceulx de la cité que oncques



mais n'avoient veu gens d'armes en si belle ordonnance, et après passa le sommage, et se logèrent de là la rivière tout au long de l'Eire; et fut bien heure de vespres avant que tout le sommage fut passé. Celle nuyt se loga le duc en la cité, avec luy de ses haultz barons de l'arrière-garde, où on luy fist grant honneur, et donna à soupper aux dames et aux damoiselles de la ville, aux bourgeois et à plusieurs gentilz hommes, chevaliers et escuiers qui demouroient en la cité, et après soupper commença la feste, qui fut moult grande. Et, au departir, il n'y eut dame ne damoiselle à qui le duc ne fist donner ung beau joyau, selon ce qu'il lui sambloit que la personne le valloit; et aussi fist il à aucuns des bourgeois, et par especial à tous gentilz hommes, et acquist tellement l'amour d'eulx qu'ilz voulsissent bien qu'il fut leur sire.

Le lendemain passa la grosse bataille, et puy passa l'arrière garde en belle ordonnance, et se logèrent oultre le Rin, et prist le duc congïé de ceulx de la ville, et moult les mercia de l'onneur qu'ilz lui avoient fait. Et ceulx lui respondirent tous d'une voix : Noble duc, la cité et nous tous sommes prestz à vostre commandement plus qu'à nul aultre seigneur que nous aions marchissant à nous; et ne nous espergnés pas de chose nulle que nous puissions faire pour vous, car nous en sommes tous prestz maintenant et autres fois. Et se partist d'eulx, et alla en sa tente, et le lendemain, ainsi que le duc partoît de la messe, et qu'il faisoit tromper pour desloger, et que quant l'avant garde c'estoit mise à chemin, vindrent quatre chevaliers de la cité bien montez et bien armez, excepté de bassines, qui descendirent devant le logis du duc, atout quatre cens hommes d'armes

et cent arbalestriers qui les sievoient. Adonc les chevaliers saluèrent le duc, et puis lui disdrent : Tres-noble et puissant duc, la cité de Couloigne se recommande à vostre bonne grace, et, sire chevalier, pour la grant noblesse qu'ilz ont veu en vous, ilz desirent tous temps estre vos bons amis, et puys que vous les ayés pour recommandez; ilz vous envoient quatre cens hommes d'armes et cent arbalestriers d'estoffe, paieez pour huyt moys, pour aller avecques vous partout où vous voudrez et où il vous plaira. Par mon chief, dist le duc, tresgrans mercis, et vous soyez le treshien venu; ceste courtoisie n'est pas à refuser; et sachiés que je ne le oubliray pas en temps et en lieu. Sire, dist l'ung des chevaliers, il n'y a nul de nous quatre qui ne sache tous les chemins d'icy en Craco, et, se mestier est, nous vous guiderons bien et seurement par tous les desrois, passages et ripvières. A ce respond le duc et dist : Cecy n'empire pas nostre affaire, et je n'y renunce pas quant il sera temps. Lors les fist mettre en ordonnance et les receipt pour estre soubz sa banière. Et lors se desloga l'avant-garde, la grosse bataille et l'arrière garde, et errèrent tant par leurs journées qu'ilz vindrent et entrèrent en Bavière, auprez d'une grosse cité appelé Nueremich, où estoit le duc Ode atout grans gens : car il se doubtoit du roy Zelodus de Craco, qui estoit assiegé devant le roy Phedrich de Behaigne, qui tenoit en grant necessité : car il avoit bien avec luy quatre vingz mille payens, et se doubtoit moult fort le duc Ode que le roy Zelodus ne luy venist courir sus se il soubzmettoit le roy Phedrich, et pour tant avoit-il assamblé son conseil assavoir mon qu'il pourroit faire.

Lors vint ung ancien escuier qui estoit au duc Ode,

et luy dist : Monseigneur, par l'ame de moy, je viens de devers les marches d'Allemaigne, mais il s'avalla pour venir cy ung grant seigneur, et mainne les plus beaulx gens d'armes que oncques mais je veisse, et ne sçay où il se veult traire, fors qu'il tire le chemin pour venir cy. Par foy, dist le duc, je me donne grant merveille quieulx gens ce sont; se le roy d'Anssay n'eut esté l'aultre jour desconfi devant Lucembourg, je pensasse que ce fut il qui allast aidier au roi Phedrich, son frère, contre les Sarrazins; et, par mon chief, se ce fut il, je allasse avec luy pour le secourir. Monseigneur, dist l'escuier, il seroit bon d'aller sçavoir quieulx gens ce sont, ne se ilz vous vueillent aultre chose que bien. Dan escuier, dist le duc Ode, aller vous y convient, puis que vous les avez veus, car c'est bien droit. Et celuy respondist : Par ma foy, monseigneur, je suys tout prest, et à Dieu vous commant. Et tantost s'en partist; et tant erra qu'il apperceut l'ost au font d'une vallée sur une rivière, et vit les cuisines, les chevaulx fouier, et les coursiers hanir; là veoit gentilz hommes par trepeaulx, avec la barre de fer et la lance avec la tarde. Les autres esprouvoient leurs harnois de trait, de jet d'espée, et d'aultres fortz exercices. Par mon chief, dist l'escuier, vecy bonne contenance de gens d'armes; ils ne sont pas apprentifz de leur mestier. Telz gens sont fort à doubter. Lors regarda à destre sur une petite montaigne où il y avoit bien cinq cens hommes d'armes, et vit le guet et les coureus destournez tout en l'entour de l'ost. Par foy, dist l'escuier, qui moult avoit veu en son temps, ce sont gens d'armes à droit conquerer. Lors entra en l'ost et demanda celluy qui avoit le gouvernement de l'ost, et tantost il y fut mené; et, quand il vint devant Anthoine,

il fut moult esbahi de sa fasson , et toutesfois le salua moult courtoisement, et puyz luy dist : Monseigneur , le duc Ode de Bavière m'envoye par devers vous à sçavoir que vous querez en son pays , et se ne luy voulez que bien ; et aussi qui vous estes qui menez si belle compaignie que je vois cy assemblée : car il sçet bien que vous n'allez mie en telle route que vous n'ayez bien affaire. Amis, dist Anthoine, dictes à vostre seigneur que nous ne luy voulons que bien ne à son pays ; et luy pourrez dire que c'est le roy d'Ans-say , Anthoine de Lusignen , duc de Lucembourg , et Regnauld son frère , et plusieurs autres barons , chevaliers et escuiers , qui allons secourir le roi Phedrich de Behaigne , qui est assiegé des Sarrazins. Sire, dist l'escuier, Dieu vous doinct faire bon voiage par sa sainte grace , et à Dieu vous commant ; je le vois dire à monseigneur. Allez en la garde de Dieu , dist Anthoine. Et lors se departist l'escuier, et revint en la cité, et recorda au duc tout ce que vous avez ouy , de mot à mot , et la fierté d'Anthoine , et la fasson et gouvernement de l'ost , et commença à dire : Sire, certainement ceulx sont les gens que je vis oncques qui mieulx sont à priser et à doubter. Par mon chief, dist le duc , il meut de grant honneur et vaillance à ces deux frères de venir de si loing pays pour querir les adventures, et leur vient de grand bien de venir secourir le roi Phedrich contre les ennemis de Jhesucrit. Et je prometz à Dieu que ce ne sera sans moy , car il me seroit tourné à grant honte se je n'y alloye, attendu qu'il est mon cousin , et que ma terre marchist si prez de son pays et royaulme , et que les estrangiers le viennent secourir de si loing pays. Et pour lors avoit fait son mandement le duc Ode , et avoit jà de trois à quatre mille combatans. Que vous

feroye ores long compte ? L'ost se desloga et passa par-devant Nurmich ; et lors le duc Ode saillit à belle compagnie de gens , et se vint presenter au roy d'Anssay et à Anthoine , et à son frère , luy et ses gens , qui le receurent moult liement , et ainsi chevaucha l'ost ensamble par l'espace de six jours. Et cy se taist l'istoire de plus parler d'eulx , et parle du roy Phedrich et du siège.

En ceste partie dist l'istoire que la puissance du roy Zelodus de Craco fut moult grande , et n'osoit pas bonnement sallir le roy ; et toutesfois fist-il mainte saillie sur les Sarrazins, où il les greva moult , et y eut mainte grosse escarmouche , et presque tous les jours estoit la meslée à la barrière ; et avoit en la cité environ cent bassines de Hongres qui estoient moult vaillans chevaliers , et sailloient souvent , et escarmouchoient l'ost , et leur portoient moult grant dommage. Or advint par ung matin que les Sarrazins vindrent escarmourcher , et ceux de la ville avallèrent le pont et ouvrirent portes et barrières , et saillist le roy tout armé à moult belle compagnie , et y eut moult grant occision des payens , et les reboutèrent jusques à leur logis ; à celle heure estoit monté le roy de Craco sur ung fort destrier , sa banière au vent , accompagné de bien quinze mille Sarrazins , et s'en vint en moult belle ordonnance vers la bataille ; là eut maint coup donné et receu , et par force convint nos gens reculer jusques aux barrières. Là eut grant mortalité et occision d'ung costé et d'aulture , car le roy Phedrich reconfortoit moult ses gens. Et quant il apperceut le roy Zelodus qui faisoit moult grant lommage de ses gens , il ferist le cheveu des espions ; et prinst l'espée au poing , et ferist le roy sarrazin sur le heaulme par telle vertu et par telle force

qu'il l'embrocha sur le col de son chevan , et pou faillist qu'il ne le versast par terre ; car il perdist les deux estriers ; mais ses gens tantost le secoururent , et le dressèrent en estant. Et le roy Phedrich ferist ung payen par telle force qu'il l'abbattist tout mort par terre. Le roy de Craco fut revenu à luy, qui tenoit une archegaie dont le fer estoit moult trenchant et agu , et vit que le roy Phedrich moult dommagoit ses gens ; il s'approucha de luy, et escouist l'archegaie, et la laissa aller vers le roy par telle vertu qu'il le percha de part en part. Et, ce fait, le roy Phedrich, qui sentist la detresse de la mort, ne se peut plus tenir, mais reversa par terre tout mort. Adonc furent ses gens moult doulens , et entrèrent en la cité , et levèrent le pont et fermèrent la porte. Lors commença la douleur moult grande parmy la ville.

---

*Comment le roy de Craco fist prendre le corps du roy Phedrich, qui avoit été tué, et le fist ardeoir.*

**L**e roy de Craco fist prendre le corps du roy Phedrich tout mort, et le fist ardeoir devant la porte pour plus esbahir ses gens et ceulx de la cité. Quant ceulx de la cité sceurent la mort de leur roy, ilz furent moult doulens et esbahis , et firent moult grant doeul de luy tous , et par especial la pucelle Aiglentine , sa fille, menoit tel doeul que c'estoit grant pitié à veoir, et disoit telles parolles ou samblables : Ho Dieu , qui me pourroit reconforter quant je vois la mort de mon père devant moy, et la destruction de mon

peuple et de moy, ne je ne vois pas lieu dont secours me peüst venir? car j'ay oy dire que mon oncle le roy d'Anssay, où je me fioye plus qu'en aultre du monde, a esté desconfit devant Lucembourg; vray Dieu! or ne me sçay-je mais où attendre, fors tant seullement à vostre benigne grace. O tresnoble et puissante et tresexcellente royne, mère de Dieu, salvateur de tout le monde, vueillez reconforter ceste povre orpheline, et la vueillés garder en vostre sainte pitié et misericorde, en telle manière que ces faulx payens n'aient nulle puissance sur mon corps. Et en ce disant demainoit celle pucelle telle douleur que c'estoit grant pitié à veoir; et destor- doit ses mains et arrachoit ses chevelx. Qui eut veu l'angoisse qu'elle sentoit, il n'a si dur cœur au monde qui n'en eut pitié; et ses dames et damoiselles la reconfortoient le plus qu'elles povoient; mais en son doeul n'avoit point de fin. Et ceulx de la cité estoient tous esbahis tant de la mort de leur seigneur que de la doubte des Sarrazins, qu'ils ne sçavoient que faire d'eulx rendre salves leurs biens: car le roy Zelodus les faisoit fort requerir, et leur faisoit remonstrer comment ilz ne se povoient bonnement tenir contre le povoir des Sarrazins; et que, se il les prenoit par force, qu'ilz y auroient jà renson, fors tous d'estre brulez en pouldre, dont la cité fut en grant ballance de soy rendre; mais il n'y avoit de preud'ommes chevaliers qui moult avoient amé le roy, et pour ce ilz amoient la pucelle, sa fille, qui leur disoient: Faulces gens, que voulez-vous faire? Encores n'est pas venu le messagier qui est allé querir secours vers le roy d'Anssay; prenez cœur en vous, car vous aurez en brief bonnes nouvelles, se Dieu plait. Et quant ceulx l'oyrent ainsi



parler, ils respondirent au conseil des Sarrazins que ilz ne se renderoient point, et qu'ilz estoient tous reconfortez contre leur puissance. Adoncques, quant le roy Zelodus le sceut, il en fut moult couroucé, et jura par ses dieux que il les feroit tous ardoir en pouldre; mais en peu d'heure Dieu labeure; et aussi tel jure de son marché qui puy le laisse. Non obstant Zelodus fist ainsi comme vous aprez oyrez.

Le roy Zelodus fut moult couroucié de la response, et adoncques il fist escarmoucher et assaillir la cité, et la greva de son povoir. Ceulx qui estoient dedens lentement et lachement se deffendoient pour la grant paour qu'ilz avoient; et, se ne fut la doubte des nobles du pays qui là estoient, ilz se fussent rendus salves leurs vies. Or vous diray du duc Anthoine et de Regnauld, son frère, du roy d'Anssay et du duc Ode de Bavière, qui amenoient leur ost moult hativement: car bien avoient oy dire la misère où estoient ceulx de la cité; mais pas ne sçavoient de la mort du roy Phedrich. Ung jeudi au soir s'en vindrent loger sur une ripvière, environ une grosse lieue et demie de Pragne, et celluy soir fut commandé à ung chevalier du pays, qui estoit en leur compaignie, qu'il allast le lendemain noncer leur venue en la cité. Et celluy monta le lendemain matin à cheval et s'adressa vers la ville; mais le roy Zelodus avoit fait armer ses gens et faisoit fort assaillir la cité, car grant desir avoit de la prendre, et ceulx de dedens se deffendoient lachement, et bien le appercevoient les Sarrazins; et pour ce ilz assailloient tant plus vigoureusement. Et fut la besoingne mal allée quant l'ancien chevalier vint, qui bien apperceut la besoingne et la faible deffense de ceulx de dedens. Adoncques acheva l'assault, et

vint à une petite poterne, et hurta ung petit, et appella; et tantost ceulx de la garde le congneurent bien et le laissèrent entrer dedens. Et tantost qu'il fut entré, il courut parmy les deffences, criant en ceste manière : Seigneurs, deffendez-vous bien : car vecy la fleur de chevalerie de cestuy monde qui vous vient à secours avec le roy d'Anssay ; et les verrez tantost commencer la bataille, et faictes bonne chièrè, car, par mon chief, jà Sarrazin n'en échappera qui ne soit mort ou pris. Et quand ils l'entendirent, ilz jettèrent ung cri si treshault que c'estoit merveilles à oyr, en disant : Loué en soit nostre Seigneur le doux Jhesucrist. Et adoncques s'emploierent moult fort à deffendre, par telle manière que mal soit de Sarrazin qui oncques puyt attendre ne demourer auprez des murs. Et à celluy assault et deffence demoura aux fons des fossez grant foison de Sarrazins mors et affollez. Et quant le roy Zelodus apperceut que ceulx de la cité avoient reprins si grant cœur, il en fut moult esmerveillé et dolent, et tant qu'il ne sceut que penser : car il les veoit de si grant deffense qu'il n'y avoit si hardi Sarrazin qui se osast approuchier, mais s'en partoient et reculoient arrière.

Et quant le roy Zelodus apperceut que ses gens reculoient ainsi, il en fut moult dolent, et en eut grant merveilles pourquoy ceulx de dedens avoient pris si grant cœur en eulx ; mais il sera plus couronné tantost que devant : car le duc Anthoine chevaucha moult hardiement en belles batailles, les manières desploiez ; et avoit fait laisser les logis tous loïs et bien cinq cens hommes d'armes pour les garder. Et estoient le roy d'Anssay et le duc de Bavière en l'arrière-garde, et Regnauld et Anthoine en

la première bataille. La veissiés moult belle compaignie, banières ventiler au vent, bassines, harnois de jambes, l'or, l'azur et les couleurs des banières et des panons resplendir contre le soleil. Et tant chevauchèrent en ordonnance qu'ilz virent la cité que les Sarrazins assailloient moult durement, et veoient leurs tentes et leurs pavillons, où il y avoit moult grant foison de Sarrazins. Adoncques fist arrester Anthoine ses gens, tant que l'arrière-garde fut venue, et ordonna sur les elles archiers et arbalestriers; et lors furent apperceus des Sarrazins, qui l'allèrent dire au roy Zelodus en ceste manière : Sire roy, laissez l'assault que à mal heure a esté commencé. Sachiés que tant de cristiens viennent que les champs en sont couvers. Adoncques, quant le roy entendist ces nouvelles, il fut moult couroucé, et laissa l'assault, et vint au dehors de son logis, et ordonna ses gens et ses batailles au mieulx qu'il peut. Et Anthoine et Regnauld firent sonner leurs trompettes et firent aller la bataille tout le petit pas. Et quand ilz furent approuchez de leur ost, là eut grand effroy; et à l'aprochier fut moult grande la tourble; et y en avoit là de telz qui eussent bien voulu estre dont ilz estoient venus. Car à la baisser des lances eut moult grant foison d'abatus d'ung costé et d'autre, et en y eut de mors et de navrez grant foison; et aprez tirèrent les espées, et firent l'ung l'autre moult durement sans aucune pitié. Là eut maintz Sarrazins mors et abatus par terre; moult bien se esprouvoient Poetevins, et faisoient grant occision de Sarrazins; mais le roy Zelodus cria son enseigne moult haultement, et joindist l'escu au pis, et brandist la lance, et brocha le cheveu des esporons, et au dos le sievoient dix mille Sarrazins. Et adont il

baissa sa lance et ferist ung cristien par telle force qu'il luy mist le fer et panon parmy le corps, et l'abbatit tout mort par terre, et ses gens le sievoient au dos, qui moult vaillamment se portoient, et firent grant dommaige aux cristiens, et les reculèrent le get d'une lance. Adoncques cria le roy Zelodus son enseigne : Seigneurs barons, frappez oultre ; la journée est nostre , car ilz ne nous peuvent eschapper. Et les Poetevins les recevoient moult asprement. Et sachiés que là eut grant perte d'ung costé et d'aulture. Lors vint le duc Anthoine , l'espée au poing ; et quant il apperceut ses gens reculer, a pou qu'il ne mouroit de doeuil, et escria Lusignen à haulte voix, et se bouta entre Sarrazins plus roidement que fouldre qui chiet du ciel, et frappoit à destre et à senestre, et abbatoit tout ce qu'il encontreit devant luy ; et ses gens le sievoient au dos, qui estoient tous esbahis de ce qu'ilz lui vcoient faire ; car il n'y avoit si hardi Sarrazin qui l'osast attendre, ainçois se reculoient vers leurs tentes. Et ce voiant le roy Zelodus s'escria : Avant, seigneurs et barons, deffendez-vous. Comment, est-ce que pour ung homme seul vous vous enfuyez ? C'est moult grant honte à vous. A ces parolles il rallia ses gens, et rendist estact à Anthoine et aux Poetevins moult bataillereusement. Lors vint l'admiral a tout dix mille combatans. Adoncques refforcha la bataille moult horrible. Là eubt moult de Sarrazins occis et affollez.

---

*Comment le roy de Craco fut occis en la bataille.*

**A**prez vint l'arriere-garde , que le roy d'Anssay et le duc Ode menoiert , qui se ferirent moult vigoureusement en la bataille ; là eut grant occision , car ilz enduroient bien les faitz d'ung costé et d'autre. Et sur ce arrivèrent Anthoine et Regnauld , qui se ferirent d'ung accord entre les Sarrazins , et faisoient telle occision qu'il n'y avoit Sarrazin ne cristien qui ne s'esmerveillast des merveilleux coups qu'ilz donnoient , et en la parfin il n'y eut si hardi Sarrazin qui les osast attendre , et partout où ilz les veoient , ils les fuyoient ; et les cristiens faisoient tous si bien que Sarrazins eussent tourné le dos , se ce ne fut le roy Zelodus qui moult vaillamment les tint ensamble. Et sachieés qu'il fit moult grant dommaige aux cristiens , ravigora ses gens par tel parti que ilz se deffendirent moult fort. Et quand Regnauld aperceut le roy Zelodus qui ainsi rendoit estat à ses gens et menoit la bataille si tresvaillamment qu'il n'y failloit riens , il jura à Jhesu Crist qu'il mourroit en la paine ou il delivra la place des Sarrazins. Lors tourna la targe derrière et brocha le cheveu par grant hair , et alla plain cours vers le roy de Craco. Et quant le roy le vit venir , il haulsa l'espée et le ferit sur le heaulme de toute sa force ung moult rude coup ; mais l'espée glissa contre val sur le senestre costé de la cuisse , et le blessa tellement que le sang lui courut aval jusques à ses tallons. Et Regnauld , qui fut moult doulent , leva l'espée à deux mains et ferist le roy Zelodus par grant hair sur le bassinnet

si grand coup qu'il fut tout estourdi, et tant que l'espée lui vola du poing, et s'enclina sur le col de son cheveu et rompit par force la couroye du bassinet. Et adonc Regnauld le ferist et le cherga tant de coups qu'il le convint cheoir par terre, et tantost eut sur luy moult grant foule de gens et de chevaulx; mais ses gens le vindrent secourir d'entre les piés des chevaux, et ne le seurent aidier. Et quant Sarrazins le sceurent, ilz tournèrent en fuyte, et nos gens les sievoient asprement, et les occisoient parmy les champs, et parmy les boissons, et sachiez qu'il en eschappa bien peu, et ainsi fut la bataille finée. Et ce fait, les cristiens se logèrent ès tentes des Sarrazins; les deux frères, le roy d'Anssay, le duc Ode, se partirent à tout cent chevaliers, et s'en allèrent vers la cité, où ilz furent liement receups, car les citoiens avoient grant joye de la victoire qu'ilz avoient eue contre les Sarrazins. Adoncques vindrent au palais, où ilz entrèrent en la chambre; lors vint la pucelle Aiglentine à l'encontre de son oncle le roy d'Anssay.

---

*Comment le roy Zelodus et les aultres Sarrazins furent ars et brulés.*



Aiglentine la pucelle adonc fut moult lie de la desconfiture des Sarrazins, et aussi de la victoire et de la venue de son oncle; mais non obstant elle avoit si grant douleur au cœur de la mort de son père, qu'elle ne le pouvoit oublier; et neantmoins, quant elle approucha

de son oncle, si s'enclina et le bien viengna moult doucement en disant : Mon treschier oncle, vous soiez le tresbien venu ; pleut à Dieu que vous fussiés arrivé deux jours plus tost ; vous eussiés trouvé mon père en vie, que Zelodus a fait occir, et puy l'a fait bruler, pour plus vituperer la foy catholique. Et quant le roy l'entendit, il fut moult dolent, et jura Dieu et ses saintz que autant en feroit faire du roy Zelodus et de tous ses Sarrazins qu'il pourroit trouver, mors ne en vie. Et adoncques fist-on crier par la cité que de chascun hostel allast ung homme sur les champs pour assembler les mors sarrazins sur une montaigne, et que on y portast grant foison de bois pour ardoir les corps. Et ainsi fut fait, et fut le corps du roi Zelodus mis au dessus, et furent tous couvers de bois ; et fut mis le feu dedens, et furent tous les paiens ars ; et les corps des cristieus qui furent trouvez mors, ensevelis et mis en terre sainte. Et ces choses faictes, le roy d'Anssay fist appareiller pour faire l'obsèque du roy Phedrich son frère, et moult honnourablement, comme vous pourrez cy aprez veoir.

En ceste partie nous dist l'istoire que moult fut le roy d'Anssay dolent de la mort de son frère ; mais le doeul lui convenoit passer quant il estoit venu de la volenté de Dieu ; l'appareil fut fait pour l'obsèque, lequel fut en la grande eglise de la cité ; il monta à cheveu, avec luy le duc Ode de Bavière et pluseurs aultres barons de Behaigne, et s'en allèrent tous vestus de noir aux tentes qui avoient esté aux Sarrazins, où les deux frères estoient logez, et eubrent fait venir le sommaige et ceulx qui gardoient les logis, et fait tendre à ung des costez de l'ost. Et adoncques departirent les deux frères l'avoir à chascun, tant grans que petis ; et n'y eut celluy qui ne



se tenist bien païé. Adoncques vindrent le roy , le duc Ode , et toute la baronnie , qui moult humblement saluèrent les deux frères , et les frères les receurent moult joieusement. Adoncques compta le roy d'Anssay aux deux frères comment le roy Phedrich avoit esté occis en la bataille , et comment le roy Zelodus avoit fait ardoir le corps , en despit de toute cristienneté ; et pour ce avoit-il fait ardoir le roy Zelodus et tous les aultres Sarrazins. Or dist Anthoine : Par mon chief , vous avez tresbien fait. Et vraiment le roy Zelodus feist moult grant mesprison et grant cruauté ; car puy que ung homme est mort , c'est grant honte à son ennemi de le plus touchier. Par foy , syre , dist le duc Ode , vous dictes verité ; mais le roy d'Anssay est cy venu pour vous et Regnauld vostre frère prier de venir à l'obsèque du roy Phedrich son frère , qui jà est tout prest de commencer ; les pseaulmes et vigilles furent dès le soir dictes ; et lors respondirent les deux frères : Nous irons volentiers. Adoncques montèrent à cheval à moult belle compaignie , et vindrent en la cité. Dames et damoiselles , chevaliers , escuiers , bourgeois et gens d'estat et communes les regardoient volentiers à merveilles , et estoient moult esbahis de la griffe du lyon que Anthoine avoit sur la joe , et louoient moult le beau corps et membres qu'il avoit , et aussi de Regnauld son frère , et disoient entre eulx : Ces deux princes sont moult bien taillez de conquerir et tenir moult de terres et de seigneuries en moult de divers pays et maintes diverses contrées ; et en ce parti vindrent à l'eglize , et descendirent illec.

---

*Comment les deux frères furent à l'ensevelissement  
et obsèque du roy Phedrich.*

**A**iglentine, qui estoit à l'encontre de l'eglize, moult humblement fist la reveren-  
ce aux deux frères, et les mercia moult  
humblement du noble secours qu'ilz lui  
avoient fait, car aprez Dieu ilz luy avoient gardé  
son honneur, sa vie et son pays. Et adoncques An-  
thoine luy respondit moult humblement : Damoi-  
selle, nous n'avons rien fait fors ce que nous devons  
faire, car tous bons cristiens sont tenus et obligez  
selon Dieu de destruire et opprimer les ennemis de  
Jhesucrist. Et adoncques la prindrent les deux frè-  
res par les deux lets et la dressèrent moult humble-  
ment en siège. Là estoit la pucelle moult noblement  
acompaignée de dames et damoiselles du pays. L'ob-  
sèque fut fait et les chevaulx offerts comme il appar-  
tenoit à ung tel et si noble roy qu'il estoit. Et aprez  
le service, les deux frères montèrent à cheveu et  
leur mesnie. Le roy d'Anssay et le duc Ode con-  
duirent la pucelle jusques au palais et descendirent;  
et aprez montèrent ensamble en la salle; et adonc le  
disner fut prest; ils lavèrent leurs mains, et puis  
s'assirent et furent moult bien servis; et aprez les  
nappes ostées ilz lavèrent, et furent graces dictes.  
Adoncques la damoiselle fut convoiée en sa cham-  
bre, qui fut moult dolente de la mort de son père.  
Et adoncques appella le roy les barons du pays et  
leur dist ces parolles :

Seigneurs barons, dist le roy; il vous fault entre  
vous adviser comment vous ayez en vous ung vail-

lant homme pour gouverner le royaume de ma niepce ; car terre qui est en gouvernement de femme est peu de chose. Or regardez qui sera bon au prouffit et à l'onneur de ma niepce et de vous. Adoncques respondit ung pour tous les aultres : Sire roy , nous ne sçavons homme qui devant vous s'en doibve mesler, car se vostre niepce Aiglentine estoit allée de vie à trespasement, toute la terre et le royaume de Behaigne escherroit à vous ; si que pourtant nous vous en chergons, et en faictes à vostre voulenté, car c'est bien raison. Adoncques respondist le roy et dist ainsi : Par mon chief, pour le plus brief, il faut marier ma niepce ; or luy querez ung mary qui soit bien digne de gouverner son royaume ; car quant est de moy, j'ay assez pays à gouverner ; et pourtant je ne vueil mic avoir le gouvernement de cestuy cy. Adoncques les barons respondirent tout prestement : Sire roy, se il vous plaist que vostre niepce soit mariée, si luy querez ung bon mari tel qu'il vous plaira ; car par dessus vous il n'y a homme qui s'en meslast. Et quant le roy entendit ce , il respondist en ceste manière : Et nous y pourvoierons à son honneur et prouffit et au vostre aussi, bien prochainement, et je m'en vois parler à elle pour celle meisme cause. Adoncques les barons respondirent : Sire, Jhesucrist le vous vueille meriter. Et lors le roy s'en partist, et vint en la chambre de sa niepce, qui moult humblement le receipt. Et adoncques le roy luy dist en ceste manière : Ma belle niepce, Dieu merci, vos besoingnes sont maintenant en bon parti et en bon point ; car vostre pays est delivré du dangier des Sarrazins, par la puissance de Dieu et des deux frères de Lusignen. Or fault regarder comment vostre terre soit gouvernée doresnavant à vostre prouffit et

honneur et de vos gens aussi. Adoncques respondist la pucelle : Mon treschier oncle , je n'ay plus de confort ne de conseil que vous ; si vous requiers pour Dieu que vous y veuillez pourveoir de remède ; car il est bien vray que à vous je doibs plus obeir que à personne du monde , et aussi le vuel faire. Adoncques en eut le roy moult grant pitié , et lui respondist et dist : Belle niepce , nous y avons jà pourveu ; il vous fault marier à ung tel homme qui soit digne de vous gouverner et vostre pays ; et il n'est pas trop loing d'icy , qui est bon et beau , noble , preus et hardy. Par ma foy , bel oncle , dist la pucelle , ce sont foyson de belles taches et bonnes ; je suys certaine et sçay bien de vray que vous ne me conseilleriez chose qui ne soit à mon honneur et prouffit , là où vous le pourrez sçavoir et considérer ; mais , treschier oncle , de moy si tost marier aprez la mort de mon père , je ne monsteroye pas nul samblant de doeul de sa mort , et me samble que je m'eferoye trop , et en seroie blasmée moult durement au derrière de moy ; et tel me monstroist bonne chiere qui en tendroit mains de compte derrière.

A ce respondist le roy : Ma tresbelle niepce , grant chose à faire le convient ; car de deux maulx on doit choisir le plus petit , quant l'ung avoir le fault ou choisir ; mais , belle niepce , il est bien vray qui pourroit bonnement attendre , se seroit bon pour honneur que vous attendissiés encores ; mais quoy , ma belle niepce , je suys demourant loingz de vous et ne puy cy gaires longuement demourer sans trop grant dommaige d'aultruy et du mien ; et d'autre part , il fault satisfaire les deux frères du noble secours qu'ilz vous ont fait , ou du mien ou du vostre. Et auleuns disent qu'il est bon d'avoir plus de prouf-

fit et mains d'honneur ; et à dire que vous les peussiez remunerer de la courtoisie qu'ils vous ont faicte , la moitié de vostre royaulme ne souffiroit pas au grant dangier et à la paine qu'ilz ont souffert et eu pour vous ; et d'autre part, belle niepce, sachiez que vous n'estes mie trop souffissante pour avoir ung tel et si noble homme à mari comme est Regnauld de Lusignen ; car pour certain il est bien digne d'avoir la plus grande dame du monde, tant pour sa noble lignée comme sa bonté, beaulté et sa noble proesse. Adoncques quant la pucelle entendit le roy son oncle, elle fut toute honteuse, et veoit et consideroit bien qu'elle estoit en grant dangier et de son peuple et de pluseurs aultres choses ; si ne sceut que respondre, fors tant seullement qu'elle du tout en plourant se soubzmettoit au bon vouloir du roy son oncle, et luy dist telles parolles : Treschier oncle, je n'ay point de confort en cestuy monde, fors que Dieu et vous ; pour ce, faictes de moy et de mon royaulme tout ce qu'il vous plaira. Belle niepce, dist le roy, vous dictes tresbien ; et je vous jure par ma foy que je ne feray chose en ceste partie que je le face pour le mieulx. Or, ma belle niepce, ne plourez plus, car je vueil que vous vous delivrez de ceste besoingne ; car plus demourroit ceste baronnie, qui sont bien en nombre xii mille combatans, sur votre pays, et tant aurez-vous plus grant dommaige. Et celle, qui bien cognoissoit que à droit luy disoit, si luy dist : Mon treschier oncle, faictes en vostre plaisir. Adoncques vint le roy en la grande salle où les deux frères estoient, avec eulx moult belle baronnie tant du pays comme d'ailleurs ; et prist le roy la parolle et dist à Anthoine en ceste manière : Noble duc, plaise vous attendre à moy ; les barons de ce pays qui cy

sont vous supplient, et aussi fais-je, qu'il vous plaise que Regnauld vostre frère soit roy de Behaigne, et qu'il prengne à femme Aiglentine, ma niepce; et, treschier sire, vueillez luy prier que ce ne vueille refuser; car les barons du pays le desirent moult à avoir. Sire roy, ceste requeste est digne d'estre ot-troyée, et aussi sera elle. Or faictes venir la damoiselle. Et tantost le roy et le duc Ode l'alèrent querir, et lui firent oster le noir, et la firent vestir des plus riches garnimens qu'elle eubt, et des plus riches joyaulx, fermaulx, aigneaulx d'or à riches pierres, saintures, chapeaulx, et ses dames et damoiselles moult richement aournées, et pluseurs eurent les chiefz bien aournées de grosses perles; le roy et le duc Ode adressèrent la damoiselle, et les aultres dames venoient aprez. Adoncques quant la damoiselle entra en la salle avecq sa compaignie, elle fut toute enluminée de richesses et de beaulté. Adonc Anthoine et tous les barons honnourèrent moult fort la pucelle, qui tant fut belle que à merveilles, et elle aussi leur fist honnourablement la reverence. Adonc prinst le roy la parolle, et dist en ceste manière :

Sire duc de Lucembourg, tenez-nous vos convenances; veez cy de quoy nous voulons tenir les nostres. Par mon chief, dist Anthoine, c'est bien raison. Or sa, dist le duc Anthoine, beau sire, recepvez celle noble pucelle, et l'onneur du royaulme de Behaigne. Adonc passa Regnauld devant, et dist à haulte voix : Par ma foy, beau sire, je rends premierement graces à Dieu omnipotent, au roy qui est icy, et à tous les barons de ce pais de cestuy hault honneur, car se il n'y avoit tant seullement que la pucelle sans heritaige, si ne la refuseroie-je mie, et à l'aide de Dieu, j'ay esperance de conquerir assez de

pays pour elle et pour moy , combien que je prens bien tout en gré. Adonc luy dist Anthoine : Beau frère , vous avez raison , car vous avez le royaulme tout conquis davantaige ; or vous doint Dieu par sa sainte grace conquerre des aultres sur les ennemis de Dieu. A brief parler, fut là mandé ung evesque qui les fiança , et commença la feste à estre moult grande ; car on le sceut tantost par toute la ville ; et en eubrent tous ceulx de la ville moult grant joye , et fut toute la ville parée de couvertes de riches draps d'or ; et fist-on moult noble appareil comme pour une telle feste , et fut ordonné que les neupces se feroient sur le champ au maistre pavillon. Et ainsi demoura jusques au tiers jour ; et fist-on faire maintes robes riches , tant pour l'espouse , les dames et damoiselles , comme pour les deux frères et les barons du pays et les estrangiers ; et la nuyt que on devoit espouser le lendemain , on mena la pucelle , et avec elle les dames et damoiselles , au maistre pavillon ; et fist-on tendre moult de riches tentes tout environ pour les dames ; et le roy d'Anssay et le duc Ode de Bavières se logèrent avecq leur baronnie environ les tentes des dames , et Anthoine et Regnauld d'aultre partie ; et fist-on celle nuyt faire bon guet comme se les anemis furent prez de là ; et fut la feste moult grande , et le soupper moult notable. Et quant il fut temps , chascun s'en alla reposer jusques à la matinée que l'aubbe du jour apparut.

---



*Comment Regnauld espousa Aiglentine , fille du  
roi de Behaigne.*

**E**n ceste partie nous dist l'istoire que quant l'aubbe du jour apparut , la matinée fut belle et clère, et luysit le soleil moult bel et cler. Adonc fut moult noblement appareillée l'espouse, et fut addressée au lieu où la messe se devoit dire. Ilz furent espousez , et la messe dicte moult solemnellement, et aprez ramenée au maistre pavillon; et quant le disner fut prest, ilz lavèrent et s'assirent à table; et ilz furent moult richement servis , et de pluseurs manières de metz ; et quant ilz eubrent disné , les napes furent ostées; ils lavèrent , les tables furent abbatues et graces dictes. Aprez , les dames allèrent à leur retrait , et les chevaliers s'allèrent armer, et Anthoine meismes , pour faire honneur à son frère.

---

*Comment , aprez le disner, les chevaliers  
joustèrent.*

**L**es dames retournèrent et montèrent sur les eschafauds; lors vindrent les chevaliers sur les rends, et commencèrent les joustes moult belles; et n'y eubt oncques chevalier qui se peut tenir à Anthoine ne à Regnauld; et quant ilz visrent que les joustes affoiblissoient pour eulx , ilz se departirent des rends, et se vindrent desarmer; et tout ce ap-

perceut bien le roy d'Aussay, le duc Ode de Bavières et l'autre baronnie. La joustة dura moult longue pièce ; et tantost aprez fut temps de soupper, ainsi la joustة cessa ; et s'en departirent les chevaliers et escuiers, et puy souppèrent. Le soupper fait, les menestriers cornèrent, et danssa on grant temps. Et quant il fut heure d'aller dormir, on mena l'espousée couchier en ung riche lict de parement ; et puy assez tost aprez vint Regnauld et se coucha avecq la pucelle, aprez que le lict eubt esté beneit. Adoncques se departist chascun de la chambre, les ungz crians, chantans et daussans, et les aultres comptans de beaulx comptes et de belles adventures ; et se esbatoient qui mieulx pour passer le temps ; les aultres allèrent dormir. Regnauld et la pucelle furent couchiés l'ung avecq l'autre, et moult se humilioit la pucelle envers luy et luy disoit : Monseigneur, ce ne fut la grace de Dieu mon créateur, et la puissance de vostre frère, et vous aussi, ceste povre orpheline estoit toute desolée et perdue, elle et tout mon pays, et cheue en moult grande adversité entre les mains des mauvais Sarrazins ; mais l'aide de Dieu et la vostre m'en ont jetté, dont je vous remercie, et quant vous avez daigné de prendre en femme si medice pucelle comme je suys. Par foy, dist Regnauld, ma doulce amour, vous avez trop plus fait pour moy que je n'ay pour vous, quant vous m'avez fait le don de vostre noble corps, et héritier de tout vostre royaume ; et avecques moy n'avez riens pris fors tant seullement mon corps. Et lors respondist la pucelle : Par ma foy, monseigneur, le corps de vous vault mieulx que dix royaumes, et plus est à priser, quant à mon gré. De leurs parolles n'en veulz plus parler ; mais celle nuyt fut engendré d'eulx deux

ung tresbeau filz qui eubt a nom Oliphart; celluy fist moult grande guerre et les soubzmist en toute la basse marche de Hollande et de Zellande, Streve et Dannemarche et Norwége. Lendemain, au matin, se leva chascun, et fut messe chantée et y fut menée la dame. Aprez la messe, vindrent au maistre pavillon, et ainsi qu'ilz eubrent lavé et qu'ilz se deurent asseoir pour disner, vindrent deux chevaliers de Lucembourg qui apportoint lettres à Anthoine de par Cristienne sa femme, et vindrent devant le duc Anthoine et le saluèrent de par sa femme, en luy disant ainsi : Monseigneur, vous devez avoir grant joye, car ma dame vostre femme vous a apporté ung le plus bel enfant masle que oncques fut veu en nul pays. Or, beaulx seigneurs, dist Anthoine, loué en soit Dieu, et vous soiez les tresbien venus; et puy prinst-il les lettres.

L'istoire nous dist que le duc Anthoine de Lucembourg fut moult joyeux de ces nouvelles, et aussi fut Regnauld, son frère. Adoncques le duc Anthoine leut les lettres, et trouva dedens que les deux chevaliers disoient la vérité. Alors accolla le duc les deux chevaliers moult liement, et leur fist donner moult de riches dons. Adonc s'assist au disner, et dura la feste jusques à huyt jours; et puy retournèrent en la cité. Et lors prinst congié le roy d'Anssay, Anthoine et le duc Ode de Bavières, et tous les barons, du roy Regnauld et de la royne Aiglentine, qui furent moult doulens de leur departie. Et eubt convenant le duc Anthoine au roy Regnauld que se les paiens luy faisoient point de guerre, que il le viendroit secourir à noble baronnie, et le roy Regnauld l'en remercia moult; lors s'entrebaisèrent les deux frères à leur departement. Tant chevaucha l'ost qu'il

vint à Muchin en Bavière ; et se logèrent en la prairie devant icelle ville ; et les festoia moult le duc Ode par l'espace de trois jours ; et au quatrièsme jour se departirent , et prindrent congié du duc Ode ; et chevauchèrent tant qu'ilz approuchèrent Coulongne à une journée prez. Adonc vindrent les quatre chevaliers qui gouvernoient les gens d'armes et les arbalestriers que ceulx de Couloingne avoient envoié à Anthoine , et luy disdrent en ceste manière : Monseigneur, il est bon que nous allons devant en la ville pour appareillier vostre passage. Par ma foy, dist le duc Anthoine, beaulx seigneurs, il me plait bien ; et lors se partirent les quatre chevaliers et leur mesnie avecques eulx ; et chevauchèrent tant qu'ilz vindrent en la cité de Coulongne, où ilz furent moult bien receus, et leur enquirent les grands bourgeois et les gouverneurs de la cité comment ilz avoient exploité en leur voiage, et ilz leur comptèrent toute la vérité, avecq la grande puissance et la grant valeur des deux frères ; et comment Renauld estoit roy de Behaigne. Adoncques quant ceulx de Coulongne l'entendirent, ils furent bien joyeux, et disdrent qu'ilz estoient bien eureux d'avoir acquis l'amour de telz deux princes. Et lors firent faire moult grant appareil pour recevoir le duc Anthoine et le roy d'Anssay et leurs gens. Tant chevaucha l'ost qu'il vint à Couloingne, et allèrent les bourgeois de la cité à l'encontre en moult belle compaignie, et firent passer ceulx qui venoient pour aller tendre oultre la ville ; et firent loger par decha l'avant-garde, la grosse bataille et le sommage. Adonc rencontrèrent Anthoine et le roy d'Anssay, et leur firent moult grande reverence, et les prièrent tant qu'ilz vindrent loger le soir en la ville à moult

grant foison de nobles barons; et les festoièrent moult honnourablement, et donna aux dames, aux bourgeois de la ville et aux gentils hommes à soupper, et le lendemain à disner; et ce jour passa le Rin le remanant de l'ost; et le lendemain au matin prinst le duc Anthoine congïé de ceulx de la ville, et les mercia moult de ce qu'ilz lui avoient fait; et leur dist que se ilz avoient besoing de luy, qu'il les conforteroit à son povoir; et ilz le mercièrent moult. Lors se departist Anthoine et se desloga l'ost; et errèrent tant par pluseurs journées qu'ils vindrent ung soir loger es prez dessoubz Lucembourg.

La duchesse Cristienne fut moult joyeuse quant elle sceut la venue du duc Anthoine son mary; elle s'en issist hors de la ville a moult belle compaignie de dames et damoiselles, et des nobles du pays, et toute la bourgeoisie venoit aprez à l'encontre de luy, et la clergé à confanons et l'eau benoite, et l'encontrèrent à demie lieue de la ville; et là fut moult grande la joye que le duc et la duchesse s'entrefirent; et tout le menu peuple crioit noel, et louoient nostre Seigneur Jhesucrist de la venue de leur seigneur; et se loga l'ost devant Lucembourg; et Anthoine, le roy d'Anssay et les plus haultz barons se logèrent en la ville; là fut la feste moult grande par toute la ville; et y demoura le roy d'Anssay par l'espace de six jours continuellement, et le festoia le duc Anthoine moult richement, et luy rendist toutes ses obligattons et le quitta, excepté la prieuré fonder pour prier pour les mors, pour l'amour du roy Regnauld son frère; et le mercia le roy moult amiablement. Et adonc se departit de Lucembourg, et s'en revint en son pays d'Anssay, où il fut moult joyeusement receu; et le duc Anthoine demoura avec

sa femme, et en eut la dame celluy an ung filz qui fut appellé Lochier; et delivra toute l'Ardemie de robeurs, et fonda ès bois une abbaye de sainte vie, et fist faire le pont de Maisières, sur la Meuse, et pluseurs aultres fortresses en la basse marce de Hollande; et fist moult de beaulx faitz d'armes avecq le roy Olliphart de Behaigne, qui estoit son cousin-germain et filz du roy Regnauld. Et depuys eut le roy d'Anssay affaire au conte de Fribourg et au duc d'Autrice; et manda à Anthoine qu'il luy venist aidier; et si fist-il, et print par force le conte de Fribourg, et passa en Autrice, et desconfist le duc en bataille, et le fist apaisier au roy d'Anssay à son honneur. Et eut Bertrand, le filz Anthoine, à femme Mellidée, la fille au roy d'Anssay, et fut roy d'Anssay aprez le trespas du roy. Et la duché de Lucembourg demoura à Locher aprez le decès de son père, le duc Anthoine. Mais de ceste matère n'en parleray-je plus quant à maintenant, mais retourneray à parler de Raimondin, de Melusine et de leurs aultres enfans.

En ceste partie nous dist l'histoire que Raimondin, par son vasselaige, conquist moult grant pays, et luy firent maintz barons hommaige jusques en Bretagne. Et eut Mellusine, les deux ans aprez, deux filz, dont le premier eut à nom Fromond, qui ama moult l'eglise, et bien le monstra en la fin, car il fut rendu moine à Maillères, dont il advint puy-ung grant et horrible meschief, ainsi comme vous orrez cy aprez en l'histoire. Et l'autre filz qu'elle eut l'an ensievant eut à nom Thierry, qui fut moult bataillereux. Icy vous laisseray à parler des deux enfans, et vous diray de Geuffroy au grant dent, qui fut le plus fier, le plus hardi et le plus entrepre-

nant de tous ses aultres frères. Et sachiés que celluy Geuffroy n'en doubta oncques homme, et dist l'istoire et la vraie cronicque qu'il se combatit à ung chevalier faye au maulvais esperit ès prez dessoubz Lusignen, ainsi comme vous oyrez cy après raconpter. Or est vray que pour lors Geuffroy fut grant et percreu, et oyt nouvelles qu'il y avoit en Irlande ung peuple qui ne vouloit pas obéir en ce qu'il devoit à son père. Adonc jura Geuffroy la dent Dieu qu'il les feroit venir à raison; et, pour ce faire, prinst congïé de son père, qui fut moult courroucé de son departement. Et de fait mena avecq luy jusques au nombre de cinq cens hommes d'armes et cent arbalestriers, et s'en vint en Irlande; et tantost enquist où estoient les desobeissans; et ceux qui tenoient la partie de Raimondin lui enseignèrent les fortresses des desobeissans. Et adoncques s'armèrent et se présentèrent audit Geuffroy, et ilz luy disdrent qu'ilz luy aideroient à destruire ses ennemis. Par Dieu, beaulx seigneurs, dist Geuffroy au grant dent, vous estes moult bonnes et leales gens, et je vous mercie moult de ce que vous m'offrez et de l'honneur que vous me faictes; mais, quant à present, Dieu mercy, il n'est nul besoing de ce, car j'ay assez de gens d'armes pour accomplir mon affaire sans vous traveiller de rien, au plaisir de Dieu. Par ma foy, sire, vous avez plus affaire que vous ne cuidez, car vos ennemis sont moult fors et fiers et de merveilleux courages, et sont trestous cousins et parens, et du plus grand estraction de sang qui cy soit ou pays. Beaulx seigneurs, dist Geuffroy, ne vous en chaille, car, à l'aide de Dieu omnipotent, j'en chevirai bien. Et sachiés qu'il n'y aura ja si grant ne si petit, s'il ne veut obéir à mon mandement, que je ne le fasse mour-



rir de malle mort , et aussi , beaulx seigneurs et amis , se je vois qu'il me soit besoing , je vous remanderay . Et ilz respondirent : Nous sommes tous prestz dès maintenant , ou toutesfois , sire , quand il vous plaira . Beaulx seigneurs , dist Geuffroy au grant dent , ce fait est moult à remercier . Adonc prinst Geuffroy congïé d'eulx , et se mist à chemin vers une fortesse qui estoit nommée Syon ; et dedens icelle avoit ung des ennemis de Geuffroy , qui estoit nommé Claude de Syon , et estoit luy troisième des frères ; moult furent les trois frères fiers et orgueilleux , et vouloient suppediter tous leurs voisins et estre seigneurs d'eulx . Adoncques Geuffroy envoya deffier iceulx frères , en disant en ceste manière que ilz luy vouldissent faire obeissance pour Raimondin son père . Et ilz respondirent au messaigier que , pour Raimondin ne pour homme de par luy , ilz n'en feroient riens , et qu'il n'y retournat plus , aultrement il feroit que fol . Par ma foy , dist le messagier , je m'en garderay moult bien , sinon que je vous enmaine ung medecin qui vous destrempera ung tel electuaire de quoy vous serez trestous perdus et pendus par la gorge . Et de ce mot furent les frères moult couroucez . Et sachiés que , se le messagier n'eust tost hasté le cheveu , qu'il eut esté pris et mort sans nul remède : car ilz estoient folz et cruelz , et ne craignoient Dieu ne nul homme . Adoncques le messagier retourna vers Geuffroy , et luy compta l'orguel et le boubant des trois frères . Par mon chief , dist Geuffroy , grant vent chiet pour petit de pluie , et de ce ne doubtez , car je les paieray bien de leurs gaiges .

L'istoire nous dist que quant Geuffroy eubt oy l'orgueil et la fière responce des trois frères , que , sans plus dire , il s'en vint loger à demie-lieue de la

fortresse ; et quant il eubt ses gens logez et ordonnez , il s'arma de toutes pièces , et prinst avec luy un escuier qui bien sçavoit tout le pays , et le fist monter sur ung riche destrier et coursier à l'avantaige , et commanda à ses gens qu'ilz ne se meussent de là jusques à tant qu'ils orroient nouvelles de luy ; et ils luy respondirent que non feroient-ils. Adoncques s'en partist Geuffroy avec l'escuier ; mais là avoit ung chevalier qui avoit nourry et gouverné Geuffroy , qui bien cognoissoit son fier courage , et qu'il ne craignoit riens du monde ; et celluy chevalier avoit nom Philibert de Mommoret , et estoit moult vaillant de la main ; et avoit esté en moult de bonnes places , et celluy amoit moult Geuffroy. Adonc se partist aprez lui , avecq luy dix chevaliers tous armez , et sievit Geuffroy de loing que oncques ne perdist la veue de luy ; et Geuffroy chevaucha tant qu'il apperceut la fortresse de Syon , qui seoit devers la coste où il estoit sur une haulte roche. Par ma foy , dist Geuffroy , se la fortresse est ainsi forte de l'autre costé comme elle est de cestuy , elle me fera grant ennuy ainçoys qu'elle soit prinse. Il me faut sçavoir se elle est ainsi forte par delà. Adoncques prinst environner la fortresse tout le couvert d'ung petit boys qui estoit illec prez , et vindrent en la coste de la montaigne , et s'avallèrent aval à une belle prarie ; et tousjours Philibert le sievait ne oncques n'en perdist la veue , et faisoit mucer ses gens au bois. Et tant chevaucha Geuffroy qu'il eut environné la fortresse , et regarda moult bien que devers le pont c'estoit le plus foible , et luy sembloit bien que par là elle pourroit estre prise d'assault , car les murs y estoient bas et n'estoient pas les tours guerlandées , mais y avoit sur la porte une grosse tour assez haulte

et bien couronnée et monstroït tresgrant deffence en lieu foible. Mais Geuffroy advisoit de venir tout pourveu de manteaulx et de cloyes pour garder des pierres de fer; et ainsi qu'il advisoit et pensoit à ce, il entra en une petite rue qui remontoit la montaigne, à revenir autour de la forteresse, pour retourner à son logis. Adonc Philibert le perçoit bien et qu'il vouloit faire, et s'en vint à ses gens et les remena assez prez du chemin par où il estoit venu, et les fist embuchier au bois; car il vouloit laisser Geuffroy repasser, et s'en vouloit retourner au logis aprez lui; et ainsi qu'il regardoit quant Geuffroy isseroit du cavan, il perçoit une route de gens d'armes à cheveau qui entroient en la charrière par où Geuffroy venoit; et fut la charrière si estroite que à paine se pouvoient rencontrer deux hommes de front, et aucunesfois quant les chevaux estoient grans, il en convenoit retourner quelqu'un; si ne sceut Philibert que penser, et s'arresta moult grant pièce sur ce propos, car il craignoit tant Geuffroy qu'il n'osoit aller avant. Et me tairay de luy, et vous diray de Geuffroy, et comment il luy prinst de ce fait, comme vous orrez cy aprez raconter tout le fait et la manière.

En ceste partie nous dist l'istoire que au milieu de la montaigne Geuffroy rencontra la route des gens de cheveau; et estoient de seize à dix et huyt, que ung que aultres; de quoy il y en avoit jusques à quatorze bien armez et richement; et qui me demanderoit quieulx gens c'estoient, je diroye que c'estoit l'ung des frères Claude de Syon qui venoit devers son frère, pour ce qu'il avoit mandé pour le conseiller qu'il feroit du mandement qu'il avoit eu de Geuffroy; car il auroit entendu que Geuffroy estoit moult cruel et moult merveillex homme. Et adonc quant

Geuffroy eult rencontré le premier de la route, si luy dist qu'il se virast et qu'il fist virer ses compaignons tant qu'il eult la montaigne passée. Par foy, fist celluy, qui estoit fier et orgueilleux, damp musart, avant nous faudra bien sçavoir qui vous estes, qui distes que nous virons pour vous. Par foy, dist Geuffroy au grant dent, et vous le sçavez maintenant, et puy vous retournerez malgré que vous en ayez; je suis Geuffroy de Lusignen; or virés tost, ou, par le dent Dieu, je vous feray virer par force. Quant Guion le frère Claude de Syon l'entendit, et que c'estoit Geuffroy au grant dent, il leur escria et dist: Avant, seigneurs barons, par foy, se il nous eschappe ce sera grant honte à nous tous; mal nous est venu demander servitude en nostre pays. Adoncques quant Geuffroy entendit ceste parolle, il traist l'espée sans plus dire, et ferit le premier sur le chief si grand cop qu'il l'envoya tout estourdy par terre, et puy passa par de costé le cheveu et par-dessus celluy que feru avoit, qui gisoit au font de la charière, tellement qu'il luy derompit tout le corps, et ferist ung aultre d'estoc parmy le pis, et le jetta tout mort par terre, et puy leur escria: Par foy, faulces gens tristes, vous ne me povez eschapper; vous retournerez à vostre pute estraine. Et lors passa par delà le cheveu à l'aultre qui gisoit mort, et vint au tiers. Celluy estoit moult grant et fort, et ferit Geuffroy sur le bassinet de toute sa force; mais le bassinet fut moult dur et l'espée glissa aval de grant randon, mais oncques n'empira Geuffroy ne son harnois de la valler d'ung denier; et adont Geuffroy empoigna l'espée à deux mains et le ferist sur la coeiffe d'acier jusques à la cervelle, et le rua tout mort. Et quant Guion percut ce meschief, il fut moult iré,

car il ne pouoit advenir à Geuffroy fors que ung à coup, et veoit qu'il n'y avoit mais que deux devant luy, si en eut grant paour, car il appercevoit venir Geuffroy de grant puissance et hardiesse; il escria aux derreniers : Retournez et montez tant que nous soions au large où nous nous puissions deffendre; car, en ce parti, ce diable nous occiroit tous. Et adont ceulx virèrent tout court et montèrent appertement la montaigne, et Geuffroy aprez, l'espée au poing; et lors son escuier fist retourner les chevaux des trois qui estoient abbatuz. Or diray de Philibert de Mommoret, qui estoit approuché du cavan, et oyt la noise; si appella ses gens et ilz vindrent à luy; et adoncques Guion et ses gens saillèrent de la montaigne, et Geuffroy aprez, l'espée au poing; et quant ilz l'apperceurent, ils le assaillirent de tous costez; et il se deffendoit comme preus et vaillant; et aussi son escuier se porta tresvaillamment, et fut moult forte la bataille. Or vous diray de celluy que Geuffroy avoit abbatu premier, car quant il apperceut que Guion s'en estoit tourné par la force de Geuffroy, et il vit que ses deux compaignons estoient mors emprez luy, il fut moult doulent, et regarda autour de luy, et trouva son chevau et monta sus à tresgrant paine, et s'en alla, tant qu'il peut poindre le chevau des esporons, vers Syon; et quant il vint, il trouva Claude à la porte, avecq luy de ses gens; et quant il le vit, il le congneut moult bien et le vit tout sanglent et tout souillé de sang; si luy demanda qui ainsi l'avoit atourné, et celluy luy compta l'aventure comment ilz avoient rencontré Geuffroy tout seul, et le dommage qu'il luy avoit fait retourner Guion son frère hors du cavan par force, et encores duroit la bataille. Adoncques quant Claude l'enten-

dit, il en fut moult doulent, et tantost s'en alla armer et fist ses gens armer.

Moult fut doulent Claude quant il ouyt les nouvelles de la vilonnie et du dommage que Geuffroy eubt fait à Guion, son frère, et comment encores se debatoient et combatoient par dessus le cavan. Adoncques s'arma et fist armer ses gens et montèrent à cheveu jusques à sept vingz hommes d'armes, et laissa Clarebault, son frère, au fort, à tout soixante bassines pour le garder; lors vint en la bataille; mais pour neant se penoit, car Philibert et ses dix chevaliers estoient venus en la bataille, et besongnèrent tellement que tous les hommes de Guion furent mors et Guion pris; et tantost jura Geuffroy qu'il le feroit pendre par le col. Lors vint l'escuier à Geuffroy qui estoit rentré au cavan pour aller querir une belle espée qu'il avoit veu gisir par terre d'ung des chevaliers que Geuffroy avoit occy. Adonc il ouyt le trot et le bruit des chevaux et des gens d'armes que Claude amenoit; si retourna tout courant à Geuffroy et lui dist : Monseigneur, j'ay oy moult grant bruit de gens qui cy viennent; et tantost que Geuffroy l'ouyt, il fist Guion lier au bois à ung arbre, et le fist garder à ung chevalier, et s'en vint atout ses hommes à l'encontre du cavan, et là attendoit l'adventure. Et Philibert alla courant sur la montaigne et regarda au font de la charrière, et vit venir Claude et ses gens qui venoient par le cavan. Adoncques retourna à ses gens et dist à Geuffroy : Sire, il n'y a affaire aultre chose que de bien garder ce pas; veez cy venir vos ennemis; et Geuffroy respondist : Or ne vous en doubtez, il sera moult bien gardé et deffendu. Adonc il appella l'escuier qui estoit venu avecques luy et luy dist : Courez



tantost à l'ost et me faictes venir mes compaignons le plus brief que vous pourrez. Et il se departist et ferit des esporons, et vint vers l'ost grant alaine ; et, quant il fut arrivé, il leur dist : Beaulx seigneurs, or tost à cheveu, car Geuffroy se combat à ses ennemis ; et ilz s'armèrent et montèrent tantost à cheveu qui mieulx sceut, et vindrent tantost aprez l'escuier qui les guidoit au plus droit qu'il pouoit vers le lieu où il pensoit à trouver Geuffroy, qui se combatoit à ses ennemis.

L'istoire nous dist que Geuffroy et Philibert et leurs chevaliers estoient en l'entrée du pas ; et lors vint Claude et ses gens qui venoient à moult grant effort parmy le cavan, et bien cuidoient gaignier la montaigne à leur advis ; mais Geuffroy estoit à l'entrée du pas qui moult asprement leur deffendoit le passage ; et sachiés qu'il n'y eut si hardi qu'il ne fist reculer, car il y eut deux de ses chevaliers qui estoient descendus à piet, les lances es poings qui se tenoient moult vigoureusement au cavau coste à coste de Geuffroy, et donnoient aux gens de Claude de grans coups de lances, et en y eubt pluseurs de mors. Philibert estoit adonc descendu lui quatriesme, et c'estoit mis sur la donne du cavan par dessus, et faisoit assambler pierres et gettoient par telle vigueur contre la vallée que il n'y avoit si fort, s'il estoit ataint sur la couppe du bassinet à plain coup, qui ne fut tout estourdi ou rué du cheveu par terre ; et sachiés qu'il en y eut plus de vingt mors. Et lors vint l'escuier qui amenoit l'ost, et quant Geuffroy le sceut il lui fist mener trois cens hommes d'armes par le chemin qu'ils estoient allez le matin pour aller au-devant du pas, que Claude ne ses gens ne peussent retourner en leur forteresse. Et tantost de là l'escuier



se departist , et s'en vint grant aleure au devant de la prarie , et passa par devant la forteresse. Et quant Clerevault les vit , il cuida que ce fut aulcun secours qui leur venist , car il ne cuidoit pas qu'il y eut au pais de leurs ennemis à si grant force ; et ceulx venoient tout le beau pas sans faire nul samblant qu'ilz leur vouldissent que bien. Et adonc Clerevaud , qui cuidoit bien que ce fussent amis , fist abaisser le pont et ouvrir la porte , et vint lui vingtiesme tout armé sur le pont. Et adonc quant l'escuier et sa route apperceurent que le pont fut abbattu et la porte ouverte , ilz se trairent le chemin le plus promptement qu'ilz peurent , et quant , au passer devant la porte , Clerevauld leur escria : Quelles gens estes-vous ? Et ceulx respondirent : Nous sommes bonnes gens ; et en approchant dudit pont environ de xx. chevaux , ilz luy demandèrent où est Claude de Syon ? nous voulons parler à luy. Et Clerevauld les approcha en disant : Il reviendra tantost , il est allé combattre Geuffroy ou grant dent , nostre ennemy , que luy et Guion , nostre frère , ont enclos en celle montaigne que vous voies là devant vous ; et sachiez que Geuffroy ne leur peut eschapper , et fut-il ores de fin acier trempé , qu'il ne soit mort ou affollé. Par foy se dist l'escuier , ce sont bonnes nouvelles. Et adonc s'approcha luy vingtiesme de plus en plus , en demandant à ses gens : Le irons-nous aidier ? Par foy , dist Clerevauld , grant mercy , il n'est à present nul besoing.

L'istoire nous racompte que tant s'approcha l'escuier de Clerevault par belles parolles , qu'il vint prez du pont. Adoncques il escria à ses gens : Avant , seigneurs , la forteresse nous est gagnée. Et quant Clerevauld oyt ce mot , il cuida reculer pour lever le pont ; mais les vingt se ferirent si rudement parmy

luy et ses gens, que tout fut tombé par terre, et tantost misrent piet à terre et vindrent sur le pont et entrèrent en la porte, tantost ilz misrent deux lances ès chaines de la porte coulisse, et puis plus de cent misrent piet à terre et vindrent sur le pont et entrèrent en la porte, et hault et bas, parmy la fortesse, et puis fut pris Clerevauld et tous les autres qui estoient en la fortesse, et furent tous liez en une chambre, et les firent garder par quarante hommes d'armes; et aprez se assablèrent et eurent conseil qu'ilz manderoient celluy fait à Geuffroy, et qu'ilz se tendroient enclos en la fortesse, assavoir moult se Claude reviendrait à garent; et ainsi le firent. Adonc dist l'escuier que luy mesme le iroit nuncer à Geuffroy ceste aventure; et lors s'en partist, et vint au ferir de l'esporon à Geuffroy, et luy compta ceste adventure; et, quand Geuffroy sceut l'adventure, il fut moult joyeux, et tantost le fist chevalier, et luy bailla cent homme d'armes, et luy commanda qu'il allast tantost sur le pays et qu'il gardast bien que Claude ne print aultre chemin que celluy de la fortesse, car, se il eschappoit, il pourroit faire moult d'ennuy avant que on le peut atraper; et que mieulx le valloit enclore au cavan et le prendre par force là dedens. Sire, dist le chevalier nouvel, ne vous en doutez, il ne nous eschappera se il ne scet voler; mais que je puisse aller à temps, je vous donne ma teste se il s'en va. Et lors se departist et descendist la montaigne atout les cent hommes d'armes; et Geuffroy demoura au pertuis, qui se combattoit à force d'espée à ses ennemis; et bien xl. chevaliers estoient descendus à piet sur la montaigne, qui gettoient pierres contre val de si grant force que, malgré que Claude en eubt, il le convint retourner à grant

paine luy et ses gens. Et Geuffroy et ses hommes entrèrent au cavan et les enchassèrent au dos ; mais à grant paine peurent passer parmy les mors qui avoient esté occis du jet de pierres. Or vous diray du nouvel chevalier qui jà estoit venu à l'encontre du cavan, luy et sa route ; mais quant il oy le bruit des chevaux , il pensa bien que Claude retournoit , et prist le couvert de la montaigne , et laissa à Claude le chemin de la fortesse.

L'istoire dit que Claude exploita moult fort pour saillir du cavan et s'en venir à temps à salveté au fort de Syon ; mais de ce que fol pense demeure souvent la plus grant partie à la fois. Or est vray qu'il exploita tant qu'il saillist du cavan et vint au large. Adoncques il n'attendit per ne compaignon, mais s'en vint à cours de chevau vers le fort , et , quant il fut prez , il cria à haulte voix : Ouvrez la porte ; et ilz firent ainsi. Et lors il passa le pont et entra dedens , et vint descendre avant qu'il percut qu'il eut perdu sa fortesse ; et tantost qu'il fut descendu , il fut saisi de tous costez et lié fermement. Adoncques il fut moult esbahi , car il ne veoit autour de luy homme qu'il congneut. Qu'esse cy ? dist-il ; que diable sont mes gens devenus ? Par mon chief , dist ung chevalier qui bien le congnoissoit , tantost serez logé avec eulx , et tantost il fut mené en la chambre où Clerevauld et les autres prisonniers estoient. Lors , quant il les apperceut liez et gardez comme ilz estoient , il fut moult doulent. Et quant Clerevauld le vit , il luy dist : Ha a , Claude , beau frère , nous sommes par vostre orgueil enchus en grant chetiveté , et doubtez que n'en eschapons jà sans perdre la vie , car trop est Geuffroy cruel. Et Claude lui respondist : Il nous en convient attendre tout ce qu'il nous

adviendra. Lors vint Geuffroy, qui entra en la for-  
tresse, et avoit occis que prins tout le demourant des  
gens de Claude ; et adonc fut amené Guion son frère  
en la chambre avec les aultres ; lors entra Geuffroy  
dedens et choisist Claude entre les aultres, et luy  
dist : Et comment, dist-il, faulx triste, avez-vous  
esté si hardi de dommager ne de molester ainsi le pays  
de monseigneur mon père et ses gens, vous qui  
devez estre son homme ? Par mon chief, je vous en  
pugniray bien : car je vous feray pendre devant Val  
bruiant, voiant vostre cousin Guerin, qui est triste  
comme vous devers monseigneur mon père. Et  
quant Claude oyt ce salut, sachiés qu'il ne luy pleut  
gaires. Mais, quant le peuple du pays sceut que Syon  
et Claude estoient pris avec ses deux frères et leurs  
gens mors, lors vindrent plaintes de roberies et  
d'aultres mauvais cas sur Claude et sur ses gens, et  
trouva-on leans plus de cent prisonniers, que de bon-  
nes gens du pays, que marchans et estrangers, qui  
avoient esté robez, le venoient racompter ; et par là  
ne passoit nul qui ne fust rué jus ; et, quant Geuffroy  
ouyt ces nouvelles, il fist tantost lever unes fourches sur  
la coste de la montaigne, et y fist pendre toutes les gens  
de Claude ; mais celluy Claude et ses deux frères il es-  
pargna pour lors, et bailla la charge du chasteau à  
ung chevalier du pays qui estoit moult vaillant homme  
et preud'homme, et lui commanda sus sa vie de elle  
bien garder, et gouverner leaulment les subjectz, et  
faire garder justice. Et celluy luy promist de ainsi  
le faire à son povoir, car il gouverna le pays moult  
bien et loiaulment. Et, après ces choses, se partist le  
matin, et prist le chemin de Val bruiant, et fist  
amener avec luy tous les trois frères, qui moult  
grant paour avoient de la mort, et n'estoit pas sans

cause, comme vous oyrez dire et deviser cy aprez.

L'istoire nous dist que Geuffroy et ses gens chevauchèrent tant qu'ilz vindrent devant Val bruiant, et furent les tentes tendues, et se loga chascun en ordonnance ainsi qu'il peut. Adonc fist Geuffroy tantost lever unes fourches devant la porte du chasteau, et fist pendre incontinent Claude et ses deux frères, et manda à ceulx du chasteau que, se ilz ne se rendoient à sa voulenté, qu'il les feroit tous pendre se il les pouoit tenir. Et, quant Guerin de Val bruiant oyt ces nouvelles, il dist à sa femme : Or dame, il est vrai que contre la force de ce diable je ne me pourroie tenir, et je me partiray d'icy et m'en iray à Montfrin, à Girard, mon nepveu, et à mes autres amis, pour avoir conseil comment nous pourrons avoir traicté de paix à Geuffroy. Adonc la femme, qui moult fut saige et subtive, luy dist : Allez-vous-en, de par Dieu, et gardez bien que vous nesoiés pris, et ne vous partés point de Montfrin tant que vous aurez nouvelles de moy : car, à l'aide de Dieu, je pense que je vous pourchasseray bon traicté à Geuffroy : car vous sçavez bien que, se vous me eussiés voulu croire, vous ne vous feussiés pas meslé d'avoir fait ce que Claude et ses frères vous ont fait faire ; combien que, Dieu merci, vous n'avez point encores faulcé vostre foy devers vostre seigneur souverain Raimondin de Lusignen. Adonc Guerin luy respondist : Ma chière seur, faictes le mieulx que vous pourrez, car je me fie en vous, et croiré de tout ce que vous me conseilerez. Et lors s'en partist par une faulce poterne, monté sur ung moult appert coursier, et passa le couvert des fossés et rés à rés des logis, que oncques ne fut congneu, et, quant il se vit ung peu loingz, il ferit le cheveu des esporons tant comme il peut, et

le cheveu l'emporta moult roidement. Et sachiés qu'il avoit si grand paour d'estre advisé qu'il ne sçavoit son sens, et loua moult Jhesucrist quant il se trouva à l'entrée de la forest, qui duroit bien deux lieues, et print le chemin vers Montfrin tant qu'il peut chevauchier.

L'istoire nous dist et tesmoingne que tant chevaucha Guerin de Val bruiant qu'il vint à Montfrin, où il trouva Girard son nepveu et luy compta cest affaire, et comment Geuffroy au grant dent avoit pris Claude leur cousin et ses deux frères, et avoit fait pendre tous leurs gens devant le chasteau de Syon, et les trois frères avoit fait mener devant Val bruiant, et de fait les avoit fait pendre illecq, et comment il se partist pour doubte qu'il ne fut pris en la forteresse. Par foy, dist Girard, beau oncle, vous avez fait que saige : car, à ce que on m'a dict, celluy Geuffroy est moult grant chevalier de hault et puissant affaire, et si est merveilleusement cruel et se fait moult à doubter. Mal nous vint quant nous oncques alasmes à Claude, car nous sçavons bien que luy et ses frères estoient de mauvaise vie et que nul ne passoit par leur terre qui ne fut robé. Or prions à Jhesucrist qu'il nous en vueille jeter hors à nostre honneur. Bel oncle, il nous fault aller aviser sur ce fait; il est bon que nous le mandons à nos proemes et à tous ceulx qui ont esté de ceste folle aliance. Et Guerin respondist. C'est verité. Et adonc ilz mandèrent à tous qu'ilz s'appareillassent de venir devers Montfrin, affin d'avoir conseil ensamble comment nous pourrons ouvrer de cestuy fait, et sçavoir se nous pourrons aulcunement trouver voye comment nous nous pourrons excuser devers Geuffroy. Or se taist l'istoire de plus parler d'eulx, et parle de la



dame de Val Bruiant, qui moult estoit saige et soubtive et vaillante dame ; et tousjours avoit blasmé son mari de ce qu'il c'estoit oncques consenti à Claude ne à ses frères. Celle dame avoit une fille qui povoit bien avoir de .viii. à .ix. ans, laquelle estoit moult belle et gracieuse, et aussi avoit ung filz qui avoit environ dix ans , qui estoit moult bel et bien endoctriné. Adonc la dame ne fut ne folle ne esbahie, et monta sur ung riche pallefroy, et fist monter ses deux enfans et conduire par les frains par deux anciens gentilz hommes , et fist monter avec elle jusques à six damoiselles, et fist ouvrir la porte ; et là trouva le nouvel chevalier qui apportoit le mandement de Geuffroy , et le bienveigna moult doucement et courtoisement ; et aussi celluy luy fist grant reverence, car moult sçavoit de bien et d'onneur. Et la dame luy dist moult attemprement : Sire chevalier, monseigneur n'est pas ceans, et pour tant je vueil aller par devers monseigneur vostre maistre , pour sçavoir que c'est qu'il luy plaist : car il me samble qu'il est cy venu en manière de faire guerre ; mais je ne croy pas que ce soit à monseigneur mon mari ne à nul de ceste fortesse, car ne plaise à Dieu que monseigneur ne nul de ceans ait point fait chose qui doibve desplaire à Geuffroy ne à monseigneur son père ; et, se par adventure aucuns de ses haineux avoient informé Geuffroy d'aulture chose que de raison, je luy vouldroie humblement supplier et prier qu'il luy plaist à ouyr monseigneur mon mari en ses excusations et deffences. Adoncques, quant le nouvel chevalier l'ouyt parler si sagement, il respondist : Ma dame, ceste requeste est raisonnable, et pour ce je vous meneray devers monseigneur ; et je croy que vous le trouverez tresamiable et que vous aurez



bon traicté avec luy, combien qu'il soit bien informé contre Guerin moult durement ; mais je croy que à vostre requeste il fera une partie de vostre petition. Et lors se partirent et vindrent vers les logis.

L'istoire dist que tant chevauchèrent la dame, sa mesnie et le nouvel chevalier, qu'ilz vindrent à la tente de Geuffroy, et là descendirent ; et quant il sceut la venue de la dame, il saillist de sa tente et vint à l'encontre ; et celle, qui fut bien enseignée tenoit ses deux enfans devant Geuffroy et luy fist moult humblement la reverence. Et adonc Geuffroy s'enclina vers elle et la leva moult humblement, et luy dist : Madame, vous soiez la tresbien venue. Et, Monseigneur, dist elle, vous soiez le tresbien trouvé. Et adonc les deux enfans le saluèrent moult doucement et tresreveramment ; et eulx deux dreslés, il leur rendist leur salut. Et adonc print la dame la parolle, et faignit, comme se elle ne sceut riens, qu'il fust venu là par maltalent, et dist en ceste manière : Monseigneur, monseigneur mon mari n'est pas, quant à présent, en ceste contrée, et pourtant suys-je venue par devers vous pour vous prier qu'il vous plaise de venir loger en vostre forteresse, et amenez avec vous tant de vous gens qu'il vous plaira ; car, mon treschier seigneur, il y a bien de quoy vous tenir bien aise, Dieu merci et vous ; et sachiez que moy et ma mesnie vous recepyrons volentiers comme nous devons faire au filz de nostre seigneur naturel. Quant Geuffroy l'entendist, il fut moult esbahi comment elle lui osoit faire celle requeste, veu et considéré de quoy on l'avoit informé contre Guerin de Val-Bruiant son mari. Toutesfoisl respondist : Par mon chief, belle dame, je vous mercie de la grande courtoisie que vous me offrez, mais ceste re-

queste ne vous doibz-je pas accorder, car on m'a donné à entendre que vostre mari ne l'a pas desservi envers monseigneur mon père et envers moy ; combien que , ma belle dame , je vucil bien que vous sachiez que je ne suys mie venu pour guerroier dames ne damoiselles , Dieu m'en gard , et de ce soiez toute seure que à vous , à vos gens ne à vostre fortesse , ne feray rien meffaire au cas que vostre mari n'y soit. Et elle luy respondit : Tresgrans mercis ; mais je vous requiers qu'il vous plaise à moy dire la cause pour quoy vous avez indignation contre monseigneur mon mari , car je suys certaine qu'il ne fist oncques riens , là ou luy ou moy l'aions peu penser ne sçavoir , que par raison dust estre à vostre desplaisance , et crois bien que s'il vous plaist à oyr monseigneur mon mari en ses excusations , que vous trouverez que ceulx qui vous ont informé le contraire n'ont pas dit verité ; et , monseigneur , je me faictz forte sur ma vie que vous le trouverez ainsi que je vous dis.

En ceste partie nous dist l'istoire que , quant Geuffroy oyt la dame parler, il pensa ung peu et puyz respondist : Par foy, dame , s'il se peut bonnement excuser qu'il n'ait erré contre son serement , j'en seray tout joyeux , et je le recepveray volentiers en ses excusations avec ses compaignons et tous leurs complices , et vigoureusement je luy donne son alant et son venant huit jours luy .xl. Et lors print congïé et s'en retourna à Val-Bruiant , et laissa ses enfans , et fist monter jusques à dix chevaliers et escuiers et trois damoiselles , et s'en partist et chemina tant qu'elle vint à Montfrin , où elle fut liement recepue. Là estoient les gentilz hommes ; et adonc la dame leur compta comment Guerin , son mari ,

avoit huit jours saulf, allant et venant, de Geuffroy, pour luy. xl , et se il se peut excuser, Geuffroy l'orra voulentiers et luy fera toute raison. Par foy, dist ung ancien chevalier, dont aurons bien traicté avec luy, car il n'est homme qui puist dire que nous aions riens meffait en quelque manière que ce soit ; se Claude, qui estoit nostre cousin, nous avoit requis d'avoir aide de nous, s'il en avoit besoing, et nous luy eussions promis de luy aidier, nous n'avons mie pourtant encores riens meffait ; ne Geuffroy ne aultre ne peut dire que nous en missions oncques bassinet sur teste, et que nous sallissions oncques ung seul pas de nostre hostel pour luy conforter aucunement contre Geuffroy, ne trouver le contraire. Doncques alons-nous-en seurement, et m'en laissez convenir, car je ne me soussie pas que nous n'aions bon traicté avec luy. A celluy propos se affermèrent tous les proesmes, et lors prindrent journée de faire leur appareil d'y aller le tiers jour aprez ; et adonc s'en partist la dame, et erra tant qu'elle vint à Val-Bruiant ; lors fist querir vin, pain, poullaille, foing et avaine, pour envoyer à Geuffroy, qui oncques n'en receipt riens, mais bien souffrit prendre qui en vouloit avoir, pour son argent qu'il en eubt ; et manda madame à Geuffroy la journée que Guerin et ses parens devoient venir devers luy.

En ceste partie nous dist l'istoire que Guerin de Val-Bruiant, Girard, son nepveu, attendoient leur lignage à Montfrin ; et ceulz venus, ilz montèrent à cheveu et chevauchèrent tant qu'ilz vindrent à Val-Bruiant, et le lendemain ilz mandèrent à Geuffroy qu'ilz estoient tous prestz à venir devers luy pour eulx excuser ; et Geuffroy leur manda qu'il estoit tout prest de les recevoir. Et adoncques partirent du chateau

et vindrent devant la tente de Geuffroy et luy firent la reverence honnourablement. Et lors print l'ancien chevalier, dont je vous ay dessus parlé, la parolle en disant : Treschier seigneur, nous sommes cy venus pour la cause qu'on nous a donné à entendre que vous estes informé contre nous, et vous a-on raporté que nous estions consentans de la mauvaistié que Claude avoit commencé de faire encontre nostre droit seigneur vostre père, dont, sire, il est bien vray que Claude, avant qu'il eut ceste folie entreprise, il nous assambla trestous et nous dist : Beaulx seigneurs, vous estes tous de mon lignage, et je suis du vostre; c'est bien raison que nous nous entreaïmons comme cousins. Par foy, Claude, dismes, c'est verité; pourquoy le dictes-vous? Et adonc il nous respondist moult couvertement : Beaulx seigneurs, je me doubte que je n'aye briefment une grosse guerre et à faire à forte partie; si vueil sçavoir se vous me voudrez aidier. Et nous luy demandasmes à qui, et il nous respondist que nous le sçaurions tout à temps, et qu'il n'estoit pas parfait ami qui failloit à son preesme à son besoing. Adonc nous luy dismes : Nous voulons bien que vous sachiés qu'il n'y a si grant en ce pais ne marchissant, s'il se prent à vous, que nous ne vous aidons à vostre droit soutenir. Et sur ce s'en partist; et eut plusieurs rancunes où il avoit peu de droit, desquelles luy aidasmes à saillir. Mais, chier seigneur, depuis qu'il commença à desobeir monseigneur vostre père, nous ne doubtons ne Dieu ne homme que nul de nous mist sur son corps pièce de harnois ne en issist de son chastel pour luy ne pour son fait; et le contraire ne sera jà sceu ne trouvé; et se il est aultrement trouvé, si nous faictes pugnir selon raison, car de ce nous

ne voulons jà avoir grace ; mais requérons seulement droit et justice ; doncques , se il y a aultre cause que aucun ait sur nous devisé par envie ou par hainne , je dis par droit que vous ne nous devez vouloir nul mal , nous qui sommes vrais subjectz et obeissans de monseigneur vostre père Raimondin de Lusignen , car se aucun nous vouloit molester ou injurier , vous nous devriés garder ; et de cestuy fait ne vous sçau-roie plus que dire , car nous ne sçavons entre nous adviser que nous eussions oncques fait chose qui deut desplaire à monseigneur vostre père. Si vous requérons tous que vous ne vueillez estre informé que de raison.

Quant Geuffroy eut oy l'excusation de l'ancien chevalier , qui avoit parlé pour luy et pour les aultres , il trait son conseil à part et leur dist : Beaulx seigneurs , que vous samble de ce fait ? Il me samble que ces gens s'excusent moult bel. Par foy , disdrent-ilz tous en commun , c'est verité , nous ne leur sçaurions que demander , fors que vous leur facés jurer sur saintes evangilles que se le siège eut esté devant Syon , se ilz eussent aidé ne conforté Claude et ses frères contre vous , et se ilz jurent que oy , ilz sont vos anemis ; et se ilz jurent que non , vous ne leur devez porter nul maltalent ; et en aprez faictes-leur jurer que se vous les eussiés mandé au siège , se ilz vous feussent venu aidier , conforter et servir contre vos anemis. A ce point furent tous ceulx du conseil d'accord. Et lors furent appelez et leur furent ces parolles et ce fait recordé. Et ilz disdrent qu'ilz jureroient bien et volentiers , et jurèrent et affirmèrent les deux poingz dessus dis , et pour ce ilz furent d'accord à Geuffroy , qui , aprez , alla visitant le pays par l'espace de deux mois , et puis print congié des

barons et laissa bon gouverneur au pais, et s'en partist et s'en vint grant erre à Lusignen, où il fut moult festoïé de son père et sa mère et de toutes gens ; car ilz sçavoient comment il avoit fait plessier tous leurs ennemis. Lors estoit venu de Chippre ung chevalier de Poetou qui estoit du lignage de ceulx de Tours, qui avoit rapporté nouvelles comment le caliphe de Bandas et le grant Carmen avoient couru en Armanie et fait moult grant dommaige au roy Guion d'Armanie, et comment le roy Urian avoit oy nouvelles qu'ilz avoient intention de lui faire guerre en Chippre, et faisoit le roy son amas de gens d'armes et de navires pour eulx combatre en mer ou en leur pays mesmes, s'ilz ne le trouvoient sur mer, car il n'avoit pas intention de le laisser arriver en son pais. Quant Geuffroy oyt ce, il jura Dieu que ce ne seroit pas sans luy, et que trop avoit gardé son hostel, et dist à Raimondin son père et à sa mère qu'ilz luy vouldissent faire finance pour aller aidier à ses frères contre les Sarrazins. Et ilz luy accordèrent parmy ce que dedens ung an il retourneroit par devers eulx.

Moult fut Geuffroy joyeux quant il eubt l'accord et le consentement de ses père et mère d'aller secourir ses frères contre les Sarrazins. Et adoncques il pria le chevalier qui estoit venu de Chippres qu'il vouldist retourner avec lui, et il l'en meriteroit bien. Par mon chief, dist le chevalier, on m'a dit que à vostre proesse nul ne se peut comparer, et je iray avecques vous pour veoir se vous ferez plus que Urian, votre frère, ou que Guion, le roy d'Armanie, car ces deux congnoissé-je assez. Par foy, sire chevalier, dist Geuffroy, c'est peu de chose de mon fait envers la puissance de mes deux seigneurs mes



frères ; mais je vous remercie de ce que si libéralement m'avez offert de venir avec moy, et pour tant je le vous meriteray bien, se Dieu plait. Adoncques il fist son mandement, et fist tant qu'il eut bien xiiii. cent bassines et bien trois cens arbalestriers, et les fist tous retraire vers la Rochelle ; et Raimondin et Melusine y estoient, qui avoient fait arriver moult belle navire et bien pourveue et avitaillée de ce qui estoit nécessaire. Et adoncques prist congé de ses père et mère et entra en la mer, et avec luy sa compaignie ; et furent les voilles levez et se commandèrent à Dieu, et aprez se esquipèrent en mer, et en peu d'eure on eut perdu la veue d'eulx, car ilz alloient moult roidement. Mais cy se taist l'istoire de plus parler, et commence à parler du caliphe de Bandas et du souldan de Barbarie, qui estoit nepveu du Souldan qui avoit esté mort en la bataille soubz le cap Saint Andrieu, au dessus de la montaigne Noire.

L'istoire nous dist que le caliphe de Bandas, le souldan de Barbarie, le roy Anthenor d'Antioche, et l'admiral de Cordes, avoient fait ensamble leurs seremens que jamais ne fineroient tant qu'ilz eussent destruit le roy Urian de Chippre, et Guion, roy d'Armanie, son frère ; et avoient assamblé bien jusques à xvi. mille Sarrazins, et avoient leurs navires toutes prestes ; et avoient intention de descendre et arriver premièrement en Armanie, et tout avant euvre destruire l'isle de Rodes et le royaume d'Armanie, et puy passer en Chippre et tout destruire et mettre à mort. Et avoient juré qu'ilz feroient le roy Urian morir en croix, et le cruciferoient, et sa femme et ses enfans arderoient ; mais comme dist le saige : Fol pense et Dieu ordonne. Et pour lors avoit



pluiseurs espies entre eulx, tant d'Armanie comme de Rodes; et là en eut une qui estoit proprement au grant maistre de Rodes, qui sambloit si bien Sarrazin que nul ne l'avisast jamais pour aultre que Sarrazin, et avoit à main leur langage si bien comme s'il fut du pays. Cestuy sceut tout le secret des Sarrazins, et aprez se partist d'avec eulx, et s'en vint à Baruth, où il trouva une barque qui s'en vouloit aller en Turquie querir marchandises; il se mist avecq eulx. Et quant ilz eurent vent propice, ils desancrèrent et levèrent leurs voilles au vent; et tant sanglèrent par mer qu'ilz virent l'isle de Rodes et l'approchierent pour eulx refrechier; et l'espie leur dist qu'il vouloit aller en la ville ung petit; et ceulx luy dirent que s'il ne revenoit tantost qu'ilz ne l'attenderoient gaires. Ne vous doubtez, dist-il, je revien dray tantost. Et tantost se departist d'avec eulx et vint en la ville où il fut moult bien congneu; et le plus tost qu'il peut il vint comparoir devant le grant maistre de Rodes, qui lui fist bonne chièrre, et tantost luy compta les nouvelles. Et quant le maistre de Rodes l'oyt parler, il luy demanda se c'estoit verité. Et il lui respondist : Par ma foy, oy, car je les ay veu. Et aprez le maistre de Rodes rescript tout ce fait au roy d'Armanie et au roy de Chippre, qui tantost escript au maistre de Rodes et au roy Guion d'Armanie en leur mandant qu'ilz fussent en mer atout leur puissance, et qu'ilz l'atendissent sur la coste de Iaphes; car c'estoit son intention de soy traire vers celles parties, pour ce qu'il sçavoit que le caliphe de Bandas et tous ses complices se mettoient en mer vers celle coste. Adoncques quant le roy oyt ceste nouvelle, il se mist en mer à bien six mille hermins et bien trois mille arbalestriers, et s'en vint

par mer en Rodes où il trouva le grant maistre au port. Et quant le grant maistre de Rodes le vit, il en eut moult grant joye ; et tantost se mist avecques luy en la mer à bien trois cens hommes d'armes, que frères chevaliers que aultres, et bien de six à sept cens arbalestriers et archiers ; et quant ilz furent assamblez, belle fut la flotte à veoir ; car par compte fait ilz furent trouvez par vraye estimation x. mille hommes d'armes, et environ. xvii. cens arbalestriers ; et sachiés qu'il les faisoit beau veoir, car les bannières ventilloient sur les vaisseaux, et l'or et l'asseur et autres couleurs ; les bassines et aultres harnois reluisoient au soleil que c'estoit grant merveille. Ce fait, ilz se misrent à mer et tirèrent le chemin du port de Iaphes, où les Sarrazins avoient fait tirer et assamblar leurs navires. Et icy se taist l'istoire de plus parler d'eulx, et parle du roy Urian.

L'istoire dist que le roy Urian avoit fait arriver parmy son pays de Chippre, et les avoit fait entrer en la mer au port de Limasson ; et estoit la royne Hermine au chasteau, et avecques elle dames, damoiselles et Henri son filz, qui avoit jà cinq ans, et ceulx qui devoient garder le pays et le port. Or est vray que quant le roy eut pris congié et fut entré en mer, il eut bien avec luy. xiiii. mille hommes, tant d'ommes d'armes, comme les combatans de trait ; et furent les voilles levez, et se esquipèrent du port, et se boutèrent en mer, et senglèrent de telle force que la royne, qui fut en la maistresse tour, en eut tost perdu la veue. Et sachiés que le tiers jour aprez, Geuffroy au grant dent s'ariva soubz Limasson ; mais le maistre du port ne les laissa pas entrer dedens, combien qu'il fust moult esbahy quand il percut les armes de Lusignen sur les vaisseaulx et bannières ;

il ne sceut que penser, et pour ce, il alla tantost au chasteau et nunça à la reyne cest affaire. Et elle, qui fut moult saige, luy dist : Allez sçavoir que c'est, car se il n'y a traison, il n'y peut avoir que bien ; et parlez à eulx sçavoir que c'est ; et ayez vos gens tous prestz sur le port, affin que se ilz vouloient arriver par force que ilz en fussent contreditz. Et il fist le commandement de la royne, et vint aux barrières contre de deux tours du clos et leur demanda que ilz queroient. Et adoncques dist le chevalier qui aultresfois avoit esté en Chippre : Laissez-nous arriver, car c'est l'ung des frères du roy Urian qui luy vient au secours contre les Sarrazins. Adoncques quant le maistre du port oyt le chevalier, il le congneut et luy dist ainsi : Sire, le roy est parti d'icy trois jours y a, et s'en va à moult noble et riche armée vers le port de Iaphes ; car il ne veult pas que les Sarrazins arrivent en son pays ; mais dictes à son frère qu'il viengne, vous et luy, avec .l. ou .lx. en vostre compaignie, devers ma dame la royne, qui moult sera lie de vostre venue. Et celluy le dist à Geuffroy, qui tantost entra en une petite galiotte, et vindrent à la chainne, qui tantost lui fut ouverte, et entrèrent dedens. Et trouvèrent moult bonnes gens qui moult honnourablement receuprent Geuffroy et sa compaignie, et moult se donnèrent merveilles de son grant couraige et de sa fierté, et disdrent en eulx-mêmes : Ces frères conquerront moult de pays ; je crois bien que cestui ne repassera jamais en son pays tant qu'il aura conquesté pays decha. Et en ces choses disant vindrent là où la royne estoit, qui les attendoit en tenant par la main son filz Henri. Et à l'approchier de Geuffroy, elle s'enclina tout jus à terre, et aussi fist Geuffroy, et la drescha sus en

l'embranchant moult doucement et la baisa. Et aprez luy dist : Ma dame ma seur, Dieu vous doint joye de tant que vostre cœur desire. Et elle le bienveigna en lui monstrant grant signe d'amour. Et aprez Geuffroy prist son nepveu , qui estoit à genoulx devant luy , et le leva entre ses bras en luy disant : Beau nepveu , Dieu vous accroisse et vous ottroye bon amendement. Et l'enfant luy respondist : Grant mercis, bel oncle. Que vous feroie orés plus long compte? Geuffroy fut adonc moult joyeux , et fut le port ouvert et la navire mise dedens. Et quant ilz furent bien refrechis Geuffroy dist à sa seur : Madame, je m'en vueil aller ; baillez-moy maronnier qui bien sache la contrée de ceste mer, par quoy je ne faille trouver mon frère, et je vous en prie, ma treschère seur, tant comme je puis.

A ce respondist la royne : Mon treschier frère, à ce ne fauldré pas, car, par mon ame , je vouldroie qu'il m'eut cousté mille bezans pour tous perilz , et vous et vostre navire fussés là où monseigneur est ; car je sçay bien que de vostre venue il aura moult grant joye, comme il est de raison. Adoncques elle appela le maistre du port et lui dist : Alez , et me faictes arriver une galiote qui soit de .xvi. rames, et me querez le meilleur maronnier et le plus saige patron de galée qui soit demourant par decha , pour conduire mon frère par devers monseigneur. Et celluy tantost respondist : Par ma foy, ma dame, j'ai bien ung rampin tout prest et tout armé et advitaillé de ce qu'il fault ; il ne convient que mouvoir. Adonc fut Geuffroy moult joyeux , et print incontinent congié de sa seur et de son nepveu et de la compaignie, et vint au havre et entra en son vaisseau. Adonc le rampin fut devant, et les voilles

furent levées; lors ilz s'empaignirent en la mer, et allèrent si roidement que ceulx qui estoient au port en eubrent tost perdu la veue. Et la royne et ceux qui estoient avecques elle en la maistresse tour disdrent : Nostre Seigneur les conduise et les vueille retourner à joye. Or les vueille Dieu aidier, car ilz en ont bien besoing. Et ne demoura pas quatre jours, ainsi que vous oyrez cy aprez, que le roy Urian et sa navire se exploitèrent tant qu'ils virent le port de Iaphes et la grosse navire qui estoit là assemblée; et estoit jà le Calife venu, qui avoit fait traire dehors toutes ses gens; et le souldan de Barbarie, et le roy Anthenor d'Antioche, et l'admiral de Cordes avoient ainsi fait leur appareil, et n'y avoit à monter que les seigneurs et princes; et eurent conseil que le roy d'Antioche et l'admiral de Cordes feroient l'avant-garde, et tendroient le chemin de Rodes; et que illec prendroient terre et escriroient au caliphe et au souldan, affin que se ilz en avoient affaire, qu'ilz les sieveroient pour les secourir. Et ainsi fut ordonné et fait. Et partirent le roy et l'admiral à tout .xl. mille paiens, et tournèrent leur chemin vers Rodes, que oncques le roy Urian ne les perceut; et n'avoient esté que deux journées qu'ilz percurent le roy Guion et la navire de Rodes; et les cristiens l'apperceurent aussi; là eut grand effroy quant ilz eurent advisé l'un l'autre à cler, et qu'ilz se entre rencontrèrent. Lors se misrent cristiens en ordonnance et arches; adonques abordèrent ensamble; là eut grant occision et fière meslée, et eut à celluy poindre six navires sarrazines effondrées et peries en mer; et firent les cristiens moult bien leur debvoir, et se combatirent moult vaillamment; mais la force et la quantité des Sarrazins fut

moult grande, et eurent les cristiens fort à souffrir, et eussent esté desconfis se Dieu, par sa grace, n'eut elle part conduit Geuffroy et sa navire, ainsi comme vous oyrez cy aprez dire.

L'istoire nous dit que Geuffroy et ses gens senloient par la mer à voilles tendues et à force de vent qu'ilz avoient à fin souhet, et approchèrent le lieu où estoit la bataille; et tout premier le rampin qui le conduisoit les approcha de si prez qu'il les veioit combatre à l'eul. Lors vira tout court et dist à Geuffroy que chascun fut tout prest, car nous avons eu grans gens, et croy que ce soient nous gens et Sarrazins qui se combatent; or vous mettés en ordonnance, et nous retournerons veoir quieulx gens sont. Or allez, dist Geuffroy, et qui qu'ilz soient, j'aideray aux plus foibles, voire se ne sont mes frères. Et à ce mot partist le rampin, et vint jusques sur la bataille, et oyrent ceulx qui estoient dedens le rampin crier moult hault : Cordes et Anthioce; et d'autre part : Lusignen et saint Jehan de Rodes. Et lors vindrent à Geuffroy et dirent : Sire, se sont Sarrazins d'ung costé, et, d'autre part, cristiens Français Lusignen et saint Jehan de Rodes; mais certainement se n'est pas le roy Urian, mais croy, monseigneur, que c'est le roy Guion son frère et le maistre de Rodes, qui ainsi se combatent à Sarrazins qui sont sur mer. Or tost, dit Geuffroy, à eulx appertement. Et donc on tira les voilles à mont, et le vent se ferit dedens dont la navire fut si fort boutée que ce sembloit carreaulx d'arbalestre, et se ferirent par les navieres des Sarrazins par telle manière et vertu, qu'ilz les exillèrent tant qu'il ne demourent pas. iiii. navisseaulx ensamble d'une flotte, et crioient Lusignen à haulte voix, dont les hermins et ceulx de

Rodes cuidoiēt que ce fust le roy Urian qui venist de Chippre. Et adonc reprindrent grant cœur en eulx et se ravigoroient fort; et le roy d'Antioche et l'admiral de Cordes ralièrent leurs gens ensamble et coururent sur les cristiens de grant force; mais Geuffroy et ses gens, qui estoient frès et nouveaulx, leur coururent sus par telle manière qu'il sembloit qu'ilz fussent frisonnes. Adonc le vaisseau où Geuffroi estoit se borda au vaisseau où le roy Anthenor estoit, et se entregrapèrent à bons cros de fer; adonc saillist Geuffroy dedens le vaisseau du roy, et commença à faire moult grant occision de Sarrazins; et ses gens coururent de l'autre part, et se combatoient vaillamment et de si grant puissance qu'il n'y eut Sarrazin qui s'osast monstrier en nulle deffence; et en saillist pluseurs en la mer, qui cuidoiēt saillir au vaisseau de l'admiral de Cordes, qui estoit moult prez d'eulx, que le roy Guion assailloit par grande force; et toutesfois le roy Anthenor se sauva au vaisseau de l'admiral de Cordes, et fut tantost son vaisseau pillié de ce qui y estoit de bon, et puy fut effronné en mer; et le rampin costioit toujours les gros vaisseaulx et en perça jusques à quatre; de quoy ceulx qui estoient dedens ne s'en perceurent oncques jusques à ce qu'ilz se trouvèrent plains d'eau, et par ce leur convint perir en mer. La bataille fut moult fière et horrible, et l'occision fut hideuze; et à brief parler, les Sarrazins furent mis si au bas tellement que en eulx n'avoit point de deffence.

Moult fut la bataille dure, fière et aspre; mais sur tous les aultres se combatoit Geuffroy moult puissamment, et aussi faisoient Poetevins qui estoient avecq luy venus; et aussi faisoit Guion et le maistre de Rodes; mais ilz s'esbahissoient pour ce qu'ilz crioient Lusi-



gnen : mais adonc n'estoit pas heure de enquester. Adoncques le roy Anthenor et l'admiral virent bien que la desconfiture tournoit sur eulx , car jà ilz avoient perdu plus de deux pars de leurs gens ; si firent sçavoir au demourant qu'ilz se retirassent vers le port de Iaphes pour avoir secours ; et ilz s'estoient à boutez en un vaisseau d'avantaige, et prindrent la balange de la mer, et tirèrent les voilles amont, et s'en partirent de la bataille. Et quant les Sarrazins l'apperceurent, il s'en alla aprez qui peut ; mais les hermins et ceulx de Rodes en reculèrent la plus grant partie, qui furent mors et jettez tous à bort. Mais quant Geuffroy percut partir le roy et l'admiral de Cordes, il fist tirer ses voilles amont, et se mist aprez tout sa navire, et les suyt si asprement que en peu d'heure il eslongna les hermins, le roi Guion et le maistre de Rodes. Adoncques quant le rampin l'aperceut, il escria à ses gens à haulte voix : Aprez, aprez, beaulx seigneurs, car se Geuffroy perdoit son chemin qu'il ne tournast tantost vers monseigneur son frère , jamais je n'oseroie retourner vers ma dame. Et adonc le roy Guion congneut le rampin et lui demanda qui ces gens estoient qui leur avoient fait si grant secours. Par foy, sire, dist le patron, c'est Geuffroy au grant dent vostre frère, et frère au roi Urian. Quant le roy Guion l'entendit, il s'escria à haulte voix : Levez ces voilles, et vous hastés d'aller aprez mon frère, car, se je le pers, jamais n'auray au cœur joye. Et ceulx le firent et allèrent aprez le geondt. Mais le rampin alla devant si roidement que en peu de temps il eubt rataint Geuffroy, qui jà estoit prez des Sarrazins, qui approchoient le port de Iaphes. Or vous laisseray d'en parler, et vous diray du roy Urian, qui jà estoit venu sur le port, et

avoit de fait bouté le feu en leur navire; mais paiens les resçoirent le mieulx qu'ilz peurent, et toutesfois ilz n'y sceurent oncques tel remède mettre qu'il n'y eut plus de dix vaisseaulx ars, que grans que petis. Et fut moult grant l'estourmie.

En ceste partie nous dist l'histoire que tant sievyt Geuffroy au grant dent le roy et l'admiral, qu'ilz approchèrent fort du port de Iaphes, et se ferirent dedens, et Geuffroy aprez, et sa navire, que oncques ne voulut de y laisser entrer, pour chose que on luy monstrat, la grant multitude et peuple de Sarrazins qui jà estoient entrez en la navire qui estoit sur le port; et tantost commença Geuffroy la bataille, qui fut moult dure et moult forte, tant que de fait le roy et l'admiral se firent mettre à terre à ung petit basteau, et vindrent en la ville de Iaphes, où ilz trouvèrent le caliphe de Bandas et le souldan de Barbarie, qui furent moult esbahis de ce qu'ilz estoient si tost retournez, et leur demanda pourquoy c'estoit. Et ilz leur comptèrent toute l'adventure, et comment le roy d'Armanie et le maistre de Rodes estoient desconfis, se ne fut ung chevalier tout fourcené qui y survint à tout ung peu de peuple qui crioit Lusignen, et n'est nul qui puisse arrester contre luy; et veez le là où il se combat à nos gens, et c'est feru au havre parmy le plus dru, et tout ce qu'il ataint est destruit et mis en fin. Adonc quant le souldan l'entendit, il n'eut mie talent de rire, mais dist: Par Mahon, on m'a dit de pieça que moy et pluseurs aultres de nostre loy aurons moult affaire pour les hoirs de Lusignen; mais qui pourroit tant faire que on les tint par decha à terre, et nos gens fussent hors des navires, ilz seroient tous destruis à peu de paine. Par mon chief, dist le caliphe,

vous dictes verité; et puyz qui les auroit desconfis par decha, la terre par de là seroit moult legière à conquister. Par foy, sire, dist le souldan, vous dictes verité. Or faisons retraire nos gens hors des vaisseaux, et les laissons arriver paisiblement. Mais pour neant en parloient, car ilz en issirent, sans ce qu'il leur fut commandé, par Geuffroy, qui les assailloit par telle vigeur que, au costé où il estoit, mal eubt celluy qui demourast au vaisseau, que tous ne tirassent à terre. Et adoncq Geuffroy fist yssir toutes ses gens aprez, et les enchassa jusques en la ville de Iaphes; et tous ceulx qui peurent estre atains furent ruez tous mors à terre, et les fuyans entrèrent en la ville crians : Trahis! trahis! Lors furent les portes fermées, et vint chascun en sa garde. Et Geuffroy retourna à sa navire, et commanda à tirer les chevaux dehors, car bien affermoit que jamais ne s'en partira, pour mourir en la paine, tant qu'il aura fait tel enseigne au pays qu'il y ait esté encores.

L'istoire nous dist que, demaustiers que Geuffroy faisoit tirer les chevaux dehors, le rampin advisa les pavières et panons du roy Urian, qui moult fort escarmouchoit la navire aux Sarrazins, qui riens ne sçavoient que Geuffroy eut pris terre, car ils avoient prins la barge et le parfont du port, et le roy et l'admiral de Cordes avoient pris, et estoient arrivez dessoubz à l'estroit, qui estoit moult aisé à prendre terre, voire à bien peu de navire. Et lors rencontra le rampin le roy Guion et ses gens, qui luy demandèrent nouvelles de Geuffroy. Par mon chief, dist le patron, veez-le là où il a pris terre sur les ennemis, et les fait entrer par force en Iaphes; allez prendre terre avecques luy, car il a peu de gens, et Sarrazins ont pris terre. Et velà le roy Urian qui

escarmouche leur navire, à qui je vois anuncer vostre adventure et la venue de Geuffroy, son frère. Par foy, dist le roy Guion, ce fait à creancer. Et lors se ferist au havre, et le rampin exploita tant, qu'il vint au roy Urian et le salua treshaultement, et luy dist toute l'adventure ainsi comme vous l'avez oye, dont il regracia moult devotement nostre seigneur. Et adonques il s'escria à ses gens : Avant, seigneurs et barons, pensez de bien faire, car nos ennemis ne nous peuvent eschapper que ilz ne soient ou mors ou pris. Et s'en vindrent ferir aux navires si roidement, que Sarrazins furent tous esbahis et issirent hors de leurs navires qui miculx sceut, et s'en allèrent vers Iaphes. Et quant le caliphe et le souldan virent leurs gens qui estoient trais à terre, ilz mandèrent au roy Urian, par un truchement, qu'ils eussent trèves pour trois jours, et qu'il venist prendre place, et se logast, et fist refreschier ses gens, et au quart jour on luy livreroit bataille. Et le roy leur accorda volentiers, et le fist signifier au roy Guion et à Geuffroy, ses frères; et estoit jà le roy Guion trait à terre avec son frère, qui se entre-faisoient grande joye, et se logèrent au mieulx qu'ilz peurent. Et le roy Urian fist adonc mettre ses gens à terre, et fist tendre ses logis sur la marine, au devant de sa navire; et fist venir loger ses frères et le maistre de Rodes avec luy, et fist leur navire traire emprez la sienne. Adonques commença la joye à estre grande entre les frères, et fut leur ost nommé à estre en somme toute environ .xxii. mille, que archiers, que arbalestriers, que gens d'armes.

L'istoire dist que les deux frères et leurs gens se refreschirent et s'entrefirent moult grant joye les trois jours durans; mais en ce terme, le souldan de

Damas, qui sceut la venue des cristiens, manda au caliphe et à ses gens qu'ilz ne se combattissent pas sans luy, et qu'ils prénissent encores trois jours de trèves, et ilz si firent; et leur accorda le roy Urian. Et durant icelluy terme les fist le souldan desloger de nuyt, et s'en vindrent loger en la prarie soubz Damas, pour traire les cristiens plus avant au pays, car ilz avoient en intention que jamais pié n'en eschapperoit. Et avoit bien assemblé .xl. mille paiens, et les aultres estoient bien quatre-vingz mille; ainsi estoient tous en nombre .vii. vingz mille Sarrazins; et nous gens n'estoient sur le tout que .xxii. mille. Mais quant ilz sceurent que Sarrazins estoient partis, ilz furent moult doulens, car bien cuidoient qu'ilz s'en fussent fuys; mais pour neant s'en doubtoient, car avant trois jours les eurent en barbe, et leur donnèrent tant d'affaire, qu'ilz furent tous embesognez d'eulx deffendre. Lors vint ung truchement sur ung dromadère, qui descendist en la tente des frères et les salua moult sagement; et les frères luy rendirent son salut; et celluy les regarda tous trois moult longuement avant qu'il parlast, car moult se donnoit merveilles de la grant fierté qu'il veoit estre en eulx trois, et par special à Geuffroy, qui estoit le plus grant et le plus fourni des aultres, sans comparaison; et veoit la dent qui luy passoit la lèvre de plus d'ung grant pouce en esquare; il en fut si esbahi que à peine peut-il parler. Mais toutesfois il dist au roy Urian : Sire roy de Chippre, le caliphe de Bandas, le souldan de Barbarie, le roy Anthenor d'Antioche, l'admiral de Cordes et le roy de Dannette vous mandent par moy qu'ilz sont tous pretz de vous livrer bataille, et vous attendent ès prez qui sont des-soubz Damas, ès belles tentes et pavillons; et vous

mandent que vous y pavez venir seurement loger devant eulx, et pourrez prendre place telle qu'il vous plaira; et vous donnent trèves depuys que vous serez logez; et cependant de commun accord vous adviserez place où la bataille se fera; et par adventure, quant vous aurez vu leur puissance, vous trouverez aulcun amiable et bon traictié à messeigneurs, car certainement à leur force ne pourrez contrestre, tant sont fors. Et quant Geuffroy entendist ceste parolle, il luy dist : Va à tes rois, à ton souldan, à ton caliphe, et leur dis que s'il n'y avoit tant seullement que moy et mes gens, si les iroie combattre; et leur dis que de leur trève n'avons-nous que faire. Et quant tu vendras à eulx, dis-leur que je les deffie; et tantost, toy parti d'icy, je feray assaillir Iaphes et mettre tout à feu et à flamme, et tout ce que je trouveray dedens de Sarrazins, je les feray tous mourir; et leur dis, à ton passer à Iaphes, qu'ilz se pourvoient bien, car je les iray presentement visiter et assaillir. Quant le truchement oyt ceste responce, il fut tout esbahi, et vint sans plus dire sur son dromadère et monta; car il avoit si grant paour de la fierté qu'il avoit veue à Geuffroy, que tousjours regardoit derrière luy, de paour qu'il avoit de lui qu'il ne le sievist, et dist en soy-mesmes : Par Mahon, se tous les autres fussent telz, nos gens recepveroient moult grant perte avant qu'ilz fussent desconfis. Adoncques il vint à Iaphes et leur dist comment Geuffroy au grant dent les vendroit tantost assaillir, et qu'il avoit juré qu'il metteroit à l'espée tous ceulx qu'il y trouveroit. Adonc furent moult esbahis; et sachiés qu'il s'enfuyt vers Damas bien la moetié des gens de la ville, et emportèrent leur finance. Et tantost Geuffroy fist sonner ses trompet-

tes et armer ses gens, et alla incontinent assaillir la ville, que oncques ne la voullut laisser à faire pour ses frères; et jura Dieu qu'il y monstera telles enseignes que on congnoïtera qu'il aura esté en Surie. Mais cy se tait l'istoire de luy, et parle du truchement, qui erra tant qu'il vint au logis des Sarrazins devant Damas.

En ceste partie nous dist l'istoire que tant chevaucha le truchement son dromadère, qu'il vint en l'ost devant Damas, et trouva à la tente du caliphe les deux souldans, le roy Anthenor, l'admiral de Cordes et le roy Gallofrin de Dannette, et pluseurs aultres, qui lui demandèrent nouvelles des cristieus. Et le truchement leur respondit : J'ay bien fait vostre message; mais quant je eulx dis que quant ilz auroient veu vostre puissance, que par adventure ilz feroient bon traictié à vous, et que à vous ne à vos gens ne pourroient resister, adonc l'ung d'eulx, qui a grant dent qui luy sault de la bouche devant, n'attendist pas que le roy de Chippre respondist, mais dist ainsi : Va dire à tes royx et à ton souldan que de leurs trèves que faire n'avons, et que se il n'y avoit seulement que luy tout seul et ses gens, si vous combateroit-il; et me dist oultre que aussitost comme je vendroie à vous que vous rendisse vos trèves, et que vous vous gardissies de luy; et plus, qu'en despit de vous tous il iroit assaillir Iaphes, et qu'il metteroit le feu partout, et qu'il feroit tout mettre à l'espée, et aussi que je leur disse au passer; et ainsi je l'ay fait. Et sachiés que la moetié de ceulx de la ville sont venus après moy. Et tantost que je fus parti, je oy ses trompettes sonner pour aller assaillir. Et que pensez-vous que c'est grant hideur de veoir le maintieng et la fierté du roy



Urian, de Guion et de son frère, et de toutes leurs gens. Sachies que au samblant qu'ilz monstrent, il leur samble que vous ne les devez mie attendre, et especialement celluy au grant dent n'a paour seulement que vous vous enfuyez devant qu'ilz puissent venir à vous. Et quant le souldan de Damas l'entendit, il commença à soubzrire, et luy respondist : Par Mahon, à ce que je puy veoir de vostre hardiesse, vous serez le premier qui assablerez la bataille contre celluy au grant dent. A quoy respondist le truchement : Or soye maudit à l'eure ne au jour que j'en approucheray que je puisse, qu'il n'y ait une grosse ripvière, ou les tours, ou les murs de Damas ou de quelque autre fort lieu, entre moy et luy, ou aultrement Mahon me puisse confondre. Et lors se print chascun à rire de ceste parolle. Mais tel en rist qui puy en eut pleuré se il eut eu loisir. Or vous diray que Geuffroy fist : Il fist assaillir Iaphes, et de fait la print à force, et mist à l'espée tout tant qu'il peut trouver de Sarrazins, et en fist vuidier l'avoir et les garnisons, et porter en l'ost et aux vaisseaux, et puy fist bouter le feu partout ; et, ce fait, retourna aux logis, et requist à ses frères qu'ilz lui baillassent le maistre de Rodes et ses gens pour faire l'avant-garde. Et ilz luy accordèrent ; dont le maistre de Rodes fut moult joyeux ; et celle nuyt se reposèrent jusques au matin.

Le lendemain au matin, comme l'histoire nous tesmoingne, aprez la messe oye, se desloga l'avant-garde, et puy la grosse bataille et le sommaige, et puy l'arrière-garde ; et fut moult grant noblesse de veoir partir l'ost en moult belle ordonnance. Adonc vint une espie à Geuffroy, qui luy dist : Sire, cy à demie-lieue d'icy sont environ mille Sarrazins qui

s'en vont ferir à Baruth pour garder le port de la ville. Auquel Geuffroy demanda : Me sçauras - tu conduire là ? Par ma foy, Sire, dist l'espie, oy. Adonques Geuffroy dist au maistre de Rodes qu'il conduist l'avant-garde, et qu'il bouta le feu partout sur le chemin, afin qu'il ne faulst point à le trouver à la trasse de la fumée ; et le maistre luy dist que si feroit-il. Adonc s'en partist Geuffroy avec l'espie ; si s'en alla devant, et apperceut les Sarrazins qui avalloient d'ung tertre. Et lors luy monstra l'espie les Sarrazins, dont Geuffroy fut moult joyeux et hasta ses gens. Et quant il les eut ratins il jura : Par dieu, gloutons, vous ne me povez eschapper. Et se ferit entre eulx, et abbatit le premier qu'il ataindit par terre ; puy tira l'espée et fist merveilles d'armes, et ses gens d'aulture costé. Que vault le long parler ? Sarrazins furent pou, sy ne purent endurer le faitz, et s'en tournèrent en fuyant vers Baruth, et nos gens aprez. Quant les Sarrazins de Baruth virent venir les fuyans, ilz les congneurent, et avallèrent le pont et ouvrirent la barrière et la porte. Et adonc les fuyans entrèrent dedens. Mais Geuffroy les sievyt si asprement, qu'il entra par la meslée avecques eulx dedens la ville à bien cincens hommes d'armes. Qui furent esbahis, que Sarrazins ? Et quant il fut entré dedens la porte, il la commanda à garder tant que ses gens fussent venus. Et adonques commença la bataille à estre moult fière ; mais neantmoins Sarrazins ne peurent durer, et s'enfuyrent vers la porte de Triples, qu'ilz firent ouvrir ; et lors qui avoit bon cheveu il ne l'oublia pas, mais ferit des esporons tant qu'il peut vers la porte de Triples ; et les aucuns qui furent mieulx montez s'enfuyrent vers Damas ; et Geuffroy et ses gens

misrent tout à l'espée et delivrèrent toute la ville des Sarrazins, que mal soit de piet qui oncques en eschappa, ne qui demourast, que tous ne fussent mors, sinon ceulx qui s'enfuyrent. Adonc Geuffroy fist jetter les mors en la mer, et advisa la ville, qui estoit forte à merveilles, et le chasteau qui seoit sur la mer, et le beau clos garny de belles tours pour garder la navire. Adonc dist Geuffroy que par ses bons dieux ce bon port il vouldroit garder pour luy, et y laissa .viii. vingz arbalestriers et deux cens hommes d'armes de ses gens, et y sejourna toute celle nuyt; et le lendemain print congié de ses gens, et alla aprez l'ost au train de la fumée, ainsi qu'il avoit dit au maistre de Rodes, qui moult avoit grant paour que Geuffroy n'eut aucun empeschement; et aussi avoient ses frères, auxquieulx il n'en avoit riens fait assavoir. Atant se taist l'istoire de plus parler d'eulx, et parle des fuyans de Iaphes qui vindrent à l'ost devant Damas, en la tente du souldan, où les aultres roys estoient, et leur comptèrent moult piteusement la destruction de Iaphes, et comment cristiens avoient tout mis à l'espée et arcé la ville. Quant les Sarrazins l'entendirent, ilz furent moult doulens. Par Mahon, dist le souldan de Damas, moult sont cristiens durs gens et qui peu doubtent. Ilz voient bien que contre le grant peuple que nous avons ilz ne pourroient avoir victoire, et font samblant que point ne nous doubtent ne craignent gaires, non plus que si nous fussions aussi peu de gens comme ilz sont. Par Mahon, dist le souldan de Barbarie, se ilz estoient maintenant tous cuitz, et s'il estoit accoustumé de mengier telle cher, il n'y en a pas assez pour repaistre nous et nos gens. Par ma loy, se il n'y avoit ores que moy et mes gens, il n'en re-

passera jà piet delà la mer. Adoncques quant le truchement l'ouyt, il ne se peut tenir de parler; toutes-fois luy dist tout hault : Sire souldan, se vous aviés veu maintenant le roy Urian, le roy Guion son frère, et la contenance et la manière de leurs gens, et la grant, horrible et ressongneuze fierté de Geuffroy à la grant dent, son frère, il ne vous prendroit jà volenté de les menasser comme vous dictes. Et sachiés bien que avant que la besoingne soit faicte vous n'aurez pas si bon marché comme vous en faictes maintenant. Et si ay maintes fois ouy dire que tel menasse qui a aulcunefoys grant paour, et qui puy est abattu. Adoncques quant le souldan de Damas entendist les mos du truchement, si luy dist : Par Mahon, beau sire, il y a en vous grant hardiesse; à ce que je vois, vous vouldriés ores estre institué au premier front de la bataille pour rencontrer Geuffroy à la grant dent. Et il luy respondist : Par ma foy, sire souldan, se il n'est rencontré d'aulture que moy, il peut bien venir seurement, car je tourneray toujours le talon devers luy d'une grosse lieue ou de deux de loing. Adonc commença grande la risée; mais tantost eurent aultres nouvelles dont ilz n'eurent talent de rire, car les fuyans de Baruth vindrent au logis et leur comptèrent le dommaige et la pitié de Baruth, et comment Geuffroy à la grant dent les avoit chassé par force, et tout le demourant occis. Et par Mahon, sire souldan, sachiés qu'il n'a talent de fuyr, car il a gaigné Baruth de vivres bien garni, et s'en vient moult grant erre par decha; et ne voit-on que feu et flamme par tout le pays, et sont tous les chemins plains de Sarrazins mors. Adonc quant le souldan de Damas l'entendit, il fut moult doulent. Par Mahon, dist-il, je croy fermement que celluy au

grant dent a le diable au corps. Adoncques, dist le souldan de Barbarie : je me doubte qu'il ne m'avienne ce que on m'a dit. Et quoy ? dist le souldan de Damas. Par mon chief, dist celluy, on m'a dit aultresfois que je seroie destruit par les hoirs de Lusignen et par pluseurs aultres, et nostre loy en affoiblira. Lors n'y eut si hardi Sarrazin qui ne tremblast de paour. Et cy se tait l'istoire d'en plus parler, et commence à parler de Geuffroy.

En ceste partie nous dist l'istoire que tant erra Geuffroy que il trouva l'avant-garde où le maistre de Rodes estoit, qui luy fist moult grant feste et fut moult joyeux de sa venue ; et luy demanda comment il avoit exploité. Et luy compta comment luy et ses gens, à l'aide de Dieu, avoient gaigné Baruth, et par force ont chassé hors grant partie de ceulx qui estoient dedens, et le demourant occis ; et comment il avoit laissé à la garder certain nombre de ses gens et des vivres grant plenté. Par Dieu, dist le maistre de Rodes, vecy bonne besongne et haultement executé. Et tantost furent ces nouvelles publiées parmy l'ost. Et tantost qu'elles vindrent à la cognoissance du roy Urian, que si tost qu'il le sceut en fut moult joyeux, et à bon droit ; et dist au roy Guion, son frère : Par mon chief, moult est Geuffroy de grant travail et de haulte puissance ; il fera encores moult de bien, se Dieu luy donne longue vie. Par foy, dist le roy Guion, mon frère, vous dictes verité. Moult longuement allèrent les deux frères ensemble parlans de Geuffroy ; et tant chemina atout son host, qu'il se loga ung soir sur une petite ripvière, à cincq lieues de Damas. Et illec leur vindrent leurs espies, qui leur disdrent toute la contenance des Sarrazins. Adoncques eurent conseil

leurs gens ensamble qu'il estoit de faire. Et fut ordonné entre eulx que le lendemain l'ost se logeroit à une lieue prez des Sarrazins, sur une ripvière, et de là veoient Damas à la main droite. Et ainsi fut fait. Lendemain matin se desloga l'ost, et fut defendu que nul ne fust si hardy qui boutast point le feu en son logis ne ailleurs, affin que les Sarrazins ne apperceussent si tost leur venue. Et à brief parler tant cheminèrent qu'ilz vindrent au lieu, et se logèrent tous ensamble; et firent celle nuyt moult noble guet devers leurs ennemis; et soupa-on parmy l'ost, et couchèrent tous armez la nuyt. Et ung peu apres la minuyt, Geuffroy monta à cheval, avec luy mille combatans, et print une garde qui bien sçavoit le pays, et s'en ala devers l'ost des Sarrazins tout le couvert. Et avoit assez prez ung peu de bois qui duroit environ d'une demie-lieue; et là s'embucha, et manda en l'ost qu'ilz fussent tous prestz comme pour recueillir leurs ennemis.

L'istoire nous tesmoingne que Geuffroy, au point du jour, monta à cheval, à tout deux cens combatans; et commanda à ceulx de l'embuche que pour chose nulle qu'ilz veissent qu'ilz ne se debuchassent point tant qu'ilz les vissent ressortir et ceux qui les chasseroient; puis s'en alla escarmoucher l'ost. Lors se partist Geuffroy, et vint sur une petite montaigne entre le point du jour et le soleil levant; et vit l'ost tout quoy, et n'oyoit riens comme se il n'y eut eu nulluy. Adonc fut moult doulent quant il ne sceut plus tost leur commune : car, se ses frères eussent esté là, ilz eussent eu grant marché de Sarrazins; et non obstant il jura Dieu que puy que il estoit si prez, que il leur feroit sçavoir sa venue. Adoncques dist Geuffroy à ses compaignons : Chevauchons fort,

et gardez bien que vous ne soiez pas endormis, et que vous ne facés point de noise tant que le vous diray. Et ilz disdrent que non feroient-ilz. Adonques chevauchèrent ensamble tout couvertement, et entrèrent en l'ost, et virent bien que ilz dormoient de tous costez. Et Geuffroy regarda, et vit le grant peuple qui y estoit, et dist en ceste manière : Par foy, se c'estoient gens de foy, ilz seroient moult à doubter. Adonques chevauchèrent ensamble jusques au milieu sans eulx riens meffaire. Et Geuffroy advisa une moult riche tente, et cuida bien que ce fut la tente au caliphe ou à ung des souldans, adonc dist à ses gens : Il est temps d'esveiller ceste matinaïlle, car ilz ont trop dormi. Or avant, enfans, pensez bien de mettre tout à mort ce que vous rencontrerez. Adonques s'en vindrent à la tente et entrèrent dix chevaliers de Poetou qui estoient descendus, et tirèrent bonnes espées et ferirent parmy bras et parmy testes. Là commença la noise à estre moult grande; et en celle tente estoit le roy Gallofrin de Danette, qui saillit hors de son lit, et bien s'en cuida fuyr par derrière. Mais Geuffroy l'advisa, et luy donna si grant coup de l'espée qui fut pesante et tranchant comme un raisouer, qui le fendit jusques à la cervelle; et le Sarrazin chait tout mort. Mal soit du piet qui oncques de la tente eschappa. Adonques commencèrent à crier Lusignen à haulte voix, et s'en retournèrent par où ilz estoient venus, tuans et abbatans tout ce qu'ilz rencontrèrent en leur chemin. Adonques l'ost s'esmut, et chascun cria : Aux armes ! La nouvelle vint en la tente du souldan de Damas, qui dist : Quelle noise est ce que j'ay oye là dehors ? Adonc ung Sarrazin qui venoit de celle part, qui avoit la destre partie de la teste trenchée



tellement que l'oreille luy gisoit sur l'espaule , luy dist : Sire, ce sont dix diables qui se sont ferus en vostre host, qui tuent et abbatent tout ce qu'ilz rencontrent en leur chemin. Ilz vous ont jà occis vostre cousin le roy Gallofrin de Dannette , et crient Lusignen à haulte voix. Quant le souldan l'entendist, il fist sonner ses trompettes, et s'armèrent parmy l'ost. Adonc le souldan ferit après, atout .x. mille Sarrazins. Et Geuffroy alloit atout ses gens parmy l'ost, faisant moult grant occision et grant dommaige aux Sarrazins, car ilz furent desarmez et ne peurent durer. Et sachiés que avant qu'ilz partissent de l'ost, ilz misrent à mort et navrèrent plus de huit mille Sarrazins. Et quant ilz furent hors des logis, ilz s'en allèrent tout le pas, et le souldan aprez hastivement.

Moult fut le souldan de Damas doulent quant il apperceut l'occision que les cristiens avoient fait à ses gens, et jura par Mahon et Appolin que bien s'en vengeroit tost, et dist que jamais n'auroit pitié de cristien que tous ne soient mors et detruitz. Lors issist du logis à dix mille paiens et sievyt Geuffroy moult asprement, et aprez luy venoient Sarrazins qui le sievoient. Et Geuffroy commanda à ses gens de fuyr vers l'ost, et il se bouta au bois avec ceulx qui y estoient en embuche, pour les ordonner. Et le souldan moult despourveuement à force de cheveu le sievoit, et passa par devant l'embuche au lieu où il estoit, et il envoioit les fuyans à l'avant-garde pour eulx adviser de ce fait. Le maistre de Rodes estoit jà monté et s'estoit jà mis soubz la banière en belle bataille au dehors des logis, et estoit bien à huit mille combatans, comprins les gens de trait; et quant il percut nos gens qui venoient, et le souldan avec les Sarrazins qui les chassoit à desroy, il leur vint à l'en-

contre et les receipt en sa bataille et les fist mettre en arroy. Et lors s'en allèrent à l'encontre du souldan les lances baissées , et là eut moult fière asssemblée , car en peu d'eure furent les Sarrazins desconfis ; car si bien les recueillirent les cristiens que peu en y eut qui n'abatist le sien aux lances baisser ; là crioient Lusignen et Rodes. Quant le souldan percut la perte , il recula tout le pas en rassamblant ses gens et attendant les aultres qui venoient ; et tant qu'il rassambla jusques à dix mille ; mais Geuffroy saillist de l'embuche et ferist luy et ses gens sur ceulx qui sievoient le souldan sans ordonnance , et en peu d'eure en y eut trois mille de mors par les chemins et par les sentiers. Adoncques s'en refuyoient plusieurs vers l'ost , et trouvèrent le caliphe de Bandas , le souldan de Barbarie, le roy Anthenor et l'admiral de Cordes, qui leur demandèrent dont ilz venoient. Et ilz disdrent que ilz venoient de la bataille où le souldan de Damas estoit desconfit. Adoncques ilz furent moult desconfortez, et ne sceurent que faire ; mais tousjours venoient Sarrazins refuyans qui disoient comme les premiers. Or vueil retourner à la bataille.

Moult fut la bataille horrible et cruelle, et se porta le souldan de Damas moult bien la journée depuis qu'il eut rallié tous ses gens. Lors vint Geuffroy de Lusignen qui leur couroit sus d'ung costé, et d'aultre le maistre de Rodes ; là eut maint Sarrazin occis. Que vault le long compte ? Ilz se sentoient assaillis de tous costez ; si ne se peurent plus tenir et se commencèrent à desconforter. Et quant le souldan percut sa perte , il issist de la bataille et tourna la targe derrière le dos et ferit le cheveu des esporons, et s'en alla grant alleure vers l'ost des paiens ; et Geuffroy

estoit à ce costé , qui bien l'aperceut aller , et bien veoit à son riche harnois que c'estoit , et qu'il convenoit que ce fut ung des grans seigneurs des Sarrazins. Lors brocha le cheveu des esporons aprez le souldan , et luy escrie : Retourne devers moy , ou tu es mort ; car je auroie grant vergoingne se je te feroie par derrière ; et toutesfois , se tu ne te retourne , faire le me convient. Et quant le souldan oy ce mot , si hurta le cheveu des esporons plus fort que devant. Et adoncques le cheveu si s'en va si roidement qu'il sambloit que ce fut foudre qui descendit du ciel ; et Geuffroy s'en alla aprez grant erre , et estoit moult dolent de ce que il ne le pavoit ataindre ; et toutesfois il l'approcha fort , et luy escria : Sarrazin , tu es faulx recreant , quant tu es si fort monté et si noblement armé , que t'enfouys pour ung homme seul ; retourne , ou je te occiray en fuyant , combien que je le fais moult enuis. Adoncques quant le souldan oyt dire à Geuffroy qu'il s'enfuyoit pour ung seul homme , il en eut en soy-mesmes grant vergongne. Et adoncques se retourna à la cornire du bois prez de l'ost , au propre lieu où Geuffroy avoit mis et assis l'embuche la matinée ; adoncques il arresta le cheveu et s'en retourna devers Geuffroy , et joindist la targe au bois , et mist la lance sur la faulce , et demanda à Geuffroy qui venoit de grant randon : Dy , va , cristien , qui es-tu , qui si hastivement me suys ? Par Mahon , tu pourras bien avoir fait ton dommaige. Et Geuffroy luy respondist ainsi : Je pense bien à estre venu pour le tien ; mais puy que mon nom veulz sçavoir , je le te diray , car pour toy ne le veulz-je pas celler ; je suys Geuffroy au grant dent , frère au roy Urian et Guion , roy d'Armanie. Et tu , qui es ? Par Mahon , dist le souldan , et tu le sçauras ; je suys souldan de

Damas. Et sachiez que je ne fusse pas si joyeux qui m'eut donné cent mille besans d'or comme je suys de t'avoir trouvé si à mon aise ; car tu ne me peus eschapper ; je te deffie de par Mahomet mon dieu. Par mon chief, dist Geuffroy, ne toy ne ton dieu ne prisé-je pas ung chien pourri. Car tantost me trouveras de plus prez à la pute estrainne ; se il plait à Dieu mon createur, tu ne me eschapperas mie.

Or dist l'istoire que les deux barons, qui furent de noble cœur et de haulte puissance, se eslongnèrent l'ung de l'autre et joindirent leurs targes contre leurs pis, et brandirent leurs lances, estraingnans le costé et embrochèrent leurs heaulmes ès chiefz, comme vaisseaulx espers et durs au mestier d'armes, et laissèrent contre les chevaux tant comme ilz peurent et vindrent ferir des fers des lances agus et trenchans sur le comble de l'escu par telle manière qu'il n'y eut nerf qui ne fut percé de part en part ; les fers des lances vindrent joindre sur les pièces d'acier de si grande force qu'il n'y eut si bon cheveu qui ne chancellassent ; le souldan ploya ung peu l'eschine, et vola sa lance en pièces ; et la lance Geuffroy estoit de plançon de fresne moult fort ; et y emploia toute sa force ; mais oncques ne peut empirer la pièce ; toutes fois le souldan fut tellement ataint qu'il convint le maistre et le cheveu voler par terre, et fut tellement estourdi qu'il ne veoit ne entendoit. Adoncques Geuffroy cuida descendre pour sçavoir en quel point il estoit ; mais adonc il apperceut venir bien .lx. Sarrazins qui luy escrièrent : Par foy, faulx cristien vostre fin est venue. Et quant Geuffroy l'entendist il brocha le cheveu des esporons et brandit la lance et le premier qu'il ataindit il le fit voler par terre tout mort. Ainçois que la lance luy faulsist, il tir

l'espée et l'empoingna fermement; et qui eut là esté il eut veu vaillance de cœur d'omme en deffendant sa vie; et abatoit Sarrazins autour de luy, car la place estoit toute vermeille de sang; et ilz luy jettoient lances et dars, et le painnoient moult fort de l'ater-rer; et adonc le souldan revint à soy et se redressa sus, tout estourdi, comme se il venit de dormir, en sursault; il advisa de costé luy, et monta, et regarda la bataille, et bien advisa Geuffroy qui lui faisoit moult grant occision de Sarrazins; et estoit Geuffroy navré en plusieurs lieux. Adonc s'escria le souldan: Avant, frans Sarrazins; par Mahon, s'il nous eschappe je n'auray jamais le cœur joyeux; car qui cestuy pourroit avoir affiné, le demourant ne seroit gaires à doubter. Adoncques Geuffroy fut assailly de toutes pars, et il se deffendoit hardiement, et tant que nul Sarrazin l'osoit attendre, mais luy jettoient de loingz lances et dars, et luy jettoient sajettes de pluseurs lieux; mais il ne sambloit pas qui luy en fut de riens, mais leur couroit sus comme loup familieux sur les brebis. Par Mahon, dist le souldan, ce n'est pas ung homme, mais ung grant diable, ou le dieu des cristiens qui cy est venu pour destruire nostre loy. Et pour vray en ceste adventure fut Geuffroy bien par deux heures.

En ce peril et painne fut Geuffroy tant que le nouvel chevalier qui avoit esté avec luy en Guerlande, lequel l'avoit bien veu partir aprez le souldan, lequel le sievyt bien à deux cens bassines, car il l'aimoit parfaitement. Et adoncques, quant il approcha du bois, il appercent la bataille et vit le souldan qui moult se penoit de dommager Geuffroy, qui se combatoit seul aux gens Mahomet. Mauldit soit-il qui ne luy aidera maintenant de tout son pover !

Benoit soit-il de Dieu ! Et ceulx respondirent : Mal out Sarrazins rencontré sa venue. Adoncques brochèrent les chevaux tous ensemble et vindrent à la bataille. Mais aussi tost que le souldan apperceut le secours , il brocha le cheveu des esporons et s'en alla vers l'ost, et laissa ses gens en celle adventure , qui fut telle que oncques puis n'en vit pié en vie ; car tantost furent mors et occis. Adoncques, quant Geuffroy vit le nouvel chevalier qui l'avoit si bien secouru , il le mercia treshumblement et luy dist : Mon ami, telles roses fait-il bon mettre en son chappel. Le sire qui a son hostel garni de telle chevalerie et de gentillesse, amant et craignant honneur, doit seurement reposer. Sire, dist le nouvel chevalier, je n'ay fait chose dont vous me devez point de guerdon , car tout preudomme doit prendre garde de l'honneur et du prouffit de son maistre et de son seigneur ; et donc , puis que c'est chose due , il ne chiet point de guerdon. Mais partons d'icy , il est bien temps de reposer, vous avez assez fait journée qui doit bien souffrir , et aussi nous sommes peu de gens et prez de nos anemis , qui ont grant puissance, et si avez mestier que vous plaies soient visitées , et aussi il me semble qu'il vault mieulx que nous retournons vers l'ost de nostre volenté que par force. Il nous convient retourner, car il n'est mie doute que qui retourne fuyant ou chassé de ses ennemis , qu'il ne peut avoir ce sans blâme , combien que on dit souvent qu'il vault mieulx fuyr que une folle attente. Adonc Geuffroy, qui sceut bien que à bon droit le disoit, luy respondist ainsi : Beau sire, nous croirons à ceste fois vostre conseil. Et s'en partirent de la place , et s'en allèrent vers leurs logis , et trouvèrent en leur chemin les champs jonchez de Sarra-

zins tous mors. Et sachiés que les Sarrazins perdirent celle matinée plus de .xxv. mille Sarrazins, qui furent tous mors par faitz d'armes, que on reporta en l'ost que cristiens faisoient, et s'enfuyrent d'aulture part bien .xl. mille. Et sachiés que le caliphe et les deux souldans et le roy Anthenor et l'admiral de Cordes ne trouvèrent, de sept vingz mille Sarrazins qui estoient au soir, que quatre vingz mille, dont ilz furent tous esbahis. Or diray de Geuffroy, qui retourna en l'ost, où il fut moult bien festoié de ses frères et de la baronnie, et furent toutes ses playes visitées par le mire, qui dist qu'il n'y avoit chose dont il laissast point l'armer; tous en louèrent Dieu. Or vous diray du souldan.

L'istoire nous dist que quant le souldan fut parti de la ville, il erra tant qu'il vint à son host, où il trouva ses gens tous esbahis, car ilz cuidoient qu'il fut mort. Et quant ilz le visrent, ilz luy firent moult grant joye et reverence, et luy demandèrent comment il avoit exploité. Par Mahon, dist le souldan, petitement, car mes gens sont tous mors. Et incontinent le souldan se desarma et leur compta toute l'aventure, et reposèrent les deux hostz celle nuyt sans courir l'ung sur l'autre.

En ceste partie nous dist l'istoire que le tiers jour pour matin firent armer nous gens tout leur host par batailles, et laissèrent gardes pour garder les logis et les navrez, dont aulcun en y avoit de mors, mais non gaires, et s'en allèrent cheminant, les banières au vent, en bataille rengée. En l'avant-garde estoit Geuffroy et le maistre de Rodes et leurs gens, et bons arbalestriers sur les elles; et en la grosse bataille estoit le roy Urian, et en l'arrière-garde Guion. Et tant exploitèrent qu'ilz virent l'ost des Sarrazins.



Adoncques là eut grant effroy, et les Sarrazins crioient à l'arme ; mais avant qu'ilz peussent estre ordonnez, Geuffroy et le maistre de Roddes se firent ès logis et y firent grant occision ; et reculèrent les deux souldans , le caliphe , l'Anthenor et l'admiral de Cordes , tout hors de leur logis ; et là ordonnèrent leurs batailles ; et nos gens passèrent parmy leurs tentes sans y arrester, prendre ne piller quelque chose , car ainsi estoit crié sur la hart. Adonc ilz visrent leurs ennemis rengez sur les champs , lors leur coururent sus. Là eut moult grant et horrible mortalité aux batailles assemblées ; bien assailloient cristiens et bien deffendoient Sarrazins. Là eut moult grant noise et moult grant triboulement ; l'ung crioit Damas , l'autre Barbarie , l'autre Bandas , l'autre Antioche , l'autre Cordes , et nos gens crioient Lusignen. Là eut mains mors renversez l'ung sur l'autre ; les batailles furent assamblées toutes en une. Là firent les trois frères tant d'armes , que tous ceulx qui les veoient en estoient tous esbahis. Le souldan de Damas et le souldan de Barbarie apperceurent les trois frères qui faisoient grant occision de Sarrazins ; si leur coururent sus atout .xx. mille paiens. Là reforcha moult fort la bataille , et souffrirent cristiens moult grant affaire et se reculèrent le long d'une lance. Et quant les trois frères et le maistre de Roddes les virent courir sur nos gens , ilz en furent moult doulens. Adonc commencèrent à crier moult fort : Lusignen ! Avant , frères , barons , seigneurs ! ceste chienaille ne se peut plus gaires tenir ! Adonc cristiens se revigorèrent et firent une pointe aux Sarrazins. Là fut la mortalité moult grant , et greigneur assez que devant. A tant vint Geuffroy parmy la bataille , la targe tournée derrière le dos , et tenoit

l'espée empoignée à deux mains , et vit l'admiral de Cordes qui moult courroit sur les cristiens ; adonc le ferit Geuffroy de telle vertu , à ce que l'espée fut pesante et dure , et qu'il y mist toute sa force , que l'espée luy coula jusques à la cervelle , que oncques le bassinet ne le peut garder , et l'abbatit à terre tout mort. Là fut moult grant la foulle et la presse des gens , car les deux souldans y amenèrent toute leur puissance , et cuidoient bien redresser l'admiral , mais cestoit pour néant , car il estoit jà mort. Adonc vint le roy Urian l'espée au poing , et advisa le souldan de Barbarie , qui moult le haioit pour son oncle , qu'il avoit occis en Chippre ; adont le roy entoisa l'espée et ferit le souldan de si grant force qu'il luy envoya le bras tout jus , qu'il ne tenoit mais que à deux tendans dessoubz l'esselle. Lors , quant il sentist le coup , il s'en partist de la bataille et se fist mener par dix de ses hommes à Damas , et là se fist appareiller , et toujours se combatoient les Sarrazins , car le souldan de Damas , et le caliphe de Bandas , et le roi Anthenor , les tiennent en vertu. Là eut moult grant douleur et moult grant pestilence , et sachiés de vray que les cristiens y eurent moult grant dommaige ; et aussi , comme il est trouvé en la vraye histoire , furent les payens dommaigez , et firent perte de leurs gens de bien .xl. mille Turcs ; et dura la bataille jusques au soir , qui se partirent et se retirèrent chascun en son logis , et le lendemain au matin se retrait le caliphe et le roy Anthenor dedens Damas , avec eulx le remanant de leurs gens ; et quant le roy Urian et nous gens le sceurent , ilz s'en vindrent loger devant Damas. Et sachiés bien qu'ilz estoient affoiblis et en avoit la plus grant partie de navrez. En tel estat se reposèrent jusques à huict jours , sans assault ne

escharmouche faire à la ville, ne ceulx de dedens ne firent en celluy temps aulcune saillie sur l'ost des cristiens.

L'histoire nous dist que moult fut le roi Urian et ses frères et le maistre de Rodes courroucez de la perte de leurs gens, et bien veoient se les Sarrazins criassent point de gens nouveaulx qu'il leur en pourroit bien mal venir; car ilz avoient bien perdu huict mille de leurs gens, que ungz que aultres. Et d'aulture part furent les souldans en la ville moult esbahis; car ilz ne sçavoient pas la perte que les cristiens avoient eue. Et eurent conseil qu'ilz requerroient au roi Urian journée de traictié sur forme de paix, et ilz le firent. Et le roy eut conseil qu'il l'accorderoit; et fut la journée assignée par accord au tiers jour entre les logis et la ville; et furent les trèves données ce pendant, et eurent bons ostages. Et adonc vindrent ceulx de la ville en l'ost marchander, acheter et vendre de leurs marchandises. Lors vindrent à la journée les Sarrazins et leur conseil; et d'aulture part vint Urian et tous les barons de l'ost des cristiens et parlementèrent de moult de choses l'ung avec l'autre ensamble; et tant firent de chascune part qu'ilz furent d'accord parmy ce que les Sarrazins leur donneroient tout ce qu'ilz avoient froyé par le voyage, et aussi pour eulx en retourner dont ilz estoient venus; et que chascun an ilz devoient payer au roy Urian .xxx. mille besans d'or, et furent entre les deux parties trèves jusques à cent ans et ung jour; et en furent donnez chartres et lettres, et seellées. Et ce convenant le souldan de Barbarie, qui fort se douloit de l'espaule que le roy Urian lui avoit blessée, et le roy d'Antioche, ratifièrent que jamais ne porteroient dommaige au roy Urian, au

roy Guion et au maistre de Rodes, ne à leurs gens ; et se aultres roix sarrazins leur vouloient faire dommaige, que ilz leur feroient assavoir, si tost qu'il viendrait à leur congnoissance. Et parmy ce, le roy Urian leur promist que s'ilz avoient guerre à nul roy sarrazin pour ceste cause, que il leur viendrait aidier à tout sa puissance ; et pareillement le promirent le roy Guion et le maistre de Rodes. Et ainsi fut fait l'accord, et se retirèrent les frères et leurs gens au port de Iaphes ; et les convoièrent le souldan de Damas et le caliphe de Bandas et le roy Anthenor et moult d'aultres nobles Sarrazins. Et estoit le souldan enamouré de Geuffroy, et luy tenoit toujours compagnie, et s'ouffroit de luy faire plaisir le plus qu'il pouvoit faire. Et Geuffroy l'en mercia. Puy le dit souldan mena Geuffroy en Iherusalem, qui n'estoit pas encore réparée de la destruction que Vespasien et Titus, son filz, y avoient fait, quant ilz allèrent venger la mort Ihesucrist .xl. ans aprez le crucifiement, à laquelle vengeance ilz donnèrent .xxx. Juifz pour ung denier, en ramembrance qu'ilz avoient achetté le corps Ihesucrist .xxx. deniers. Et demoura Geuffroy trois jours au sépulcre en dévotion ; et cependant y allèrent le roy Urian et le roy Guion, ses frères, et le maistre de Rodes, et moult grant foison de cristiens.

En ceste partie dist l'istoire que tant sanglèrent Geuffroy et ses gens par la marine, qu'ilz arrivèrent ung soir à la Rochelle, où il fut bien festoié ; et lendemain s'en partist et alla tant par ses journées qu'il vint à Marment, où il trouva son père et sa mère, qui jà sçavoient comment luy et ses frères avoient besogné oultre mer ; et festoièrent moult Geuffroy ses frères, et tint Raimondin moult grant

cour, et donna de beaulx dons à tous ceulx qui avoient esté avec Geuffroy en celluy voyage; et dura bien la feste par l'espace de huict jours; et au neu-fiesme jour s'en partirent, et tindrent chascun d'eulx pour contens. Or advint en celluy temps qu'il y avoit ung grant gayant en Guerende, qui accueilloit ung grant orgueil, et par sa force il mist tout le pays à patis jusques en la Rochelle; et en estoient les gens du pays moult chargez, mais ilz n'en osoient mot sonner ne riens dire. Nouvelle en vint à Raimondin, qui moult en fut doulent; mais il n'en monstroït samblant, de paour que Geuffroy ne le sceut, pour doubte qu'il n'alast combattre le gayant; car il le congnoissoit de si grant cueur qu'il ne laisseroit point qu'il n'y allast; mais il ne peut estre si cellé que Geuffroy ne le sceut. Et venu à sa congnoissance il dist : Et comment diable, mes deux frères et moy avons tant fait que nous avons treu du souldan de Damas et ses complices, et ce matin, qui est seul, tiendra le pays de mon père à patis? Par mon chief, mal le pensa, car il luy coustera moult chier; et jà n'y laissera aultre gaigne que la vie. Adoncques vint à son père, et luy dist : Monseigneur, j'ay grans merveilles de vous, qui estes chevalier de si hault affaire, comment vous avez tant souffert de ce matin Guedon le gayant qui a mis vostre pays de Guerende à patis, et l'aultre pays, tant à vous comme à aultruy, jusques à la Rochelle. Par Dieu, monseigneur, c'est honte pour vous. Adonc, quant Raimondin l'entendist, si luy dist : Geuffroy, beau sire, sachez qu'il n'y a gaires que nous n'en sçavons riens; et ce avous-nous souffert jusques à vostre joyeuse venue; car nous ne voulons pas troubler la feste; mais ne vous en chaille, car Guedon sera bien païé de sa deserte;

jà luy occist mon père son aieul en la conté de Ponthiène, comme on m'a dist en Bretaigne, quant je y fus combatre Olivier du Pont de Leon, pour la traison que Josselin son père avoit faicte à Henri de Leon.

Adoncques respondist Geuffroy : Ne sçay ne vueil enquester des choses passées; puy que mes predecesseurs en ont eu l'onneur et en sont venus au-dessus il me souffist; mais de present, ceste injure sera bien tost, se Dieu plaist, amendée. Monseigneur, il ne vous en fault jà mouvoir; pour un tel ribault, par le dent Dieu, je n'y meneray que dix chevaliers de mon hostel pour moy tenir compaignie, non pour aide que je vueil avoir contre lui, mais pour moy tant seulement acompaignier pour mon honneur; et à Dieu vous commant, car je ne fineray jamais que je l'auray combatu corps à corps; ou il m'aura, comment qu'il soit, ou je l'auray, au plaisir de Dieu. Et quant Raimondin entendist ceste parolle, il fut moult iré et luy dist : Puy qu'il ne peut estre autrement, va t'en à la garde de Dieu. Et adoncques il prist congié de son père et de sa mère, et se mist en chemin luy onzième de chevaliers, et s'en alla vers Guerende, là où il pensoit plus tost trouver le gayant Guedon; et par tout enquestoit de luy, et en enquestant, bien est vray que on luy en dist nouvelles, et luy demanda-on pour quoy il le demandoit. Par foy, dist Geuffroy, je luy apporte le patis qu'il a pris par son fol oultrage sur la terre de monseigneur mon père, qui est en la pointe du fer de ma lance; car jamais, tant que je vivray, n'aura aultre patis, et en deusse morir en la painne. Adoncques, quant les bonnes gens l'ouyrent ainsi parler, ilz luy disdrent : Par ma foy, Geuffroy, vous vous entremettés

de grant folie ; car cent telz comme vous estes ne luy pourroient durer. Ne vous chaille, dist Geuffroy ; n'en ay jà doubte ; laissez moy en avoir la paour tout à par moy. Et ceulx se teurent et ne l'osoient courouer, car ilz doubtoient trop la fierté dont il estoit plain , et le menèrent à une lieue de son receipt et luy disdrent que tantost le pourroit trouver. Et il leur respondist : Et je le verray moult voulentiers , car pour le trouver suys-je cy venu. Et si se taist l'istoire de plus parler de Geuffroy, et commence à parler de Raimondin et Melusine.

L'istoire nous tesmoingne que Raimondin et Melusine estoient à Marment, et vint à ung samedi que Melusine se abscondist celluy jour ; et Raimondin, comme est dit, lui avoit promis que jamais le samedi ne se metteroit paine de la veoir, et aussi n'avoit-il fait jusques à celluy jour, et n'y pensoit à nul mal ne aultre chose quelconques de nulle presumption de mauvaisetié, fors tant seullement que bien. Or fut vray que ung peu devant disner luy vindrent nouvelles que son frère, le conte de Forestz, le venoit veoir, dont il fut joyeux ; mais depuys il en fut moult couroucé, ainsi comme cy aprez vous orrez en la vraye histoire. Adoncques Raimondin fist grant appareil et moult noble pour recevoir son frère ; car moult estoit joyeux de sa venue. Pour fin de compte, et à brief parler, il vint à luy encontre, et le receipt moult liement, et aprez allèrent à la messe, et, le service divin fait, ilz vindrent en la salle et lavèrent leurs mains et se assirent et furent moult bien servis. Las ! orrez se commença une partie de la douloureuse tristesse ; car Raimondin ne pensoit à nul mal, et toutes fois son frère ne s'en peut tenir qu'il ne lui dist et demandast sa femme, et fut la manière telle : Mon



frère, où est ma sœur? Faictes-la venir avant, car j'ai moult grand desir de la veoir. Beau frère, dist Raimondin, elle est embesoingnée quant est pour au jour d'uy, et ne la povez veoir; mais demain la verrez et vous fera bonne chièrre. Adonc quant l'autre oynt ceste responce, il ne se teut pas, mais luy dist ainsi: Vous estes mon frère, je ne vous doibs pas celler vostre deshonneur. Or, beau frère, je vous diray: le commun langaige court que tous les samedis elle est avec ung aultre en fait de fornication; ne vous n'estes mie si hardi, tant estes aveuglé d'elle, de enquerre ne de sçavoir où elle va; et les autres dient et maintiennent que c'est une esperit fae, qui tous les samedis fait sa penitence. Or ne sçay lequel croire; pour ce que vous estes mon frère, je ne vous doibs pas celler votre deshonneur; et pour ce suys-je cy venu pour le vous dire. Adonc quant Raimondin entendist ces motz, il bouta la table en sus de luy et entra en sa chambre tout espriz d'ire et de jaleuzie; et prinst son espée qui pendoit à son chevet et la sçaindist, et alla au lieu où il sçavoit bien que Melusine alloit tousjours le samedi, et trouva un moult fort huys de fer, et qui estoit bien espés; et sachiés de vray que oncques mais il n'avoit esté si avant. Adonc quant il apperceut l'uys, il tira l'espée, et mist la pointe encontre, qui moult estoit dure, et tourna et vira tant qu'il fist ung pertuis; et adonc regarda dedens et vit Melusine qui estoit en une moult grande cuve de mabbre, où il avoit degrez jusques au font. Et estoit la cuve de la grandeur bien de xv. piés au tour, et au quarré il y avoit allées bien de cinq piés d'espès large; et là se baignoit Melusine, et faisoit sa penitence en l'estat que vous orrez cy aprez.

*Comment Raimondin, par l'admonestement de son frère, regarda Melusine sa femme estant au baing, et comment il en fut couroucé contre son frère.*

**E**n ceste partie nous dist l'histoire que tant vira et ravira Raimondin, qu'il fist un pertuys en l'uys, de la pointe de son espée, par quoy il peut adviser tout ce qui estoit dedens la chambre, et vit Melusine qui estoit en la cuve jusques au nombril en signe de femme, et peignoit ses chevelx; et du nombril en bas en signe de la queue d'une serpente grosse comme ung quaque à harenc, et moult longuement debatoit sa queue en l'eau, tellement qu'elle le faisoit bondir jusques à la voulte de la chambre. Adonc quant Raimondin vit ce, il en fut moult doulent, et dist : Ma doulce amour, or vous ay-je traye par le tresfaulx enortement de mon frère, et me suis parjuré envers vous. Adonc il en eut moult grant douleur en son cueur, et telle tristesse que cueur humain ne pourroit plus porter. Adonc il courut en sa chambre et prinst de la cire en une vielle lettre qu'il trouva, et en estouppa le pertuys; et puy il vint en la saïlle, où il trouva son frère. Et quant il apperceut, il vit bien qu'il estoit couroucé, et cuida qu'il eut trouvé quelque mauvaistié en sa femme; si luy dist : Mon frère, je le sçavoie bien; avez-vous bien trouvé ce que je disoie? Adonques Raimondin luy escria en ceste manière : Fuyez d'icy, faulx triste, car vous m'avez fait, par votre tresmauvais rapport, ma foy parjurer contre la plus loyalle et la meilleure des dames qui onc-

ques naquît, aprez celle qui porta nostre seigneur Ihesucrist; vous m'avez apporté toute douleur, et en perdray toute ma joye. Par Dieu, se je creioie mon cueur, je vous feroie mourir de malle mort; mais raison naturelle me deffent de ce faire, pour tant que vous estes mon frère; allez-vous en, ostez-vous d'icy et de devant mes yeulx; que tous les maistres d'enfer vous puissent convoier en enfer. Et quant le conte percut son frère qui estoit en si grant douleur, il saillist de la salle, et aussi toutes ses gens, et monta à cheveu et s'en alla grant erre vers la conté de Forestz, moult fort doulent et repentant de sa folle entreprise, car bien sçavoit que Raimondin son frère, ne la mère, jamais ne le voudra veoir. Cy vous laisseray de plus parler, et vous diray de Raimondin, qui entra en sa chambre.

Ha, ha, Melusine, dist Raimondin, de qui tout le monde disoit bien, or vous ay-je perdue sans fin; or ay-je perdue joye à tousjours mais; or vous ay-je perdue, beaulté, bonté, douceur, amitié sans courtoisie, charité, humilité, toute ma joye, tout mon confort, mon esperance, mon cueur, mon bien, mon pris, ma vaillance; car tant peu d'onneur que Dieu m'avoit presté me venoit de vous, ma douce amour. Ha, ha, faulce borgne, aveugle fortune, sure, dure et amère, bien m'a mis du hault siège de ta roe au plus bas lieu de ta maison où Jupiter abeuvre les chetifz maleureux; tu soies ores de Dieu mauldicte. Par toy fis-je le fourfait de mon treschier seigneur; or le me veus trop; hélas! tu m'avoies jetté et mis en la haulte auctorité par le sens et valleur de la meilleure des meilleurs, de la plus belle, de la plus sage des plus saiges. Or la me fault maintenant perdre par toy, faulce borgne, triste envieuse; bien est fol qui

en tes dons se fie. Or hais, or aimes, or fais, or defais et despite ; il n'y a en toy seureté et stabilité, ne qu'il y a à un cochet au vent. Las ! tresdoulce amie, je vous ay, par mon velin et traison, tachée ; hélas, ma doulce amie, vous m'aviés medeciné de mon premier velin ; or le vous ay cruellement merité comme je vous ay ainsi tachée et ay ma foy perdue ; se je vous pers pour ceste cause, je m'en iray en exil en tel lieu où on n'aura jamais nouvelles de moy. Ainsi comme vous avez ouy se dementoit Raimondin.

Or nous dist l'istoire que en celle douleur et en celle misère demoura Raimondin jusques au jour ; et, quant l'aube du jour fut apperceue, Melusine vint, qui entra en la chambre. Adoncques quant Raimondin l'ouyt venir, il fist samblant de dormir ; elle se despoulla et se coucha toute nue de costé luy ; et lors Raimondin commença à souspirer comme celluy qui sentoit grant douleur en son cuer ; et adoncques elle l'embracha et luy demanda en ceste manière : Monseigneur, que vous faut-il ? estes-vous malade ? Et, quant Raimondin vit qu'elle n'eut parolle de riens, il cuida qu'elle ne sceut rien de ce fait ; mais pour neant le cuida, car elle sçavoit bien qu'il ne l'avoit descouvert à arme ; elle se souffrist quant à l'eure, et ne luy en monstra nul samblant, dont il fut moult joyeux, et luy respondist : Madame, j'ai esté ung peu malade, et ay eu ung peu de fièvre en manière de continue. Monseigneur, dist Melusine, ne vous esbahissez pas, car vous serez tantost gari, se Dieu plaist. Et adoncques celluy, qui fut moult joyeux, lui dist : Par ma foy, m'amie et ma dame, je me sens jà tout adoulcé de vostre venue. Et elle luy respondist qu'elle en estoit toute joyeuse. Et quant il fut temps d'eulx lever, ils se levèrent et allèrent ouyr

la messe , et fut tantost le disner prest , et ainsi demoura tout le jour ; et le lendemain prinst congié Melusine , et s'en alla à Nyort , où elle fist bastir une forteresse , et adoncques elle fist deux tours jumelles qui encores y sont . Et cy s'en taist l'istoire , et parle de Geuffroy , et comment il vint en Guerende .

Cy nous dist l'istoire que Geuffroy arriva en Guerende et y fut receu à moult grant joye , et tantost demanda où le gayant Guedon se tenoit ; et là estoit qui bien lui enseigna ; mais ils demandèrent avant pour quoy il le queroit . Par foy , dist Geuffroy , je le vous dirai : je luy apporte du patis que toutes les gens de monseigneur mon père luy doibvent en la pointe de ma lance . Comment , disdrent-ilz , le pensez-vous aller combattre à par vous ? Par foy , dist Geuffroy , pour aultre chose ne le quiers-je en ce pays . Par ma foy , Monseigneur , se disdrent-ilz , c'est une folle entreprinse , car il a esté combatu par maintes journées de pluseurs , aulcunes foys de cent , autrefois de deux cens ; autrefois de trois cens , et autrefois de mille ; et sachiés que nous n'y veismes oncques riens conquerer ; comment y penseriés-vous donc tout seul resister à sa puissance ? Or ne m'en parlez plus , dist Geuffroy , car sachiés qu'il aura tout ou qu'il n'aura riens . Or me menez où il repaire ; et ilz luy menèrent tant qu'ilz virent en une montagne une grosse tour qui surveoit par cinq lieues le pays d'environ , et estoit la tour moult bien fossoïée , et les fossez bien curez , et bonnes tours et haultes , et au parfont des fossez dehors bons murs , et fut la tour bien garlandée , et y avoit deux pons levis , et furent les murs drus semez de fortes tours . Et lors ilz disdrent à Geuffroy : Monseigneur , voiez là la tour de Monjouet , où Guedon le gayant se tient ,

et sachiés que, se vous nous voulez croire, il vous suffira assez d'avoir veu la tour, et vous en viendrez avecq nous, car, quant à nous, nous n'y rions point avant avecques vous pour le pesant de vous de bon fin or. Par foy, dist Geuffroy, je vous mercie de ce que vous si avant m'avez amené; et se descendist pour soy armer.

Geuffroy adonc, comme nous dist l'histoire, descendist de son cheveu et s'arma, et puy çaignit l'espée, où il se fioit moult; après bouta le bon basinet, et monta à cheveu, et demanda l'escu, et le pendist au col, et prinst une masse d'acier qu'il pendist à l'arçon de sa selle, et puy prinst un cor de voirre et le pendist à son col, et demanda sa lance, et puis dist à ses dix chevaliers en ceste manière : Beaulx seigneurs, attendez-moy au font de ceste vallée, et, se Dieu me donne victoire sur le gayant, je sonneray ce cornet. Adonc, quant vous l'orrez, vous viendrez tantost à moy; et ceulx le commandèrent en la grace de Dieu, qui furent doulens de ce qu'il ne les laissoit aller avec luy. Et tantost se partist Geuffroy, et monta la montaigne, et vint à la porte de la basse tour, et la trouva ouverte, et aprez s'en alla vers la tour, qui moult estoit forte à merveilles. Adoncques, quant il fut prez, il la regarde, et fort luy pleut la fasson de la tour; adonc Geuffroy regarda et vit que le pont de la basse court et de la haulte estoient levez, car le gayant dormoit. Adoncques s'escria à haulte voix en disant en ceste manière : Filz de putain et faulx gaient, vien parler à moy, car je t'apporte l'argent du pays que les gens de monseigneur mon père te doibvent. Et pour vray tant cria Geuffroy que le gayant s'esveilla et vint à une fenestre, et regarda Geuffroy tout armé sur le destrier, et la lance sur la

isse ; et aussi Geuffroy l'advisa, qui estoit si grant si membré 'et de fières contenance. Adoncques y escria à haulte voix : Chevalier, que veulz-tu ? Par mon chief, dist Geuffroy, je te quiers et non aultre, et te vien challenger, et apporte le treu que tu as eslevé sur les gens de Raimondin de Lusignen. Adonc quant le gayant l'entendist, à peu qu'il n'esraga de fin dueil quant il vit le corps d'ung seul chevalier qui luy commence à faire guerre et le va querir ainsi hardiement jusques à son recept ; mais non obstant ce, quant il se fut bien advisé il considéra en luy mesmes que il estoit homme de grande vaillance. Adoncques s'arma le gayant, et lassa le beaulme, et prinst ung flayal de plomp à trois chaines et une grant faulx d'acier, et vint au pont et l'abassa, et vint à la court, et demanda à Geuffroy : Qui es-tu, chevalier, qui me viens requerer si hardiement ? Et adoncques Geuffroy tantost luy respondist en ceste manière : Je suis Geuffroy au grant dent, filz à Raimondin de Lusignen, qui vien challenger le patis des gens de monseigneur mon père. Adonc quant Guedon l'entendist, il commença à rire et lui dist ainsi : Par foy, follet, pour la grant haultesse et hardiesse de ton cueur, j'ay pitié de toi ; or te vouldroie faire grant courtoisie, c'est que tu t'en retournes sans beste vendre ; car sachiez se tu estoies toy et cinq cens telz comme toy, si ne pourroies endurer ma puissance ; mais pour pitié que j'ay de mettre à mort ung si vaillant chevalier, comme je cuides que tu soies, je te donne congié que tu t'en retournes à Raimondin ton père ; et va tantost d'icy, et pour l'amour de toy je quitte tous les gens de ton père jusques à ung an du treu qu'ilz me doibvent. Adonc quant Geuffroy ouyt qu'il le prisoit si peu, il en fut



doulent et luy dist en ceste manière : Meschante creature, tu as jà grant paour de moy, et je respons que de ta courtoisie ne tiens-je conte, car tu la me veulx faire pour aulcune doubte que tu as de moy. Or sachiez bien de certain que jamais ne me partiray de ceste place jusques à tant que je t'auray la vie ostée du corps, et pour ce aiez pitié de toy et non mie de moy, car je te tien pour mort là où tu es, et de present je te deffie, de Dieu mon createur. Adonc quant le gayant l'ouyt, il fist samblant de rire, disant ainsi : Geuffroy, follet, tu viens en la bataille, et ne pourras endurer ung seul coup de moi sans voller par terre. Adoncques Geuffroy sans plus dire ferist le chevau des esporons et mist sa lance soubz son bras, et s'adressa vers le gayant tant que le chevau peut courir, et le ferist de la lance au fer tranchant emmy le pis par tel'e vertu qu'il le fist voller par terre, la panse contremont; mais le gayant saillist sus moult couroucé, et au passer que Geuffroy fist il ferist le chevau de la faulx si que luy trencha les garres de derrière. Adonc quant Geuffroy le sentist, il descendist jus moult legierement, et s'en vint vers le gayant l'espée traicte. Adonc luy vint le gayant à l'encontre, la faulx empoignée, et là eut fière bataille.

---

*Comment Geuffroy occist le gayant en Guerende.*

**A**insi, comme vous avez ouy, fut Geuffroy à piet devant le gayant qui tenoit la faulx au poing, et cuida ferir Geuffroy; mais il tressaillist, et, au retourner, il ferist de l'espée sur la manche de la faulx, si que il la tronsonna en deux; et le gayant prinst adonc son flayel et en donna à Geuffroy moult grant coup sur le bassin, tant que il fut prezque estourdi. Et adoncques il bouta l'espée au fourrel et vint au destrier qui gisoit par terre, et prinst la masse d'acier et s'en vint au gayant, qui voulut enteser son flayal; mais Geuffroy le hasta tellement que il luy escout le flayal de la main; et, ce voyant, le gayant mist la main en son sain, où il avoit mis et apporté trois marteaulx de fer, et en prinst l'ung et le jetta à Geuffroy par grant ire; et le coup chait sur la manche de la masse auprez du poing, si que il la fist voler par terre, et saillist, et la leva. Et adonc Geuffroy traist l'espée et vint au gayant, qui le cuida ferir de la masse d'acier sur la teste; mais Geuffroy, qui fut fort et legier, tressaillist, et le gayant saillist, et le coup volla à terre par telle vertu que la teste de la masse entra plus d'ung piet dedens la terre. Et Geuffroy ferist adoncques le gayant, sur le bras destre, de l'espée et de toute sa force; l'espée fut moult bone et bien trenchant, et luy trencha le bras, si que il vola par terre. Adoncques fut le gayant moult esbahi quant il eut ainsi le bras perdu; et pourtant il haulça l'espée de l'autre main, et cuida ferir Geuffroy au pis; mais il s'en garda bien et le ferist de l'espée sur la

jambe, au dessoubz du genoul, par telle puissance, qu'il la trencha en deux. Et adonc le gayant chait et jetta ung si treshorrible et hault cry que toute la vallée en retentist; et bien l'ouyrent ceulx qui at-  
tendoient Geuffroy; mais ilz ne sceurent pas certainement que ce fut; mais ilz eurent grant merveille de si horrible son. Et adoncques couppa Geuffroy au gayant les las du heaulme et puy luy trencha la teste. Et adoncques il prinst son cornet et sonna par si tresgrant vertu que bien l'ouyrent ses gens qui l'at-  
tendoient en la vallée, et aussi firent aucuns du pays qui estoient demourez en ladicte vallée; et adoncques sceurent que le gayant estoit mort, et en louèrent Nostre Seigneur Jhesucrist devotement. Ilz montèrent sur la montaigne et vindrent sur le fort, où ilz trouvèrent Geuffroy qui crioit à ceulx du pays: Jamais ce triste ne vous tiendra en ses patis; il n'a à present talent de le vous demander. Et quant ilz apperceurent le corps du gayant et la teste qui estoit d'aulture part, ilz furent tous esbahis de sa grandeur, car il avoit bien xv. piez de long, et disdrent adonc à Geuffroy qu'il avoit oultrage de soy avoir mis en si grant peril d'avoir osé assaillir ung si grant deable. Par ma foy, dist-il, le peril en est passé: car, beaulx seigneurs, je vueil bien que vous sachiés que jamais ne commenceroit, ne seroit nulle chose assommée, et faut avoir en chascune chose commencement et moyen que la fin viengne et qu'elle prengne fin.

---

*Comment Froimond, frère de Geuffroy, fut rendu moyne à Maillières.*

**M**oult furent adonc les chevaliers esbahis, comme nous racompte l'istoire, de ce que Geuffroy avoit occys le gayant, et aussi furent-ilz de la grandeur du gayant, et fut tantost la nouvelle esbandue parmy le pays, et aussi ès pays marchissans entour. Et aussi Geuffroy transmist à son père, par deux de ses chevaliers, la teste d'icelluy gayant, et entretant il s'en alla esbatant parmy le pays, où il fut bien festoyé et receu à grant joye, et luy fist-on de moult riches presens. Or cy vous laisseray à present de parler de luy, et vous diray de Froimond, son frère, qui tant pria son père et sa mère qu'ilz luy accordèrent qu'il seroit rendu moyne à Maillières, et y fut vestu par le consentement de son père et de sa mère, et en fut l'abbé moult joyeux, et aussi fut tout le couvent. Et sachiés qu'ilz furent leans jusques au nombre de cent moynes, à compter l'abbé; et, se lors ilz eurent grant joye de la venue Froimond, ilz eurent depuys grant douleur, comme vous orrez ci-après racompter. Mais sachiés que ce ne fut mie pour le fait de Froimond, car il estoit moult devot, et fut tant comme il fut leans de moult estreite vie; mais pour raison de luy il advint leans une merveilleuse adventure, ainsi comme vous orrez ci-aprez. Il est vray que les deux chevaliers que Geuffroy avoit envoyé par devers son père porter la teste du gayant Guedon firent tant qu'ilz vindrent à Marment, où ilz trouvèrent Raimondin, et luy présentèrent la teste du gayant,

de par Geuffroy, dont il fut moult joyeux ; et fut la teste moult regardée, et s'esmerveilloit chascun comment Geuffroy l'avoit osé assaillir. Et adonc Raimondin fist escrire à Geuffroy une lettre comment son frère Froimond estoit rendu moynne à Maillières. Helas ! tant mal fist que ce fut la cause de la triste douleur de la partie de sa femme, dont puy n'eut joye au cuer, ainsi comme vous orrez ci-aprez. Vray est que Raimondin fist adoncq beaulx dons aux chevaliers, et leur bailla la lettre, et leur dist qu'ilz luy saluassent Geuffroy et qu'ilz portassent la teste du gayant à Melusine, qui estoit à Nyort, car ilz ne se tordoient de gaires. Et adoncques se partirent les deux chevaliers, et tirent tant qu'ilz vindrent à Nyort, où ilz trouvèrent leur dame, et la saluèrent de par son filz Geuffroy, et luy présentèrent la teste du gayant, dont elle fut moult joyeuse, et l'envoya à La Rochelle, et fut mise sur une lance à la porte Guiennoise ; et donna Melusine aux deux chevaliers de moult riches dons. Et eulx aprez prindrent congié et s'en allèrent vers la tour de Monjouet, où Geuffroy se tenoit volentiers. Et cy se taist l'istoire et parle d'une autre chose.

L'istoire nous dist que la nouvelle fut tantost espandue par moult de pays comment Geuffroy à la grant dent avoit occis le gayant Guedon en bataille, et en furent moult esbahys tous ceulx qui en oyrent parler ; et pour lors regnoit en Northobelande ung gayant qui avoit nom Grimault et estoit le plus cruel que on eut oncques mais veu ; et sachiés qu'il avoit .xvii. piedz de hault, et celluy grant dyable se tenoit emprez une montaigne qui est nommée Brumblenlio. Et sachiés de vray qu'il avoit destruit tout le pays d'illec environ, et tant qu'il n'y avoit

personne qui osast habiter à .viii. ou à .ix. lieues prez, et estoit tout le pays gasté, car les gens y avoient tout abandonné, et, de fait, luy avoient tout laissé. Or advint qu'ilz ouyrent les nouvelles, en celluy pays, comment Geuffroy avoit occis et destruiect le gayant Guedon; adonc ilz eurent conseil qu'ilz envoieroient devers Geuffroy et qu'ilz luy offriroient, se il les vouloit delivrer de ce cruel murtrier, tous les ans qu'il viveroit, x. mille besans d'or, et que, se il avoit hoir masle de son corps, qu'il possederait d'hoir en hoir tant qu'il viendrait de lignée en lignée de fille, mais lors en vouloient estre quites. Dont ilz eslirent huict messagiers des plus notables du pays, et les envoierent devers Geuffroy. Et adoncques chevauchèrent tant qu'ilz vindrent à Monjouet, et là le trouvèrent et luy comptèrent leur messaige. Et quant Geuffroy les entendist, il leur respondist promptement : Beaulx seigneurs, je ne reffuse pas l'offre que vous m'avez faicte; nonobstant, se je n'eusse maintenant eu nouvelles de vous, sachiés bien que tout sans cela je fusse ores allé combatre le gayant pour aulmosne et pour pitié du peuple qu'il destruiect, et aussi pour honneur acquerir. Sachiés que je m'en iray tantost avecques vous sans nul delay, et, à l'aide de Dieu, je pense à exillier le gayant. Et ceulx l'en mercièrent moult.

---

*Comment le messagier de Raimondin vint devers  
Geuffroy en Guerende.*

**L**ors vindrent les deux chevaliers qu'il avoit envoie devers son père, et le saluèrent moult honnourablement de par son père et de par sa mère, et luy comptèrent la bonne et joyeuse recueille et les beaulx dons qu'ilz avoient eu. Par foy, dist Geuffroy, beaulx seigneurs, ce me plaist. Et puy luy baillèrent les lettres de par son père. Et Geuffroy les prinst et rompist la cire, et vist la teneur des lettres faisant mention comment Froimond, son frère, estoit rendu moyne à Maillières. Adoncques Geuffroy se courouça et monstra si cruel samblant qu'il n'y eut oncques si hardi qui autour de luy osast demourer, mais vuidèrent tous la place, excepté les deux chevaliers et les ambassadeurs de Northobelande.

En ceste partie nous dist l'istoire que, quant Geuffroy congneut les nouvelles de Froimond, son frère, qui estoit vestu moyne à Maillières, qu'il fut si doulent que à peu qu'il ne saillist de son sens. Et sachiez de vray que mieulx sambloit estre en fourcenerie que aultre chose. Adonc il parla en hault et dist : Comment ! monseigneur mon père et madame ma mère n'avoient-ilz pas assez pour Froimond mon frère faire riche, et luy donner de bon pays et de bonnes fortresses, et de le richement marier, sans le faire moyne ? Par le dent Dieu, ces moynes flatteurs le comparront, car ilz l'ont enchanté et surtrait leans pour en mieulx valoir, et, comment qu'il soit, il ne s'en partira jamais. Par Dieu, il ne me despleut onc-



ques mais tant. Par la foy que je doibz à Dieu et à tous ceulx à qui je doibs foy, par toy, je les paieray tellement que jamais ne leur tiendra de faire faire moyne. Adonc dist aux ambassadeurs de Northobelande : Seigneurs , il fault que vous m'atendez cy jusques que je retourne , car il me faut aller à ung mien affaire qui moult fort me touche. Et ceulx qui l'ouyrent garmenter luy disdrent : Monseigneur , il soit à vostre volenté. Lors fist Geuffroy monter à cheveu ses dix chevaliers, et aussi il s'arma et monta à cheveu , et se partist de Monjouet esprins de moult grant couroux et de grant hayne contre l'abbé et les moynes de Maillières. Et pour lors estoient l'abbé et ses moynes en chappitre. Et Geuffroy, venu au lieu, entra , l'espée çainte à son costé , audit chappitre, et, quant il vit l'abbé et ses moynes, si leur dist tout hault : Comment ! ribaulx moynes, qui vous a donné la harðiesse d'avoir enchanté mon frère tant que par vostre faulce cautelle vous l'avez fait devenir moyne ? Par le dent Dieu , mal le pensates , car vous en beuvrez ung mauvais hanap. Ha , ha , sire , dist l'abbé, pour Dieu mercy, veuillez vous informer de raison ; par mon createur, ne moy ne moyne qui soit ceans ne luy conseillasmes oncques. Adonc saillist Froimond avant, qui bien cuidoit appaisier l'ire de Geuffroy, et luy dist : Mon chier frère, par l'arme que j'ay à Dieu rendue, il n'y a personne ceans qui oncques me le conseillast, que je le ay fait de mon propre mouvement, sans conseil d'aultruy et par droite devotion. Par mon chief, dist Geuffroy, si en seras païé avec les aultres ; il ne me sera jà reprouché que j'aye moyne frère ; et adoncques il saillist hors, et tira bon huys à luy, et le ferma bien et fort, et fist à toute la maisnie de leans apporter feurre et

buche, et aprez fist bouter le feu, et jura Dieu que il les arderoit tous là dedens. Adoncques vindrent les dix chevaliers avant, qui moult le blasmèrent, et disdrent que Froimond estoit en bon propos, et que encore par son bien fait et sa prière il pourroit bien faire moult grant allegement aux ames de ses amis. Par la dent Dieu, dist Geuffroy, ne luy ne moyne de leans ne chanteront jamais messe ne matine que tous ne les arde. Adoncques s'en partirent les dix chevaliers de luy, et luy disdrent qu'ilz ne vouloient pas estre coupables de ceste mesprison comme de ardoir la maison de Dieu et tous ses serviteurs sans nulle cause.

---

*Comment Geuffroy au grant dent ardist l'abbaye de Maillières, l'abbé et les moynes.*

**E**n ceste partie dist l'istoire que Geuffroy, si tost que ses chevaliers furent partis d'avecques luy, il prinst du feu et une lampe ardant qui estoit en l'eglise, et aprez il bouteda le feu au feurre, et tantost la buche qui y estoit fut esprise de feu. Là povoit-on veoir et ouyr moult grant pitié, car, incontinent que les moynes sentirent le feu, ilz commencèrent à faire trespiteux cris et tresamères et douloureuses plaintes; mais ce ne leur valut riens; ilz reclamoient Jhesucrist et luy prioient devotement qu'il eut mercy de leurs ames, car des corps estoit neant. Que vauldroit le long compter? il seroit bien long; il est bien vray que tous les moynes furent ars, et bien la moetié de l'abbaye, avant que Geuffroy se partist de là. Ce fait, il vint à son cheveu

et monta sus, et, quant il vint aux champs, il se retourna vers l'abbaye et commença à regarder le grant meschief et le dommaige qu'il avoit fait. Adonc commença à gemir et à soy plaindre douleureusement en disant en ceste manière : Faulx , mauvais , desloyal , proditeur , ennemy de Dieu , vouldroyes-tu que on te fist ce que tu as fait aux vrays serviteurs de Dieu ? Certes non. Et moult d'aulture laidure se disoit, si que n'est homme qui peut penser le desconfort et la desesperance qu'il prinst, s'il ne l'avoit ouy ou veu ; et croy bien que de fin ennuy il se fut occys de son espée pour le desconfort qu'il prinst en soy , se ne fut que les dix chevaliers y vindrent d'aventure sur luy, qui bien l'avoient ouy en sa grant douleur garmenter, gemir et plaindre. Adoncques luy dist l'ung des chevaliers : Ha , ha , sire , c'est trop tartrepenti quant la follie est faicte. Adoncques, quant Geuffroy ouyt ceste parolle, il eut encores plus grant despit que devant ; mais il ne daigna oncques respondre au chevalier ; ains chevaucha si fort vers la tour de Monjouet que à grant paine luy peurent ses gens tenir route ; et tant erra qu'il y vint. Adonc fist son appareil pour aller avec les ambassadeurs de Northobelande, et le lendemain s'en partist , et tourna son chemin avec les ambassadeurs où ilz le devoient mener, et ne mena avecques luy que ses dix chevaliers et son harnoys et les leurs. Et cy s'en taist l'istoire.

En ceste partie nous dist l'istoire que Raimondin se seoit à disner à Merment ; lors vint ung messagier qui venoit de Maillières, qui demanda où estoit Raimondin ; et on le mena devant luy ; lequel messagier s'agenoilla, et fist moult honnourablement la reverence devant Raimondin, et le salua moult courtoisement ; et Raimondin luy rendist son salut et luy de-

manda quelles nouvelles et dont il venoit. Sire, dist le messagier, ce poise moy que je ne les vous puy apporter meilleures, car je les aporte moult piteuses. Il faut que nous les sachons, dist Raimondin; Dieu en soit gracié et loué de ce qu'il nous envoie. Et celuy luy dist : Monseigneur, il est bien verité que Geuffroy au grant dent, vostre filz, a pris en luy telle merencolie et tel dueil de ce que Froimond, vostre filz, c'estoit rendu moyne à Maillières, qu'il est ja venu de fait audit Maillières, où il a trouvé au chapitre l'abbé et tous les moynes; et sachiés pour verité qu'il a bouté le feu dedens et les a tous ars et bien la moetié de l'abbaye. Qu'est-ce que tu dis, dist Raimondin? Ce ne peut estre; je ne le pourroye croire. Par ma foy, monseigneur, il est ainsi, et, se ne me croiez, faictes-moy mettre et tenir en prison, et, se ne trouvez qu'il soit vray, faictes-moy mourir de telle mort qu'il vous plaira. Adonc Raimondin se leva de la table, et vint en la court, et demanda son cheveu; et on luy admena, et il monta, et s'en partist sans actendre per ne compaignon, et chevaucha vers Maillières tant que le cheveu le peut porter et aller. Adoncques ses gens montèrent à cheveu qui mieulx pour aller aprez luy; et tant chevaucha Raimondin qu'il vint à l'abbaye. Et adonc il vit la grant douleur et le grant meschief que Geuffroy avoit fait, dont il prinst tel dueil en son cuer que à paine qu'il n'enragoit. Ha, ha, dist-il, Geuffroy, tu avois le plus bel commencement de haulte proesse et de chevalerie pour venir au degré de hault honneur que filz de prince qui fut vivant, et ores tu es du tout desmis par ta cruauté. Par la foy que je doibz à Dieu, je croy que ce ne soit que fantosme de celle femme; je ne cuide point qu'elle ait porté chose à la fin qui

viengne à perfection , car elle n'a apporté enfant nul qui n'ait apporté quelque estrange tache sur terre. Ne vois-je pas l'orrible qui n'a pas encores sept ans acomplis, qui a jà occis deux de mes escuiers , et avant qu'il eut trois ans avoit-il fait mourir deux de ses nourrices par force de mordre ses mamelles ? et ne vois-je leur mère le samedi, que mon frère de Forestz m'acointa de malvaises nouvelles, en forme de serpent du nombril en bas ? si fis, par Dieu. Et sçay de vray que c'est aulcun esperit, où c'est fantosme ou illusion qui ainsi m'a abusé : car, la première fois que je la trouvay, ne me sceut-elle pas à dire mon aventure ?

En ce parti chevaucha Ramondin tant qu'il vint à Merment, et là descendist et monta en une chambre et se coucha sur ung lict, et là se commença à desmener et faire grieve lamentation telle, qu'il n'y a si dur cueur au monde qui n'en eut eu pitié. Adoncques tous les barons en furent moult doulens, et, quant ilz virent qu'ilz ne luy peurent appaisier sa douleur, ilz furent moult doulens. Adoncques ilz eurent conseil qu'ilz le manderoient à Melusine, qui lors estoit à Nyort et faisoit faire les deux maistresses jumelles, qui sont moult belles à veoir. Adonc prindrent ung messagier et luy mandèrent tout le fait. Las ! tant mal firent, car ilz les mirent tous deux en griefz tourmens et en moult grant misère. Or commence leur dure et amère departie, qui dura à Raimondin tout son vivant, et à Melusine durera sa penitence jusques en la fin du monde. Or le messagier tira tant qu'il vint à Nyort, et salua la dame, et luy bailla les lettres que les barons luy envoioient. Adonc elle rompist la cire et lut la lettre, et, quant elle apperçeut le meschief, elle fut doulente, et plus

du courroux de Raimondin que d'aulture chose , car elle vit bien que le meschief que Geuffroy avoit fait ne pouvoit estre aultrement pour le present. Adonc elle fist venir tout son arroy , et manda foison de dames du pays pour luy tenir compaignie , et s'en partist de Nyort , et vint à Lusignen , et là demoura par l'espace de trois jours , et faisoit moult male chièr , et toujours alloit et venoit par leans , visitant hault et bas tout le lieu en soupirant et jettant de foyes en aulture de si grans plains que merveilles. Et nous dist l'histoire et la cronique , que je tiens estre vraye , qu'elle sçavoit bien la douleur qui moult luy estoit prouchaine , et , quant est de moy , je le croys fermement. Mais ses gens ne pensoient pas à cela , mais que c'estoit pour la desplaissance qu'elle avoit de ce que Geuffroy avoit ainsi ars son frère et les moynes aussi , et pour le courroux qu'elle sçavoit que Raimondin en avoit pris. En ce parti fut Melusine à Lusignen par deux jours , et au tiers jours s'en partist et vint à Merment moult bien accompagnée de dames et de damoiselles , comme j'ay par devant dit. Et lors les barons du pays , qui estoient assamblez pour reconforter Raimondin , que ilz amoient de bon cueur , luy vindrent à l'encontre et la bienveignèrent fort , et luy comptèrent qu'ilz ne luy pouvoient faire laisser sa douleur. Or vous souffisse , dist-elle , car il sera tantost reconforté , se Dieu plaist.

Melusine , la bonne dame , qui adonc estoit bien accompagnée de dames et damoiselles et des barons du pays , entra en la chambre où Raimondin estoit , et celle chambre avoit le regard sur les vergés , qui moult estoient delectables , et avoit le regard aux champs par devers Lusignen. Lors , quand elle vit Raimondin , elle le salua moult doucement et hon-

nourablement ; mais adonc il fut si doulent et si oultré d'ire que il ne luy respondist mot. Et adonc elle prinst le parler et luy dist : Monseigneur, c'est moult grant follie à vous, que on tient le plus saige prince que on sache vivant, de vous ainsi demener de chose qui aultrement ne peut estre et que on ne peut amender ne y remedier ; vous vous arguez contre la vouldenté du createur, qui tout a fait et deffera toutes foyz qu'il vouldra à son plaisir. Sachiés qu'il n'est si grant pecheur au monde que Dieu ne soit plus pitieux et plus pardonnable , mais que le pecheur se repente parfaictement et qu'il luy crie mercy de bon cueur. Se Geuffroy, vostre filz, a fait celle oultrage par son merueilleux courage , sachiés de certain que c'est pour le pechié des moynes, qui estoient de mauvaise et desordonnée vie, et a voulu nostre seigneur avoir la pugnition, combien que ceste chose soit incongnoissable à humaine creature, car les jugemens de Dieu sont tresmerveilleux et si secrez qu'il n'est cueur d'omme qui les puist comprendre en son entendement. Et d'aulture part, monseigneur, nous avons assez de quoy, Dieu mercy, pour refaire l'abbaye aussi bonne et meilleure qu'elle ne fut oncques et la renter et doer mieulx et plus richement pour mettre plus de moynes qu'il n'y eut oncques. Et Geuffroy, se Dieu plaist, s'amendera par devers Dieu et par devers le monde ; pour quoy, monseigneur, vueillez laisser le dueil, et je vous en prie. Adoncques, quant Raimondin entendist Melusine, il sceut bien qu'elle disoit vray de ce qu'elle luy disoit, et que c'estoit le meilleur selon raison ; mais il fut si oultré et percié d'ire que raison naturelle estoit fouye de luy. Adoncques d'une trescruelle voix il dist en ceste manière :



*Comment Melusine chait pasmée par terre , pour la reproche que Raymondin luy dist.*

**L**a tresfaulce serpente, par Dieu , ne toy ne ton fruit ne sera que fantosme ; ne jà hoir que tu aies porté ne viendra à bon chief en la fin. Comment rauront leurs vies ceulx qui sont ars en grieve misère, ne ton filz qui estoit rendu au crucifix ? Il n'avoit sailly bon fruit de toy que Froimond, or est destruiet par art demoniacle, car tous ceulx qui sont enforcenez d'ire sont ès commandemens des princes d'enfer ; et pourtant fist Geuffroy l'orrible , le grant et hideux fourfait qu'il a fait comme d'ardoir son frère et les moynes, qui n'avoient mie mort desservie. Adonc, quant Melusine ouyt ceste parolle , elle eut telle douleur au cuer qu'elle chait toute pasmée par terre , et fut demie heure qu'elle ne rendist aspiration , ne que on ne sentist en elle aspiration ne alaine. Et adonc fut Raimondin plus couroucé que devant, car lors il fut refroidé de son ire , et commença à faire moult grant dueil , et pour peu qu'il n'affoloit , et se repentist moult des parolles qu'il avoit dictes, mais ce fut pour neant , car ce fut trop tart. Adonc les barons du pays et les dames furent moult doulens, et redressèrent la dame en son seant, et luy arousèrent le visaige d'eau froide , et tant firent qu'elle revint à elle. Et quant elle peut parler, elle regarda Raimondin moult piteusement et luy dist :

---

*Comment Melusine se revint et parla à Raimondin.*

**H**a, ha, Raimondin, la journée que je te vis premièrement fut pour moy trop douloureuse. A la mal heure vis oncques ton gent corps, ta fasson, ne ta belle figure; mal convoité ta beaulté, quant tu m'as si faulcement traye; combien que tu soiez parjure envers moy quant tu mis paine de moi veoir, mais pour ce que tu ne l'avois mie encores descouvert à personne, je le t'auroye pardonné en cuer, et ne t'en eusse point fait de mention, et Dieu le te eut pardonné; car tu eusses fait ta penitance en cestuy monde. Las, mon amy, or sont nos amours tournez en hayne, en douleurs, en dreté, nos solas et joye en larmes et en pleurs, nostre bonheur en tresdure infortunee pestilence. Las, mon amy, se tu ne m'eusses faulcé ton serment, j'estoie jettée et exemptée de paine et de tourment, et eusse eu tous mes sacremens, et eusse vescu tout le cours naturel comme femme naturelle, et fusse morte naturellement, et eusse eu tous mes sacremens, et mon corps eut esté ensepveli en l'eglize de Nostre-Dame de Lusignen, et eusse fait mon anniversaire bien et deuement. Or suys-je par ton fait rabatue en la penitence obscure où j'avoie long temps esté par mon adventure, et ainsi le me fauldra porter et souffrir jusques au jour du jugement, et par ta faulceté; je prie à Dieu qu'il te le vueille pardonner. Adonc elle commença à mener telle douleur qu'il n'y a si dur cuer au monde qui n'en eut eu pitié se il l'eut veue en ce point; et quant Raimondin la vit, il eut tant de douleur qu'il ne veoit, n'entendoit, ne ne sçavoit contenance.

L'istoire dist que Raimondin fut moult dolent; et pour vray, l'istoire et la vraye cronique le tesmoingne, que nul homme ne souffrist oncques telle douleur sans passer les articles de la mort; mais quant il fut ung peu revenu en sa memoire, et vit Melusine devant luy, il s'agenoilla et joingnist les mains en disant ainsi : Ma chièrre dame, m'amie, mon bien, mon esperance, mon honneur, je vous supplie en l'honneur de la glorieuse souffrance de Nostre Seigneur Jhesucrist, en l'honneur du saint glorieux pardon que le vray Filz de Dieu fist à Marie Magdalaine, que vous me vueillez ce meffait pardonner; et que vous vueillez avec moy demourer. Mon doulx amy, dist Melusine, qui regarda que les larmes luy choyoient des yeux à si grant habondance que sa poitrine estoit arousée, le meffait vous vueille pardonner celluy qui est le vray juge et le vray pardonneur, qui est tout puissant, et la droite fontaine de pitié et misericorde; car, quant à moy, je vous pardonne de bon cuer; mais quant est de ma demourance, c'est tout neant, car il ne plaist mie au vray juge.

---

*Comment Raimondin et Melusine chaièrent pasmez.*



ce mot le leva et l'embrascha de ses bras, et s'entrebaisèrent et eurent tous deux si grant douleur qu'ilz chaièrent tous deux pasmez sur la terre de la chambre. Qui lors eut veu dames et damoiselles, chevaliers et escuiers plourer et mener grant douleur en disant en

commun : Faulce fortune , comment es-tu si faulce et si perverse que tu t'es entremise de ces deux loyaulx amans ? Et en ce disant , s'escrièrent tous à une voix : Nous perdons aujourd'huy la meilleure dame qui oncques gouvernast terre , la plus saige , la plus humble , la plus charitable , la plus privée de ses gens qui oncques fut sur la terre . Adonc commencèrent tous à plourer et à plaindre , et à mener si grant douleur qu'ilz entreoublièrent les deux amans qui gisoient par terre . Adoncques Melusine revint à elle , et ouyt la douleur que ses gens menoient pour sa departie , et vint à Raimondin qui gisoit encores tout pasmé par terre , et le leva et drescha en son estant , et dist à Raimondin et à ses gens : Or entendez bien ce que je vous diray :

---

*Comment Melusine fist son testament.*

**M**on doulx amy , dist la dame , sachiés que je ne puy plus demourer avec vous , car il ne plaist mie à Dieu , pour le meffait que vous avez fait ; et pour ce je vous vueil dire devant vos gens ce que vous orrez . Or sachiés , Raimondin , que aprez vous jamais homme ne tiendra le pays en si bonne paix que vous le tenez , et auront vos heritiers aprez vous moult d'affaires ; et sachiés que aucuns decherront , par leur follie , de leur honneur et de leur heritaige ; mais quant à vous , ne vous en doutez , car je vous aideray tout vostre vivant en toutes vos necessitez ; et ne chassez point Geuffroy hors de vous , qui est vostre filz ; car il

sera moult vaillant homme ; et, d'aulture part, nous avons encore deux enfans , dont l'aisné , qui a nom Raimonnet, n'a pas encores trois ans, et Thierry n'a pas environ deux ans ; faictes les bien nourrir ; et aussi sachez que je m'en prendray bien garde, combien que je ne vueil pas que aïés esperance nulle quant d'icy seray departie, qui sera bien brief, me voiez jamais en forme de femme ; Et vueil que vostre filz Thierry mains ne soit sire de Partenay, de Warnont, et de toutes les appendences de la terre, jusques au port de la Rochelle ; et Raimonnet sera conte de Forestz, et en laissez convenir à Geuffroy, et il en ordonnera moult bien. Et elle appella Raimondin à part et les plus haultz barons du pays, et leur dist en ceste manière : Beaulx seigneurs, gardez que si chier que vous amez vostre honneur et vostre chevance, que si tost que je seray departie de cy, que vous facez tant que Horrible, nostre filz, qui a trois yeulx, dont l'ung est au front, soit mort tout prestement ; car sachez en vérité, se vous ne le faictes, qu'il fera tant de maulx que ce ne seroit mie si grant dommaige de la mort de telz .xx. mille, que de la perte et dommaige que on auroit pour luy ; car certainement il destruiroit tout ce que j'ay ediffié, ne jamais guerres ne fauldroient au pays de Poetou ne Guienné ; et gardez que vous le facés ainsi, ou vous ne fistes oncques si grant follie. Ma douce amour, dist Raimondin, il n'y aura point de faulte ; mais pour Dieu et pitié ne me vueillez pas tant deshonnorer, mais vueillez demourer, ou jamais je n'auray joye au cueur. Et elle luy dist : Mon doulx amy, se ce fut chose que je peusse faire, je le feroye tresvoulentiers ; mais il ne peut estre. Et sachiés que je sens au cueur plus de douleur de vostre departie cent

mille foys que vous ne faictes, car ainsi pour le vray faut-il qu'il soit, puy qu'il plaist à celluy qui peut tout faire et deffaire. Et puy à ce mot le alla accoller et baiser moult doucement en disant : Adieu, mon amy, mon bien, mon cueur et ma joye, encores tant que tu viveras auray-je recreation en toy ; mais aussi auray-je pitié de toy ; tu ne me verras jamais en forme de femme. Et adonc saillist sur une fenestre qui avoit le regart sur les champs et sur les jardins, au costé devers Lusignen, aussi legierement comme se ellè eut vollé ou eu elles.

---

*Comment Melusine s'envolla de Raimondin, en forme d'ung serpent, du chasteau de Lusignen, par une fenestre.*

**E**n ceste partie nous dist l'istoire que quant Melusine fut sur la fenestre, elle prinst congié de tous en plourant et soy recommandant à tous les barons, dames et damoisselles qui furent là presens, et puy dist à Raimondin : Mon doulx amy, voiez cy deux aneaux d'or qui ont une mesme vertu ; et sachiés bien de vray que tant comme vous les aurez, ou l'ung d'eulx, ne vous ne vous hoirs, s'ilz les ont aprez vous, ne serez jà desconfis en plet ne en bataille, se ilz ont bonne cause ; ne jà vous ne ceulx qui les auront ne pourront mourir par armes quelconques. Et adoncq les luy tendist et il les prinst. Et aprez commença la dame à faire piteux regrès et griefz souspiers en regardant Raimondin moult piteusement, et ceulx qui là es-

toient, plourant tousjours si tendrement que tous en avoient moult grant pitié. Encores en souspirant moult piteusement commença à regarder le lieu en disant : Hé, doulce contrée, j'ai eu en toy tant de soulas et de recreation , et y estoit en cestuy siècle du tout en tout ma beneureté , se Dieu n'eust consenti que je eusse esté si faulcement traye ; hélas , je souloye estre dame clamée, et souloit-on faire et accomplir tout ce que je commandoye ; or n'en seray-je pas plus chambrière , mais seray en paine et en tourment jusques au jour du jugement ; et tous ceulx qui m'appelloient avoient grant joye quant ilz me veoient ; doresnavant ilz se desviront de moy , et auront paour et grant hideur ; et les joyes que je souloye avoir me seront plains et tribulations et griefves penitences. Et lors commença à dire à haulte voix : Adieu tous et toutes , et vous prie treshumblement qu'il vous plaise à prier notre Seigneur devotement pour moy qu'il luy plaise à moy allegier ma penitence ; mais toutesfois je veuil bien que vous sachez que je suys , et qui fut mon père , affin que vous ne reprochés pas à mes enfans qu'ilz soient enfans de malvaise femme , ne de serpente , ne de faée , car je suys fille du roy Elinas d'Albanie et de la royne Pressine sa femme , et sommes trois seurs qui avons esté predestinées moult durement d'estre en griefves penitences , et de ce ne vous puy-je à present plus dire ne ne veuil. Puis dist : Raimondin , adieu , mon amy , ne oubliez pas à faire de vostre filz Horrible ce que je vous ay dit ; mais pensez de vous deux enfans Raimonnet et Thierry. Adonc commença à faire un grief souspir , et laissa la fenestre , et saillist en l'air , et trespassa les vergiers , et lors se mua en forme de serpent moult grande , grosse et longue comme de.



xv. piés; et sachiés que en la pierre sur quoy elle passa au partir de la fenestre, demoura et encores est empraint la forme du piet d'elle. Adonc moult grant douleur menoient la baronnie, dames et damoiselles, et especiallement celles qui l'avoient servie, et par dessus tous les aultres Raimondin faisoit dueil moult aigre et merveillex. Et lors saillirent tous ès fenestres pour veoir quel chemin elle tiendroït. Lors la dame, ainsi transmuée en guise de serpent come dit est, fit trois tours environ la fortesse, et à chacune fois qu'elle passoit devant la fenestre, elle jetta ung cri si merveillex que chacun en plouroit de pitié, et appercevoit-on bien qu'elle se partoït bien enuis du lieu, et que c'estoit par contrainte. Et adonc elle prinst son chemin vers Lusignen, menant par l'air si grant effroy en sa furieuseeté, qu'il sambloit par tout en terre que la fouldre et tempeste y deut cheoir du ciel.

Ainsi comme je vous dis s'en ala Melusine, samblant de serpent vollant par l'air, vers Lusignen, et non pas si treshault que les gens du pays ne la veissent bien, et l'oyoit-on plus long d'une lieue aler par l'air, car elle alloit menant telle douleur et faisant si grant effroy que c'estoit grant douleur à veoir; et en estoient les gens tous esbahis; et tant alla qu'elle fut à Lusignen, et l'environna par trois fois, et crioit piteusement et lamentoit de voix seraine, dont ceulx de la fortesse et de la ville furent moult esbahis, et ne sçavoient que penser; car ilz veoient la figure d'une serpente, et oyent la voix d'une dame qui sailloit d'elle; et quant elle l'eut environné trois fois, elle se vint fondre si soudainement et si horriblement sur la tour poterne, en menant telle tempeste et tel effroy, qu'il sambla à ceux de leans que toute la fortesse deut cheoir en abisme, et leur sambla que tou-

tes les pierres du sommaige se remuassent l'une contre l'autre ; et la perdirent en peu d'eure qu'ilz ne sceurent oncques qu'elle fut devenue. Mais tost aprez vindrent gens que Raimondin envoioit pour sçavoir nouvelles d'elle, ausquieulx fut dit comment elle s'estoit venue rendre leans et la paour qu'elle leur avoit faicte ; et ceulx retournèrent devers Raimondin, et luy comptèrent le fait. Lors commença Raimondin à entrer en sa douleur, et quant la nouvelle fut sceue par le pais, le povre peuple mena grant douleur, et la regrettoient piteusement, car elle leur avoit fait moult de biens ; et commença-on par toutes les abbaies et eglises qu'elle avoit fait fonder à dire pseaulmes, vigilles, et faire anniversaires pour elle ; et Raimondin fist faire moult de biens et prières.

---

*Comment Raimondin fist bruler Horrible son filz,  
ainsi comme Melusine en avoit chargé  
en son testament.*



Aprez vindrent les barons du pays à Raimondin, et luy dirent : Monseigneur, il faut que nous façons de vostre filz Horrible ce qu'elle nous a commandé à faire. Et Raimondin leur respondist : Faictes-en ce qu'on vous a commandé à faire. Et ilz prindrent Horrible par belles parolles, et le menèrent en une cave ; car se il s'en fut donné garde de ce que on luy vouloit faire, ilz ne l'eussent pas eu sans peril ne sans paine. Adoncques l'enfermèrent en fumée de foin moillé ; et, quant il fut mort, il fut ensepvely en une bière, et porté à Poitiers en l'abbaye du Moustier-Neuf, où

il fut sepulture, et son obsèque fait richement ainsi comme il appartenoit.

---

*Comment Melusine venoit tous les soirs visiter ses deux enfans Raimonnet et Thierry.*

**A**près, Raimondin s'en partist de là, et vint à Lusignen, et y amena ses enfans Raimonnet et Thierry, et dist que jamais n'entreroit en la place où il avoit perdu sa femme. Et sachiés que Melusine venoit tous les jours visiter ses enfans, et les tenoit au feu, et les aisoit de tout son pover au mieulx qu'elle pover; et la veoient bien les nourrices, qui mot ne osoient dire. Et amendoient et plus croissoient les deux enfans en une sepmaine que les aultres enfans ne faisoient en ung mois, dont toutes gens s'en donnoient grans merveilles; mais quant Raimondin sceut par les nourrices que Melusine venoit tous les soirs visiter ses enfans, sa douleur lui allega pour l'esperance qu'il avoit de la raver; mais pour neant le pensoit, car jamais puy ne la vit en forme de femme, combien que pluseurs l'aient veue en forme femenine. Et sachiés que combien que Raimondin eut esperance de la raver, si avoit-il telle douleur au cueur que nul ne le vous scauroit dire; et ne fut oncques puy homme qui le peut voir rire ne mener joye. Et avoit moult en hayne Geuffroy au grant dent, et se il l'eut tenu en son ire il l'eut fait destruire. Mais cy se taist l'istoire à parler de luy, et commence à parler de Geuffroy.

L'histoire nous dist que tant erra Geuffroy qu'il vint en Nortobelande avec les ambassadeurs, avec les dix chevaliers, et quant les barons du pays sceurent sa venue, ilz luy vindrent à l'encontre moult honorablement, et le receuprent à moult grant sollemnité, et luy disdrent : Ha, a, sire, de vostre joyeuse venue devons-nous louer nostre Seigneur Jhesucrist; car sans vous ne povons estre delivrez du merveilleux murtrier Grimauld, le gayant, par quoy tout le pays est destruict. Et adoncques Geuffroy leur respondist : Et comment povez sçavoir que par moy en povez estre delivrez? Adoncques ilz luy respondirent : Monseigneur, les sages astronomiens nous ont dist que le gayant Grimault ne pavoit mourir que par vos mains, et aussi nous sçavons de certain que il le scet bien, et se vous allés devers luy et vous luy dictes votre nom, vous ne le sçaurez si bien garder que il ne vous eschappe. Par mon chief, dist Geuffroy, se il est vray que vostres astronomiens vous le ayent dit, il ne peut fouyr, car j'en ay bonne volenté, mais or me faictes mener devers le lieu où je le pourray trouver, car j'ay moult grant desir de le veoir. Adoncques ilz respondirent : Monseigneur, volentiers. Et incontinent ilz lui baillèrent deux chevaliers du pays qui le conduirent vers le lieu; mais ilz disdrent tout incontinent l'ung à l'autre qu'ilz ne l'approcheroient pas de trop prez, et qu'ilz ne pourroient croire que Geuffroy peut avoir victoire envers luy. Adoncques Geuffroy prinst congié des barons, et s'en partist, et avec luy les deux chevaliers qui le devoient guider; et tant chevauchèrent qu'ilz virent la montaigne de Brumbelyo; et lors disdrent les guides à Geuffroy : Monseigneur, voiez là la montaigne où il se tient; et voiez-vous bien

ce blanc sentier qui monte tout droit à ce gros arbre ? Par foy, dist Geuffroy, ouy. Par dieu, monseigneur, disdrent-ilz, c'est le droit chemin que vous n'y pouvez faillir, car pour vray dessoubz cest grant arbre vient-il souvent pour espier ceulx qui passent le chemin. Or y povez aller si vous voulez, car nous ne pensons pas aller plus avant. Et Geuffroy leur respondist en ceste manière : Se je feusse venu sur la fiance de vostre aide, j'eusse ceste foyz failly. Par mon chief, dist l'ung, vous dictes vray. Lors vindrent au piet de la montaigne, et lors descendist Geuffroy et s'arma bien et bel, et puy monta à cheval et mist l'escu au col et la lance au poing, et puy dist aux dictz chevaliers qu'ilz demourassent là desoubz, et que ilz verroient comment il adviendroit de celle chose ; et ilz disdrent qu'ilz y demouroient.

---

*Comment Geuffroy au grant dent vint contre le  
gayant Grimault, et comment de la  
lance il l'abbatist.*

**E**n ceste partie nous dist l'istoire que Geuffroy se partist et prinst congié, et monta la montaigne tant qu'il approcha fort de l'arbre, et percut le gayant qui se seoit dessoubz ; mais sitost qu'il apperceut Geuffroy, il s'esmerveilla moult fort comment ung seul chevalier avoit la hardiesse d'aller vers luy. Adoncques il pensa en luy mesmes qu'il venoit pour traicter à luy d'aucuns patis ou d'aucune paix. Adoncques jura sa loy que moult peu luy vauldroit. Adonc se leva le

gayant moult atalenti de mal faire, et prinst ung levier en son poing, que ung fort villain auroit assez affaire à le lever. Adoncques il devalla ung peu de la montaigne pour venir à l'encontre de Geuffroy, et cria à haulte voix à Geuffroy : Qui es-tu, di, va, chevalier, qui as tant de hardiesse de venir vers moy ? Par ma loy, bien t'en paieray, car qui t'envoya icy n'amoit pas grandement ta vie. Et Geuffroy luy escria : Deffens-toy, je te deffie. Et puis brocha le cheveu des esporons, et abaissa la lance, et ferist le gayant emmy le pis si roidement qu'il le fist voller par terre les jambes contre mont, et puy passa oultre et tourna tout court et descendist de paour que le gayant ne lui occist son cheveu, et l'atacha par la resne à une racine d'arbre ; puis traist l'espée et jetta la targe, car il apperceut bien que à attendre le coup du levier il feroit grant follie. Adoncques le gayant luy vint à l'encontre, mais il ne l'apercevoit point à cause que il estoit si petit envers luy qu'il ne le pouvoit bonnement choisir ; et pour ce baissa la teste, et le vit adoncques le gayant, et luy dist ainsi : Dy, va, petite stature, qui es-tu, qui si vaillamment m'abat ? Par Mahon, je n'auray jamais honneur. Et adonc Geuffroy luy respondist : Je suis Geuffroy au grant dent, fils de Raimondin, seigneur de Lusignen. Adonc quant le gayant l'entendist, il fut moult doulent, car bien sçavoit qu'il ne pouvoit mourir fors que par ses mains ; mais non obstant il luy respondist : Je te congnois assez ; tu occis l'aultrier mon cousin Guedon en Guerende ; les cent mille diables t'ont bien apporté en ce pays. Et Geuffroy luy respondist : Voire pour toy, car jamais ne me partiray jusques à tant que je t'auray osté la vie hors du corps. Adonc quant le gayant l'entendist, il haulça

le levier et cuida ferir Geuffroy parmy la teste ; mais il y failly ; et adonc Geuffroy le ferist de l'espée sur l'espaule , car il ne peut atteindre sa teste , et luy tranche les mailles du jasseran , et luy entra l'espée bien palme dedens la cher. Adoncq le sang luy roya jusques aux talons ; et quant il sentist le coup , il luy escria : Mauldit soit le bras qui de telle vertu scet ferir , et le fevre qui forga l'allumelle soit pendu parmy le col ; car oncquesmais je n'eus sang trait par taillant , tant fut bon. Adoncques il entoisa le levier , et cuida ferir Geuffroy sur la teste , et tantost Geuffroy moult appertement gauchist au coup , dont il fist que saige : car sachiés de vray que , s'il l'eut atteint , à ce que le levier estoit pesant , il eut ensmé jusques aux dens ; mais Dieu , en qui estoit sa fiance , ne le volut pas. Et devez sçavoir de certain que le levier , au cheier , entra bien un grant piet dedens terre ; mais avant que le gayant peult ravoir son coup , Geuffroy le ferist de l'espée sur le costé , tellement qu'il luy fist le levier saillir des poingz , et en couppa une grant pièce.

---

*Comment le gayant s'enfouyt , et Geuffroy aprez ,  
l'espée au poing.*

**A** doncques fut le gayant moult dolent quant il vit son levier par telle manière froyé et gesir sur la place , car il ne se osa baisser pour le prendre. Adoncques il sallist à Geuffroy , et luy donna ung si grant coup de poing sur le bassinet qu'il luy estourdist toute la teste ; mais il eut le poing tout enflé , et en



tomba du grant coup. Et adoncques Geuffroy le ferist de l'espée sur la cuisse, par telle manière qu'il luy abbatit demi piet ou braon. Adoncques quant le gayant vit ce, il se recula ung peu contre mont, et puyz tourna le dos et s'enfouyt contre mont sur la montaigne, et Geuffroy aprez, l'espée au poing; mais quant ledit gayant vint à la montaigne, il trouva ung pertuys, et tantost se lança dedens; de quoy Geuffroy s'esmerveilla moult comment il fut si tost en bas. Adoncques il vint au pertuys et bouta sa teste dedens, et luy sambla que ce fut le tueau de une cheminée. Adoncques il retourna à son cheveu, et prinst la lance, et monta sur son cheveu, et devalla la montaigne, et vint à ses gens et aux deux chevaliers, qui eurent moult grant merveille quant ilz le virent retourner sain et sauf; et y estoit jà venu grant multitude des gens du pays, qui luy demandèrent s'il avoit veu le gayant. Et il leur dist que il l'avoit combattu, et qu'il s'en estoit fouy et bouté en ung pertuys; et si tost envanuy qu'il ne sçavoit qu'il estoit devenu. Et ilz luy demandèrent se il luy avoit point dit son nom, et Geuffroy dist que si avoit, et ceulx dient que c'estoit neant de le trouver, car il sçavoit bien que il devoit morir par la main de Geuffroy. Or ne vous doubtez, dist-il, car je sçay bien par où il est entré, et pourtant je le trouveray bien demain. Adoncques, quant ilz luy oyrent dire ceste parolle, ilz en eurent moult grant joye, et disdrent que Geuffroy estoit le plus vaillant chevalier du monde.

---

*Comment Geuffroy alla au pertuys où le gayant estoit entré, et se laissa couller dedans.*

**L**e lendemain par matin s'arma Geuffroy et monta à cheval, et chevaucha tant qu'il vint à la montaigne, et trouva le pertuys, et regarda dedens; mais il n'y vit ne que ung puys. Par foy, dist Geuffroy, le gayant est plus grant et plus gros que je ne suys, et cy est entré par icy, mais cy ferai-je, comment qu'il en advienne. Adoncques il laissa couler sa lance contre val, et tint le fer en sa main, et puys entra les piés devant au pertuys et se laissa couler avecques la lance, et s'en alla par ung estroit sentier, et vit au loing grant clarté. Et adonc il se seigna, et s'en alla celle part.

---

*Comment Geuffroy trouva la sépulture du roy d'Albanie, son grand-père Elinas, dedens la montaigne.*

**E**t quant il vint à large, il trouva une moult riche chambre où il y avoit moult de richesses; et y eut moult grans candelabres d'or et moult grant luminaire; et y veoit-on aussi cler comme se il eut esté aux champs; et au milieu de celle chambre trouva la plus riche tombe d'or et de pierres precieuses qui cuidoit jamais avoir veu; et par dessus avoit la figure d'ung grant chevalier à merveilles, qui avoit une riche couronne d'or au chief, et y avoit grant foison de riches pierres. Et

assez prez de là avoit une figure d'une royne d'albastre, couronnée moult richement, qui tenoit ung tablier qui disoit en ceste manière : Cy gist mon mari, le noble roy Elinas d'Albanie ; et devisoit toute la manière comment il avoit esté là mis, et par quelle cause ; et parloit aussi de leurs trois filles, c'est assavoir Melusine, Palestine et Melior, et comment elles avoient esté pugnies pour ce qu'elles avoient enfermé leur père. Et parloit comment le gayant avoit là esté commis pour garder le lieu jusques à tant qu'il seroit de là dejecté par l'oir d'une des filles, et comment nul ne povoit jamais entrer leans se il n'estoit de leur lignage ; et le devisoit tout au long ainsi comme il est escript icy dessus au chapitre du roy Elinas. Et à ce veoir et regarder advisa Geuffroy par grant temps, tant sur le tableau comme sur la beaulté du lieu ; mais encore ne sceut-il pas qu'il disoit qu'il fut de la lignée du roy Elinas et de Presine, sa femme. Et quant il eut bien regardé tout longuement, il se partist, et erra tant parmy ung lieu obscur, qu'il se trouva aux champs. Adoncques regarda devant luy et vit une grosse tour quarrée bien garlandée et bien carnellée, et chemina celle part, et tournoya tant qu'il trouva la porte, qui estoit ouverte arrière et le pont abbatu ; il entra dedens, et vint en la salle, où il trouva ung grant traillis de garde de fer, dedens laquelle avoit bien cent hommes du pays que le gayant tenoit tous prisonniers. Et quant ilz visrent Geuffroy, ilz s'esmerveillèrent moult et luy disrent : Sire, pour Dieu, fuyez-vous-en, ou vous estes mort ; car le gayant viendra tantost qui vous destruira, se vous estiez ores telz cent comme vous estes. Et Geuffroy leur respondist ainsi : Beaulx seigneurs, je ne suys pas cy venu se n'est pour le

trouver ; j'auroye fait tresgrant follie d'estre venu de si loingz jusques cy pour m'en tourner si tost. A ces parolles vint le gayant qui venoit de dormir ; mais quant il vit Geuffroy, il le congneut et vit bien que sa mort approuchoit, et en eut grant paour. Adonc il saillist en une chambre qu'il vit ouverte, et tira l'uys aprez luy. Et quant Geuffroy l'apperceut, il fut moult doulent de ce qu'il ne l'avoit peu rencontrer à coup à l'uys de la chambre.

L'istoire nous dist que Geuffroy fut moult doulent quant il vit que le gayant fut entré en la chambre et que il eut fermé l'uys sur luy. Adonc il vint contre l'uys, courant de moult grant radeur, et y ferist du piet si roidement qu'il le fist voller emmy la chambre. Adoncques le gayant saillist hors, qui par ailleurs ne povoit saillir, et tenoit ung grant maillet dont il donna à Geuffroy tel coup sur le bassinet, qu'il le fist tout chancier. Et quant Geuffroy sentist le coup, qui fut dur et pesant, il le ferist d'estoc de l'espée emmy le pis, tellement qu'il la lui bouta tout dedens jusques à la croix. Adonc le gayant jeta ung moult horrible cry, et cryoit illecq tout mort. Et quant ceulx qui estoient enferrez en la gayole de fer le virent, s'escrèrent à une voix : Ha, a, noble homme, benoite soit l'eure que tu naquies de mère. Nous te prions pour Dieu que tu nous ostes d'icy, car tu as aujourd'uy delivré ce pays de la plus grant misère où oncques gens feussent.

---

*Comment Geuffroy delivra les prisonniers que le gayant tenoit.*

**A** doncq Geuffroy cercha les clefz tant qu'il les trouva, et les mist hors ; et , ce fait , ilz s'agenoillèrent tous devant luy, et luy demandèrent par où il estoit venu ; et il leur dist toute la verité. Par foy, disdrent-ilz, il n'est pas memoire de nouvelles nulles que depuys quatre cens ans nul homme passast par le cavan, que vous et le gayant tant scullement, et ses antecesseurs, qui de hoir en hoir ont destruiect tout ce pays ; mais nous vous remainerons bien par aultre chemin. Et adonques Geuffroy leur donna tout l'avoir de la tour, et ilz le prindrent.

---

*Comment les prisonniers que Geuffroy avoit delivrez mirent le gayant sur une charette et l'amenèrent avecques eulx.*

**A** prez mirent le gayant sur une charrette en son estant, et le lièrent tellement qu'il ne pavoit cheoir, et puyz boutèrent le feu par tout en la tour. Et, ces choses faictes, ilz radressèrent Geuffroy au lieu où il avoit laissé son cheveau, sur lequel il monta, et descendirent tous la vallée, atout l'avoir, dont chascun en avoit sa part, et firent mener la charette où le gayant estoit à .vi. beufz, et tant qu'ilz vindrent aux chevaliers, et trouvèrent les chevaliers de Geuffroy, et bien la

plus grant partie de ceulx du pays , nobles et non nobles , qui tous festoièrent et firent grant honneur à Geuffroy , et luy voulurent faire grans presens , mais il n'en voulut riens prendre , ains prinst congié de tous , et se partist d'eulx . Et ceulx menèrent par toutes les bonnes villes le gayant , duquel veoir les gens en furent moult esmerveillez , et comme ung homme seul osast assaillir ung tel Sathanas ; et le tindrent à tresgrandement hardi . Et si se taist l'istoire d'en plus parler , et retourne à parler de Geuffroy .

En ceste partie dist l'istoire que tant erra Geuffroy qu'il vint à Monjouet en Guerende , où ceulx du pays luy firent grant feste ; et pour lors estoit venu Raimonnet , son frère , pour l'informer du couroux que leur père avoit et des parolles qu'il avoit dictes sur luy , et luy racompta et dist de puis le commencement jusques en la fin , et comment leur mère estoit partie , et toute la manière , et comment le premier commencement de sa departie estoit par leur oncle , le conte de Forestz , et comment elle avoit dit , à son departir , qu'elle estoit fille du roy Elinas d'Albanie . Et quant Geuffroy oyt ce mot , il luy souvint du tableau qu'il avoit trouvé sur la tombe du roy Elinas , et par ce sceut au cler que luy et ses frères estoient descendus de la lignée , dont il s'en tint plus chier . Mais ce non obstant , il fut moult doulent de la departie de sa mère et de la douleur de son père , et congneut adonc que ceste mauvaise adventure avoit esté engendrée par le conte de Forestz , son oncle , dont il jura la benoite Trinité qu'il le comparroit . Adonc il fist monter son frère et ses .x. chevaliers , et chevaucha vers Forestz , et eut nouvelles que le conte son oncle estoit en une forteresse qui estoit as-

sise sur une roche moult haute ; et estoit celle fortresse pour celluy temps nommée Jalensi , et de present on l'appelle Marcelli le Chasteau.

---

*Comment Geuffroy fist morir le conte de Forestz , son oncle.*

**T**ant erra Geuffroy qu'il vint au chasteau , et tantost descendist et monta en la salle , et trouva le conte , qui estoit entre ses barons , et adonc il luy escria haultement : A mort , triste ! car par vous avons-nous perdue nostre mère. Adoncques traist l'espée et alla vers le conte , et le conte , qui congnoissoit bien sa fierté , advisa l'uys de la maistresse tour et s'en courut celle part , et Geuffroy aprez ; et tant le chassa d'estage en estage , qu'il vint tout au dernier , prez du toit , et voyant qu'il ne pavoit ailleurs fouyr , monta sur une fenestre qui sailloit sur le toit , et par icelle cuida saillir en une petite guerite pour eschapper la fureur de Geuffroy et soy saulver. Mais le piet lui faillist , et tomba tout en bas , tout desrompu et tout mort , avant qu'il vint contreval. Adoncques Geuffroy le regarda d'amont et le vit moult hideusement arrée , mais il n'en eut oncques pitié , mais dist : Faulx triste , par ta faulce jenglerie ay ma mère perdue , or l'as-tu comparu. Adoncques il vint à bas , et n'y eut oncques celluy si hardi de tous les hommes du conte qui osast lever l'euil , et tantost leur commanda que le conte fut ensepvely , et si fut-il , et fut son obsèque fait. Aprez compta Geuffroy aux barons du



pays pourquoy il avoit fait morir son oncle , et en furent les barons ung peu appaisez , pour la mesprizon que le conte avoit faicte. Et lors leur fist faire Geuffroy hommaige à Raimonnet son frère , qui fut aprez conte de Forestz. Et cy se taist l'istoire de luy , et retourne à parler de Raimondin son père.

---

*Comment Geuffroy alla devers son père à Lusignen et luy cria mercy.*

**L**'histoire dist que tost aprez cest affaire fut compté à Raimondin , qui fut moult dolent , mais il le passa legierement pour ce que son frère lui avoit anoncé la racine par quoy il avoit sa femme perdue. Adonc dist à soy mesmes : Ce qui est fait ne peut estre aultrement , il me fault appaiser Geuffroy avant qu'il face plus de dommaige , et pour ce manda par Thierrî qu'il venist devers luy à Lusignen , et Geuffroy vint au mandement de son père , et d'aussi loing qu'il le vit , il se jetta à genoux et luy cria mercy , en disant : Mon treschier père , je vous supplie qu'il vous plaise moy pardonner , et je vous jure que leaument feray refaire l'abbaye plus belle et plus riche qu'elle ne fut oncques , et y feray renter et fonder .x. moynes plus qu'il n'y avoit. Par Dieu , dist Raimondin , tout ce peut faire à l'aide de Dieu , mais aux mors ne povez rendre la vie. Or , il est vray qu'il ne peut estre aultrement. Geuffroy , il est vray qu'il me fault aler en ung pelerinage que j'ay promis à faire , et pource je vous laisseray le gouvernement de ma terre , et se

d'aventure Dieu fait sa voulenté de moy, toute la terre est vostre ; mais je vueil que ce que vostre mère a ordonné soit tenu : elle a ordonné à Thierry Parthenay, Merment, Warment et leurs appendences toutes, jusques à La Rochelle, avec Chasteau Aiglon, et tout ce qui y pent, et dès cy l'en herite, et vueil qu'il ait. Adonc Geuffroy lui dist : Mon chier père, c'est bien raison qu'il soit ainsi. Ce fait, Raimondin fist son appareil et monta avec luy foison seigneurs, chevaliers, gens de toutes offices, et emporta grant finance, et se mist à chemin ; et Geuffroy et Thierrille convoièrent certain temps, et en chevauchant, Geuffroy leur compta comment il avoit trouvé en la montaigne de Brumbelio la tombe du roy Elinas sur six colombes d'or, et de la richesse du lieu, et de la royne Pressine, qui estoit sur la tombe, aux piés du roy, et estoit figurée du blanc albastre, et le tablier qu'elle tenoit, et de ce qui estoit dedens escript, et comment leurs .iii. filles estoient predestinées, desquelles nostre mère fut l'une, et toute la besoingne ainsi qu'elle fut, et comme je l'ay traité au chapitre du roy Elinas, au commencement de ceste histoire. Et sachez que Raimondin l'escouta volentiers, et luy pleut moult, car Geuffroy l'affermoit pour pure verité, comme de l'avoir veu et leu au tablier, que leur mère fut fille du roy Elinas et de Pressine, et puy donna Raimondin congié à ses enfans, et s'en partirent de luy en plourant de son département, et s'en retournèrent à Lusignen, et Raimondin tint son chemin vers Romme, et au departir il donna à Thierrille l'anneau que Melusine luy avoit donné à son département.

*Comment Raimondin vint devers le pape à Romme,  
et se confessa à luy.*

**E**n ceste partie nous dist l'histoire que tant chevaucha Raimondin et sa mesnie en sa compaignie, qu'il vint ès mons de Monjouet et les passa, et chevaucha tant par la Lombardie, qu'il arriva ung soir à Romme auprez Noiron. Et le lendemain vint à Saint-Pierre, et là trouva le pape Benoit, qui pour lors regnoit, et se traist par devers luy, et luy fist moult humblement la reverence, et le pape à luy, quant il sceut que c'estoit Raimondin, et Raimondin se confessa à luy le mieulx qu'il peut, et quant est de ce que il s'estoit parjuré devers sa femme, le pape luy enchargea telle penitence comme il luy pleut, et disna celluy jour avec le pape Benoit, et lendemain il alla visiter les saintz lieux à Romme, et y mist bien huict jours avant qu'il eut tout achevé, car il avoit affaire. Et quant il eut tout fait ce qu'il vouloit faire, il prinst congé du pape, et luy dist en ceste manière : Père saint, je ne puy pas bonnement considerer en moy que je doibve jamais avoir joye pour user le remanant de ma vie, si ay esperance de moy aller rendre en quelque hermitaige. Et adoncques le pape luy demanda ainsi : Raimondin, où avez-vous devotion d'aller? Par ma foy, père saint, j'ay ouy dire que il y a une moult bonne et devote place à Monserat, en Arregon. Mon beau filz, dist le père saint, ainsi le dist-on. Et Raimondin luy dist : Père saint, là ay-je devotion de moy retraire, et moy rendre hermite, et là prier Dieu devotement qu'il luy plaise

faire aulcun allegement à ma femme. Or, mon beau filz, dist le pape, avec le saint Esperit puissiés-vous aller, et tout ce que vous ferez en bonne volonté je vous le charge en lieu de penitence. Et adonc Raimondin s'enclina et luy baisa le piet, et le pape luy donna la benediction. Et adonc s'en partist Raimondin et s'en vint à son logis, et fist tantost trosser les sommiers et tout son arroy; et quant est de ses gens, je ne vous vueil gaires faire de mention, ne aussi de son chemin. Mais tantost il commença à chevaucher fort, et tant erra, qu'il vint à Tholouze, et là donna congié à toutes ses gens, excepté tant seulement à ung chappellain et à ung clerc, et adonc leur paya largement de leur salaire, et escript plusieurs lettres et les sella et envoya à Geuffroy et aux barons du pays, faisans mention comment Geuffroy prist les hommages et aussi comment ilz le receupsent à seigneur. Et adoncques ceulx s'en departirent de luy moult doulens, et moult grant dueil demenans, car il ne leur dist oncques quel chemin il feroit. Mais sachiés qu'il s'en alla bien garni de finance, et tant chemina qu'il vint à Nerbonne, et là reposa ung bien peu.

En ceste partie nous dist l'istoire que quant Raimondin fut venu à Nerbonne, que il fist faire pour lui robes d'ermite plusieurs et moult simples, et aussi pour son chappellain et son clerc, telles qu'il leur failloit. Et puy s'en partist d'illec, et s'en vint au destroit de l'estant de Salses, et passa par dessoubz le chasteau, et vint à Perpignen, et y demoura ce jour, et le lendemain se partist, et passa le vellon et le pertuys, et vint à disner à Funères, et au giste à Gnomie, et tant fist qu'il vint à Barselonne et se mist en une bonne hostellerie. Et là demoura troys

jours , et advisa la ville , qui moult luy sambla belle , et puy s'en partist au quatriesme jour , et vint à Monserrat , et visita l'église et le lieu , qui luy sambla moult devot , et illec ouyt le service moult devotement ; mais encores avoit-il vestu ses robes du siècle . Et adoncques luy demandèrent ceulx qui furent commis à loger les pellerins , si luy plaisoit à demourer celluy jour . Et il respondit que oy . Lors furent les chevaulx logez , et luy bailla-on une belle chambre pour luy et pour ses gens . Et cependant alla Raimondin visiter les hermitaiges , mais il ne fut que jusques au cinquiesme , car celluy lieu estoit si treshault qu'il n'y peut bonnement faire le voyage , et trouva que au tiers lieu n'avoit point d'ermite , car il n'avoit guères qu'il estoit trespasé . Or estoit de coustume que se dedens ung terme qui estoit ordonné ne venoit ung autre qui voulsist estre en celluy lieu , il convenoit que le plus prochain d'embas venist demourer au lieu , et celluy de dessoubz en celluy d'aprez , et ainsi demouroit le lieu vuide qui estoit le plus prez de la terre , tant qu'il venoit aulcune bonne personne meue de devotion qui se mettoit en celluy lieu . Et estoit la cause de celle permutation telle , que le premier traist à mont les vivres pour eulx sept et en prent sa refection la journée , et celluy qui luy est prez plus prochain dessus luy , il le traict à mont en pareille manière . Adoncques tant enquist Raimondin de leur estre et de leur vie , que sa devotion luy vint de plus en plus que devant , c'est assavoir de soy rendre hermite en celluy lieu . Et lors prinst congié de l'ermite , et s'en vint en bas , et demanda le prieur de l'abbaye , et on luy dist que il estoit au villaige dessoubz , qui est à luy , et l'appelle-on Culbaton ; et il leur pria adonc que ilz le fissent mener là où le

prieur estoit, et ilz luy disdrent que aussi feroient-ilz volentiers. Et ce fait il laissa ses gens et s'en partist avecq ung des varlès de leans, et avallèrent la salize, qui moult fut droite et roide, et s'en devalèrent par les eschelles, et tant firent qu'ilz vindrent au prieuré, où ilz trouvèrent le prieur, qui fist bonne chière à Raimondin, et Raimondin dist au prieur toute sa devotion, et comment le lieu luy plaisoit. Adonques le prieur, qui l'apperceut estre homme de belle part et luy sembloit estre homme d'estat et de belle contenance, luy accorda, dont Raimondin en eut grant joye en son cuer.

Moult fut adonc Raimondin joyeux quant le prieur luy eut accordé la place du quart hermitage; il loa moult de ce Nostre Seigneur Jhesucrist; ainsi demoura la nuytée jusques à lendemain avecq le prieur, et au matin montèrent les eschelles, et vindrent à l'abbaye, et fut vestu Raimondin en habit d'ermite, et laissa de tout son vestement du siècle. Et sachiés qu'il vint bien garny de cinq ou de six paires d'habis d'ermite; et chanta-on le service, present Raimondin, qui offrist à son entrée et commencement moult de riches joyaulx et pierres precieuses; et le service fait, s'en allèrent disner, et fist Raimondin porter à ses frères hermites de la pitance, et leur fist signifier sa venue, dont ilz commencèrent à loer Dieu, et en luy priant devotement qu'il les vueille maintenir en bonne devotion; et ainsi demoura Raimondin en l'abbaye, et lendemain, la messe ouye, fut convoié jusques au piet de la salize qui joingt aux chambres de leans, et adonc prinst Raimondin congié et monta en la chappelle; et luy alloit son chappellain tous les jours au matin chanter sa messe, et le clerc luy aidait à dire ses heures; et

commença Raimondin à mener moult sainte vie, et fut la nouvelle espandue parmy le royaulme d'Arragon, et parmy Castellongne, et aussi par dessa par tout Languedoch, qu'il estoit venu ung baron à Monserrat pour soy rendre hermite ; mais on ne sçavoit de quelle contrée il estoit ; et aussi il n'en vouloit riens dire. Et le furent veoir plusieurs nobles du pays et d'ailleurs ; aussi y fut le roy d'Arragon, les ducs, les contes, les barons et nobles du pays, et luy enquestoient de son estre ; mais de luy n'en peurent oncques riens sçavoir. Et à tant se taist l'istoire à present, et parle des gens de Raimondin, et qu'ilz firent au departir de Thoulouze.

L'istoire nous racompte que tant chevauchèrent les gens de Raimondin, depuys qu'ilz furent departis de Tholoze, parmy la Guienne, qu'ilz vindrent en Poitou, et arrivèrent à Lusignen, où ilz trouvèrent Geuffroy et plusieurs aultres des barons du pays, lequel ilz saluèrent de par son père, et les barons aussi, et puy leur baillèrent les lettres qu'il leur envoyoit. Quant les barons eurent oy la teneur de leurs lettres, ilz dirent à Geuffroy en ceste manière : Monseigneur, puy qu'il ne plaist plus à monseigneur vostre père de nous plus gouverner, et qu'il nous mande que nous vous faisons hommaige, nous sommes tous prestz de le faire. Par Dieu, dist Geuffroy, moult grant mercis. Or, beaulx seigneurs, je suy tout prest de vous recevoir. Et adonc luy firent tous les barons hommaige ; et la nouvelle fut espandue parmy le pays comment Raimondin s'en estoit allé en exil pour le grant dueil qu'il avoit de sa femme qu'il avoit perdue. Qui lors eut veu la douleur que on menoit par toute sa terre en regrettant leur seigneur et sa femme, c'estoit grant pitié à veoir



et oyr, car moult redoubtoient Geuffroy pour sa fierté ; mais pour neant s'en doubtoient, car il les gouverna tresbien et sagement. Or vous laisseray à present de plus parler d'eulx, et diray de Geuffroy, qui estoit moult doulent de ce qu'il avoit ainsi perdu son père et sa mère par son pechié ; car ceulx qui retournèrent ne luy sceurent oncques à dire quelle part il estoit allé, ne en quelle region Adonc remordist conscience à Geuffroy moult fort, et luy souvint comment il avoit ars les moynes et l'abbaye de Maillières, et son frère Froimont, sans avoir nulle bonne cause de ce faire ; et que par son pechié avoit couroucé père et mère, et par ceste cause avoit perdue sa mère, dont il menoit tresgrant douleur ; et puy luy souvint du conte de Forest son oncle, qu'il fist saillir de la grosse tour de Marcellly le Chasteau, qui est fondé en hault sur la roche, et le fist ainsi morir. Adoncques commença fort Geuffroy à penser en soy mesmes de tous les pechiés qu'il avoit commis. Et commença à dire et penser que se Dieu, par sa benigne grace, n'avoit pitié de luy, que son ame estoit en voye de dampnation. Adoncques entra Geuffroy a par soy seullement en une chambre, et commença à mener moult grant douleur et à plourer moult entierement ses pechiés ; et illec luy prist devotion d'aller à Romme, comme Dieu le voulut, et soy confesser au Saint Père. Et adoncques il manda Thierry son frère, le seigneur de Partenay, qu'il vint parler à luy, car il l'amoit sur tous les autres. Sitost que Thierrri oyt le mandement de son frère, il monta tantost à cheveu et erra tant qu'il vint à Lusignen, où Geuffroy le receipt moult liement, et luy dist qu'il luy vouloit laisser son pays en gouvernement, car il vouloit aller à Romme pour soy

confesser de ses pechiés au Père saint. Et aussi il luy dist qu'il ne fineroit mais d'aller jusques à tant qu'il auroit trouvé son père, se il le povoit bonnement faire. Adonques luy pria Thierry qu'il le laissast aller avec luy ; et Geuffroy lui dist qu'il ne seroit pas bon que il fust ainsi fait. Et adonques s'en partist Geuffroy à belle compaignie et en riche estat , et emporta moult grant finance , et admena avecques luy ung varlet qui avoit esté à Romme et revenu jusques à Tholouze avec son père , et luy commanda qu'il le menast par tous les lieux où son père avoit cheminé , et qu'il le logeast en toutes les hostelleries où ilz avoient esté logez , et luy dist que ce feroit-il.

---

*Comment Geuffroy alla à Romme , et se confessa au Père saint.*

**E**n ceste partie nous dist l'istoire que quant Geuffroy se fut parti de Lusignen , qu'il erra tant par ses journées qu'il vint à Romme , et se traist vers le Saint-Père , le quel luy fist moult bonne chiére quant il le congneut. Adonques Geuffroy se confessa moult devotement de tout ce qu'il luy povoit soubvenir ; et luy encharga le Saint-Père de refaire l'abbaye de Maillières , et d'y renter six vingz moynes , et pluseurs aultres penitences dont cy à present me tairay. Adonques Geuffroy dist au pape comment il vouloit aller querir son père. Lors luy dist le pape qu'il le trouveroit à Monserrat en Arragon , car il lui dist au

departir que là se alloit rendre hermite. Et adonques il prinst congié du pape et luy baisa les piedz, et le pape luy donna sa benediction. Et à tant se departit Geuffroy de Romme, et erra tant et sa mesnie qu'ilz vindrent à Thoulouze, et se loga en l'ostel où son père avoit esté logié. Et illecques demanda le varlet à l'oste se il sçavoit quelle part Raimondin estoit tourné quant il s'en partist de là. Et luy dist qu'il avoit tenu le chemin de Nerbonne, et que plus avant n'en sçavoit ; et celluy le dist à Geuffroy. Par ma foy, dist Geuffroy, ce n'est pas le plus court chemin pour aller à Montserrat ; mais puy que mon père alla par delà, nous nous y en irons aussi. Or furent illecques logez le soir, et le matin s'en sont partis et ont tant exploicté qu'ilz vindrent à Nerbonne, et au propre hostel où Raimondin avoit esté logé ; Car tant enquesta le varlet qu'il sceut bien que là avoit esté Raimondin son maistre logé, et que là il avoit fait faire plusieurs robes d'ermitaige. Et adonques ledit Geuffroy s'en partist le lendemain au matin, et vint à Perpignen, et erra tant qu'il vint à Barcelonne, et prist le chemin de Monserrat, et vint à l'abbaye, et envoya ses chevaux à Culbaston et entra en l'eglize. Et adonc le varlet advisa en la chappelle au lampe le chappellain de Raimondin, et le dist à Geuffroy, dont il en eut moult grant joye, et alla à luy et le salua ; et quant celluy le vit, il se mist à genoulx devant Geuffroy et luy dist : Chier sire, vous soiez le bien venu ; et luy compta la bonne vie que Raimondin son père menoit, et comment il estoit tous les jours confessé et recepvoit son createur, et qu'il ne mengoit riens qui receupt mort. Et adonques Geuffroy luy demanda où estoit son père, et il luy dist ; là sus, en tel hermitage,

où il y en a sept contremont celle salize droite, et il est au quatriesme lieu ; mais , monseigneur , huy mès ne povez-vous parler à luy , mais demain y parlerez-vous bien. Par ma foy , dist Geuffroy , ce me desplaist ; mais puy qu'il faut que ainsi soit , il m'en convient deporter. Monseigneur , dist le chappellain , vous orrez la messe au grant autel qui est tout prest , et entretant je ordonneray vos gens , qui metteront à point vostre chambre , et feray appareiller le disner. Ce me plaist , dist Geuffroy.

A tant se partist le chappellain de Geuffroy , qui s'en alla ouyr messe , avec luy dix chevaliers , et bien jusques à vingt escuiers qu'il amenoit avec luy. Adoncques les moisnes de leans vindrent au chappellain de Raimondin et lui demandèrent : Qui est celluy grant dyable à la grant dent ; il semble estre moult cruel homme ; de quoy le congnoissez-vous ? Est-il de vostre pays ? Par ma foy , dist le chappellain , ouy. C'est Geuffroy au grant dent de Lusignen , l'un des bons et des preux chevaliers du monde ; et sachiés qu'il tient moult belle terre. Et ceulx disdrent : Par ma foy , nous avons bien ouy parler de luy. N'est-il pas celluy qui occist le gayant en Guerrende , et l'autre gayant en Northobelande ; et qui ardist l'abbé , tous les moynes et toute l'abbaye de Maillières , pour ce que son frère y estoit rendu moyne sans son congié ? Par ma foy , dist le chappellain , si est. Il est icy venu pour nous faire quelque malle meschance. Or sachiés , dist l'ung des moynes , que je me mettray en tel lieu que il ne me trouvera pas , se je puy. Non , dist le chappellain , sachiés qu'il ne vous fera jà mal , mais serez tous joyeux de sa venue , car il y a tel ceans qu'il aime sur toutes les creatures du monde. Et ainsi se rassurèrent les moynes ung

petit ; mais , quant ilz le sceurent en convent , ilz alloient adonc et venoient parmy leans , faisans net par tout , et appareillèrent à leur povoir si richement comme se Dieu y fut venu et descendu du ciel. Et mandèrent au prieur , qui estoit à Culbaston , qu'il venist à mont , et que Geuffroy au grant dent estoit layens venu en pelerinage à moult belle compaignie. Adonc monta le prieur ès eschelles pour aller à mont , et vint à l'eglise , et trouva Geuffroy au cuer , qui avoit oy la messe ; et luy fist la reverence moult honnourablement et courtoisement , et luy dist que toute l'eglise et le convent et tous leurs biens estoient à son plaisir. Damp prieur , dist Geuffroy , tresgrans mercis. Et sachiez bien de vray que j'ayme ceste place , et , se Dieu me doinct santé , elle n'empirera pas de moy ne des miens. Sire , dist le prieur , Dieu vous le rende. Adoncq vint le chappellain à Geuffroy et luy dist : Monseigneur , il est tout prest quant il vous plaira à disner. Et atant prinst Geuffroy le prieur par la main , et le mena à mont , et lavèrent leurs mains ; puy se assirent à disner , et aprez furent graces dites ; et devisa Geuffroy au prieur et le prieur à luy grant pièce ; et ainsi se passa jusques à lendemain.

En ceste partie nous dist l'istoire que le lendemain par matin se leva Geuffroy , et trouva le chappellain de son père qui l'attendoit avec le prieur , et le menèrent ouyr la messe , et aprez la messe le menèrent jusques à la salize , et monta le chappellain devant et commença à monter contre mont. Et adonc Geuffroy prinst congié du prieur , qui ne cuidoit pas qu'il y allast pour autre chose que pour veoir l'estat des hermitaiges , car il n'eut à pièce pensé que son père eut esté là ; et adonc monta Geuffroy aprez le chappellain. Et quant ilz avoient monté environ. xx.

pas , il leur convenoit reposer, et ainsi virer de vingt en trente pas ; et par ceste manière montèrent tant qu'ilz vindrent au tiers hermitage, qui avoit quatre vingz pas de hault et plus. Le clerc estoit devant le quatriesme hermitage où Raimondin estoit , et attendoit le chappellain. Et advisa et vit venir Geuffroy aprez luy ; si le congneut bien , car aultresfoys l'avoit veu ; et adonc entra en la chappelle , et dist à Raimondin : Monseigneur, vecy venir vostre fils Geuffroy qui vient avec vostre chappellain. Adonc quant Raimondin ouyt ce dire , il fut moult joyeux , et dist : Dieu y ait part , il soit tresbien venu. Adonc vint le chappellain , qui le salua ; mais Raimondin luy dist qu'il dist à Geuffroy qu'il ne pavoit parler à luy jusques à ce qu'il eut ouy sa messe ; et il cy fist ; et respondit Geuffroy : Or soit à son bon plaisir. Ce fait , Raimondin se confessa et ouyt sa messe et receut nostre seigneur ; et en dementiers Geuffroy regardoit contremont les grans salizes qui sont hautes et droites , et vit les trois hermitages qui estoient encores par dessus luy ; et vit la chappelle Saint-Michel , qui est le cinquiesme hermitage ; et puis regarda contrebas ; si se donna grant merveille comment oncques homme osast là prendre habitation , et luy sembloit de l'église et de l'abbaye que ce n'estoient que petites chappelles. Lors l'appella le chappellain , et Geuffroy entra ens , et tantost qu'il percut son père , il se mist à genoux et le salua moult reveramment ; et Raimondin le courut embrasser et le baisa ; et lors se assirent sur une scabelle devant l'autel ; et là commença Geuffroy à compter à son père comment il vint à Romme , et comment il se confessa au Saint-Père , et le Saint-Père luy dit qu'il le trouveroit à Monserrat ; et avec ce entredirent

moult de choses l'ung à l'autre , et pria moult Geuffroy à son père qu'il vouldist revenir en son pays. Beau filz , dist Raimondin , ce ne puis-je faire , car je veuil cy user ma vie , et prieray toute ma vie Dieu pour ta mère , pour moy , et aussi pour toy , que Dieu te vucille amender. Et ainsi demoura Geuffroy toute celle journée avecques son père ; et le lendemain par matin oyt Raimondin sa messe , et se ordonna ainsi qu'il avoit acoustumé , et puy dist à Geuffroy : Beau filz , il te convient partir d'icy , et retcurner en ton pays ; et me salue tous mes enfans et mes barons. Et Geuffroy prinst adonc congïé de son père , tout en plourant , et moult s'en partist enuis ; et aprez descendist dela salize , et vint en l'abbaye , où le prieur le bienveigna , et se donnoit moult grant merveilles pour quoy il avoit tant demouré là sus.

L'istoire nous dist que Geuffroy donna moult de riches dons et beaulx joyaulx à l'eglise , et puy prinst congïé du prieur et des moynes ; mais le prieur le convoya jusques à Culbaston , et disna Geuffroy avecques le prieur , et luy dist en secret que Raimondin estoit son père , et luy pria moult qu'il se prinst garde de luy , et que l'eglise n'y perderoit riens , et le viendroit tous les ans veoir une foys tant comme il viveroit. Adonc respondist le prieur que de ce ne failloit point doubter , car il en feroit moult bien son debvoir. Aprez prinst Geuffroy congïé , et s'en vint à Berselonne au giste , et le lendemain s'en partist ; et tant fist par ses journées qu'il vint à Lusignen , où Thierry son frère et les barons le receuprent moult liement , et furent tresjoyeux de sa venue ; et quant ilz furent à recoy , il compta à Thierry son frère toute la pure verité de la chose et de leur père aussi ; et lors Thierry , qui moult l'amoit , com-



mença à larmoier moult tendrement ; et Geuffroy son frère, ce voyant, luy dist ainsi : Mon tresdoulx frère, encores vous faut-il demourer cy, car sachiés que je vueil aller voir nos deux frères en Allemaigne, c'est assavoir le roi Regnauld de Behaigne et le duc Anthoine de Lucembourg ; mais je n'iray pas degarny de gens d'armes, car il y a de tresmauvaises gens en icelles parties, et qui moult vœulentiers ro bent les passans le chemin. Par mon chief, mon frère, que nous laissons nos pays en garde à nos barons, et amainerons avec nous cinq cens bassines, et qu'il vous plaise que je alle avecques vous, car j'ay ouy dire qu'il y a moult grant guerre entre ceulx d'Anssay et ceulx d'Autriche. Par ma foy, dist Geuffroy, vous dictes bien : car par adventure s'en pourroit bien Anthoine nostre frère mesler de celluy fait. Et adonc quant ilz faisoient leur ordonnance, Odon le conte de la Marche vint parler à Geuffroy à bien soixante bassines ; car pour lors il avoit guerre au conte de Vandosme ; et adonc Raimonnet leur frère, conte de Foretz, arriva aussi en celle propre journée par devers ses frères. Ainsi fut moult grande la feste que les frères s'entrefirent, et furent tous moult joyeux quant ilz eurent oy les nouvelles de leur père, et bien disdrent qu'ilz l'iroient veoir tous ensamble.

---

*Comment Geuffroy fist refaire l'abbaye de  
Maillières.*

**G**euffroy , avant son departement , chargea et ordonna gens pour reffaire l'abbaye de Maillières ainsi comme le Saint-Père luy avoit enchargé pour penitence, et leur assigna où ilz prendroyent argent pour payer les ouvriers ; et puyz laissa bon gouvernement en son pays ; et aussi fist son frère Thierry au sien. Et quant Odon et Raimonnet visrent que ilz se mettoyent en chemin pour aller veoir leurs autres deux frères en Allemagne, si disdrent entre eulx que aussi feroient-ilz. Si demandèrent tantost aux gens de leurs pays que ilz leur fussent au devant à Bonneval. Et à ce temps estoient ceulx frères ensamble, acompaignez de deux mille bassines et de mille arbalestriers. Et quant le conte de Vandosme en oyt les nouvelles, il cuida certainement que ilz venissent pour le exillier, et que Odon se fut complaint à ses frères de luy ; et doubta tant Geuffroy, que il se vint rendre à Bonneval en la mercy de Odon, conte de la Marche ; et il luy pardonna tout le meffait que oncques il fist à luy ; et le conte luy fist hommaige de la terre de quoy la hayne estoit entre eulx deux.

En ceste partie nous racompte l'istoire que les quatre frères se partirent de Bonneval , et puyz se penèrent tant d'errer que ilz vindrent en la Champagne , et en leur compaignie pluseurs grans seigneurs ; et se logèrent une nuyt sur une ripvière nommée la Meuse, dessoubz une forteresse qui est appelée le Chasteau de Durres , pour ce que il siet sur

la salize en hault sus la ripvière. Or me tairay ung peu à parler d'eulx, et commenceray à dire et à parler du roy d'Anssay, qui avoit une moult grosse guerre au conte de Fribourg et au duc d'Autriche, qui l'avoient assiegé en une sienne fortresse qui estoit appelée Pourrencru, et estoit la place à quatre lieues de l'abbé. Et adoncques le roy d'Anssay manda le roy Regnauld de Behaigne, son nepveu, car il avoit sa niepce espousée, et si avoit mandé le duc Anthoine de Lucembourg, que ilz luy venissent aidier contre ses ennemis, qui estoient si fors que il ne les povoit plus resister. Et estoit le roy Regnauld pour lors venu à Lucembourg atout quatre cens bassines, et avoit amené la royne Aiglentine, sa femme, avec luy, et Oliphart, son filz. Grande fut la joye que les frères s'entrefirent. Adoncques Anthoine bienveigna moult Regnauld et la royne sa seur, et son nepveu Oliphart. Et la duchesse Cristienne leur vint à l'encontre, avecques elle ses deux filz, c'est assavoir Bertrand et Lochier, et sa mesnie. Là eut moult grant joye faicte des frères, des seurs et des nepveux les ungz aux aultres. Et tous ensamble en une compaignie entrèrent en la ville, et descendirent au chasteau; et les baignons se logèrent en la prarie ès tentes et pavillons. Adoncq vindrent deux chevaliers poitevins qui avoient esté avec le roy Regnauld et avec le duc Anthoine à leurs conquestes; mais quant ilz vindrent en la prarie et virent l'ost des baignons d'une part, et d'autre les gens du duc Anthoine, ilz furent moult esbahis que ce povoit estre; et commencèrent à demander se ilz vouloient tenir le siège devant la ville, et ilz disdrent que non. Adoncques passèrent les deux chevaliers outre, et vindrent au chasteau, et là descendirent, et montèrent en la salle,

où ilz furent bien congneus de toutes pars; et leur fist-on grant joye; et vindrent devant les deux frères, et les saluèrent de par Geuffroy et leurs trois aultres frères, et aussi toute la compagnie. Adoncques, quant les deux frères ouyrent les nouvelles, ilz leur firent faire grant joye, et eurent moult bonne et belle chière, et leur demandèrent se leurs frères estoient en bon point, et ilz leur disdrent que oy, et sont à deux lieues d'icy atout deux mille bassines et mille arbalestriers, où ilz vous viennent veoir. Par ma foy, dist le roy Regnauld, Anthoine, beau-frère, veez icy gracieuse compagnie venir veoir ses amis; au mans ne viennent-ilz pas la main desgarnie. Adoncques il s'escria : A cheveu, et faictes tendre toute la ville. Et ainsi fut-il fait; et montèrent adoncques les frères à noble compagnie de chevalerie, et en leur compagnie se misrent les deux chevaliers poitevins; et ainsi s'en allèrent à l'encontre de leurs frères; et les dames s'en allèrent en leurs chambres pour eulx atourner.

En ceste partie nous dist l'istoire que tant cheuachèrent Anthoine et Regnauld, que ilz rencontrèrent la première route, et leur demandèrent où sont les quatre frères; et ilz leur disdrent : Voiez-les là, des-soubz cest estandart qui est demy parti d'azur et d'argent. Et ilz s'en allèrent celle part. Or est-il vray que Geuffroy estoit monté sur ung grant destrier et coursier, et le baston au poing, armé de toutes pièces, fors du bassinet; mais ilz sceurent la venue des deux frères, si firent faire place environ d'eux, que nul ne les osoit approchier du long de deux lances; et y avoit foison de gens d'armes devant et derrière qui tenoient les aultres en ordonnance. Adoncques vindrent le roy Regnauld et le duc Anthoine saluer

leurs frères, et les bienveignèrent moult gracieusement. Là fut moult grande la joye que les frères firent entre eulx les ungs aux autres; adoncques ilz se mirent à chemin ensamble, deux et deux, tous les plus aisnez devant. Odon et Anthoine allèrent devant; aprez, le roy Regnauld et Geuffroy; et puy aprez, Raimonnet et Thierry; et alla tout leur ost aprez, à banières desploiez, et s'en allèrent vers Lucembourg, qui jà estoit tout encourtinée; et les bourgeois estoient parez, et les bourgoises, aussi bien parées, estoient aux fenestres, et les dames au chastel, moult noblement atournées, qui moult grant desir avoient de veoir les frères, et par especial Geuffroy, pour les proesses que on disoit qu'il avoit faictes. Atant vindrent les frères en la ville, et firent loger les gens Geuffroy et de ses aultres frères venus avecq luy, et aprez ceulx de Lucembourg.

Moult fut grant l'effroy au tendre pavillons et tentes. Or est vray que, quant les frères entrèrent à Lucembourg, ilz misrent Anthoine et Geuffroy devant. Et sachiés que les nobles et non nobles gens s'esmerveilloient moult fort de la fierté et de la grandeur de ces deux frères, et disoient tous ceux qui les veoient que ces deux hommes estoient bien taillez de desconfire ung grant host. Et tant chevauchèrent que ilz vindrent au chasteau, et là descendirent. Là estoient la royne et la duchesse, qui se entretenoient par les mains, et estoient leurs dames et damoiselles aprez elles, et vindrent tout droit faire la reverence aux frères. Là eut moult grant joye demenée. On fist mettre les tables, et le disner prest, et puy aprez lavèrent et se assirent, et furent moult noblement servis. Et quant ilz eurent trestous disné, Geuffroy leur compta toutes les adventures de ses faitz, et du

pays où il avoit esté en diverses besongnes et contrées. Et il commença à racompter et deviser l'aventure et la destinée du roy Elinas, dont ilz sont descendus, dont ilz furent joyeux. Et puyz compta la departie de son père, et en quel lieu il estoit, car du remanant sçavoient-ilz assez. Et puyz compta le roy Regnauld comment luy et Anthoine, son frère, s'en alloient secourir le roy d'Anssay, que le duc d'Autriche, le conte de Fribourg, le conte de Salerne, et jusques au nombre de dix comptes d'Allemaigne outre le Rin, avoient assiégué à Pourrentru. Adoncques respondist Geuffroy en ceste manière : Mes seigneurs et mes frères, nous ne vous sommes pas venus veoir pour reposer, quant vous avez tant d'ouvrages sur les bras ; et se nous eussions sceu au départir de Lusignen, entre nous quatre eussions amené assez de gens, combien que nous ne sommes que trop ; mais, beaulx seigneurs, ne faisons pas icy long séjour, mais allons courir sur nos ennemis. Adonc se dressa, et prinst congié de ses deux frères et de ses neveux ; et commença à dire en ceste manière : Beaulx seigneurs, qui a à besongnier ne doit pas attendre le lendemain de ce qu'il peut faire le serain. Et adonc prindrent congié Odon, Raimonnet et Thierry ; et tantost descendirent de la salle ; et adoncques leurs frères et les barons et les dames les convoièrent ; mais il n'y avoit celluy qui ne se donnast grant merveilles de la fierté de Geuffroy. Et quant ilz furent descendus en bas, ilz prindrent gracieusement congié des dames, et montèrent à cheveu ; et ne voulurent oncques souffrir que le roy Regnauld et Anthoine les convoiasent, mais leur dist Geuffroy : Prenez congié dès anuyt de vos femmes, mes seurs, et de vos aultres gens, et ordonnez bien et sagement

de vos besongnes ; et je m'en vois à mon logis , et moy et mes frères , pour ordonner nos gens , et aussi pour avoir guides qui sachent le pays , car nous ferons l'avant-garde entre nous quatre et nos gens. Et ceulx retournèrent et disdrent entre eulx l'ung à l'autre ainsi : Pour vray , cestuy homme ne peut longuement durer qu'il ne soit ou mort ou pris , car il ne craint riens qu'il soit au monde , et aussi à le conseillier c'est paine perdue , car il ne souffre riens fors selon son ymagination ; car pour certain le roy Urian et le roy Guion , nos frères , m'ont bien mandé comment il se gouverna par toute la terre où il avoit esté , et aussi en la mer , comment il y a besongné ; car , se il n'avoit que dix mille hommes avecques luy et il en voyoit devant soy deux cent mille , si se frapperoit-il dedens de sa fierté , sans prendre conseil de nulluy. Adonc le roy Regnauld luy respondist : Mon frère , cy se fauldra sur ce adviser d'estre plus sur sa garde , affin que , se il avoit affaire , que on luy fut prest à secourir pour le peril qu'il en pourroit advenir ; car de ce je ne luy sçay nul mal gré , pour ce que , au plus tost que on peut , on doibt grever ses ennemis ; et , puy qu'il se sent puissant de soy-mesmes , et qu'il est hardi et entreprenant , sa hardiesse , par foy , luy est bien seant ; car chose hardiement entreprise et poursuyte fait aussi ensuyvre le fait à bien. Et à tant en laissèrent le parler. Celle nuyt ilz prindrent congié de leurs femmes , et leur laissèrent bons gouverneurs ; et aussi Geuffroy ordonna d'autre costé et se pourveut de tout ce que mestier luy estoit , et eut bonnes guides. Et avoit enquis diligamment de ses ennemis , et des passages par où ilz devoient rapasser la ripvière , et que ilz ne povoyent rapasser que par Fribourg ou par



Balle. Adoncques il luy sambla que s'il pouvoit avoir l'ung, que legièrement il pourroit desconfire ses ennemis.

Le lendemain fist Geuffroy sonner ses trompettes et fist chanter la messe et armer ses gens, et se mist à chemin à belle compaignie et en belle ordonnance. Et adonc ses deux frères saillirent hors de la ville, et firent desloger leur ost. Là pouvoit-on veoir les banières de Lusignen ventiller au vent. Tant chevauchèrent et leur ost, qu'ilz passèrent la Lorraine, et se misrent es plains pays d'Anssay. Ung soir furent logés à six lieues de l'ost et à cinq de Fribourg. Lors appella Geuffroy ses frères et leur dist : Nous ne devons pas courir sur ces gens sans les deffier ; il fault mander qu'ilz se gardent de nous. Et ilz respondirent que c'estoit bien raison de ce faire. Adonc ilz firent une lettre faisant mention de ce, et fut le commencement de la lettre escripte en ceste manière : A vous duc d'Autriche, et à vous conte de Fribourg, et à tous vos alliez, nous Regnault, roy de Behaigne, nous Anthoine de Lusignen, duc de Lucembourg, nous Odon de Lusignen, conte de la Marche, nous Geuffroy de Lusignen, seigneur de ce lieu, nous Raimonnet de Lusignen, conte de Foretz, et je Thierry de Lusignen, seigneur de Parthenay, vous mandons que tantost, ces lettres veues, vous vous gardez de nous, car nous vous porterons dommaige le plus tost que nous pourrons, pour cause du tort que vous faictes et avez fait à nostre seigneur et bien amé cousin et oncle le roy d'Anssay. Et en ceste defiance misrent leurs six seaux, et fut baillée la lettre à ung herault qui tant erra qu'il vint au siège et la presenta au duc d'Autriche, et fut leue en audience. Comment, se disdrent les Allemands l'ung

à l'autre, le diable a apporté tant de ceux de Lusignen en cestuy pays? Il n'est maintenant nouvelles par pays que d'eulx, tant y a que les nouvelles sont espandues par le monde, et entre les Sarrazins et entre les cristiens. Adonc s'en retourna le herault aux frères et leur compta la manière comment ceulx de l'ost s'esmerveilloient dont tant de ceulx de Lusignen povoient venir. Et adonc Geuffroy respondist ainsi : Par ma foy, ilz ont ouy parler de nous bien loing, mais tantost, se Dieu plaist, ilz nous verront de plus prez au plus brief que nous pourrons, au plaisir de Dieu. Or fut vray que la nuyt se reposa l'ost; mais Geuffroy dist à ses trois frères qu'ilz feissent l'avantgarde, et qu'il avoit ung peu affaire en certain lieu; et il disdrent de par Dieu, mais qu'il gardast bien où il iroit; et il leur dist : Ne vous en doubtez, je m'en garderay bien, se Dieu plaist. Et atant s'en partist Geuffroy, atout cinq cens bassines et cent arbalestriers, et aussi il eut deux bonnes guides qui bien sçavoient tout le pays, et se fist mener vers Fribourg, et s'embucha entre les hayes au point du jour; et là actendoit Geuffroy l'adventure.

L'istoire nous dist que adonc il se partist tout seul de l'embuche, et se mist sur une petite montaigne, au point du soleil levant, et estoit armé d'une costede fer sans bassinet, le plus couvertement qu'il peut, et avoit ainsi fait armer jusques au nombre de dix chevaliers es quieulx il se fioit le plus, et avoient dix grans sacs plains de fain, et avoient larges botes et esperons enroulliés, en guise de gros varles; et avoient avec eulx ung escuier de la duché de Lucembourg, qui moult bien sçavoit parler allemand. Et leur commanda Geuffroy qu'ilz fussent tous pretz quant il les viendroit querre, et aux aultres qu'ilz

espiassent se ilz entreroient dedens la porte, et se ilz les y voyoient entrer qu'ilz venissent atout les chevaux aprez eulx. Et ilz luy disdrent que ainsi feroient-ilz. Adonc Geuffroy apperceut que ung peu aprez soleil levant on ouvrist la barrière et le pont et la porte toute arrière; et fist-on grant foison de bestial saillir de leans. Et quant il apperceut ce, il s'en retourna tout court et fist prendre à ses dix chevaliers chascun son sac sur l'arson de sa selle, et prinst le sien; et lors l'escuier, qui moult bien sçavoit le langage, prinst ung sac aussi, et se mist devant Geuffroy embrunché sur son fardel. Adoncques vindrent à la barrière, et incontinent ledit escuier cria à haulte voix : Ouvrez icy, ouvrez, car nous avons si grant sommeil que plus ne povons, pour ce que ne finames à nuyt de chevaucher. Et on leur ouvrist. Et leur demandèrent que c'estoit que ilz portoient; à quoy ilz respondirent : Ce sont robbes que nous avons gaignées, et les venons vendre en ceste ville. Et ainsi les laissèrent passer, et tantost ilz montèrent sur le pont et entrèrent en la porte, et jettèrent hastivement leur sac jus, et tirèrent leurs espées, et firent sur les portiers, et les mirent à mort à terre, et tous les aultres à l'espée. Adoncques quant ceux de l'embuche perceurent qu'ilz furent dedens la porte, ilz brochèrent les chevaux, et vindrent à la ville, et entrèrent dedens la porte qui mieulx. Adoncq eussies oy crier : Trahis, trahis. Et d'autre part : Ville gaignée. Fin de compte, il est vray que tous ceulx qui furent trouvez furent mors; mais grant foison s'en partirent de la ville; et tantost Geuffroy garnist le pont dessus la ripvière, et y laissa quatre cens bassines et cent arbalestriers; et puy se mist en chemin devers l'ost, et trouva qu'ilz estoient des-

logiez ; et avoient les frères de Geuffroy moult grant paour de luy, mais quant ilz le virent ilz furent moult joyeux. Et adoncques il leur compta son adventure, et comment il avoit conquis le passage pour passer en Autriche ; et besoing en estoit. Et ilz en furent moult joyeux, et se logèrent celle nuyt tous ensamble aux plains champs, et jeurent tous armez, car ilz furent à une lieue de l'ost. Et celle mesme nuyt vindrent nouvelles en l'ost des parties adversaires comment Fribourg estoit pris, dont le conte et tous les autres furent moult doulens ; et leur compta le messagier la manière comment ce avoit esté. Par foy, dist le duc d'Autriche, ilz sont subtilz gens d'armes, et sont moult à redoubter. Qui n'y pourvoira de remède, ilz nous pourront bien donner ung grant eschat. Par Dieu, disdrent les autres, vous dictes vray. Et ainsy laissèrent la chose jusques à lendemain ; et sur ce eurent conseil.

En ceste partie nous dist l'istoire que le lendemain au point du jour, ouyrent les frères messe, et puy ordonnèrent leurs batailles. Geuffroy et ses trois frères qui avec luy furent venus, et leurs gens, eurent la première bataille, Anthoine eut l'autre, et le roy Regnault la tierce, et s'en allèrent les bannières au vent. Par ma foy, c'estoit grant beaulté à les veoir. Adoncques environ le soleil levant, vindrent sur une petite montaigne, et commencèrent à veoir et regarder la fortesse du Pourrencreu, et le siège entour ; et, ce fait, descendirent la vallée. Et à celle heure vint ung chevalier qui s'estoit allé esbattre hors de l'ost, qui cria à l'arme quant il vit venir les frères. Lors se coururent armer de toutes pars, et se vindrent renger au dehors de l'ost. Adonc les batailles s'approchèrent, et au baisser des lances eut

moult grant criée et grant froissée de lances ; et moult fut l'encontre fière et dure ; et y eut d'une part et d'autre moult d'occis. Les batailles sembloient estre tout en une. Là povoit-on veoir grant occision ; et la chose estant en tel estat, Geuffroy tenoit l'espée empoignée et en frappoit par telle manière que tout ce qu'il rencontroit il jettoit par terre. Adoncques les six bannières des frères se joindirent ensamble, et alloient iceulx six frères en une flotte. Là oyoit-on crier, Lusignen : en pluseurs lieux, et alloient iceulx frères desrompant les batailles, et mettans tout en fuyte. Et fut le duc d'Autriche abbatu du cheveu par terre d'ung revers que Geuffroy luy donna ; et, luy abbatu, il fut incontinent saisi ; et Anthoine prinst le conte de Fribourg, et fut baillé à quatre chevaliers en garde. Que vouldroit ores faire long compte ? La bataille fut desconfite, et s'en allèrent ceulx qui peuvent eschapper, les ungz vers Balle, les aultres vers Fribourg ; et y eut merveilleuse occision, car il y eut de vingt et cinq à trente mille tant d'Autrichiens que de leurs aidans. Adoncques ceulx du fort furent moult esbahis quant ilz visrent dehors tel toullis, mais ne demoura gaires que on leur dist que c'estoient les frères de Lusignen. Adoncques issist le roy d'Ans-say dehors, et vint aux logis où les frères estoient logez ès tentes qu'ilz avoient conquises ; et le roy là arrivé les festoya moult amoureusement, et les mercia moult humblement du noble secours qu'ilz lui avoient faict. Et tantost luy firent admener le duc d'Autriche, le conte de Fribourg, et six aultres contes, et les luy baillèrent, et luy disdrent : Damp roy, vecy vos ennemis ; faictes-en à vostre guise. Et le roy les en mercia moult humblement. Mais, à brief parler, ce non obstant, ilz traictèrent ensamble,

tant par le moyen des frères comme par eulx, qu'ilz promissent, par foy et serment, à restablir au roy d'Anssay toute sa perte. Et se vous voulez sçavoir la cause pour quoy la guerre estoit meue entre eulx, c'estoit pour ce que les aultres demandoient à avoir ce qui demoura au roy d'Aussay par ledit traicté. Et si jurèrent et promissent que jamais ilz ne mouveroient guerre l'ung à l'autre; et Geuffroy fist rendre au conte de Fribourg sa ville, dont il le mercia moult, et luy offrist moult humblement son service. Et là fut accordé le mariage de Bertrand, le filz au duc Anthoine, à Mellidée, la fille au roy d'Anssay; et adonc, quant ce fut fait, le duc d'Autriche et ses gens prendre congié des frères; et s'en partirent les frères et le roy d'Anssay et Mellidée sa fille, et vindrent à Lucembourg; et là furent faictes les neupces à moult grant joye et solemnité; et, la feste passée, le roy Regnauld et sa femme prindrent congié de leurs frères, et s'en allèrent en Behaigne. Et Geuffroy et ses frères reprindrent congié de leur frère, et de la duchesse et de leurs nepveux, du roy d'Anssay et de sa fille, et s'en retournèrent chascun en son pays; et le roy d'Anssay retourna au sien, et emmena sa fille et Bertrand son mari. Et nous dist l'istoire que depuys se trouvèrent les huyt frères ensamble à Monserrat, et tindrent entre eulx grant feste; et firent tant que Raimondin, leur père, vint au bas de son hermitaige, et fut moult joyeux de veoir ses enfans ensamble; et aprez ce, prinst Raimondin congié de ses enfans, et remonta en son hermitaige. Et à leur departement donnèrent les frères de moult riches joyaulx à l'eglise, et aprez prindrent congié l'ung de l'autre, et s'en allèrent chascun en leurs contrées, les ungz par mer, et les aultres par terre.

Cy nous tesmoingne l'histoire que tant que Raimondin vesquist, Geuffroy et Thierry son frère le visitèrent unes foys chascun an ; et estoit assez prez du terme qu'ilz devoient mouvoir, car Thierry estoit venu à Lusignen, et devoient mouvoir dedens trois jours ensuyvans, que advint une adventure de quoy les frères furent moult esbahis et doulens, car la serpente se monstra sur les murs, ainsi que tous la peurent bien veoir à plain, et alla tout autour de la forteresse par trois foys, en signe qu'elle prinst moult douloureusement congîé dudit lieu, et se mist sur la tour Pontume, et là faisoit si griez plains et si tres grans souspirs, qu'il sembloit proprement à ceulx qui là estoient que ce fut la voix d'une dame ; et aussi estoit-ce, comme nous racompte l'histoire. Et adoncques Geuffroy et Thierry en eurent moult grant pitié, car ilz sçavoient bien certainement que c'estoit leur propre mère, et pour ce commencèrent à plourer moult tendrement. Adonc quant elle les perceut plourer, elle s'enclina et jetta ung cry si horrible et si douloureux qu'il sambla proprement à ceulx qui l'oyrent que la tour deubt fendre. Aprez, les frères partirent pour aller à Monserrat, et firent tant qu'ilz arrivèrent audit lieu, et trouvèrent leur père trespassé, dont ilz menèrent moult grant dueil.

Le lendemain vint le roy d'Arragon, la royne et tous les barons et prelas du pays, et pluseurs autres ; et y avoit foison de dames et damoiselles, et de bourgoys et bourgoises des bonnes villes du pays ; et y estoient Geuffroy et Thierry moult richement habitez, quant pour dueil faire eulx et leurs gens. Adonc vindrent vers le roy d'Arragon, vers les princes et prelas, et tenoient entre eulx le prier pour faire congnoistre les seigneurs par nom et par sur-



nom. Et sachiés que Geuffroy et Thierry firent moult honnourablement la reverence au roy et à la royne d'Arragon et aux aultres barons, et les mercièrent moult honnourablement de l'onneur qu'ilz leur faisoient. Adoncques entrèrent au moustier, et firent commencer le service moult devotement, et fut l'offrande moult grande et riche, et furent les chevaux offerssi honnourablement comme on devoit faire pour ung tel prince.

Ainsi comme je vous dis fut fait l'obsèque de Raimondin, et y eut moult grant noblesse; et aprez le service fut ensepveli le corps, et fut bien seellée la sepulture par dessus, qui fut moult riche et moult noblement ouvrée, selon l'usage du temps de lors; et fut le disner grant et noble. Et est vray que le roy et la royne d'Arragon regardoient moult volentiers Bernardon, le nepveu de Geuffroy et de Thierry, et moult leur pleut, car il servoit les seigneurs si gracieusement que merveilles; et tant que, aprez graces, la royne pria au roy qu'il demandast à Geuffroy qui celluy enfant estoit. Par mon chief, dist le roy, j'avoys en propos de le demander, car il me plaist moult, et tant vault mieulx qu'il vous plaist aussi. Et lors le roy appella Geuffroy, et lui demanda de quel lignage celluy enfant estoit, qui tant bien estoit endoctriné. Par ma foy, dist-il, il est filz de Odon, le conte de la Marche, qui est nostre frère. Geuffroy, dist le roy, il samble bien qu'il soit sailly de noble extraction, et aussi il le monstre bien. Sachiés de vray que l'enfant nous plaist moult, et aussi fait-il à la royne; et vrayment, s'il vous plaisoit à nous le laisser, nous en ferions tant pour l'amour de vous, que vous nous en sçauriés bon gré au temps advenir. Sire, dist Geuffroy, le père en a encores deux et

deux filles , et, puyz qu'il vous plaist, de bonne heure fut-il né , et il nous plaist bien. Et lors le roy l'en mercia moult, et aussi fist la royne. Et sachiez que celluy enfant eut puyz espousée la fille au seigneur de Cabières en Aragon , qui plus n'avoit d'oir ; et en sont issus les hoirs de Cabières , qui ores vivent. Adoncques le roy et la royne prindrent congié, et aussi firent tous les aultres barons , des deux frères, qui les convoièrent moult honnourablement, et puyz s'en retournèrent à l'eglise et mirent leur nepveu en beau point , et luy baillèrent grant foison de finance pour soutenir son estat , et aussi luy baillèrent ung tressage escuier pour le gouverner, et l'envoierent au roy moult bien accompagné ; et le roy et la royne le receurent moult liement et l'aimèrent moult. Or vous diray des deux frères , et comment ilz prindrent congié du prier, et firent moult de bien à l'eglise, et en vouloient amener le chappellain et le clère de leur père ; mais ilz ne voulurent oncques partir, et se rendist le chappellain hermite au lieu de son maître ; et le clère demoura serviteur comme devant. Et aprez s'en partirent Geuffroy et Thierry avec leurs gens, et apportèrent le corps de leur père ; et, en toutes les villes où ilz gisoient, faisoient autour du corps grant luminaire , et dire et faire prier Dieu par les religieux pour leur père. Et les convoia le prier de Monserrat jusques à Perpignen ; et puyz il prinst congié et s'en retourna en son abbaye ; les deux frères et leur route errèrent tant qu'ilz vindrent à Lusignen. Là furent adoncques mandez les contes de Foretz et de la Marche, qui estoient leurs frères ; et firent faire l'obsèque de leur père à Nostre-Dame de Lusignen. A celluy obsèque furent tous les barons du pays, et fut illecq corps ensepvely à grant

noblesse et à grant solemnité. Et y fut faict ung moult grant disner; et fut adoncques Geuffroy tenu pour estre le droit seigneur de Lusignen; et comptèrent à Odon leur frère comment le roy et la royne d'Arragon avoient voulu avoir Bernardon son filz. Et il respondit : Que Dieu y ait part, car je tien à bien employé. Lors prindrent congié les frères et les barons de Geuffroy, et retournèrent chascun en leur pays; et Geuffroy demoura à Lusignen, qui puy fist moult de biens.

---

*Comment l'abbaye de Maillières fut refaïcte.*

**E**t fut l'abbaye de Maillières refaïcte plus grande et plus puissante qu'elle n'avoit esté par avant; et y mist Geuffroy six vingz moynes, et les renta moult bien; et furent ordonnez pour tous temps et à tousjours pour servir Dieu devotement et prier pour les ames des trespassez, et aussi pour les ames de Raimondin et Melusine, sa femme, et pour les ames de tous leurs hoirs, et de tous aussi qui de eulx estoient issus. Et se fist Geuffroy signifier et escrire à la porte; c'est assavoir la longueur et la grandeur de luy, au plus prez que on peut faire à sa samblance. Et dist l'histoire que le roi Urian regna moult puissamment en Chippre, et aussi firent ses hoirs aprez luy. Et, par cas pareil, regna roy Guion en Armenie; et aussi semblablement le roy Regnault en Behaigne, Anthoine à Lucembourg, Odon à la marche, Raimonnet en Forestz, Geuffroy à Lusignen, et Thierry à

Parthenay. Et en sont issus ceulx de Penebrot en Angleterre ; ceulx de Cabières en Arragon , comme j'ai dessus dit ; ceulx du Chassenage du Dauphiné ; ceulx de la Roche , et ceulx de Candillat , si comme on le treuve ès anciennes croniques. Je vous vueil encores parler de Geuffroy au grant dent.

Icy aprez nous dist la vraye histoire que, bien dix ans aprez la mort de Raimondin, Geuffroy son filz gouverna sa terre tellement que en ces dix ans on ne rendist aulcuns comptes , ne aussi il ne luy en challoit. Quant on lui disoit ainsi : Monseigneur, oyez vos comptes , si sçaurez comment vous vivez ; il respondist en ceste manière : Ne faictes-vous à nulluy tort pour rente ne revenue que j'aye ? et quel compte voulez-vous que j'aye , quant vous et moy sommes tous aises ; que mes fortresses sont bien retenues , toutes mes besongnes en bon point ; que vous me baillez argent quant j'en demande et me faictes finances de ce que je vueil avoir ? Quel compte voulez-vous que j'aye ? Quant est de moy , je ne vueil aultre compte ouyr , ne je ne vous sçauroye aultrement requerre. Cuidés-vous que j'aye cure de faire une maison d'or ? Celle de pierre que monseigneur mon père et madame ma mère m'ont laissée me souffist bien. Et ses recepveurs respondirent à luy : Au moins, Monseigneur, ne peut ung prince faire moins que de ouyr ses comptes unes fois chascun an, et ne fut ores que pour la salvation de ses recepeveurs et ses gouverneurs pour en faire quittance , affin que on ne leur sache que demander ne à leurs hoirs en temps advenir. Tant misrent-ils de poingz avant à Geuffroy que il se consentist à ouyr ses comptes , et fut le jour assigné. Adouques vindrent tous ses recepveurs de toutes ses terres , et entrèrent en une bonne chambre fermée.

Là fut Geuffroy et ceulx qu'il avoit commis pour les ouyr.

Cy aprez nous dist la vraye histoire que, oyant ledict Geuffroy ses comptes, compta entre les aultres son recepveur de Lusignen, lequel, en la fin de chascune année, employoit en despence dix soubz pour le pommel de la tour. Et, ce oyant, Geuffroy demanda tantost : De la quelle tour est-ce que le pommel couste tous les ans dix soubz ? Ne le povez-vous faire si fort que il dure plus de dix ou douze ans, affin que on ne compte pas si souvent ? Et incontinent ilz respondirent : Monseigneur, c'est rente que nous payons tous les ans. Comment, dist Geuffroy, je ne tiens la forteresse de Lusignen et le chasteau que de Dieu, mon createur tout puissant ; à celluyouldroye bien estre quite pour chascun an pour dix soubz. A qui les payez-vous ? Sire, par nostre foy, nous ne sçavons pas. Et comment, dist Geuffroy, vous voulez avoir quittance de moi, et aussi veulz-je avoir la quittance de celluy à qui vous paieez les dix soubz de rente pour le pommel de la tour. Et, par la dent Dieu, dist Geuffroy, vous ne me aurez pas de tel jour, car, se je puy aulcunement sçavoir à qui il est, il monstrera comment je luy doibz, ou il me rendra, ou vous ou aultre qui avez aloé en vos comptes, tout ce que il en a receu. A ce respondirent les recepveurs et gouverneurs à Geuffroy en ceste manière : Monseigneur, il y a bien cinq ou six ans aprez que ma dame vostre mère fut partie de monseigneur vostre père, que tous les ans, le dernier jour d'aoust, venoit une grant main, et prenoit le pommel de la tour Pontume, et l'arrachoit si tresfort qu'il abbatoit moult grant partie de la couverture de la tour, et cousteit à reffaire tous les ans

vingt ou trente livres. Adoncques vint ung homme que vostre père n'avoit oncquesmais veu, ce disoit, qui lui conseilla que le dernier jour d'aoust il mist trente pièces d'argent, dont chascune vaulsist quatre deniers, en une bourse, et le fist porter, entour nonne et vespres, au dernier estage de la tour, et que la bourse où seroient mis les dix soubllz fut de cuir de cerf et fut mis sur la pièce de bois qui soutient le comble où le pommel est assis, et que ainsi le fist faire et continuer tous les ans, et le pommel demourroit, par ce faisant, tout entier; et ainsi ce a esté tous les jours depuys faict, et oncques puy le pommel ne se bouga ne ne fut empiré, et n'y trouva-on riens lendemain. Et, quant Geuffroy entendist ceste parolle, il commença moult fort à penser sur ce fait, et fut moult longtemps sans répondre.

L'istoire nous tesmoingne que moult longuement musa Geuffroy sur ce fait; et, quant il y eut assez pensé, il commença à dire tout hault: Et comment cuidéz-vous, se mon père a voulu asservir l'eritaige tant qu'il l'a tenu, que pour tant je le vueille tenir à serf quant il est francq. Vous aultres avez veues les lettres comment le bon conte Henry de Poitiers le donna à mon père si franchement qu'il ne devoit riens à nul homme qui vive que à Dieu tant seullement. Par mon chief, je n'en paieray jamais croix à homme pour moi. A tant s'en issist de la chambre tout courousié, et s'en allèrent ses gens aprez luy, que oncques n'y en eut ung qui osast ung seul mot sonner; et leur dist Geuffroy: Gardez-vous bien que jamais ne soiez si hardis d'en paier denier; et sachiés que, se vous faictes le contraire, je vous couronneray du corps: car c'est ma voulenté de veoir qui sera si hardi de demander truage sur ma terre ne

sur moy ; et, au jour que je le souffriray, soye mort de malle subite. Mais aportez-moy tantost la bourse et l'argent au jour que vous avez acoustumé de le porter. Et ilz disdrënt que si feroient-ilz. Et à tant s'en partirent, et demourra la chose ainsi jusques au dit jour. Adoncques Geuffroy manda par ung mes-sagier son frère Thierry en Parthenay, et aussi Ray-monnet en Foretz, et Odon en la Marche, que ilz venissent tous à ce jour à luy. Et ilz si firent, et leur compta cette adventure, de quoy ilz furent moult esbahis. Et ilz demandèrent à Geuffroy qu'il apensoit de faire, et il leur respondist : Vous le verrez bien. Et vint la journée du dernier jour d'aoust ; et lors Geuffroy oyt messe et se confessa moult devotement, et receut le corps nostre seigneur Jhesucrist ; puy issist de l'eglise et vint au donjon et avecq luy ses frères et les barons du pays, et se assirent à disner ; et aprez disner Geuffroy se arma de toutes pièces, et après devalla une estolle que le chappellain qui luy avoit la messe dicte tenoit, et la mist entour son col, et la croisa devant son pis ; et, ce faict, prinst la bourse où les trente deniers estoient, laquelle en argent valloit loyaulment dix soubz parisis, et la pendist à son col ; puy çaindist son espée, pendist l'escu à son col, et puy fist par le chappellain jeter de l'eaue benoite sur luy ; et, ces choses faictes, commanda ses frères à Dieu, en disant en ceste manière : Je m'en vais veoir se je pourroy trouver celluy qui veult avoir rente sur ma forteresse de Lusignen ; mais, s'il n'est plus fort de moy et je le treuve, l'argent me demoura. Et ainsi monta à moult au plus hault de la tour, c'est assavoir au dernier estache, et ses frères et les barons demourèrent au dessoubz en moult grant doubte et fraeur



que Geuffroy ne fut peri. Mais Geuffroy, qui ne craignoit riens, actendist en celluy estage moult grant pièce de temps, et regardoit se il verroit riens venir.

Ainsi comme nous tesmoigne l'histoire, actendist Geuffroy depuis nonne jusques à vespres que il ne vist ne oyt nulle chose du monde; et ung peu aprez vespres, il ouyt ung moult grant effroy, et vist tout le comble de la tour qui trambloit; et ung peu aprez regarda devant luy et vit venir ung grant chevalier tout armé qui luy dist à haulte voix : Comment, Geuffroy, me veulz-tu oster la rente que je doibz avoir sur le pommel de ceste tour, qui m'est deue, et en suys en saisine et possession dès le vivant de ton père? Où sont, dist Geuffroy, les lettres que tu en as? Montre-moy comment mon père en fut obligé; et si je voys que tu en aies bon droit, vecy l'argent tout prest pour toy paier. Et adoncques le chevalier respondist en ceste manière : Je n'en eus oncques lettre, mais j'en ay esté bien payé jusques à ores endroit. Par ma foy, dist Geuffroy, se je te les devoie de bonne debte, si aurois-tu grande paine de les avoir. Et, d'autre part, tu me tiens bien pour subject, qui ainsi me cuides asservir, et sans moy monstrar que tu en ayes nulle bonne cause. Dy, va, qui es-tu, qui as levé le mien ainsi larcineusement par l'espace de quatorze ou de xv ans? Je te deffie de par la puissance de Dieu, mon createur, et te challenge mon heritaige. Par ma foy, dist celluy, il ne t'en fault jà doubter : car de par Dieu suys-je vraiment, et mon nom sçauras-tu assez à temps. Et adonc sans plus dire s'entrecoururent sus, et se donnèrent de moult grans coups et de cruelz, et oyoit-on la noise qu'ilz faisoient moult fort de passer

et de repasser qu'ilz faisoient par celle tour, et des coups d'espées qu'ilz s'entredonnoient; et bien entendoient que Geuffroy avoit affaire à forte partie; et y fussent allez les frères, mais Geuffroy leur avoit deffendu. Or vous diray de la bataille; et bien est vray que le chevalier de la tour, quant il trouva Geuffroy si ferme de l'estremie de l'espée, il bouta l'espée au foureau et jetta l'escu par derrière. Et, quant Geuffroy l'apperceut ce faire, il jetta aussi le sien, et haulça l'espée à deux mains, et en ferist le chevalier sur le bassinet si roidement qu'il le fist tout chancier; et il le suyt, et luy donna du pommeau de l'espée moult grant coup; et celluy l'embrassa à deux bras; et adoncques Geuffroy laissa aller l'espée, et le aherdist, et là commença moult fort à l'assier; et sailloient hurtebillant de telle force que il n'y avoit celluy qui ne tressuast. Et adoncques le chevalier advisa la bourse, et empoigna l'argent et tout, et l'autre tira de tout son pouvoir, et le pendant rompist en la main. A celle heure estoit jà le soleil resconse, si longuement cestoient combatus. Et lors Geuffroy reprinst l'espée et l'empoigna par la main destre, et dist au chevalier: Encores n'as-tu pas la bourse ne l'argent; il te coustera avant du sang de ton corps; mais certes je m'esmerveille comment tu te peus tant tenir envers moi. Par ma foy, dist le chevalier, encores ay-je plus grant merveilles comment tu peus tant durer contre ma puissance. Je te donne journée à demain, car il est meshuy trop tard; et me trouveras en ce beau pré là dessoubz la ripvière par delà, monté et armé pour toy challenger mon droit, mais que tu m'asseures que personne nulle ne passera la ripvière que toy. Par ma foy, dist Geuffroy, je le t'assure. Et, à ce mot, l'autre se

partist, que Geuffroy ne sceut oncques qu'il devint. Par ma foy, dist Geuffroy, vcez cy appert messagier; je me donne grant merveilles que ce peut estre. Et adoncques il descendist les degrez et apporta l'escu du chevalier qu'il avoit conquis.

L'istoire nous dist et tesmoingne que, quant Geuffroy fut embas, l'escu au col, et à la destre main l'escu du chevalier qu'il avoit conquis, et en l'autre main la bourse et l'argent, qu'il fut moult festoié de ses frères et des barons, et luy demandèrent qu'il avoit trouvé. Adoncques il dist qu'il avoit trouvé ung des vaillans hommes, et qui plus luy avoit donné de paine que nul que il trovast oncques, et leur racompta la manière de la bataille et de leurs parolles, et comment il cuida oster la bourse, et comment ilz se sont despartis, et par quelles convenances, et comment il vint et s'en alla soubdainement. Et ceulx commencèrent à rire et disdrent qu'ilz n'avoient oncques mais ouy dire pareille chose; mais quant ilz visrent Geuffroy avoir le bassinnet embarré par force de coups, et que son harnoyz estoit desrompu, ilz n'eurent tallent de rire, car ilz veoient bien que c'estoit à certes. Et lors se desarma Geuffroy et souppèrent; et le lendemain matin se leva Geuffroy et ses frères, et oyrent la messe, et aprez Geuffroy prinst une soupe en vin, et puy s'arma de toutes pièces et monta à cheveu qui fut moult fort et viste, et pendist l'escu au col, et empoigna la lance; et le convoyèrent ses frères et les barons jusques au ruisseau qui court parmy la prarie devers Poitiers, et là prinst congié, et passa tout outre la ripvière, et tantost apperçoit ung chevalier de toutes pièces armé, l'escu au col et la lance sur le faultre, et monté sur ung grant coursier liart, et monstra bien

samblant d'omme qui ne doubta gaires sa partie adverse.

L'istoire nous dist que quant Geuffroy apperceut le chevalier auprez , si luy dist tout hault : Sire chevalier, estes-vous celluy qui veult le treu sur ma forteresse? Et celluy respondist : Ouy, par mon chief. Et lors luy dist Geuffroy : Je le vous chalengeray bien se je puy, et vous deffendez, car bien besoing vous en sera. Adoncques, quant le chevalier entendist, si mist la lance en l'arrest, et Geuffroy d'aulture part ; et se viennent encontre l'ung à l'aulture par telle vertu qu'il n'y eut si bonne lance qu'ilz ne brissassent jusques à leurs poingz, et se viennent encontre de corps et de piés, d'espaules, de chevaux et de testes, si que il n'y eut celluy à qui les yeulx ne atinsselassent en la teste, et puyz trahirent leurs espées, et s'en vont entredonnant de si grans et si merveilleux coups que ceulx qui estoient oultre la ripvière estoient tous esbahis comment ilz povoyent endurer telz horions et paines ; et tant se combattirent qu'ilz n'eurent escu entier ne haberions qu'ilz ne fussent desmaillez en cent lieux ; et ainsi se combattirent tant qu'il fut heure de vespres, et tant que on ne sceut gaires lequel en avoit le meilleur. Et lors le chevalier prinst parolle et dist à Geuffroy : Atens à moy, je t'ay bien assaié, et, quant est de ces dix soubz, je te les quitte ; et sachiés que, tant que j'ai fait, ce n'a esté que pour le proffit de ton père et de ton ame, car il est vray que le pape lui avoit enjoinct penitence pour le parjurement qu'il avoit fait à ta mère, laquelle penitence il n'avoit pas encores faicte. Or est ainsi, si tu veulx fonder ung hospital et amortir une chappelle pour l'ame de ton père, que ta tour demoura d'ores en avant en son estat

paisiblement, combien que ne sera jamais heure qu'il ny adviengne plus de sauvages besoingnes que en lieu de tout le chasteau. Et Geuffroy luy respondist que, se il cuidoit qu'il fut de par Dieu, que ce feroit-il volentiers; et celluy luy jura que ouy. Geuffroy luy dist : Or soiez tout seur que tout ce feray-je faire au plaisir de Nostre Seigneur. Mais ores me dis qui tu es; et celluy respondist : Geuffroy, n'en enquiers plus avant, car plus n'en peulz-tu sçavoir à present, mais tant seulement que je suys de par Dieu. Et atant se esvanuist que Geuffroy ne sceut oncques que il devint, ne aussi ceulx qui estoient oultre la ripvière, qui furent moult esmerveillez qu'il povoit estre devenu; et aussi fut Geuffroy, qui adoncques passa la ripvière et vint à ses frères et barons, qui luy demandèrent comment il avoit chevi à son homme ne qu'il estoit devenu; et Geuffroy leur dist qu'ilz avoient bon accord ensemble, mais qu'il estoit devenu ne leur sçauroit-il dire nulles nouvelles. Et adoncques ilz vindrent à Lusignen, et fut Geuffroy desarmé en la salle, et firent pendre l'escu du chevalier qu'il avoit conquis le jour de devant sur le chevalier à ung des pilliers de la salle, et fut là tant que Geuffroy eut fait faire l'ospital et fonder la chappelle et bien renter, et, ce fait, on ne sceut oncques que l'escu fut devenu. Et lors prindrent congié les frères et les barons de Geuffroy, et s'en alla chascun en son pays. Et cy finist nostre histoire des hoirs de Lusignen, mais pour ce que les roix d'Armenie en sont extraictz, je vous vueil dire d'une adventure qui advint à ung roy d'Armenie.

L'istoire nous dist, et aussi je l'ay ouy dire à pluseurs, que commune renommée court que, grant

temps aprez le trespas du roy Guion , il y eut en Armenie ung qui fut moult beau jeune homme et en challeur de force et de vigueur, et plain de sa volenté et de grant cuidier, et estoit moult hardi et aspre comme ung lyonnet, ouyt nouvelles par aulcuns chevaliers voyagiers qu'il y avoit en la grant Armenie ung chasteau beau et riche, et estoit la dame la plus belle dame que on sceut au monde, et celle dame avoit ung esprevier, où tous chevaliers de noble sang qui y alloient veillier par trois jours et par trois nuytz sans dormir, elle s'apparisoit à eulx, et auroient ung don d'elle, tel qu'ilz voudroient demander, voire touchant choses temporelles, sans pechié de corps et sans touchier à elle charnellement. Adoncques le roy, qui estoit en sa fleur de beaulté et de vigueur et en son cuidier, dist que pour certain il iroit, et ne demanderoit plus que le corps d'elle. Et ny povoit-on aller que une foys l'an, et y convenoit entrer la surveillance de la saint Jehan, et y demouroit-on celluy jour, lendemain et le tiers jour ensuyvant, qui est le jour monseigneur saint Jehan, et qui y peut par ces trois jours veillier sans dormir, la dame sans faillir s'apparristera à luy lendemain par matin, et aura le don que il voudra demander. Adonc apresta le roy son arroy, et erra tant qu'il arriva armé à belle compaignie, et tant erra qu'il arriva la nuyct de la surveillance saint Jehan au chasteau de l'Esprevier, et fist tendre devant ung moult beau pavillon, et souppa tout à son aise, et puy s'alla couchier et dormist jusques à lendemain soleil levant, et ouyt messe et puy menga une soupe en vin, et aprez s'arma et prist congié de ses gens, qui moult furent dolens de sa departie, car bien cuidoyent que jamais ne le deussent veoir. Et

ainsi s'en alla le roy vers le chasteau de l'Esprevier.

En ceste partie nous dist l'istoire que, quant le roy fut à l'entrée du chasteau, ung viel homme tout vestu de blanc vint à luy et luy demanda qui l'amenoit illec ; et il respondist en ceste manière : Je demande l'adventure et la coustume de ce chasteau. Et le preudomme luy respondist : Vous soiez le tres-bien venu, et vous en venez aprez moy, et je vous meneray où vous trouverez l'adventure. Dont le roy luy respondist : Grans mercis, et je suys tout prest. Lors se mist le preudomme devant luy, et le roy après, et puy passèrent le pont et la porte. Et moult s'esmerveilla le roy de la richesse et noblesse qu'il veit parmy la tour, et lors monta le preudomme les degrez de la salle ; si vit à l'ung des bous une perche qui estoit de banne de la licorne, et dessus estoit estendue une pièce de velous, et estoit l'Esprevier dessus et le gan emprez luy. Et adoncques luy commença le preudomme à dire : Amy, cy povez-vous veoir l'adventure de cest chasteau, et je vous en diroy la verité ; et sachiés que, puyisque vous vous estes mis si avant, il vous fault celluy esprevier veillier sans dormir trois jours et trois nuytz, et, se fortune vous vouloit estre icy amie que vous en peussiez faire vostre devoir, la dame de celluy s'apperra à vous le quart jour, et luy demandez seurement quelque don que vous voudrez des choses terriennes, sans point demander son corps, et sans faulte vous l'aurez ; mais son corps ne povez-vous pas avoir, et sachiés que, se vous le demandez, que mal vous en viendra. Or vous veuillez sur ce adviser, et s'il advient ainsi que vous dormez dedans le terme, prenez bien garde que vous ferez.



*Comment le roy d'Armenie vint veillier  
au chasteau l'Esprevier.*

**C**elluy preudomme s'en partist du roy quant il luy eut dit les parolles recitées dessus ; et demoura le roy à par luy ; et commença à regarder les grandes richesses qu'il veoit de tous costés, et puis regarda de l'autre part, et vit la table mise et la nappe belle et blanche dessus, et y veoit moult de nobles metz ; et adoncques il se traist celle part et en prinst de celluy qui mieulx lui pleut, et menga un petit, et beut une fois ; et se garda bien de faire nul excès, car il sçavoit assez que trop mengier et trop boire attraist fain de dormir. Et cecy considerant, alloit parmy la salle esbatant. Adonc il commença à regarder maintes belles histoires peintes, et y estoient les escrips dessoubz qui donnoient la congnoissance que c'estoit ; et entre les aultres histoires y estoit peinte l'histoire du roy Elinas d'Albanie, et de Pressine, sa femme, et de leurs trois filles, et de tout, depuis le commencement jusques en la fin ; et comment ses trois filles l'encloient en une montaigne appelée de Brumbelyo, en Northobelande, et comment Pressine leur mère les en pugnist quant elle sceut le meffait qu'elles avoient fait à leur père ; et là estoient escripz tous les faitz et circonstances depuis le commencement jusques en la fin.

Moult prinst le roy grant plaisir de lire en celles histoires et en pluseurs aultres qui là estoient peintes et devisées, et ainsi musa le roy en regardant et en lisant en ces histoires, jusques au tiers jour qu'il

alloit par leans. Adoncques il percut une tresnoble chambre, et estoit l'uyt tout ouvert arriere. Lors le roy entra et regarda parmy la chambre, et y vit grant foison de chevaliers pains armez, et estoient dessoubz leurs noms en escript, de quel lignage et de quelle region ilz estoient; et par dessus y avoit escript en ceste maniere : En tel temps veilla ceans ce chevalier nostre esprevier, mais il dormist, et pourtant il luy fault tenir compaignie à la dame de ceans, tant comme il pourra vivre; mais il ne luy fault riens qu'il n'ait à son plaisir, fors seulement le departir qu'il ne peut faire de ceans. Mais entre ce chevalier avoit trois places vuides où il y avoit trois escus armoiez des armes de trois chevaliers, des quieulx les noms estoient escripts dessoubz, la region, et de quel lignage ilz estoient : et par dessus les escus estoit escript ce qui s'ensuyt : En tel an veilla nostre esprevier ceans cestuy noble homme chevalier bien et deuement; et emporta sa don. Et ainsi avoit escript par dessus les deux aultres escus. Et tant musa le roy en la chambre que par peu qu'il ne sommeilla, mais il s'en percut et vint hors de là, et vit que le soleil estoit jà tout bas, et ainsi passa le roy celle nuyt jusques au matin.

L'aulbe apparut, et vint le jour; et ainsi que le soleil se leva, vint la dame du chasteau en si noble et riche habit que le roy en fut tout esbahy, tant de la richesse de l'abbit comme de la beaulté de la dame. Et adoncques la dame salua le roy, et lui dist en ceste maniere : Sire roy, vous soiez le tresbien venu, car certes vous avez faict bien et vaillamment votre debvoir. Or demandez tel don qu'il vous plaira des choses terriennes, honnourable et raisonnable, et vous l'aurez sans arrester.

Adoncq respondit le roy, qui fut moult empris de l'amour d'elle : Par ma foy, dame, je ne demande or ne argent, terre ne heritage, bonne ville, chasteau, ne cité ; car, Dieu mercis, je suys riche homme, et ay assez et tant qu'il me souffist ; mais je vueil, s'il vous plaist, ma chièrre dame, avoir le corps de vous à femme. Et quant la dame l'entendist, elle fut moult couroucée, et luy respondist tout hault : Par foy, sire fol musart, à ce don avez-vous failly ; demandez aultre chose, car ceste ne povez-vous avoir. Et adonc le roy luy respondist : Tenez la promesse, ma dame, de l'aventure de cestuy chasteau, car, à mon advis, j'ay bien fait mon debvoir. Par ma foy, sire roy, dist la dame, je ne debas de ce ; mais ores demandez chose qui soit raisonnable, comment vous a esté dit, et vous l'aurez ; car moy ne povez-vous avoir. Par ma foy, dist le roy, ma treschièrre dame, ne vueil-je aultre don que vous, car point d'argent ne vous demanderay. Par Dieu, dist la dame, se me demandez plus, il te mesaviendra, et aussi fera-il à tes hoirs, jà soit ce qu'ilz n'y aient nul coulpe. Et le roy luy respondist : Et toutesfois ne vueil-je aultre don que le corps de vous, car pour aultre chose ne suys-je pas cy venu.

---

*Comment le roy voulut prendre la dame ,  
et comment elle s'esvanuyt.*

**E**t lors quant la dame vit qu'il ne muoit point son propos, elle fut moult couroucée, et lui dist : Fol roy, or as-tu failly a moy et à ton don, et t'es mis en aventure de demourer ceans a tousjours mais, fol, pour ce que tu es descendu de la lignée du roy Guion, qui fut filz Melusine, ma sœur, et je suys ta tante, et tu es si prez de mon lignage, posé ores que je me consentisse de toy avoir, l'église ne se voudroit pas consentir pour tant. Et puy luy commença à compter de chief en chief ainsi que vous avez oy et qu'est recité au chappitre du roy Elinas, et aussi des hoirs de Lusignen; et puy luy dist: Fol roy, par ta musardie il te mesadviendra; car toy et les tiens decherrez de terre, d'avoir, d'onneur et d'eritage, jusques à la neufiesme lignée, le royaulme que tu tiens, et portera celluy roy nom de beste mue; et t'en va, car cy ne peus-tu plus demourer. Adonc quant le roy l'entendist, oncques pour sa parolle ne mua sa folle erreur, mais la cuida prendre de faict par force, et tantost Melior s'esvanuist de luy.

---

*Comment le roy fut batu, et ne sceut de qui.*

**E**t incontinent sentist le roy descendre sur luy, aussi dru que pluye qui chiet du ciel, coups et horions d'ung costé et d'autre ; et fut moult deffroissé de coups orbes, et fut tiré et mal mené hors de la barrière, et là fut laissé. Et sachiés qu'il ne peut oncques veoir piet de ceulx qui ainsi le servoient, et le plus tost qu'il peut il se redressa le mieulx qu'il peut, et maudit celluy qui premier luy apporta les nouvelles de ceste adventure, et l'eure qu'il y estoit oncques allé. Et après vint à ses gens, qui bien veoyent qu'il ne retournoit pas si freschement comme il y estoit allé, et luy demandèrent : Monseigneur, estes-vous blessé ? avez-vous eu bataille où vous avez esté ? Et il respondit : Je suys un peu blessé, mais bataille n'ay pas eue, et ay esté tresbien batu, et ne sçay de qui, car je n'y vis oncques personne ; mais bien ay sentu les horions que j'ay receupz ; et sachiés que je ne me suys pas revenché ; et pourtant n'ay-je point eu de bataille, car il ne fait pas bataille qui les premiers coups donne, mais celluy la faict qui se revenge. Et ceulx respondirent : Monseigneur, vous dictes verité.

Assez tost aprez fist le roy cueillier son pavillon, et entra en la mer, et s'en alla le plus tost qu'il peut vers son pays, pensant de triste cœur aux parolles que Melior, la dame du chasteau de l'Esprevier, lui avoit dictes ; et moult se doubta d'avoir perdu son boneur ; mais il se garda bien de descouvrir son fait aux sergans. Pourtant il se descouvrit à ung sien frère, quant il fut en l'article de la mort ; et cel-

luy estoit jà actendant d'avoir le royaulme aprez luy; et luy dist comment il pensast à bien se gouverner sagement, car il lui en estoit bien besoing. Ce roy dont je vous parle n'eut oncques puyz joye au cueur, et regna moult long temps, mais de jour en jour il dechayoit en pluseurs manières, et en la fin il mourut. Et sachiés que ses hoirs ont eu depuys moult affaire, comme il appert encores au temps present, et en ont eu moult d'anuyz et de pestilence, comme a apparu et encores appert. Cy me tairay des roix d'Armenie, et en est conclue l'istoire, pour ce que il est tout cuidant que ilz sont extrais de la noble lignée du roy Elinas d'Albanie et de Lusignen, et encores au jour de la perfection de ceste histoire, qui fut parfaicte le jeudi septiesme jour d'aoust, l'an de grace mil ccc iiij vingz et xiiij (1), est apparant, car les roix d'Armenie en portent les armes, le cry et le surnom. Or vous ay dit et devisé, selon les vrayes croniques et selon la vraye histoire, comment la noble forteresse de Lusignen en Poitou fut fondée, et fut retraicte la noble et puissante lignée qui est descendue des nobles gens qui la fondèrent, dont Dieu en vueille avoir les ames recommandées en son saint paradis, qui est le siècle des siècles. Amen.

Ceste noble forteresse de Lusignen en Poitou, depuys tout le temps, est allée de main en main, en oultre qu'elle est venue en la main, par raison et conquete de l'espée, de hault, noble et trespuissant prince Jehan, filz du roy de France, duc de Berry, d'Auvergne, conte de Poitou, d'Estampes et de Boulon-

(1) Le texte porte : mil iiij vingz et xiiij. C'est évidemment une erreur, puisque Jean d'Arras dit, dès les premières pages, qu'il a commencé cette histoire en 1387.

gne, mon treschier seigneur et redoubté ; lequel m'a commandé à faire ce petit present traicté selon les vraies cronicques que j'ay eues, tant de luy comme d'aultres ; et ce que j'ay eu grant desir de faire son plaisir m'a fait entreprendre de faire ce dit present traicté, et mettre en prose, lequel j'ay mis au mieulx que je l'ay sceu faire. Si requiers à mon createur qu'il luy plaise que mon tresnoble et tresredoubté seigneur la vueille prendre en gré, et aussi à sa tresnoble seur Marie, fille du roy de France, duchesse de Bar et marquise du Pont, ma tresdoubtée dame, et le noble marquis de Moraine, cousin germain de monseigneur, qui lui a fait requerir qu'elle luy vueille requerre et luy vueille envoyer ceste histoire ; et aussi je prie qu'elle puisse plaire à tous ceulx qui la liront et orront lire. Et sachiés que, quant est de moy, je croy l'istoire estre véritable. Et dist-on pour certain que depuis la forteresse de Lusignen ne demoura mie .xxx. ans acomplis en main d'omme qui ne soit extraict de la dessus dicte lignée de par père ou par mère. Et est vray toutesfois, comme vous ay dit icy dessus et recité en l'istoire, quant la dicte forteresse doibt changier de maistre ou seigneur, que la serpente s'appert trois fois par trois jours devant.

Et quant à moy, veritablement j'ay oy dire à mon tresredoubté seigneur que du temps que Sersuelle la tenoit pour les Anglois, que le siège estoit de par mondit seigneur, que Sersuelle luy dist que certainement, par peu de temps avant que la forteresse fut rendue, que icelluy Sersuelle gisoit en son lict au chastel de Lusignen, avecq luy une femme née de Sancerre, nommée Alixandre, qu'il tenoit en concubinage, il vist lors presentement apparoir devant son lict une serpente moult merveilleuse, grande et



grosse, et avoit bien longue queue comme de sept à huyt piés, et estoit brodée de couleur d'asur et d'argent, et ne sceut oncques par où elle entra ; car à celle heure tous les huys estoient bien fermez et barrez, et avoit en la cheminée moult grant feu qui bien ardoit et cler. Et celle serpente alloit et venoit, debatant sa queue sur le lict, sans eulx mal faire. Et Sersuelle dist à monseigneur pour certain qu'il n'avoit oncques eu en sa vie ne eut oncques puys si grant paour ; et si luy dist qu'il se dressa en son seant en son lict, et prinst l'espée qui estoit en son chevès ; et luy dist la femme qui estoit avec luy, ainsi qu'il le recordoit à monseigneur : Comment, Sersuelle, vous qui avez en tant de bonnes places esté, avez-vous paour de celle serpente ? Certes, c'est la dame de ceste forteresse, et qui l'a fait edifier. Sachiés qu'elle ne vous fera jà mal ; elle vous vient monstrier comment il vous fault dessaisir de ceste place. Et dist Sersuelle que celle Alixandre n'eut oncques paour ; mais il dist bien qu'il ne peut oncques asseur estre. Et grant pièce aprez, elle se mua en guise de femme haulte et droicte, et sambloit estre vestue d'ung gros bureau, et çainte dessoubz les mamelles, et estoit affublée d'ung couvrechief à la guise du viel temps.

En celluy estat que je vous dis et ay recordé, jura et afferma Sersuelle à monseigneur qu'il le vit ; et plus il dist qu'elle se alla seoir sur le banc auprez du feu. L'une heure avoit le visage devers le lict et le doz au feu, et si qu'il pouoit bien tout à plain veoir sa face, et bien sambloit qu'elle eut esté moult belle femme ; et l'autre heure, elle tenoit le visage devers le feu, et gaires de temps ne se tenoit en ung mouvement. Et dist Sersuelle qu'elle demoura jusques à une heure prez du jour. Adoncques se trans-

figura en guise de serpente comme devant, et s'en alla debatant sa queue autour du lict et sur le piet, sans mal faire; et puyz elle se partit si soudainement, qu'il ne vit point son parlement, ne ne sceut oncques par où elle s'en estoit allée. Et cecy ay-je ouy dire à monseigneur et pluseurs aultres que Ser-suelle luy dist et luy jura sur ses sermens que preudomme peut faire et jurer, et depuys qu'il l'eut veue, ladicte forteresse fut bien brief rendue à mon dit seigneur, à qui Dieu en donne joye, par sa grâce, et à ses hoirs.

Encore est-il verité que il y a ung lieu à Lusignen, emprès le puy, auquel lieu, au temps passé, on a nourri poullaille, qu'elle se monstroït pluseurs foys à ung homme qui est encores en vie, qui demeure en la forteresse, et l'appelle-on Godart; et ne luy fait point de mal; et cela retrait-il sur son Dieu et son âme qu'il est verité. Item Yvon de Gales jura par sa foy à monseigneur qu'il l'avoit veue par deux foys sur les murs de Lusignen, par trois jours avant que la forteresse fut rendue; et aultres pluseurs en ont enes dont qui en voudront deviser la chose seroit trop longue. Et encore plus avant y a ung chevalier poitevin, nommé messire Percheval de Coulongne, qui fut chambellain du bon roy de Chippre, avec le roy, la serpente s'estoit apparue à icelluy roy, comme celluy roy luy avoit dit en ceste manière parlant à luy : Percheval, je me doubte trop. Pour quoy, monseigneur? dist le chevalier. Par ma foy, dist le roy, pour ce que j'ay veu la serpente de Lusignen qui c'est apparue à moy; si me doubte qui ne me adviengne aulcune perte dedens brief temps, ou à Perrin mon filz; car ainsi apparut-elle quant aucuns des hoirs de Lusignen doibvent morir. Et


jura messire Percheval que dedens le tiers jour aprez, la dure adventure que chascun scet bien advint.

Les princes et aultres pluseurs ont esté examinez, et ay sceu ce que les vrayes croniques et les livres des histoires en dient ; et se j'ay adjousté chose en ceste histoire qui samble à aulcuns increable, si le me vueillez pardonner ; car selon ce que je puis sentir, d'aulcuns acteurs tant de gramairre comme aultre philozophe, a reputé ceste histoire et les croniques estre vrayes, et les choses faées ; et qui dist le contraire, je dis que les secrez jugemens de Dieu et les pugnitions sont invisibles et impossibles à congnoistre à entendement humain ; car il est trop grossier pour entendre l'espèce espirituelle ; ne les yeulx naturelz ne peuvent veoir icelles choses spirituelles, ne ne peut bonnement comprendre que c'est ; et la puissance de Dieu y peut adjouster ce qu'il luy plaist ; comme on racompte en pluseurs histoires de pluseurs faées avoir esté mariées, et avoir eu pluseurs enfans ; comme ce peut faire ne peut sçavoir humaine créature ; car telz pointz et aultres pluseurs a Dieu retenuz en ses secretz, et en monstre les exemples ès lieux et ès personnes où il lui plaist. Et plus sera la personne grossière, et plus enuis le croira ; et plus sera deslié d'engin et de science naturelle, plus tot aura affection que ce soit chose creable, combien que les choses secrettes de Dieu ne peult aucun bonnement sçavoir.

Combien que saint Paul dist, ès espitres aux Romains, que toutes choses sont sceues par humaine creature, voire sans les secrettes choses que Dieu a reservées en sa congnoissance sans aultre, car la nature aux humains est à entendre pluseurs hommes

vaugans qui sont par universes contrées. Par ceulx sont sceues toutes les choses, par leur declaration de la parfaicte congnoissance ; non par ung tant seulement, mais par pluseurs ; et ainsi est de nostre histoire ; car elle est forte à croire et en pluseurs lieux sceue ; et pas par ung seul, et de ceulx qui l'ont deslié ; donc ainsi que une personne qui n'aura yssu de sa region ou pais ne pourroit ou ne voudroit croire maintes choses qui sont moins de cent lieues prez de luy, et sera grant estrangeté, et dira qu'il ne se peut faire, et celluy destournera ce qu'il n'aura pas veu ès lieux et diverses contrées, pais et nations, et lira les anciens livres, et les entendra, et congnoistra le vray des choses samblables. Or de ce ne vous vueil plus faire mention. Je vous supplie humblement à tous que se je ay dit chose en ceste histoire qui vous soit ennuyeuse ou desplaisante, que vous le me vueillés pardonner et tenir pour excusé ; car se on fait le miculx que on peult et scet, on doibt prendre en gré ; car en aulcuns cas, aulcune bonne volenté doibt estre reputée pour le fait. Et icy si se taist Jehan d'Arras de l'istoire de Lusignen. Et vueille Dieu donner aux trespassez sa gloire, et aux vivans force et victoire qu'ilz la puissent bien maintenir.

FIN.





## TABLE DES MATIÈRES.

	Pages
<b>P</b> réface.	5
Melusine.	9
Comment ce livre fut fait par le commandement de Jehan , filz du roy de France , duc de Berry et d'Auvergne.	11
Comment le conte de Poitiers manda le conte de Forestz de venir à la feste qu'il faisoit pour son filz.	26
Comment le conte de Poitiers demanda au conte de Forestz d'avoir Raimondin , lequel luy accorda.	27
Comment le conte alla chasser, et Raimondin avecques luy.	29
Comment Raimondin occist le conte de Poitiers , son oncle.	33
Comment Raimondin vint à la fontaine , où il trouva Melusine accompagnée de deux dames.	36

- Comment Raimondin, par le conseil de la dame,  
alla à Poitiers. 42
- Comment le conte fut apporté mort à Poitiers. 43
- Comment Raimondin retourna devers sa dame, et vit  
une chappelle que oncques mais n'avoit veue. 45
- Comment Raimondin, aprez que les barons eurent  
fait hommage au jeune conte, lui demanda ung  
don, lequel luy accorda. 48
- Comment Raimondin trouva ung homme qui portoit  
ung cuir de cerf, et l'achetta. 51
- Comment ceulx qui estoient commis vindrent deli-  
vrer le don à Raimondin. 52
- Comment Raimondin prinst congîé du conte et re-  
tourna vers sa dame. 55
- Comment le conte de Poitiers vint aux nopces de  
Raimondin accompagné de noble baronnie. 59
- Comment Raimondin et Melusine furent espousez. 61
- Comment à disner ilz furent moult honnourablement  
servis. 62
- Comment aprez disner les chevaliers et escuiers  
joustèrent. 63
- Comment l'evesque beneist le lict où Raimondin et  
Melusine estoient couchîés. 65
- Comment le conte de Poitiers et de Foretz et les  
barons et dames prindrent congîé de Raimondin  
et Melusine. 67
- Comment Urian et Guion prindrent congîé de leurs  
père et mère, et de l'ayde qu'ilz leur firent. 121



TABLE DES MATIÈRES. 429

Comment Urian et Guion prindrent congié de leur mère et entrèrent au navire.	128
Comment le Souldan fut tué devant Famagosse.	158
Comment Urian et Guion vindrent devers le roy, luy estant au liet, tout armez.	166
Comment Urian espousa Hermine, la fille du roi de Chippre.	172
Comment Guion espousa la pucelle Florie et fut roy d'Armanie.	201
Comment les messagiers apportèrent les lettres à Raimondin et à Melusine de ses deux enfans qui estoient roix.	202
Comment Antoine et Regnault desconfirent le roy d'Anssay devant Lucembourg, et comment le roy fut pris.	224
Comment le roy d'Anssay fut mené devers la pucelle Cristienne.	228
Comment le roy d'Anssay appella les barons de Lucembourg à conseil.	236
Comment Anthoine espousa Xpistienne, duchesse de Lucembourg.	238
Comment le roy de Behaigne envoya un messagier, par devers le roy d'Anssay, son frère.	240
Comment le duc Anthoine prinst congié de la duchesse Cristienne, et s'en alla vers Pragnes avec son ost.	243
Comment le roy de Craco fist prendre le corps du roy Phedrich, qui avoit été tué, et le fist ardeoir.	252

Comment le roy de Craco fut occis en la bataille.	258
Comment le roy Zelodus et les aultres Sarrazins furent ars et brulés.	259
Comment les deux frères furent à l'enseveliement et obsèque du roy Phedrich.	262
Comment Regnauld espousa Aiglentine, fille du roy de Behaigne.	268
Comment, aprez le disner, les chevaliers joustèrent.	268
Comment Raimondin, par l'admonestement de son frère, regarda Melusine sa femme estant au baing, et comment il en fut couroucé contre son frère.	332
Comment Geuffroy occist le gayanten Guerende.	339
Comment Froimond, frère de Geuffroy, fut rendu moyne à Maillières.	341
Comment le messagier de Raimondin vint devers Geuffroy en Guerende.	344
Comment Geuffroy au grant dent ardist l'abbaye de Maillières, l'abbé et les moynes.	346
Comment Melusine chait pasmée par terre, pour la reproche que Raimondin luy dist.	352
Comment Melusine se revint et parla à Raimondin.	353
Comment Raimondin et Melusine chaièrent pasmez.	354
Comment Melusine fist son testament.	355
Comment Melusine s'envolla de Raimondin, en forme	

d'ung serpent , du chasteau de Lusignen , par une fenestre. 357

Comment Raimondin fist bruler Horrible, son filz , ainsi comme Melusine en avoit chargé en son testament. 360

Comment Melusine venoit tous les soirs visiter ses deux enfans Raimonnet et Thierry. 361

Comment Geuffroy au grant dent vint contre le gayant Grimault, et comment de la lance il l'abbatist. 363

Comment le gayant s'enfouyt, et Geuffroy aprez, l'espée au poing. 365

Comment Geuffroy alla au pertuys où le gayant estoit entré , et se laissa couller dedans. 367

Comment Geuffroy trouva la sépulture du roy d'Albanie, son grand-père Elinas , dedens la montaigne. 367

Comment Geuffroy delivra les prisonniers que le gayant tenoit. 370

Comment les prisonniers que Geuffroy avoit delivrez mirent le gayant mort sur une charette et l'amenèrent avecques eulx. 370

Comment Geuffroy fist morir le conte de Forestz , son oncle. 372

Comment Geuffroy alla devers son père à Lusignen et luy cria mercy. 373

Comment Raimondin vint devers le pape à Romme, et se confessa à luy. 375

Comment Geuffroy alla à Romme, et se confessa au Père saint. 381

432      TABLE DES MATIÈRES.

Comment Geuffroy fist refaire l'abbaye de Mail- lières.	388
Comment l'abbaye de Maillières fut refaïcte.	403
Comment le roy d'Armenie vint veillier au chasteau l'Esprevier.	415
Comment le roy voulut prendre la dame, et comment elle s'esvanuyst.	418
Comment le roy fut batu , et ne sceut de qui.	419

FIN DE LA TABLE.





**Bibliothèque  
Université d'Ottawa  
Échéance**

**The Library  
University of Ottawa  
Date due**

FEB 16 1972

24 FEB. 1972

NOV 14 2000

NOV 28 2000

NOV 16 2000



a39003



003458212b

CE PQ 1103

.B5J4 1854

COO JEAN D'ARRAS MELUSINE.

ACC# 1344879





